





~~CYR. III. 75~~

~~2. 3. 11~~

~~11~~

XXXIV. 7. 53. 55.



7

RENATI / DESCARTES EPISTOLÆ,

*Partim ab Autore Latino sermone conscriptæ,
partim ex Gallico translatae.*

In quibus omnis generis quaestiones Philosophicæ tractantur, &
explicantur plurimæ difficultates quæ in reliquis
ejus operibus occurrunt.

P A R S P R I M A.



AMSTELODAMI,
Ex Typographia BLAVIANA, MDC LXXXII.

Sumptibus Societatis.



T Y P O G R A P H I P R Æ F A T I U N C U L A A D L E C T O R E M.



Habes hic, Amice Lector, Epistolarum nobilissimi Cartesii duos priores tomos Latinitate donatos, quos tertius prope diem sequetur. Neque labori neque sumptibus parcere volui in editione hac procuranda: illud unice in votis fuit ut mens Auctoris quam fidelissime & accuratissime exprimeretur. Tuum erit judicare an scopum meum attigerim. Ratio autem quæ me impulit ut versionem hanc Latinam tibi communicarem, est quod multorum annorum experientia me docuerit incomparabilis hujus Philosophi scripta, quotquot edita sunt, summopere ab omnibus veritatis amantibus expectari, & in maxima haberi æstimatione; comperi enim exemplaria per totum orbem litteratum avidissime distrahi. Quamvis vero Epistolæ hæc Gallicè editæ in plurimorum manibus jam versentur; quia tamen exemplaria pleraque distributa sunt, ac quamplurimi viri eruditi & Cartesianæ Philosophiæ cultores quotidie conqueruntur, sibi propter linguæ ejus ignorantiam nullum inde fructum posse colligi, non dubitavi, quin operæ pretium essem facturus, si in lingua omnibus eruditis familiari eas exhiberem. Noli autem expectare, ut quidquam hic addam in Epistolarum harum commendationem: vino enim vendibili non opus est suspensa hedera; atque omnibus viris eruditis, & à præjudiciis liberis jam satis se hætenus probarunt Cartesii scripta. Quod vero eos attinet qui vel à præjudiciis abrepti, vel ex nimia præcipitantia antejustam inquisitionem & meditationem adhibitam Cartesianam philosophandi methodum & dogmata hætenus probare non potuerunt, cave etiam refutanda susceperunt, eos spero aliorum exemplo invitatum iri ut præjudicia deponant, suumque judicium imposterum non ferant, nisi à primis principiis denuo omnia attentissime examinaverint; forte enim tum aliter sunt judicaturi, quemadmodum & multis, qui id consilium sunt secuti, accidisse audio. Vel si neque tum etiam approbare possint vel capere ea, quæ ad examen revocarunt, suum ipsis judicium liberum est relinquendum, & si omnis absit malitia à talibus nihil fere damni adferri potest Philosophiæ, quæ tot virorum eruditorum applausum jam meruit. Qui vero ex invidia, aliove pravo affectu, & maledicendi studio (quod vitium, proh dolor! hodie quam maxime familiare est) Cartesii Philosophicæ

sophemata traducunt, ac viro innocentissimo impudentissime quælibet horrenda affricare conantur crimina Atheismi, Scepticismi, Libertinismi, Socinianismi, & si quæ alia ejus generis ab hominibus malitiosis fingi possunt; illi contemnendi mihi videntur, talium enim hominum artes à Viris cordatis facile possunt detegi, ut & experientia docuit hæcenus factum esse non infelicitè. Tantum vèro abest ut talia facta aliquid detrimenti adferre potuerint Cartesii honori, ut nihil excogitari potuisset quo ipsius innocentia & eruditio clarius enitesceret: quo enim objecta viro erudito crimina sunt atrociora, eo minorem apud bonos inveniunt fidem, eoque majori animi studio incitantur omnes ad sedulo omnia examinandum, ac penitissime scrutandum, quem laborem alias multi non suscepissent; atque hac ratione fit ut præter innocentiam etiam rerum veritas plurimis innotescat, quæ alias forte per multos annos in obscuro latuisset, vel ad paucos modo pervenisset.

Curavi quoque ut in hac editione singulis Epistolis adderentur argumenta exhibentia succincte rerum iis contentarum summa capita, quæ indicis vicem præstare possunt. Nullus dubito, quin opera quam impendi curavi in versione harum epistolarum Latina tibi etiam sit gratissima futura. Vale.

INDEX EPISTOLARUM

primæ partis.

- EPIST. I. **D**E summo bono quod in hac vita possideri potest. pag. 1
- II. Mittit per D. Chanutum ad Reginam Sueciae litterarum quarundam moralium collectionem, &c. 4
- III. Premittit animadversiones suas ex libro Senecæ de beata vita desumptas. 5
- IV. Animadversiones in librum Senecæ de vita beata. 6
- V. Continuantur animadversiones in librum Senecæ de vita beata. 9
- VI. Medum ad obtinendam vitam beatam. Variæ voluptates animæ, & corporis. 12
- VII. Quenam sint necessaria ad hoc, ut quis sit ad recte judicandum bene dispositus. 15
- VIII. An sapius sit saltem letitiam, an veram cognitionem habere. Operatio afflictuum. Omnia dependere à Deo. De providentia & immutabilitate Dei. Quousque pro aliis solliciti esse debeamus. 18
- IX. Quomodo excessus passionum siue affectuum hic accipi debeat. Quomodo liberum arbitrium & infinita Dei potentia conveniant. Quomodo vasta universi extensio considerari debeat. 24
- X. Officii perfectio occasione mutatae religionis. Quomodo hominis arbitrium liberum sit, & dependens esse possit. Quomodo intelligi debeat, plura in hac vita esse bona quam mala. Prudentiam suadere ut aliis proficiamus, quantumvis privatae tantum utilitati studeamus. 26
- XI. Variæ animadversiones in Tractatum de Passionibus. 30
- XII. De languore in agendo, impediente non nunquam quominus ea exequamur, quæ iudicium nostrum probavit. 33
- XIII. Animadversiones in librum de Principe à Machiavello conscriptum. 34
- XIV. Officii ergo, ad Ludovicam Principem Palatinam. 37
- XV. De re quæ ad animi letitiam conferret, illamque vi aliqua concilianti sibi fortunam polleere; cuius rei exemplum Socrates. Machiavelli librum de Principe minus idoneum esse alacritati quam tristitia excitande. Præcipuum præceptum disursum ejus in Titum Livium. Judicium Cartesii de ambobus sentibus. 38
- XVI. Officii ergo, ad Ludovicam Principem Palatinam. 40
- XVII. Continens nomina ad Medicinam & Chymiam spectantia, &c. ibid.
- XVIII. Officii ergo, ad Ludovicam Principem Palatinam. 42
- XIX. Conqueritur de calumniâ Leydensis ejusdem Professoris. ibid.
- XX. Officii ergo, occasione discessus ejus in Giliam, ad conciliandam amicitiam inter Principem Palatinam & Reginam Sueciæ. 44
- XXI. Monitum circa morbum querendum. 45
- XXII. Judicium Cartesii de Regii libro, cui titulus est, Fundamenta Physices. 46
- XXIII. Præcepta nomina ad valetudinis conservationem spectantia. 48
- XXIV. Quomodo sedandi spiritus animi tumultus, qui ex rebus adversis insinuat oritur. 50
- XXV. Rationes propter quas à Tractatu de Eruditione conscribendo abstinuit. 52
- XXVI. Illos, qui in maximo splendore vitam agunt, commiseratione potius quam invidia dignos esse. 53
- XXVII. De Caroli L. Regis Angliæ cade, & de restitutione Principis Palatini in partem Palatinatus. 54
- XXVIII. Officii perfectio occasione sumpta ex morbo Elisabethæ Principis Palatinæ. In quo consistit differentia fortis animi ab humili & gregario. Præcepta contra res adversas. 57
- XXIX. De conjunctione animæ & corporis, & de potentia agendi in se invicem. 59
- XXX. Continuatio præcedentis Epistolæ, de conjunctione corporis & animæ. 61
- XXXI. Officii ergo occasione illorum quæ ad Reginam Sueciæ, de summo in hac vita bono, scripserat. 64
- XXXII. Officii ergo ad D. Clamaron. Causa 64

- sa propter quam tractatum de Meteoris edi-
dit. 66
- XXXIII. Certissima via, qua vite insti-
tuende ratio innotescit. Physices notionem
conducere ad id ad mortem non timeamus. 67
- XXXIV. Officii ergo, ad D. Chanutium.
Encomium Regine Suecie. Cur de Ethica
non scripserit. Calumnia ipsi afflicta. Ipsi
symbolum. Quousque ab ira nobis cavere
debeamus. 68
- XXXV. Responsio ad tres Questiones:
1. Quid sit amor. 2. An solo lumine naturali
Deum amare doceamur. 3. Inter inordinatos
affectus, & pravorum eorum usus, an deterior
sit amor, an odium. 70
- XXXVI. De extensione mundi, ejusque crea-
tione ac duratione. Quomodo intelligi debeat,
Deum cuncta propter hominem creasse. Causa
se quibus ad hominem tantum magis quam
aliud amandum ferimus. 80
- XXXVII. Officii ergo, ad D. Chanutium,
occasione scriptorum que ad illum pro Regina
Suecie miserat. 84
- XXXVIII. Encomium Regine Suecie. Tria
præcepta in gratiam illorum, qui se ad Prin-
cipia ejus legenda accingunt. 86
- XXXIX. Officii ergo, occasione sumpta ex
responsio quod a Regina acceptat. 88
- XL. Officii & negotiorum ergo. ibid.
- XLI. Officii ergo, ad Elisabetham Principem
Palatinam. 89
- XLII. Accur in Sueciam. 90
- XLIII. Egre adducitur ad suscipiendum iter
in Sueciam. 91
- XLIV. Officii ergo, ad Elisabetham Prin-
cipem Palatinam. 93
- XLV. Officii & negotiorum ergo, ad D. Cha-
nutium. ibid.
- XLVI. De itinere suo in Sueciam suscipiendo.
94
- XLVII. Pollicetur se iterum in Sueciam. 95
- XLVIII. Officii ergo, ad Elisabetham Prin-
cipem Palatinam, occasione itineris sui in
Sueciam. 96
- XLIX. Consilium sumit de itinere, quod in
Sueciam meditabatur. ibid.
- L. Officii ergo, ad Elisabetham Principem Pa-
latinam, postquam Stockholmum appulisset. 98
- LI. Cur argentum vivum aqua sit gravius.
Cur particula striata in centro terre non
destruantur. Cur magnetis virtus in terra
minor videatur, quam in exiguis magneticis
lapidibus. 99
- LII. Responsio ad quatuor questiones, 1. De
causa caloris in animalibus. 2. De causa
febris, ejusque horrore. 3. De spiritibus ani-
malibus, & vitalibus. 4. De causa somni. 100
- LIII. Officii ergo. Quomodo esuries & sitis
sentiantur. De causa motuum generali. De
vacuo. Unumquemque posse sibi ipsi opti-
mum esse medicum. 102
- LIV. Ejus judicium de Chymicis. De genera-
tione lapidum. De lateribus. De argenti
vires. Ejus iudicium de D. Digbi. Utrum
bruta cogitent. 105
- LV. Objección contra ejus opinionem de pro-
ductione colorum ex radiis solariis motu. 109
- LVI. Responsio Renati Descartes ad præceden-
tem Epistolam. 114
- LVII. Gratiis agit de libro, quem ipsi D. Mo-
rinus dono dederat. 122
- LVIII. Objecciónes contra opinionem Cartesii
de lumine. 123
- LIX. Responsio Cartesii ad præcedentes Mo-
rini objectiones. 135
- LX. Mutis responsiones suas ad D. Morinam. 142
- LXI. Replicatio Morini ad Cartesii Respon-
siones. ibid.
- LXII. Responsio Cartesii ad Morini replica-
tionem. 152
- LXIII. Replicatio Morini ad secundas Car-
tesii Responsiones. 165
- LXIV. D. Clerfeliier Peniam petit ab H. Mo-
ro publicandi Literas ejus ad Cartesium. 171
- LXV. Responsio Henrici Mori ad præcedentem
Epistolam. 173
- LXVI. Officii ergo, ad R. Descartes. Ob-
jecciónes de materia & corpore. Differentia
inter naturam divinam & corpoream. De
vacuo. De indivisibilitate atomorum. De
indefinita vel infinita mundi extensione. De
sensu brutorum. 176
- LXVII. Responsio Cartesii ad Superiores. 183
- LXVIII. In-

- LXVIII. Instantia contra Responsiones Cartesii. *Varie questiones de mundi extensione, de natura motus, de gyratione terra & lune, de particulis striatis, de anime unione cum corpore, ipsiusque imperio, de conversione globulorum atque rerum in elementum primum, de flexibilitate particularum aquearum, & de materie denique αὐτὴν ὁμοία.* 190
- LXIX. Responsum ad superiores Instantias. 204
- LXX. Instantia ad quasdam ex precedentibus difficultatibus. *Varie questiones & objectiones de quatuor partibus Principiorum Philosophia.* 209
- LXXI. *Varie questiones & objectiones de Dioptrice & Meteoris.* 225
- LXXII. Fragmentum responsi ad superiores, inter Cartesii Manuscripta post mortem ejus inventum. 236
- LXXIII. De questione quadam, nempe utrum corpus aliquod magis aut minus gravet prope centronem terra, quam longe ab illo. 238
- LXXIV. Ad demonstrationem principii supra positi. 254
- LXXV. J. Beverovicus rogat Cartesium de quibusdam ad circulationem sanguinis pertinentibus. 261
- LXXVI. Responsio ad precedentem epistolam, de circulatione sanguinis. 262
- LXXVII. Objectiones Medici cujusdam Lovaniensis de motu cordis & circulatione sanguinis. 264
- LXXVIII. Responsio ad precedentem epistolam, de motu cordis & circulatione sanguinis. 266
- LXXIX. Instantia ejusdem Medici Lovaniensis, ad quasdam ex precedentibus responsionibus. 273
- LXXX. Responsio Cartesii ad precedentes instantias, maximam partem ad pulsationem arteriarum & cordis pertinentes. 275
- LXXXI. De formatione ideae Dei, & de veritate axiomatum. De precipua iudicii. Emendatio variorum locorum in thesibus H. Regii ad Physicam pertinentibus. 279
- LXXXII. Mutationes quasdam in Thehsibus H. Regii, de internis partibus corporis. 283

- LXXXIII. Hortatur H. Regium, ut ad questiones Silvii amplius non respondeat. 284
- LXXXIV. *Varie antitheses & mutationes variarum rerum in Thehsibus H. Regii, si nomen recte divinumur.* 285
- LXXXV. Contra H. Regii Thesin de triplici anima. 288
- LXXXVI. De actione & passione, quomodo hic intelligi debeat. *Nota in quasdam schedas ipsi ab H. Regio missas.* 289
- LXXXVII. *Nota in quoddam scriptum H. Regii.* 290
- LXXXVIII. Solutio duarum difficultatum de febris. De causa gangrena, de palpitacione cordis, & de corde. ibid.
- LXXXIX. Instructio ad H. Regium, de negotio Voetii contra ipsam, & quomodo scriptum contra ipsius theses respondere debeat. 292
- XC. De Thesi H. Regii, in qua dicit hominem esse ens per accidens. 303
- XCI. Occasione interdixit H. Regii doctrina. 305
- XCI. Instructio ad H. Regium. ibid.
- XCII. Instructio ad H. Regium occasione controversia inter Voetium & ipsum. 306
- XCIV. Instructio ad H. Regium, quomodo se gerere debeat circa decretum Magistratus Ultrajectensis. 310
- XCIV. *Quaedam mutationes in thesibus H. Regii. Observatio de Idea Dei. Differentia inter substantiam cogitantem & substantiam extensam.* 311
- XCVI. Ad H. Regium, occasione libri cujusdam ad Cartesium missi. 313
- XCVII. Ad H. Regium, occasione editionis cujusdam libri. ibid.
- XCVIII. Ad H. Regium. Defendit se contra quorundam accusationes. Suadet ipsi ne librum suum in lucem edat. 315
- XCIX. Consultis quendam de editione notarum suarum in Programma quoddam de mente humana. 316
- C. Censura quarundam epistolarum Domini Balzaci. 332
- CI. Officiu ergo, ad D. Balzacium. 335
- CII. Invitas D. Balzacium ut Amstelodamum veniat. Amstelodami laudet. 337
- CIII. Ra-

INDEX EPISTOLARUM.

CIII. Rationes cur in Meditationibus suis Dei & anime humane-existentiam non clarius necessarius probaveris.	338	speciminum suorum. Rationes propter quas in Dissertatione susius locutus non sit de sub- stantia anime, & existentia Dei. De edi- tione scriptorum suorum.	358
CIV. Opera sua offert legato Gallico, argue etiam Regi, & Cardinali de Richelieu.	339	CXIII. Conqueritur de calumniis nonnullorum Iesuitarum, &c.	363
CV. De ideis adequatis & inadequatis. Utrum anima semper cogitet. De sensu bru- tarum.	340	CXIV. Responsio ad animadversiones quas- dam in Methodum, Dioptricam, &c.	364
CVI. Solatur D. à Zuylichem de morte ux- oris.	344	CXV. De hac notione, Id quod potest plus, potest etiam minus. De demonstrationibus sumptis ex effectibus. De anima, illiusque ideis. Causa difficultatis addiscendarum scientiarum. De errore in moribus. De sus- pensione iudicii. Ignorantia causa peccati. De indifferentia Dei, illiusque potentia in re- bus pugnantibus. Discrimen inter exclusio- nem & abstractionem.	368
CVII. Solatur quendam de morte Fratris.	345	CXVI. De distinctione inter essentiam & existentiam.	373
CVIII. Ad veniam impetrandam rustico, qui vituleum suum interjecerat.	346	CXVII. Leges motus explicantur. De idea quàm Pagani de plurimis Diis, & de Deo habuerunt.	376
CIX. Responsio ad iudicium quoddam Philoso- phia ejus alius quispian tulerat.	348	CXVIII. Primum principium quoddam sit? Solatur Achilleus Lemius.	378
CX. De æternis veritatibus. De perfectione brutorum. De cogitatione & libero arbitrio hominis. Rationes pro & contra editionem Physicæ suæ.	350	CXIX. De variis licentiarum Mutuantium.	381
CXI. De inventionis lingue universalis. De Musica, & de celeritate motus.	353		
CXII. De quodam libro. De æternis verita- tibus, illarumque dependentia. De libero ar- bitrio ejusque operationibus. Responsio ad objectionem contra titulum Dissertationis &			

EPISTOLARVM
REINATI
DESCARTES
PARS PRIMÆ

EPISTOLA I.

Ad Reginam Sueciæ.

De summo bono quod in hac vita possideri potest.

INtellexi ex Domino Chanuto, visum esse Majestati
tux hoc me honore afficere, ut meam tibi de summo
bono, secundum veterum Philosophorum mentem
sumpto, sententiam exponam: hocque mandatum tan-
tæ gratiæ duco, ut parendi animus me ab omni alia co-
gitatione abducat, omisâque imbecillitatis meæ excu-
latione, quicquid in hoc argumento noverim hic pau-
cis subjiciam. Considerari potest cujuslibet rei bonitas, vel in se, absque
respectu ad aliud, quo sensu liquet Deum esse summum bonum, quia
infinite perfectior est creaturis: sed potest etiam bonum ad nos referri,
& hoc sensu non video quid à nobis bonum haberi debeat, nisi quod ad
nos aliquo modo attinet, quodque tale est ut ejus possessio nos aliquatenus
perficiat. Sic veteres Philosophi, qui lumine fidei destituti de beati-
tudine supernaturali nihil noverant, ea tantum bona considerabant, qui-
bus in hac vita frui possumus, atque inter illa summum, hoc est, præ-
cipuum & maximum quærebant. Quod ut definire queam, adverto ea
tantum respectu nostri habenda esse pro bonis, quæ vel possidemus, vel
quibus acquirendis pares sumus. Hoc autem posito mihi videtur sum-
mum omnium simul hominum bonum esse omnium tum animæ, tum
corporis, tum fortunæ bonorum, quæ in quibuslibet hominibus esse
possunt, congeries: Privati verò cujusque aliud prorsus, nempe, constans
rectè agendi voluntas, & ex ea nascens animi tranquillitas. Cujus ratio
est,

est, quodd nullum aliud tanti pretii bonum noverim, quodque sit omnino in uniuscujusque potestate. Nam quod ad corporis & fortunæ bona, ea à nobis absolute non pendent; animæ verò bona ad duo capita referuntur, quorum unum est nosse, alterum velle id quod est bonum. Verum cognitio sæpe vires nostras excedit; quare superest tantum voluntas, quæ sit absolute in nostra potestate. Non video autem fieri posse ut eâ quicquam melius utatur, quam si semper habeat firmum & constans propositum ea omnia exactè faciendi quæ judicabit esse optima, omnesque ingenii viros intendendi ad ea rectè cognoscenda: nempe in hoc uno posita sunt virtutes omnes; hoc unum propriè loquendo laudem & gloriam meretur; denique ex hoc uno summa & solidissima vitæ nostræ voluptas exurgit: adeoque in hoc puto positum esse summum bonum. Atque ita conciliare me opinor maximè contrarias & celeberrimas duas veterum opiniones; Zenonis nempe, qui in virtute seu honesto illud posuit; & Epicuri, qui in delectatione, quam nomine voluptatis insignivit. Quemadmodum enim vitia omnia non oriuntur nisi ex dubitatione & imbecillitate, ignorantiam consequente, & poenitentiam pariente: Sic virtus non consistit nisi in mentis instituto & vigore, quo ad ea, quæ bona esse credimus facienda ferimur; modo tamen ut hic vigor à pertinaciâ non oriatur, sed ex eo quodd sciamus res à nobis, quantum fieri moraliter potest, examinatas fuisse. Quanquam autem malum sit fortasse id quod tum agimus, nihilominus certi sumus nos officium nostrum implevisse; cum è contrario, si quis aliquam virtutis actionem exerat, atque interea existimet se minus rectè agere, aut saltem inquirere negligat in actionis suæ naturam, is secundum virtutem non agit. Quantum verò ad honorem & laudem, hæc cæteris fortunæ bonis sæpissimè tribuuntur; sed quia persuasum habeo Majestatem tuam pluris facere virtutem, quàm coronam, non verebor hîc dicere haud videri mihi quicquam præter virtutem esse jure laudabile. Cætera bona digna sunt tantum quæ æstimentur, non verò quæ colantur aut laudentur, nisi quatenus recto liberi arbitrii usu parta vel impetrata supponuntur. Honos enim & laus est præmiigenus; at certè præter ea quæ à voluntate pendent, nihil est quod vel præmio vel poenâ dignum sit. Superest adhuc mihi hîc probandum, ex recto illo liberi arbitrii usu fluere summam & solidissimam vitæ nostræ voluptatem; quod quidem mihi facile videtur. Nam considerando attentè qua in re consistat voluptas, & universim omnia, quorum capaces sumus, oblectamentorum genera; observo primò, eorum nullum non esse penitus in anima, quamvis plurima à corpore pendeant, quemadmodum

dum etiam anima videt, licet oculorum ope videat. Deinde adverto, nihil esse quod possit animam voluptate perfundere, præter opinionem possidendi aliquod bonum; hanc autem opinionem sæpe non esse in ipsa nisi confusam admodum representationem, imo & ejusdem cum corpore conjunctionem causam esse cur sibi plerumque fingat bona quædam longè majora quàm revera sunt; sed si justum illorum valorem distinctè perceptum haberet, voluptatem ejus semper responsuram boni ex quo oriretur magnitudini. Animadverto insuper, boni cujuspiam magnitudinem respectu nostri, non esse solum ex rei in qua consistit valore æstimandam, sed præcipuè etiam ex modo quo ad nos refertur; & præterquam quod nihil nobilius inesse nobis potest, quàm liberum nostrum arbitrium, quod nos Deo aliquo modo pares efficit, ejusque imperio eximere videtur, (& proinde rectus illius usus est bonorum nostrorum summum) adverto illum etiam (usum nempe liberi arbitrii) magis propriè nostrum esse, nostraque magis referre; unde sequitur non posse summas nostras voluptates nisi ab illo procedere. Et certè experientiâ patet, quietem animi & interiorem tranquillitatem, quam in se perferunt, qui sentiant se nunquam non, quantum in se est, eniti, tum ut bonum cognoscant, tum ut cognitum assequantur, voluptatem esse suaviorem longè, perenniorem & solidiorem iis omnibus quæ aliunde proficiunt. Plurima hæc alia missa facio, quia cum mihi veniat ob oculos numerus negotiorum, quæ in magni regni administratione occurrunt, & quorum Majestas tua ipsa curas suscipit, non ausim illam diutius detinere; sed ad Dominum Chanutum scripta quædam transmittito, in quibus meam de eadem re sententiam fusius explicui, ut Majestati tuæ, siquidem illa videre cupiat, per illum offerantur, ut quæ hæc operâ aliquo saltem modo testatam faciam, quanto studio sim

MAJESTATIS TUE

Datum Egmondæ
20 Nov. 1647.

Humillimus & obsequentissimus servus

DESCARTES.

EPISTOLA II.

Ad Dominum Chanutum.

*Mittit per illum ad Reginam Sueciae literarum quarundam
moralium collectionem, &c.*

Mihi quidem mos est ut renuam meas de Ethica cogitationes scribere, idque duabus de causis; una, quod nullum sit argumentum quod malignorum calumniis amplio rem materiam præbeat; altera, quod existimem non esse nisi Principum, aut eorum qui Principum autoritate muniti sunt, alienis moribus leges ponere. Verum in ea, quam mihi aperuisti occasione, cessant hæc duæ rationes; dum ad me scribis summæ apud quam agis Reginæ nomine, visum esse ipsi ut meam de summo bono sententiam ei rescribam: hoc enim mandatum mihi satis autoritatis conciliat, & præterea spero responsum meum à nemine præter te & illam visum iri. Quare morem ipsi gerere tam vehementer cupio, ut procul ab omni studio reservandi mihi quicquam, optârim potuisse me in unâ literas conjicere quicquid hæc de re unquam cogitavi. Revera tam multa congerere studui in iis quas ausus sum ad illam dare, ut verear ne nihil satis explicuerim. Sed ut hunc defectum suppleam, mitto tibi aliarum quarundam epistolarum collectionem, in quibus eadem fusius pertractavi: adjunxique illis exiguum de Passionibus tractatum, quæ pars est horumce scriptorum non minima; illarum enim cognitioni præcipuè studere debemus ad summum quod descripsi bonum assequendum. Perfectior autem fuisset hæc collectio, si ausus fuisset responsum quibus me cohonestavit Princeps, ad quam hæc literæ datæ fuerant, illi adjungere; sed debuisssem illius ad hoc veniam impetrare; ipsa autem nunc temporis hinc longè abest. Cæterum te non rogo ut has statim literas Reginæ offeras: timerem enim ne cultui & venerationi deessem, quam Majestati ejus debeo, si literas ad illam mitterem quas ad aliam dedi, cum debuisssem potius ea ipsi scribere quæ grata fore existimarem; sed si non abs re putes sermonem de his apud illam movere, & dicas fuisse à me ad te missas, tumque illas videre cupiat, me ab hoc scrupulo liberum putabo. Existimavi autem fore ipsi jucundius ea videre quæ ad aliam scripsi, quàm si ad ipsam scripta fuissent; quia eo certius ipsi constare poterit, nihil in ejus gratiam immutatum fuisse aut corruptum.

Sed,

Sed, quæso, ne hæc scripta, si fieri potest, in alias cujusquam manus veniant, sitque apud te certum me esse

Egmondæ
20 Nov. 1647.

Humillimum tuum & devotissimum

DESCARTES.

EPISTOLA III.

Ad Elizabetham Principem Palatinam, &c.

Promittit animadversiones suas ex libro Seneca de beata vita desumptas.

Cælum adeo inæquale fuit ex quo Celsitudo tua absuit, ut sæpe me habuerit sollicitudo & metus ne Spadax aquæ minus salubres minusque quam sereniori tempore utiles forent; & quia mihi significasti meas tibi literas oblectamenti loco esse posse, dum vetant Medici ne animum gravioribus curis fatiges, pessime uterer eâ quam mihi fecisti potestate scribendi ad te, si vel primis occasionibus deessem. Apud me reputo perturbari te maximâ literarum parte quas aliunde accipis, atque antequam illas legas, timere ne quid in illis minus lætum reperias, quoniam jam pridem te talibus accipiendis fortunæ malignitas affuefecit. Quod verò illas spectat quæ tibi à me redduntur, apud te certum est quod si lætitiæ nihil, saltem neque mœroris quidquam allaturæ sint, & quod licebit illas quibuslibet momentis aperire, cum nihil sit cur ab his aquarum, quas potas, indigestionem metuas. Etenim cum eorum quæ in reliquo orbe geruntur nihil in hac eremo audiam, neque crebriores cogitationes volvam, quàm eas quæ Celsitudinis tuæ virtutes mihi ob oculos ponendo, faciunt ut felicitatem, quam merita es, tibi exoptem, aliud non occurrit scribendi argumentum, quàm ut verba faciam de mediis quibus nos instruit Philosophia ad summam illam felicitatem assequendam, quam vulgares animæ à fortuna frustra sperant, quamque nobismet tantum ipsis debere possumus. Inter hæc media unum ex utilioribus mihi videtur esse ut veterum de his scripta examinemus, conemurque eorum præceptis nonnihil addendo, ultra illos progredi; sic enim præcepta hæc perfectè nostra reddi possunt, eademque opera possumus ad eorum praxim disponi. Quare ut defectum suppleam ingenii mei, quod nihil Celsitudine tuâ dignum parere potest; & ne literæ meæ inanes sint prorsus & inutiles, mihi proposui in illis deinceps scribere animadversio-

nes meas ex libri cujuscumque lectione desumptas, ejus videlicet quem de *vita beata* Seneca conscripsit, nisi vel mallet alium eligere, vel hoc tibi displiceret institutum. Sed si tibi probari videam, ut spero, & præsertim etiam si tuis in eundem authorem animadversionibus dignari me velis, præterquam quòd ad me erudiendum plurimum conferent, occasionem mihi præbunt meas magis accurandi; illas enim cò majori diligentia excolam, quòd tibi jucundius esse hoc argumentum perspexero. Nihil enim tam vehementer cupio, quàm ut quibuscunque potero modis testificer me esse

CELSITUDINIS TUÆ

Humillimum & obsequiosissimum servum

DESCARTES

EPISTOLA IV.

Ad Elizabetham Principem Palatinam, &c.

Animadversiones in librum Seneca de Vita beata.

CUM elegi Senecæ librum de Vita beata Celsitudini tuæ proponendum, tanquam argumentum quod tibi gratum esse posset, rationem solum habui famæ authoris & materiæ dignitatis, non verò modi quorem tractat; quem cum ab eo tempore considerassem, accuratum minus reperio quàm ut illum sequamur. Sed ut possit Celsitudo tua de hac re facilius judicare, conabor hic explicare, quâ ratione hoc argumentum mihi videatur tractandum fuisse ab ejusmodi Philosopho, qui lumine fidei destitutus, rationem naturalem solam ducem habebat. Optimè quidem ille in principio, *Vivere omnes beatè volunt, sed ad pervidendum quid sit quod beatam vitam efficiat, caligant.* Verùm operæ est scire quid sit *vivere beatè*, dicerem Gallicè *vivre heurensement*, id est, *vivere feliciter*, nisi quod inter felicitatem & beatitudinem differentia quædam intercedat, eo quòd nimirum felicitas pendeat tantum à rebus quæ sunt extra nos, unde fit ut ii feliciores quàm sapientiores habeantur, quibus bonum aliquod nullâ suâ industriâ partum contigit: cum contrà mihi videatur beatitudo consistere in perfectâ animi tranquillitate, & interiori voluptate, quâ ii plerumque carent, quibus, favet quam maximè fortuna, & quam absque illa sapientes assequuntur. Itaque *vivere beatè* nil aliud est quàm animo perfectè contento

&c

& tranquillo frui. Deinde cùm reputo quid sit illud quod beatam vitam efficit, hoc est, quænam sint ea quæ summam hanc animi tranquillitatem efficere possunt, adverto illa esse duorum generum. Primi generis ea sunt quæ à nobis pendent, ut virtus & sapientia; secundi sunt ea quæ non pendent à nobis, ut honores, divitiæ, sanitas. Certum est enim hominem bene natum, non valetudinarium, rei nullius inopem, sapientiæque & virtute non minore præditum, posse perfectiore satisfactione frui, quàm alium quem egenum, valetudinarium, & deformem. Quemadmodum tamen fieri potest ut vas aliquod minus majore plenius sit, quamvis liquoris minus contineat; sic uniuscujusque beatitudinem sumendo pro omnimoda & perfecta votorum suorum ex ratione ordinatorum fruitione, nullus dubito quin pauperrimus quisque, & ii quibus aut fortuna aut natura infensissimæ sunt, penitus contenti esse possint, non minùs quàm alii, licet paucioribus bonis fruantur. Hoc autem solum beatitudinis genus in quæstionem cadit; cum enim alterum nequaquam sit in nostra potestate, supervacaneum esset in illud inquirere. Mihi autem videtur unusquisque posse animum suum ita comparare ut seipso sit contentus, absque ulla peregrini cujusquam boni expectatione, modò tria tantum attendat, ad quæ morales tres regulæ in tractatu de methodo à me traditæ referuntur.

Prima est, ut conetur ingenio suo quàm poterit optimè uti ad ea, quæ in omnibus vitæ casibus vel facere debet vel fugere, cognoscenda.

Secunda est, ut sit semper in firmo & constanti proposito ea omnia faciendi quæ sua ratio ipsi suadebit, nec passionibus suis aut appetitibus ab hoc abduci se permittat; atque hujus propositi firmitudinem pro virtute habendam esse existimo; quanquam haud scio virtutem fuisse ab ullo unquam ita explicatam; in plures quippe species divisa fuit, quibus varia nomina, propter varia objecta, ad quæ extenditur, imposita sunt.

Tertia est, ut attendat quod, quandiu ex ratione quantum fieri potest se gerit, bona illa, quibus tunc caret, omnia sint absolutè extra suam potestatem, atque hæc ratione iis non cupiendis assuescat; nihil enim est præter desiderium & pœnitentiam, quod tranquillitatem nostram turbare possit. Sed si illud semper fecerimus, quod nostra nobis ratio dicat, nunquam erit cur nos pœniteat, eventu licet consilia nostra fallente; non enim culpâ nostrâ id factum est. Atque hac una de causa non optamus e. g. plura brachia aut plures linguas quàm habemus à natura; optamus verò

8

verò firmiorem valetudinem, aut ampliores divitias; quòd nobis in animum inducamus posse hæc prudentiâ nostrâ acquiri, aut deberi naturæ nostræ, non item illa. Quan tamen opinionem exuere possumus, considerando nihilâ nobis prætermisum fuisse, quod in nostra potestate esset, cum rationis nostræ consilium semper secuti fuerimus, morbosque & infortuniam non esse homini minus à natura, quam res prosperas & sanitatem. Cæterum non omnia desideriorum genera sunt cum beatitudine

congrua; sed ea tantum, quæ impatientia & mœror comitatur. Neque etiam necesse est ut ratio nostra non decipiatur; satis est nos esse conscios nobis nunquam aut constantiam aut virtutem defuisse ad ea omnia faciendâ quæ optima judicavimus; atque ita sit, ut virtus sola nobis in hac vita ad beatitudinem sufficiat.

Sed nihilominus quia virtus nostra, si quando ab intellectu minus illuminata, potest falsa esse, hoc est, quia institutum & voluntas rectè agendi potest nos ad res malas (quando illas credimus bonas) impellere, voluptas ex illa tum proficiscens non est solida. Præterea enim quia hæc virtus opponitur vulgò voluptatibus, appetitibus & passionibus, ejus praxis est difficillima. Verùm rectus rationis usus, cum veram boni cognitionem afferat, facit ne virtus nostra falsa sit; imo & illam cum licitis voluptatibus concilians, reddit usum ejus faciliorem, & nostræ nobis naturæ cognitionem afferens, appetitus nostros ita coërcet, ut fatendum sit summam hominis beatitudinem ex recto hoc rationis usu pendere; & proinde studium quod ad illum acquirendum conducit, utilissimam esse omnium occupationem, uti & proculdubio jucundissima est omnium & suavissima. Postea debuisse, ut mihi quidem videtur, Seneca nos docere præcipuas omnes veritates, quarum cognitio ad virtutis usum faciliorem reddendum, nostrosque appetitus & affectus moderandos, atque ita beatitudinem naturalem adipiscendam, requiritur; quod quidem librum ejus ita commendasset, ut non potuisset aut melior aut utilior ab Ethnico scribi. Nihilominus hæc est mea tantum sententia, quam judicio Celstutudinis tuæ subjicio, & si me errorum meorum dignaberis admonere, ero tibi hoc nomine devinctissimus, meque corrigendo testabor me esse, &c.

EPISTOLA V.

Ad Elizabetham Principem Palatinam, &c.

Continuantur animadversiones in librum Seneca de Vita beata.

QUanquam nesciam an novissimæ meæ Celsitudini tuæ redditæ fuerint, neque quicquam dicere valeam in argumentum de quo ad te scribere destinaveram, quod putandum non sit esse tibi melius quam mihi notum, nihilominus pergo, hæc opinione fretus, meas tibi literas molestiores non fore quam bibliothecæ tuæ libros. Cùm enim nihil contineant, quod cito rescire tuâ intersit, nil erit quod te ad illas horas ad negotia destinatis perlegendas invitet; tempusque quod illis scribendis impendo, optimè collocatum existimavero, si illud tantum eis concesseris, quod tibi est animus perdere. Dixi supra quid mihi videretur à Seneca fuisse in ejus libro tractandum; jam quid tractet examinabo. Tria tantum summatim in eo observo: Primum, quòd conetur explicare quid sit summum bonum, ejusque varias definitiones afferat: Secundum, quòd Epicuri opinionem impugnet: Tertium denique, quòd iis respondeat qui Philosophis objiciunt, illos secundum regulas à se traditas non vivere. Verum ut melius liqueat quomodo hæc tractet, horum capitum singulis paululum insistam. In primo eos carpit qui consuetudinem & exemplum potius, quam rationem, sequuntur; *nunquam de vita judicatur*, inquit, *semper creditur*; probat quidem ut ab iis capiatur consilium qui sapientiores æstimantur, sed ita tamen ut proprium cujusque judicium ad eorum opiniones perpendendas adhibendum sit; qua in re illi valde assentior. Quanquam enim plurimi rectam viam suo Marte nequeant invenire, pauci sunt tamen qui ab alio clarè ostensam agnoscere nequeant; & utcumque sic debet conscientia nostræ esse satis, & certum apud nos, nostras de Ethica opiniones optimas esse, quas nos possumus assequi, quandoquidem cæco exempli ductu omisso, sapientiorum consilia sedulo exploravimus, omnesque ingenii nostri vires in examinando quid esset nobis amplectendum, adhibuimus. Sed dum hic studet Seneca ornandæ elocutioni, non est in mente sua exprimenda semper satis accuratus; ut cum dicit, *sanabimur si modo separemur à cætu*, videtur docere satis esse ut quis sit à receptis moribus alienus, ad hoc ut sit sapiens, quod tamen ab ejus mente abhorret. In secundo capite ea tantum aliis verbis repetit quæ in primo dixerat, hoc unum addit, illud non esse

B

bonum

bonum quod vulgo bonum habetur. Deinde in tertio, post multa super-
vacanea verba, tandem suam de summo bono sententiam profert, nem-
pe quod *Rerum nature assentitur*, & quod, *Ad illius legem exemplumque for-*
mari sapientia est, & quod, *Beata vita est conveniens nature sue*. Quæ omnes
explicationes mihi videntur admodum obscuræ: per naturam enim pro-
culdubio non innuit naturales nostros appetitus, cum illi nos sæpe ad
voluptatem, adversus quam disputat, impellant; sed ex discursus ejus
serie colligere licet, per *rerum naturam*, illum innuere ordinem à Deo in
rebus omnibus quæ sunt in universo, stabilitum, huncque ordinem tan-
quam infallibilem & à voluntate nostra independentem considerando,
dicit quod *rerum nature assentiri*, & *ad illius legem exemplumque formari, sa-*
pientia est. Ac si diceret, sapientiæ esse ordini rerum acquiescere, idque fa-
cere ad quod natos nos esse credimus; aut, ut ex Christianismi sententia
loquar, sapientiæ est se voluntati divinæ subicere, illamque in omnibus
nostris actionibus sequi. Et hoc, *Beata vita est conveniens nature sue*, innuit
beatitudinem in hoc consistere, ut ordinem universi sequamur, casus-
que nostros omnes æquo animo accipiamus, quod nihil fere explicat.
Neque enim satis patet connexio cum iis quæ statim subjicit, non posse
hanc beatitudinem obtineri, *nisi sana mens est*, &c. nisi innuat etiam idem
esse *secundum naturam* & secundum rectam rationem vivere. In quarto &
quinto capitibus, alias quasdam summi boni definitiones affert, quæ
omnes ad primæ sensum aliquo modo referuntur, sed quarum nulla il-
lud satis explicat; interim varietate sua indicant non clare intellexisse Se-
necam quid sibi vellet: Quo enim melius rem aliquam concipimus, eo
magis determinati sumus ad illam unico modo exprimendam. Locus il-
le in quo mihi videtur felicius locutus, habetur cap. 5. ubi dicit quod *Bea-*
tus est qui nec cupit nec timet beneficio rationis, item, *Beata vita est in recto*
certaineque judicio consistens. Sed quandiu non docet rationes propter quas
neque timere neque cupere debeamus, hæc omnia nos vix aut parum ju-
vant. In iisdem hisce capitibus, disputationem init cum iis qui beatitu-
dinem in voluptate ponunt, atque in sequentibus pergit; quare ante-
quam ea discutiam, meam de hac quaestione sententiam hic proponam.

Primum adverto discrimen esse inter beatitudinem, summum bonum;
& ultimum finem sive scopum, ad quem actiones nostras collineare de-
bemus: beatitudo enim non est summum bonum, sed illud supponit;
ipsa autem est animi tranquillitas sive voluptas ex boni illius possessione
proficiscens. Sed per finem actionum nostrarum potest utrumque intel-
ligi; nam summum bonum illud est sine dubio ad quod tanquam ad sco-
pum

pum actiones nostras omnes debemus dirigere; animi autem tranquillitas ex eo proficiens, cum nos ad illius investigationem pelliciat, non immerito finis noster dici potest.

Adverto præterea vocem *voluptas* alio sensu ab Epicuro sumptam fuisse, quam ab iis qui adversus illum disputarunt; omnes enim ejus adversarii vocis hujus significationem ad sensuum voluptates restrinxerunt, ipse vero ad omnes animi oblectationes illam extendit, ut videre est ex iis quæ Seneca aliique nonnulli de illo tradiderunt.

Tres autem de summo bono atque actionum nostrarum fine apud Ethnicos Philosophos præcipuæ fuere sententiæ; Epicuri nempe, qui voluptatem dixit; Zenonis, qui virtutem; & Aristotelis, qui illud ex omnibus tum corporis, tum animi perfectionibus constituit. Quæ quidem tres opiniones pro veris haberi posse mihi videntur, & invicem conciliari, modo quis illas benigne interpretetur. Cum enim Aristoteles considerasset summum totius naturæ humanæ in genere bonum, id est, illud quod ab homine perfectissimo possideri potest, recte illud constituit ex omnibus iis perfectionibus, quarum natura humana capax est, esse compositum; sed hoc ad usum nostrum minime pertinet. Zeno contra bonum quod à quolibet privato possideri potest, consideravit; quare optime etiam asseruit illud in virtute sola positum esse, quia præter virtutem, nullum est nobis bonum, quod à libero nostro arbitrio pendeat. Sed virtutem hanc tam austeram & voluptati inimicam finxit, ut non nisi melancholici, aut animi à corpore penitus avulsi ejus sectatores esse potuisse videantur. Denique non perperam Epicurus, perpendendo quæ in re posita sit beatitudo, & cujusmodi sit finis ad quem actiones nostræ tendunt, pronunciavit voluptatem in genere, hoc est, animi tranquillitatem; nam quamvis sola officii nostri cognitio posset nos ad recte agendum adducere, id nihilominus nequaquam nos beatos efficeret, si nihil inde voluptatis nobis accederet. Sed quia voluptatis nomen falsis sæpe voluptatibus tribuitur, quas vel comitantur vel sequuntur sollicitudines, tædia & pœnitentia, plurimi crediderunt hac Epicuri opinione doceri vitium, & revera ea virtutem non docet. Sed quemadmodum præmium propositum sagittarios movet ut ad scopum collineent, qui tamen præmium auferre nequeunt, nisi scopum videant; contra vero qui scopum vident non ideo ad collineandum adducuntur, nisi sciant destinatum esse victori præmium: sic virtus, quæ scopus est, cum sola ob oculos ponitur, sui desiderium non movet; animi vero tranquillitas, quæ præmium ejus est, non potest obtineri nisi ab eo qui virtutem amplectitur. Quare puto posse me hic con-

cludere beatitudinem positam esse in tranquillitate animi, (hoc est, in voluptate in genere, nam quamvis quædam oblectationes à corpore pendæant, quædam non, tamen nulla non est in anima,) verum ut obtineatur solida hæc voluptas, amplectendam esse virtutem, hoc est, requiri voluntatem firmam & constantem illud omne faciendi quod optimum judicabimus, omnesque ingenii nostri vires adhibendi, ad optimum illud recte dijudicandum. Differo in aliud tempus ejus, quod de hac re Seneca scripsit, considerationem, jam enim prolixior est epistola mea, neque licet aliud addere nisi quod sum, &c.

EPISTOLA VI.

Ad Elizabetham Principem Palatinam, &c.

Medium ad obtinendam vitam beatam. Varia voluptates animæ, & corporis.

CUM nuper dubitarem an Celsitudo tua esset Hagæ Comitum an vero Rhenæ, literas meas per Leydam misi, tuæ autem mihi redditz non fuerunt, nisi post tabellarii, qui illas Alkmariam pertulerat, discessum. Quod quidem causa fuit cur tibi citius testificari non potuerim quantum mihi gratulatus fuerim, quod meum de libro, quem legisti, judicium à tuo diversum non sit, quodque meus ratiocinandi modus satis naturalis tibi videatur. Nullus dubito quin, si tibi fuisset tantum otii perpendendi ista, quantum mihi, nil possem scribere, quod non adverteas melius, quam ipse ego; sed quia Celsitudinis tuæ ætas, natales & occupationes id non tulerunt, forsan id quod scribo tibi compendium aliquod temporis faciet, meique errores tibi locum præbebunt veri observandi. Sic cum locutus sum de beatitudine, quæ à nostro prorsus arbitrio pendet, & quam homines omnes absque aliena ope assequi possunt, optime animadvertis quosdam esse morbos, qui cum ratiocinandi facultatem adimant, tollunt etiam facultatem fruendi voluptate animi rationalis; hocque me docet id, quod de omnibus generatim hominibus pronunciaveram, non esse intelligendum nisi de iis qui liberum habent rationis usum, quique præterea viam ad hanc beatitudinem norunt: nemo enim certe est qui non cupiat se beatum efficere, sed qua ratione id obtineri possit, plurimi ignorant: & sæpe pravus corporis habitus impedit quo minus voluntas libera sit; quemadmodum etiam dormientes experimur: Nam ne summus quidem Philosophus cavere potest quo minus
mala

mala somnia sibi obversentur, si quidem proclivis sit ad ea temperamenti. Nihilominus experientia docet cogitationes eas, quæ animum cætera vacuum sæpius subierint, postea recurrere, utcunque male affectum sit corpus. Sic gloriari possum somnia mea nihil mihi molesti obijcere; & sine dubio multum ad hoc facit, tristibus cogitationibus abigendis diu assuevisse. Sed de nobis nihil absolute spondere possumus, nisi quandiu nostri compotes sumus; estque revera minus damni vitam perdere, quam rationis usum. Nam etiam absque fidei documentis, sola naturalis Philosophia spem facit animæ nostræ felicioris post mortem status, quam præsentis; neque illi molestius quidquam minatur quam alligari ejusmodi corpori, quod suam illi libertatem prorsus adimat. Quantum vero ad reliquos corporis prave habitus, qui rationem non penitus perturbant, sed humores tantum alterant, & ad tristitiam, vel iram, vel affectum quemlibet alium declinant, molesti quidem sunt, sed tamen superabiles, imò & eo majori voluptate animam perfundunt, quo superatu difficilius fuerint. Idem etiam censeo de externis omnibus impedimentis, ut de clarorum natalium splendore, de aulæ blanditiis, de fortunæ injuriis, quemadmodum etiam de rebus maxime prosperis, quæ plerunque magis quam adversa impediunt quo minus quis possit agere Philosophum. Cum enim affluunt optata omnia, obliviscimur nostri, & mutata deinde fortuna, eo magis consilii inopes sumus, quo illi magis fidebamus. Denique generatim dici potest nihil esse quod felicitatis assequendæ facultatem possit nobis penitus præripere, nisi quod rationem nostram perturbat, eaque non esse semper molestissima, quæ gravissime nocent.

Sed ut accurate constet quanti sit quidlibet ad beatitudinem nostram, attendendum est quibusnam ex causis voluptas nostra oriatur, hujus enim potissimum rei cognitio virtutis exercitium facilius efficere potest. Omnes porro animæ nostræ actiones quæ aliquid nobis perfectionis acquirunt, secundum virtutem sunt; tota autem nostra voluptas posita est tantum in perfectionis alicujus nostræ conscientia. Sic nullam unquam virtutem exercere possumus, hoc est, nunquam possumus agere id quod nostræ nobis ratio agendum suadet, quin id ipsum nos voluptate perfundat. Sed duo sunt voluptatum genera, unum ad mentem solam, alterum ad hominem, hoc est, ad mentem quatenus corpori unitam pertinens: Hæ autem imaginationi se confuse offerentes, apparent sæpe longe majores, quam revera sunt, præsertim antequam possideantur; id quod malorum omnium, omniumque vitæ errorum origo est. Nam juxta rationis regulam quælibet voluptas ex magnitudine perfectionis illam producentis

esset metienda; atque ita eas quarum causæ nobis clare cognitæ sunt, solemus æstimare. Sed sæpe passio nobis suadet quædam multo meliora esse & optabiliora, quam sunt; deinde postquam illis adipiscendis laboris multum impendimus, bonaque alia veriora possidendi occasionem interea negleximus, tum illorum vitia ex fruitioneprehendimus; hinc fastidia, ægritudines, pœnitentia. Quare verum rationis officium est justum bonorum omnium, quorum acquisitio à nostra prudentia aliquatenus pendere videtur, valorem examinare, ut curas nostras & conatus omnes nunquam non convertamus ad ea nobis procuranda, quæ revera optabiliora sunt. Qua in re si minus æqua fortuna consilia nostra fecellerit, saltem manebit hoc solatium, nihil culpa nostra nos amisisse, & fruemur nihilominus tota naturali beatitudine, cujus acquisitio fuerit in nostra potestate. Sic e.g. potest nonnunquam ira vindictæ desideria tam violenta in nobis excitare, ut majorem nobis in inimico plectendo voluptatem ostendet, quam in famæ aut vitæ nostræ conservatione; ita ut propter illam, utramque hanc in periculum inconsulte adducamus. Cum contra si ratio pensitet quale sit bonum illud aut perfectio, in quo voluptas illa fundatur, quam ex vindicta percipimus, aliud nihil reperiet, (saltem quando ultio ad aliam injuriam prævertendam non spectat) nisi quod nobis in animum inducimus esse nos aliquo modo superiores, & præstantiores eo quem ultione petimus: Quod sæpe est inane signum, nulliusque momenti, præ fama aut vita, aut etiam præ voluptate quam à vindicta temperando ex victoria ab ira reportata experimur. Idem autem in cæteris passionibus accidit; nulla est enim quæ bonum, ad quod fertur, longe splendidius non ostendet quam revera sit, quæque antequam voluptatibus fruamur, non exhibeat illas longe majores, quam ex possessioneprehendimus. Unde fit ut vulgo male audiat voluptas; quia vox ista non adhibetur nisi voluptatibus falsis significandis, quæ specie sua nos sæpe decipiunt, neglectumque interea pariunt aliarum multo solidiorum, sed quarum expectatio nos minus movet, cujusmodi sunt ut plurimum solius animi voluptates. Dico ut plurimum, nam non omnes animi voluptates sunt laudabiles, possunt enim in aliqua falsa opinionione fundari, quemadmodum ea, quam in calumniando nonnulli percipiunt, quæ in eo tantum fundatur quod quis putet se pluris æstimatum iri, quo minoris alii; atque etiam possunt nos specie sua decipere, cum vehemens aliquis affectus illas comitatur, sicut liquet in ea, qua ambitio homines ducit. Sed præcipua differentia quæ inter corporis & animi voluptates intercedit, in hoc posita est, quod cum corpus sit mutationi perpetuæ

petuæ obnoxium, imo & cum ejus conservatio & bene esse ex hac mutatione pendeat, voluptates quæ ad illud pertinent non diu durant; proficiscuntur enim ex rei cujuscumque acquisitione, quæ corpori utilis est eo quo recipitur momento, & simul ac definit esse illi utilis, illæ etiam desinunt. Cum è contra animæ voluptates possint, ut & ipsa, immortales esse, modo tam solidum fundamentum habeant, ut neque veritatis cognitio, neque falsa ulla opinio illud evertant. Cæterum verus rationis nostræ in vitæ regimine usus non consistit nisi in omnium tum corporis tum animi perfectionum, quæ industria nostra comparari possunt, iusto valore absque passione examinando & considerando, ut cum plerumque cogamur quibusdam nos privare ut aliis fruamur, optimas semper eligamus; & quia corporeæ sunt inferiores, generatim dici potest posse hominem absque illis se beatum efficere. Nihilominus in ea non sum sententia ut contemni prorsus debeant, aut ut debeat quisquam se passionum expertem præstare; satis est si illas rationi subiciat. Tum enim ita edomitæ, eo aliquando utiliores sunt, quo magis ad excessum vergunt. Ego certe vehementiore nulla unquam ducar, quàm ea, quæ me ad cultum & venerationem Celsitudini tuæ debitum exhibendum permovet, &c.

EPISTOLA VII.

Ad Elizabetham Principem Palatinam, &c.

Quenam sint necessaria ad hoc, ut quis sit ad recte judicandum bene dispositus.

Celsitudo tua tam accurate observavit causas omnes, quæ obstiterunt quo minus suam de summo bono sententiam Seneca clare exponeret, ejusque librum tam attente perlegisti, ut importunus viderer, si singula ejus capita ordine examinando pergerem, atque ita differrem responsum ad difficultatem, quam mihi proposuisti de rationibus confirmandi intellectum in dignoscendo, quid in omnibus vitæ actionibus sit optimum. Quare misso Seneca meam tantum de hoc negotio sententiam conabor explicare.

Duo tantum mihi videntur necessaria ad hoc ut quis sit ad recte judicandum bene dispositus, unum est cognitio veritatis, alterum habitus quo cognitorum meminerimus, cognitisque acquiescamus quotiescunque id occasio postulaverit. Sed quia præter Deum nemo omnia perfecte novit, debet nobis esse satis eas veritates scire, quæ ad nostrum usum potissi-

potissimum conducunt; quarum prima & præcipua est Deum esse à quo omnia pendent, cujus perfectiones sunt infinitæ, potestas immensa, decreta infallibilia: hac enim ratione docemur casus nostros omnes æquo animo accipere, utpote à Deo nobis haud temere immisos: & quia verum amoris objectum est perfectio, si quando mentem nostram ad naturam ejus speculandam elevamus, nos ad ejus amorem naturaliter tam proclives deprehendimus, ut ex nostris etiam afflictionibus gaudium percipiamus, reputantes voluntatem ejus impleri hoc ipso quod in illas incidamus.

Alterum quod venit cognoscendum, est animæ nostræ natura, quatenus absque corpore subsistit, atque illis longe nobilior est & innumerarum, quæ in hac vita non occurrunt, voluptatum capax: Id enim mortis metum depellit, affectusque nostros à terrenis ita divellit, ut non sine contemptu omnia ea, quæ à fortunæ arbitrio pendent, despiciamus.

Ad quod etiam conducere multum potest si de Dei operibus digne statuamus, vastamque hanc de extensione universi ideam habeamus, quam conatus sum in tertio Principiorum meorum libro describere.

Si enim conceipiamus nihil esse extra Cælus præter spatia imaginaria, Cælisque omnes nonnisi Terræ causa factos esse, Terram vero hominis; hinc fiet ut propendamus ad cogitandum Terram hanc esse præcipuam nostram sedem, hacque vita melius nihil ad nos pertinere. Et si verarum quæ in nobis sunt perfectionum cognitione omissa, eas quibus carent imperfectiones aliis creaturis assignamus, ut nos supra illas efferamus, atque inepte superbientes, velimus esse Deo à consiliis, mundique cum illo regimen suscipere; id vero inanes sollicitudines & ægritudines innumeras pariet.

Post agnitam ita Dei bonitatem, animarum nostrarum immortalitatem, universi immensitatem, superest adhuc una veritas, cujus cognitio mihi videtur admodum utilis, nempe quod, quamvis quilibet nostrum personam constituat ab aliis diversam, & cujus proinde res ab orbis reliqui rebus aliquo modo divisæ sunt, nihilominus cogitare debeamus non posse quempiam per se solum subsistere, & revera nos esse ex partibus universi unam, & potissimum unam ex Terræ partibus, hujus videlicet politicæ, societatis, familiæ, quicum domicilio, sacramento, nativitate conjuncti sumus; Totius autem, cujus pars sumus, bonum privato bono debet anteponi: attamen eum modo & ratione; insipienter enim se magno malo quis exponeret, exiguum tantum cognatis aut patriæ bonum

num conciliaturus; & si quis per se solus reliqua sua civitate præstantior esset, nulla esset ratio cur illius salutem sui jactura redimeret. Sed si ad semetipsum omnia quisque referret, non esset metus cæteris hominibus ex lucelli cujuscpiam spe graviter nocendi, exularetque vera omnis amicitia, omnis fides, omnisque omnino virtus; cum è contrario, si quis se ut publicæ rei partem consideret, illi volupe futurum sit omnibus prodesse, imo & data occasione non sit recusaturus vitam in periculum adducere, siquidem id aliena commoda postulent, ipsamque, si fieri posset, animam alienæ salutis causa juvaret perdere. Ita ut hæc consideratio sit maxime heroicarum, quas faciant homines, actionum omnium fons & origo. Quod enim ad eos attinet qui se morti ex fastu laudis causa opponunt; aut ex stupiditate, quia periculum non perspiciunt; existimo illos esse miseratione potius quam laude dignos. Cum vero quis se morti objicit quod putet id esse officii sui; aut cum malum aliquod aliud subit, ut bonum inde aliis accedat; quanquam fortasse distincte non attendit se id facere, quod communi societati, cujus pars est, plus debeat, quam sibi seorsum spectato, id tamen præstat vi considerationis hujus, quæ ejus menti confuse obversatur; illuc enim naturaliter propendimus, ubi Deum recte cognoscimus & amamus; tum enim nos voluntati ejus totos permittendo, affectus proprios exuimus, nec remanet alia cupido, quam id faciendi, quod ipsi gratum esse creditur, hoc autem sublequitur animi voluptas & tranquillitas, quæ minutas & breves sensuum voluptates longe antecellunt.

Præter has veritates quæ actiones nostras generatim spectant, multæ etiam aliæ cognitu necessariæ sunt, quæ ad singulas propius referuntur, præcipuè autem mihi videntur esse illæ, quas in proxime superiori mea epistola recensui, omnes nempe affectus nostros ea bona, ad quorum possessionem quærendam nos ferunt, majora nobis repræsentare, quam revera sunt; quin & voluptates corporeas animæ voluptatibus semper breviores esse; cumque adfuerint, spe nostra semper minores. Quod sedulo attendere debemus, ut affectu quovis commoti, judicium nostrum consueque suspendamus, donec sedatus sit, ne falsa nos terrenorum bonorum specie decipi facile sinamus.

His nihil est quod addam, nisi quod examinandi sint sigillatim locorum in quibus degimus, mores, ut exploratum habeamus quonamque imitandi sint; & quanquam certas de omnibus demonstrationes habere nequeamus, debemus tamen nos determinare, easque de rebus, quæ usu veniunt, opiniones amplecti, quæ nobis verisimillimæ videantur, ut,

C

cum

cum agendum erit, nunquam dubii sumus; sola enim dubitatio ægritudinem & pœnitentiam parit.

Cæterum dixi supra præter veritatis cognitionem, requiri etiam habitum, ut simus ad recte judicandum semper bene præparati. Nam quia non possumus ad unum & idem animum perpetuo advertere, fieri potest ut quantumcunque claræ & evidentes fuerint rationes, quæ aliquam nobis antehac veritatem suaserunt, postea tamen falsis speciebus ab ea credenda abducamur, nisi longa & crebra meditatione illam menti nostræ ita infixam habeamus, ut in habitum fuerit conversa; atque hoc sensu recte dicunt Scholastici virtutes esse habitus, nam revera raro peccatur defectu theoricæ cognitionis officii sui, sed defectu practicæ, hoc est, defectu firmi habitus assentiendi officio suo. Et quia dum has veritates perpendo, illarum etiam in me habitum augeo, devinctus sum hoc nomine Celstudini tuæ quod sinat ut de his apud illam agam; nec quidquam est in quo otium meum melius collocatum putem, quam dum testificari quæ me esse, &c.

EPISTOLA VIII.

Ad Elizabetham Principem Palatinam, &c.

An satius sit falsam lætitiā, an veram cognitionem habere. Operatio affectuum. Omnia dependere a Deo. De providentia & immutabilitate Dei. Quousque pro aliis solliciti esse debeamus.

DUbiū apud me aliquando movi, videlicet an esset satius lato & contento animo esse, imaginando ea, quæ possidemus, bona majora & meliora, quam sunt, atque ignorando aut mittendo eorum, quibus caremus, considerationem; an vero accuratius pensitando justum utrorumque valorem, atque inde tristitiam contrahendo. Si existimarem summum bonum esse lætitiā, nullus dubitarem quin, quocunque pacto lætitiæ consulendum esset, illorumque probarem brutos mores, qui ægritudines suas vino sepeliunt, aut tabaco soporant. Sed distinguo inter summum bonum, quod in exercitio virtutis consistit, aut quod idem est, in perfectionum omnium, quarum acquisitio à libero nostro arbitrio pendet, possessione, & animi tranquillitatem, quæ ex hac acquisitione proficiscitur. Quare cum major sit perfectio veritatem etiam nobis detrimetiosam nosse, quam illam ignorare, fateor satius esse minus lætitiæ,

titia, plus vero cognitionis habere. Etenim non semper maxime contentus est animus, cum maxime hilares sumus; contra summæ lætitiæ austeræ sunt & seriæ, nec nisi mediocres & momentaneas comitatur risus. Itaque non probo ut nos figmentis pascendo decipiamus; tota enim quæ ex iis proficiscitur voluptas, non potest nisi superficiem, ut ita dicam, animæ afficere, quæ eorum interea falsitatem animadvertendo, interiori amaritudine imbuitur. Et quanquam fieri posset ut alio indefinenter avocata mens nil tale suspicaretur, non frueretur tamen ea, de qua hic agitur, beatitudine, quæ pendere debet à prudentia nostra; hoc autem casu tantum & fortuito contingeret. Verum cum ad diversas considerationes æqualiter veras animum appellere possumus, quarum aliæ illum tranquillæ, aliæ contra perturbent, mihi videtur prudentia suadere, ut iis potissimum immoremur, quæ nos delectant; imo & quia omnia fere humana ejusmodi sunt ut possint aliqua ex parte considerari qua bona videantur, nec non ex aliqua alia, quæ vitia quædam exhibeat; si quid sit in quo industria opus est, in hoc maxime versari debet, ut assuecamus iis ex illa parte respiciendis quæ nobis potior sit, modo tamen caveamus ne decipiamur. Sic cum Celsitudo tua perpendit causas propter quas potuisset ipsi esse plus otii ad rationem suam excolendam quam permultis ætatis suæ aliis, si velit attendere quantum præ aliis istis profecerit, nullus dubito quin sit habitura satis unde sit contenta. Neque video cur malis te cum illis conferre in iis, ex quibus conquerendi causas petis, quam in iis ex quibus voluptatem esses perceptura. Cum enim humana natura sit ita comparata, ut ingenium nostrum relaxatione multatægeat, quo in veritatis investigatione momenta quædam utiliter impendat, tantumque absit illud nimio studio perpoliri, ut contra eo obtundatur; non debemus tempus quod nobis ad nosmet instituendos vacavit, ex horarum, quibus vacui fuimus, numero æstimare; sed potius, uti mihi quidem videtur, ex communi aliorum exemplo, utpote quod communem ingenii humani captum indicat. Mihi videtur etiam non esse cur eum pœniteat, qui illud fecit, quod optimum esse eo tempore judicavit, quo se ad actionem determinare debuit, quanquam postea idem cum otio reputans, se errasse judicet: Sed certe potius eum pœniteret, qui contra conscientiam suam aliquid commisit, licet postea deprehenderit factum illud esse opinione sua melius: Nostrarum enim duntaxat cogitationum rei peragi possumus, neque porro natura hominis ea est ut omnia sciat, aut exemplo æque bene statuatur, atque si haberet deliberandi tempus. Ceterum quamvis superbia, qua fit ut quispiam de seipso melius, quam par est,

sentiat, vitium sit animarum tantum infirmarum & humilium, non sequitur tamen fortiores & generosiores debere seipsas contemnere; sed erga nos æqui esse debemus, perfectionesque nostras non minus, quam vitia agnoscere, & si decorum obstitit quo minus illas prædicemus, nil tamen vetat quo minus illas persentiscamus. Denique etiamsi non sit nobis scientia infinita, ut bona omnia cognoscamus, quorum in variis vitæ casibus faciendus est delectus, mihi tamen videtur satis esse debere nobis quod mediocrem maxime necessariorum cognitionem adepti simus, qualia sunt ea quæ in mea proxime superiore enumeravi, in qua meam de difficultate, quam Cellitudo tua proponit, sententiam jam declaravi: nempe, utrum eorum potior sit ratio qui omnia ad se referunt, an vero eorum qui alienis malis se supra modum torquent. Si enim ad nos tantum curæ nostræ spectent, non possumus nisi privatis bonis frui; cum contra, si nos ut alterius cuiuspiam corporis partem concipiamus, veniamus etiam in societatem bonorum corporis illius communium, neque ideo eorum, quæ nobis propria sunt, ullo privamur: malorum autem non eadem est ratio: Nam secundum Philosophiam malum non est reale quid, sed tantum privatio; & cum adversum amici cuiuspiam casum dolemus, non ideo venimus in societatem defectus in quo malum illud consistit; imo & quantuscunque sit in hoc casu labor aut dolor noster, tantus esse nequit, quanta est interior voluptas, quæ bonas actiones semper comitatur, atque eas præsertim, quæ ex puro in alium amore, quemque ad nos non referimus, hoc est ex virtute Christiana, quam charitatem vocant, proficiscuntur. Sic etiam potest ex fletu & labore multo major quam ex risu & quiete voluptas percipi; estque facile probare hanc animæ oblectationem, in qua consistit beatitudo, non esse à lætitiæ & corporis commodis inseparabilem, tum ex tragediarum exemplo, quæ nos eo magis oblectant, quo plus in nobis trilitiæ excitant; tum ex corporis exercitiis, ut venatione, pila palmaria, aliisque similibus, quæ quanquam laboriosa admodum, tamen grata sunt; imo & videmus labore voluptatem sæpe augeri. Oblectationis autem qua in hisce exercitiis anima perfunditur ratio est, quod corporis quicum juncta est, virium aut agilitatis, aut alterius cuiuspiam perfectionis ipsi sensum imprimat: verum oblectatio, quam ex fletu percipit, dum miserandum aliquod & funestum in scena spectaculum videt, oritur præsertim ex eo quod actionem virtute dignam sibi videatur exercere, dum afflictorum miseretur; & generatim oblectatur persentiscendo affectus in se qualescunque commoveri, modo maneat ejus in illos imperium.

Sed

Sed perpendendi sunt diligentius affectus isti, ut eos definire queam; quod hic mihi facilius erit, quam si ad alium quem scriberem. Cum enim Celsitudo tua perlegerit tractatum, quem de natura animalium olim delineavi, jam nosti qui concipiam varias in eorum cerebro impressiones formari, alias videlicet ab objectis exterioribus quæ sensus afficiunt; alias ab interioribus corporis dispositionibus, sc. vel ab impressionum priorum vestigiis in memoria permanentibus, aut à spirituum ex corde advenientium agitatione, aut etiam (quod hominis solius est) ab actione animæ, quæ in immutandis iis, quæ in cerebro sunt, impressionibus, vi aliqua pollet; quemadmodum etiam vicissim hæc impressiones vim habent excitandi in anima cogitationes à voluntate minime pendentes. Quibus politis, passionibus generatim dici possunt cogitationes istæ omnes, quæ absque voluntatis concursu (& proinde absque ulla actione quæ ab ea profisciscatur) à solis iis, quæ in cerebro sunt, impressionibus in anima excitantur; quicquid enim non est actio, passio est. Sed hæc vox vulgo restringitur ad cogitationes eas, quæ ex particulari aliqua spirituum agitatione oriuntur: quæ enim aut ab objectis exterioribus adveniunt, aut ab interioribus corporis dispositionibus oriuntur, ut colorum, sonorum, odorum perceptio, fames, sitis, dolor & id genus aliæ, sensus appellantur, alii exteriores, alii interiores. Ex vero quæ non pendent nisi ex vestigiis quæ priores impressiones in memoria reliquerunt, atque ex ordinaria spirituum agitatione, sunt phantasinata, siue dormientibus nobis obversentur, siue experrectis, cum anima se ad nihil per se determinando, impressiones quæ in cerebro sunt segniter sequitur. Quum autem voluntate sua utitur ut se ad cogitandum determinet de re aliqua, quæ non solum intelligibilis est, sed & imaginabilis, cogitatio hæc novam in cerebro impressionem facit, quæ respectu animæ non est passio, sed actio, quæ imaginatio proprie dicitur. Denique quando cursus spirituum ordinarius talis est ut cogitationes plerunque tristes, aut lætas, aut similes alias excitet, id non tribuitur passioni, sed indoli siue temperamento ejus in quo excitantur, atque hinc est quod dicunt hunc esse temperamento tristi, illum læto, &c. Itaque nihil superest quod passio proprie dicatur præter cogitationes illas, quæ ex particulari aliqua spirituum agitatione oriuntur, & quarum effectus quasi in anima ipsa persentiscuntur. Verum quidem est nullas fere unquam nobis inesse, quæ ex harum, quas modo distinximus, causarum plurimis non pendeant, sed ab illarum præcipua, vel earum cujus ratio potissimum habetur, denominationem suam sortiuntur. Unde fit ut sensum doloris cum tristitia plurimi confundant; & titillationem

nem cum lætitia, quam voluptatem & oblectationem etiam appellant; famisque & sitis sensus cum edendi & bibendi appetitibus, qui passiones sunt: plerunque enim eadem causæ quæ dolorem creant, spiritus eo etiam modo agitant, qui ad tristitiam excitandam requiritur; & quæ titillationis sensum aliquem generant, spiritus eo agitant modo, qui ad lætitiā excitandam requiritur, & sic de cæteris. Confunduntur etiam nonnunquam propensiones sive habitus, qui ad passionem aliquam disponunt, cum ipsa passione, quod tamen est distinctū facile. Nam e.g. sparso in urbe aliqua rumore adventare hostes, illam obsidione cincturos, primum quod de imminente periculo iudicium oppidani ferunt, est animæ illorum actio, non vero passio; & quamvis iudicium hoc in illorum plurimis simile sit, haud tamen æqualiter illo commoventur, sed alii magis, alii minus, prout sunt ad metum magis aut minus proclives; & antequam illorum anima commotionem illam recipiat in qua sola consistit passio, oportet ut hoc iudicium tulerit, aut saltem absque iudicio conceperit periculum, illiusque in cerebro ideam expresserit, (quod per aliam actionem facit, quam imaginari dicunt) atque eadem opera spiritus immissos à cerebro determinaverit in nervos illos qui contrahendis cordis orificiis inserviunt; quod cum sanguinis circulationem moretur, hinc fit ut corpus totum, pallidum, frigidum, tremulumque evadat; & præterea spiritus à corde ad cerebrum de novo advenientes cum in modum agitantur, ut juvare nequeant ad imagines formandas diversas ab iis, quæ timorem in anima excitant. Quæ omnia tam brevi intervallo se mutuo subsequuntur, ut una eademque operatio esse videatur; & sic in reliquis passionibus particularis aliqua agitatio accidit in spiritibus à corde proficiscentibus. Animus erat hic peculiarem harum omnium passionum explanationem subicere, sed illarum enumeratio mihi videtur adeo difficilis, ut majori sit mihi opus otio, quam quod à Tabellario conceditur.

Interim cum illas acceperim quibus me Celsitudo tua cohonestavit, novam habeo respondendi occasionem, quæ me cogit hoc passionum examen in aliud tempus differre, ut dicam, rationes omnes, quæ Dei existentiam probant, illumque primam esse & immutabilem causam omnium effectuum, qui à libero hominum arbitrio non pendent, mihi videri probare illum etiam esse causam actionum omnium, quæ à libero arbitrio pendent. Non enim demonstrari potest quod existat, nisi consideretur ut ens summe perfectum; non esset autem summe perfectum, si quid in mundo fieri posset, quod ab illo omnino non procederet. Verum quidem est sola fide doceri nos quid sit gratia illa, per quam Deus ad beatitudi-

titudinem supernaturalem nos evchit; sed ex sola naturali Philosophia colligere licet, non posse animum humanum vel minimam cogitationem subire, quin velit Deus & ab æternò voluerit ut subiret. Neque hic locum habet Scholastica distinctio inter causas universales & particulares; ratio enim cur Sol, cum sit florum omnium causa universalis, non sit tamen causa quod tulipæ à rosis differant, est quod eorum productio à quibusdam aliis particularibus causis, ipsi non subordinatis, pendeat; verum Deus ita est rerum omnium universalis causa, ut sit earum etiam totalis, & sic absque ejus voluntate fieri nihil potest. Verum est etiam quod immortalitatis, & felicitatis, cujus extra hanc vitam anima capax est, cognitio posset iis, quos capit hujus vitæ satietas, asserre desiderium ex illa excedendi, si certo iis constaret se felicitate illa postmodum potituros; sed nulla ratio id apud illos evincit; & præter falsam Hegesiæ Philosophiam cujus à Ptolomæo liber prohibitus fuit, eo quod multi eo perlecto sibi mortem conscivissent, nulla est quæ suadere conetur hanc vitam malam esse, è contrario sana ratio docet, inter gravissimos etiam casus summoque cruciatus posse hominem semper contentum esse, modo ratione sua uti sciat.

Quantum ad universi extensionem, haud video quomodo illius consideratione adducamur ad providentiam particularem abstrahendam ab idea, quam de Deo habemus; aliter enim omnino se habet de Deo, quam de potentiis finitis, quæ cum exauriri possint, haud verisimile est illas ad plurima magni momenti negotia simul & ad minima quæque extendi. Sed quo majora Dei opera statuimus, eo melius infinitam ejus potentiam animadvertimus; & quo melius nota est nobis hæc infinitas, eo certiores sumus illam usque ad minutissimas quasque hominum actiones extendi. Haud etiam credo per particularem hanc Dei providentiam, quam Celsitudo tua Theologiæ fundamentum esse dicit, intelligere te mutationem aliquam, quæ in decretis ejus accidat, ratione actionum, quæ à libero nostro arbitrio pendent. Hanc enim mutationem Theologia non admittit, & cum jubet nos Deum orare, non ideo jubet ut, quod nobis desit, illum doceamus, neque etiam ut ordinem ab omni æternitate providentia ejus constitutum precibus nostris conemur immutare: horum enim utrumque esset culpandum; sed solum ut ea impetremus, quæ ab omni æternitate precibus nostris impetratum iri voluit. Arbitror autem omnes in hoc Theologos consentire, atque vel ipsos quos hic Arminianos vocant, qui videntur præ cæteris libero arbitrio maxime tribuere.

Fateor haud facile æstimari posse exacte quousque ratio statuat ut de publico

publico bono solliciti sumus, neque etiam res ea est in qua necesse sit quatenquam esse admodum religiosum; satis est ut conscientia suae satisfaciat, atque in hoc licet propensione suae multum indulgere. Rerum enim ordinem ita posuit Deus, hominesque tam arcta societate conjunxit, ut licet quis ad semetipsum omnia referret, nulla in alios charitate permutus, nihilominus, si prudentia uteretur, suam aliis operam, quoad posset, ordinario modo esset commodaturus, praesertim si eo seculo viveret quo integri mores essent. Et praeterquam quod quiddam sublimius est & pulchrius in alios bona conferre, quam ea sibi comparare, unde sit ut nobiliores animae sint ad illud procliviores, & ea, quae sibi habent, bona minoris aestiment; infirmarum etiam est & humilium se pluris quam par est facere, suntque vasculorum instar quae tribus aquae guttulis impleri possunt. Scio Celsitudinem tuam non esse in hoc numero: atque ubi viles istae animae ad laborem aliorum gratia suscipiendum excitari nequeunt, nisi spes emolumenti aliunde affulgeat; contra monenda es de tua ipsius salute, neque enim potes iis, quos benevolentia prosequeris, prodesse, si tui curam abjicias; cura ergo ut valeas, &c.

EPISTOLA IX.

Ad Elizabetham Principem Palatinam, &c.

Quomodo excessus passionum sive affectuum hic accipi debeat. Quomodo liberum arbitrium & infinita Dei potentia conveniant. Quomodo vasta universi extensio considerari debeat.

Mihi tam raro contingit sanas ratiocinationes offendere, non solum in eorum, quibus in hac eremo tor, consuetudine, sed etiam in libris quos consulo, ut nequeam sine summa voluptate eas legere, quae in Celsitudinis tuae literis habentur; illasque tam validas reperio, ut malim cedere, quam illis obistere audere. Nam licet comparatio, quam Celsitudo tua in laudem suam instituere recusat, possit experientia satis comprobari, laudabilis tamen est adeo virtus, qua de aliis in bonam partem judicamus, & tam bene convenit cum illa animi magnitudine, quae obstat quo minus ingenii humani captum ex hominum vulgo metiaris, ut non possim utramque non magni facere. Non ausim etiam ea inficiari quae Celsitudo tua scripsit de poenitentia, cum sit virtus Christiana qua fit, ut
quis

quis à peccatis resipiscat, non solum spontaneis, sed iis etiam quæ ex ignorantia admisit, affectu aliquo præpeditus, ne veritatem agnosceret. Fateor etiam tragædiarum trilitiam minus nobis placituram, si metus subesset ne nimia evadens valetudinem nostram labefactare posset. Verum cum dixi nonnullas passiones eo utiliores esse, quo magis ad excessum vergunt, sermonem tantum instituere volui de iis quæ bonæ sunt, quod ut innuerem, addidi debere illas rationi subjici. Sunt enim duo genera excessuum, unum quod rei naturam immutando, & ex bona malam efficiendo, impedit quo minus subiecta rationi maneat; alterum quod illius tantummodo mensuram auget, & ex bona meliorem reddit. Sic temeritas non est fortitudinis excessus, nisi cum rationis terminos transgreditur; sed quandiu in illis manet, alium etiam excessum fortitudo recipere potest, qui in hoc consistit, ut nulla dubitatione, metu nullo laboret.

De harum passionum numero & ordine præteritis diebus cogitavi, illarum naturam diligentius examinaturus; sed meas de his rebus opiniones nondum satis excolui, ut auserim eas ad Celsitudinem tuam scribere; quamprimum autem potero id præstabo.

Quantum ad liberum arbitrium, si ad nos tantum attendamus, fateor non posse nos illud non putare independens, sed cum ad infinitam Dei potentiam animum advertimus, non possumus non credere omnia ab illo pendere, & proinde liberum nostrum arbitrium imperio ejus solutum non esse. Implicat enim contradictionem Deum creasse homines ejusmodi naturæ, ut voluntatis eorum actiones ab ejus voluntate non pendeant; quia idem est ac si quis diceret, potentiam ejus finitam esse simul & infinitam: finitam, cum aliquid sit, quod ab illo non pendet; infinitam vero, cum potuerit rem hanc independentem creare. Sed quemadmodum existentia divinæ cognitio non debet liberi nostri arbitrii certitudinem tollere, quia illud in nobismet ipsis experimur & sentimus; ita neque liberi nostri arbitrii cognitio existentiam Dei apud nos dubiam facere debet. Independentia enim illa quam experimur, atque in nobis persentiscimus, & quæ actionibus nostris laude vel vituperio dignis efficiendis sufficit, non pugnat cum dependentia alterius generis, secundum quam omnia Deo subjiuntur.

Quantum autem ad animæ post hanc vitam statum, illum longe minus novi, quam Dominus Digby; nam omissis iis quæ fides docet, fateor sola ratione naturali posse nos multa quidem conjectare, quibus nobis satis blandiamur, spesque eximias concipere, sed certitudinem nullam. Et quia ratione naturali docemur esse nobis in hac vita plura sem-

D

pet

per bona, quam mala, neque debemus certum incerto commutare, videtur eadem ista ratio docere, non esse quidem metuendam mortem, sed neque etiam quærendam.

Non est quod respondeam objectioni, quam de vasta, quam universi tribui, extensione, proponere possunt Theologi; jam enim Celsitudo tua pro me respondit: hoc unum addo quod, si hæc extensio posset Religionis nostræ mysteriorum fidem infirmare, illa quam ab omni ævo Astronomi Cælis tribuerunt, idem facere potuisset; illos enim tantos considerarunt, ut Terra ipsis comparata sit tantum puncti instar, & tamen id illis obiectum non fuit.

Cætertum si prudentia esset eventuum domina, nullus dubito quin Celsitudo tua perductura esset ad exitum consilia quæcunque inchoaret. Sed ad hoc oporteret homines omnes esse perfecte sapientes, ut ex officii illorum cognitione, quid facturi essent certo constare posset: Aut vero perspectum esse deberet eorum omnium peculiare ingenium, quibuscum nobis est aliquid rei; quanquam neque hoc sufficeret, quia suum insuper liberum arbitrium habent, cujus eventus soli Deo patent: Et quia plerumque judicamus quid alii facturi sint, ex eo quod nosmetipsi facturissemus, si illorum partes essemus acturi, sæpe accidit ut vulgaria & mediocria ingenia, cum similia sint eorum, quibuscum rem habent, eatenus in eorum consilia melius penetrent, suaque incepta feliciter peragant, quam sublimioris ingenii viri, quibuscum res non sit nisi cum iis, qui cognitione & prudentia sunt ipsis longe inferiores, aliter prorsus de rebus, quam hi judicant. Atque hoc debet Celsitudinem tuam solari, si quando tuis consiliis fortuna adversetur. Ego vero Deum interrim orabo ut illa secundet.

EPISTOLA X.

Ad Elizabetham Principem Palatinam, &c.

Officii persunctio occasione mutata religionis. Quomodo hominis arbitrium liberum simul, & dependens esse possit. Quomodo intelligi debeat, plura in hac vita esse bona quam mala. Prudentiam suadere ut alius proximus, quamvis privata tantum utilitati studeremus.

Fateor me obstupuisse cum intelligerem Celsitudinem tuam fuisse ægritudine affectam, eo usque ut minus valeret, idque ob ejusmodi rem, quam pars magna hominum probat, quæque plurimis & quidem validis

validis rationibus excusari potest; & certe omnes qui eandem mecum Religionem profitentur, quique majorem in Europa numerum procul dubio faciunt illam defendere tenentur, etiam si circumstantiæ quædam & rationes minus laudanda subesse videantur: Fide enim credimus Deum variis mediis uti, quibus animas ad se trahat, & nonnullos impiis consiliis in monasteria adductos, vitam ibi sanctissimam postmodum egisse. Quantum vero ad illos qui diversæ sunt fidei, si de hoc sequius loquuntur, potest illorum judicium merito respui; nam quemadmodum in omnibus aliis rebus, in quibus ipsum est in partes diversas, ita hic impossibile est ut quis aliis placendo, non displiceat aliis; & si attendant, se eam, quam profitentur Religionem, non amplexuros fuisse, nisi vel ipsi vel ipsorum patres aut avi à Romana defecissent, non erit cur rideant, aut inconstantiam iis objiciant, qui ab illorum Religione deficiunt. Quantum vero ad seculi prudentiam, ratio quidem postulat ut fortunæ adhæreant ii quibus illa favet, junctisque viribus illam teneant, ne effugiat; sed ii de quorum familia fortuna fugit, non absurde mihi videntur in diversis viis in eundis consentire, ut si nequeant omnes, saltem aliquis in illam incidat; atque interea quia creditur illorum unusquisque variis consiliis pollere, cum amicis in utrisque partibus habeat, id majorem ipsis auctoritatis famam conciliat, quam si unas tantum partes sequerentur: quod obstat quo minus existimare possim fuisse hujus consilii autoribus animum nocendi familiæ vestræ. Sed non contendo posse meis rationibus Celsitudinis tuæ dolorem superari, spero tantum fore ut illum tempus mollierit, antequam hæ tibi reddantur; tinerem autem ne recrudesceret si de hoc fusius scriberem. Quare transio ad difficultatem quam de libero arbitrio Celsitudo tua proponit. Si Rex aliquis edicto monomachiam prohibuisset, & certissime sciret duos quospiam ditionis suæ Nobiles diversarum urbium incolas inter se dissidere, sibi que mutuo ita inensos esse, ut si alter in alterum inciderit, nil ob stare possit quo minus decertent, si inquam Rex iste illorum uni mandatum daret, ut versus urbem illam proficisceretur quam alter incolit, daretque etiam alteri mandatum cundi versus locum in quo prior ille versatur, certò novit non posse illos sibi mutuo obviam non fieri, proindeque non certare, atque ita edictum ejus non violare; neque tamen illos ad hoc cogit, ejusque cognitio, imo & voluntas illos ad id hoc modo determinandi, non obstat quin ultro & atque libere uterque pugnet, ac pugnasset si nihil horum rescivisset, aut alia quavis occasione illi in se mutuo incidissent, adeoque pari jure licet in illos animadvertere, ob violatum edictum. Quod autem licet Regi

de quibusdam subditorum suorum liberis actionibus facere, id Deus, qui præscientia & potentia infinita pollet, de omnibus hominum actionibus facit : & antequam nos in hunc orbem mitteret, exacte noverat quales essent futuræ voluntatis nostræ propensiones omnes, illas enim ipse nobis indidit; cætera etiam extra nos ita disposuit, ut hæc & illa objecta se sensibus nostris hoc & illo tempore objicerent, quorum occasione scivit fore ut liberum nostrum arbitrium nos ad hoc vel illud determinaret : Id ergo sic voluit, sed noluit tamen nos ad hoc cogere. Et quemadmodum in isto Rege distinguere possunt duo diversi voluntatis gradus, unus quo voluit ut duo hi Nobiles decertarent, cum fecerit ut in se mutuo inciderebant; alius vero quo id noluit, cum monomachiam edicto prohibuerit : sic Theologi distinguunt in Deo voluntatem unam absolutam & independentem, qua vult ut omnia fiant prout fiunt; aliam vero relativam, quæ ad hominum meritum aut delictum refertur, per quam vult ut legibus suis obtemperetur.

Oportet etiam duo bonorum genera distinguere, ad conciliandum id quod antehac scripsi (nobis videlicet esse in hac vita plura bona quam mala,) cum eo quod de omnibus vitæ incommodis mihi Celsitudo tua objicit. Cum consideratur idea boni ut sit actionum nostrarum regula, sumitur pro omni perfectione, quæ in ea re esse potest, quæ dicitur bona, & lineæ rectæ assimilatur, quæ inter infinitas curvas, quibus mala comparantur, unica est. Hoc sensu solent Philosophi dicere bonum esse ex integra causa, malum ex quolibet defectu : sed cum perpendimus bona & mala, quæ in una eademque re esse possunt, ut exploratum habemus quanti apud nos esse debeat, quemadmodum cum perpenderem quanti esset facienda hæc vita, sumitur bonum pro omni eo, quod in re illa reperitur, ex quo commodum aliquod percipere possumus, & malum tantum vocatur id ex quo incommodum nobis suboriri possit; cæterorum enim vitiorum quibus res illa laborare potest, ratio non habetur. Sic cum munus aliquod alicui deferretur, perpendit ille quidem hinc honorem & lucrum tanquam bona inde pendencia, inde vero laborem, periculum, temporis jacturam aliæque similia, tanquam mala; hæcque mala cum illis bonis componendo prout minora aut majora deprehendit, vel suscipit munus vel repudiat. Dixi autem hoc sensu plura semper in hac vita bona esse quam mala, quod existinem ea omnia quæ sunt extra nos, quæque à libero nostro arbitrio non pendent, minime digna esse estimatione nostra, si conferantur cum iis, quæ ab eo pendent, & quæ semper est penes nos bona efficere, modo iis sciamus recte uti; horumque
etiam

etiam ope impedire possumus ne mala aliunde ingruentia, quantacunque sint, altius in animam nostram penetrent, quam moror ex funestissimo aliquo spectaculo exortus: sed oportet, fateor, hominem multum in Philosophia profecisse, ut eo usque pertingat. Credo tamen etiam illos, qui affectibus suis quam maxime indulgent, semper apud se statuere plura esse in hac vita bona quam mala, quanquam hoc ipsi non animadvertant; nam licet nonnunquam gravissimis doloribus cruciati mortem invocent, haud tamen aliud velint (ut in fabula habetur) quam ut in onere suo ferendo illos adjuvet, neque ideo vita vellent excedere; aut si qui velint, & sibi mortem consciscant, id faciunt ex errore intellectus, non vero ex sanæ rationis iudicio, aut ex opinione, quam ipsi natura indedit; cujusmodi est ea qua fit ut vitæ bona malis ejus anteponamus.

Ratio cur credam eos qui privatæ tantum utilitati student, debere non minus quam ceteros suam aliis operam commodare; & si velint prudentia uti, conari quantum in se est ut aliis prosint, est, quod plerumque videamus eos qui officiosi audiunt, multa etiam ab aliis, imo & ab iis quibus nunquam profuerunt, amica officia accipere, quæ, si diversi ingenii haberentur, non acciperent; laboresque, quos in aliorum gratiam suscipiunt, minores esse quam commoda, quæ ex eorum, quibus noti sunt, amicitia percipiunt. Non enim expectantur à nobis nisi officia ea quæ commode possumus præstare, neque ultra ab aliis expectamus; sed sæpe fit ut quod illis minimi constat, nobis maxime prosit, imo & nobis vitam servare possit. Verum autem est beneficia nonnunquam perdi, contra vero ex maleficiis lucrum fieri, sed non debet hoc prudentiæ regulam immutare, quæ ad ea tantum refertur, quæ ut plurimum contingunt. Quod autem ad me attinet axioma hoc in vitæ meæ regimine ut plurimum secutus sum, ut tritam viam insisterem, & crederem esse maximam astutiam, nulla prorsus astutia uti. Leges societatis communes, quæ omnes eo spectant ut nobis mutuo prosimus, aut saltem non obsumus, mihi videntur tam bene stabilitæ, ut quisquis illas ingenue & absque dissimulatione aut fūco servaverit, vitam acturus sit longe felicior & tutior, quam si qui aliis rationibus utilitatem suam quærunt, & quorum quidem consilia ex aliorum hominum ignorantia & fortunæ favore exitum habent nonnunquam prosperum, sed multo sæpius improperum; ita ut iisdem plerumque pereant artibus, quibus res suas se putabant stabilire. Hoc candore, & aperto, quem in omnibus meis actionibus præ me fero, animo, profiteor etiam esse me, &c.

EPISTOLA XI.

Ad Elizabetham Principem Palatinam, &c.

Varie animadversiones in Tractatum de Passionibus.

EXperientia compertum habeo me non immerito retulisse gloriam in numerum passionum, nequeo enim illa non affici, cum video Celsitudinis tuæ candidum de exiguo, quem de illis conscripsi, tractatu iudicium; & nequaquam miror quod vitia in illo deprehendas, quibus certe eum vacare minime putavi, cum ejusmodi habeat argumentum, cui nunquam antea studueram, & cujus primam tantum delineationem institui, omisis pigmentis & ornamentis, quæ apud minus perspicaces, quam sunt Celsitudinis tuæ oculi, speciem inducere potuissent: Principia enim Physica, quibus usus sum in sanguinis motibus, qui quamlibet passionem comitantur, explorandis, omnia non exposui, quia illa recte deducere nequeo, nisi omnium corporis humani partium formationem explicando; hoc autem adeo difficile est, ut id nondum ausim aggredi, quamquam de principiorum, quæ in hoc scripto supposui, veritate mihi propemodum satislecerim; quorum præcipua sunt, officium jecoris & lienis esse, ut sanguinis minus purificati, quam ejus qui in venis est, aliquid semper asservent; deinde ignem qui in corde est egere continuo pabulo, succo nempe ciborum ex stomacho directe derivato, vel hujus defectu, sanguine illo qui in jecore & liene asservatur, quia reliquus, qui in venis est, sanguis nimis facile dilatatur; porro arctam adeo inter animam & corpus conjunctionem esse, ut cogitationes illæ, quæ aliquos corporis motus ab inennte vita comitantur, illos etiam nunc comitentur; itaque eisdem motus ab externa quacunque causa in corpore iterum excitatos, easdem etiam in anima cogitationes reducere, & vicissim easdem cogitationes recurrentes, eosdem etiam motus denuo producere; denique corporis nostri machinam ita compaginatam esse, ut vel unus lætitiæ, aut amoris, aut alius quispiam similis motus sufficiat spiritibus animalibus per nervos mittendis in omnes eos musculos, qui ad varios sanguinis motus, quos passionum comites esse dixi, efficiendos requiruntur: Fuit quidem mihi difficile proprios cujuslibet passionis motus distinguere, quia nunquam fere solæ sunt; sed tamen quia non sunt semper cum iisdem consociatæ, conatus sum mutationes eas observare quæ in corpore accidunt, cum diversimode conjunctæ sunt. Sic e.g. si amor esset

esset semper cum lætitia conjunctus, nescirem utri illorum tribuendus esset calor & dilatatio, quam circa cor efficiunt: sed quoniam amor cum mœrore etiam nonnunquam junctus est, atque tunc temporis etiam remanet calor iste, non vero dilatatio, judicavi calorem amoris esse, lætitiæ vero dilatationem. Et quamvis desiderium sit fere semper amoris comes, non semper tamen in eodem gradu conjunguntur: nam etiamsi quis multum amet, vix tamen cupit cum spe nulla ducitur; & quia tunc deest diligentia illa & promptitudo, quæ, si majus esset desiderium, simul adesset, concludere inde licet diligentiam & promptitudinem à desiderio, non vero ab amore proficisci.

Credo equidem tristitiam adimere plerisque appetentiam cibi, quam tamen ego dixi ab illa augeri; nempe quoniam hoc semper in me expertus sum. Existimo autem differentiam hanc ex eo proficisci, quod prima tristitiæ causa quæ nonnullos ab ineunte vita affecit, ea fuerit, quod non acceperint satis alimenti; in aliis vero, quod noxium esset illis alimentum quod acceperant; atque in his spirituum motus qui cibi appetentiam tollit, remansit semper conjunctus cum tristitia. Quinetiam videmus illos motus qui alias passiones comitantur, non esse in omnibus hominibus per omnia similes, quod pari causæ tribui potest.

Quantum ad admirationem, licet illa ortum habeat in cerebro, proindeque nequeat à solo sanguinis temperamento produci, sicut lætitia aut tristitia, nihilominus ope istius impressionis quam in cerebro facit, potest in corpus agere æque ac quævis alia passio, imo etiam aliquo modo magis, quia novitas ex qua oritur, efficit motus omnium promptissimos; & quemadmodum manum aut pedem movere possumus eodem fere instanti quo de illis movendis cogitamus, quia hujus motus idea, quæ in cerebro formatur, spiritus mittit in musculos ad motum hunc efficiendum comparatos; sic rei jucundæ idea quæ inopinanti animo effulget, statim mittit spiritus per nervos, qui orificia cordis aperiunt: neque aliud in hoc præstat admiratio, quam quod novitate sua augeat vim motus, qui lætitiâ creat, faciatque ut orificiis cordis subito dilatatis, sanguis qui per venam cavam in illud influit, & per arteriosam venam effluit, pulmonem subito inflet.

Externa eadem criteria quæ passiones comitari solent, possunt etiam nonnunquam à diversis causis produci. Sic vultus rubor non semper ex pudore, sed aliquando etiam ex ignis calore, aut exercitio ortum ducere potest; & risus, quem vocant Sardonium, nihil aliud est quam nervorum vultus convulsio. Pari modo fieri etiam potest ex consuetudine

aut.

aut morbo ut suspiremus; hoc autem non obstat quo minus suspiria, cum à passionibus producuntur, sint tristitiæ & desiderii externa signa. Nunquam autem audieram aut observaveram suspiria ex repletione ventriculi oriri; sed hoc cum sit, puto fieri ex motu, quo natura utitur ad ciborum succum per cor citius transmittendum, ut ventriculus iis citius sublevetur; suspiria enim pulmonem agitando faciunt ut sanguis qui in eo continetur citius defluat per arteriam venosam in ventriculum cordis sinistrum, & sic novus sanguis ex ciborum succo, è ventriculo per jecur & cor ad pulmonem usque affluente, conflatus in illum facilius admitti possit.

Quantum ad remedia adversus passionum excessus, fateor quidem illorum praxim esse difficilem; imo & non posse illa sufficere inordinationibus, quæ in corpore accidunt, præcavendis, sed solum illorum ope obtineri posse ut anima non turbetur, suumque judicium liberum retineat; quod ut fiat nequaquam existimo opus esse ut cujuslibet rei veritatem accurate perspectam habeamus, imo neque ut casus omnes possibiles sigillatim prævideamus, quod esset sine dubio impossibile; sed in universum satis est concepisse casus iis qui occurrere solent graviore, sequæ ad illos perferendos comparasse. Existimo etiam haud tere peccari optando vehementius res ad vitam necessarias; malarum tantum aut supervacanearum desideria modum requirunt. Quæ enim ad bonum tantum tendunt, quo vehementiora, eo mihi meliora videntur; & quanquam defectui meo indulgere voluerim, languorem nescio quem inter excusabiles passionem recensendo, longe tamen pluris facio eorum sedulitatem, qui cum ardore se semper gerunt ad ea, quæ sui aliquomodo officii esse credunt, facienda, licet inde parum sperent emolumentum.

Vitam duco tam solitariam, & à rerum administratione usque adeo alienus semper fui, ut non minus absurdus forem, quam iste Philosophus, qui coram Hannibale ducis officio fungi volebat, si hic aggrederetur regulas in vita civili observandas tradere; neque dubito quin ea, quam Celsitudo tua proponit, sit omnium optima, nempe satius esse ex experientia quam ex ratione in hoc se gerere; quia raro res habetur cum hominibus perfecta ratione utentibus, cujusmodi oporteret homines omnes esse; ut ex sola officii illorum consideratione, certo constare posset quid essent facturi: & plerunque optima consilia non sunt felicissima. Quare necesse est se fortunæ credere, quam votis tuis æque facilem opto, atque ego sum, &c.

EPISTOLA XII.

Ad Elizabetham Principem Palatinam, &c.

*De languore in agendo, impediēte nonnunquam quominus ea exequamur,
quæ judicium nostrum probavit.*

Oblata occasione tradendi hanc epistolam Domino Beclino mihi amicissimo, & cui non minus quam mihi ipse confido, libertatem summo confitendi per has errorem gravissimum, quem in Tractatu de passionibus admisi, quatenus ut negligentiae meae blandirer, retuli inter excusabiles animae commotiones, nescio quem languorem, qui nonnunquam impedit quo minus ea exequamur, quæ judicium nostrum probavit. Mihi autem scrupulum iniecit majorem, quod meminerim Celsitudinem tuam hunc locum observasse, quasi significasset se non improbare praxim ejus in re, in qua haud video quomodo utilis esse possit. Fateor sane magnam esse causam cur ad deliberandum spatium sumamus, antequam res magni momenti aggrediamur. Verum post inceptum aliquod negotium, & postquam de summa rei conventum est, haud video utile esse, ut de conditionibus disputando procrastinationes quæramus. Nam si res nihilominus utcunq; successerit, parva omnia emolumenta, quæ inde forsan accesserint, minus prosunt, quam nocere possit fastidium, quod ejusmodi tergiversationes afferunt; sin vero minus successerit, aliud non efficitur, quam ut omnibus palam fiat fuisse nobis consilia, quibus impares fuerimus: præterquam quod longe sæpius contingit, ut tergiversando elabatur exequendi tempus, cum inceptum bonum est, quam cum malum. Quare mihi persuadeo facilitatem animi & promptitudinem in deliberando virtutes esse in inceptis perquam necessarias; neque est quod metuat quis, id quod ignorat, sit enim plerumque ut ea, quæ maxime formidavimus, antequam nobis innotescerent, sint meliora optatis; itaque optimum est in hoc providentiæ divinæ fidere, seque illi credere. Certus sum Celsitudinem tuam mentem meam, licet pessime expressam optime assequi, teque summo studio, quo ad hoc scribendum adducor, ignoscere. Sum enim quantum quis esse potest, &c.

E

E P I

EPISTOLA XIII.

Ad Elizabetham Principem Palatinam, &c.

Animadversiones in librum de Principe à Machiavello conscriptum.

LEgi librum de quo Celsitudo tua iussit ut meam tibi sententiam rescriberem, & plurima quidem in eo præcepta reperio, quæ iudicio meo optima sunt, ut nominatim in 19 & 20 capitibus: *Debere semper Principem subditorum suorum odium & contemptum declinare*; item, *Amorem populi præstantiorem esse quibusvis propugnaculis*. Sed plurima etiam in existent quæ probare non possum; & puto in hoc maxime peccare auctorem, quod non satis distinxerit inter Principes qui iustis rationibus principatum quæsierunt, atque eos qui illegitimis artibus occupaverunt; & quod omnibus promiscue ea dederit præcepta, quæ ad hos tantum atinebant. Nam quemadmodum, si ædificii fundamenta tam infirmita ponantur, ut muros altos & crassos ferrè nequeant, muri humiles & debiles necessario superstruendi sunt; sic qui initium potentix à criminibus adepti sunt, crimina plerunque multiplicare coguntur, nec se tueri possunt, si vellent se ad virtutem convertere. De ejusmodi Principibus potuit merito dicere cap. 3. *Non posse illos plurimis odio non esse; atque sæpe esse illis utilis multa mala inferre, quam pauciora, quia leves offensa sufficiunt excitando ultionis studio, graves vero etiam ulciscendi vim adimunt*. Deinde in 15 cap. *Si vellent boni esse, inevitabilem fore illorum perniciem inter tot malos homines ubique terrarum sparsos*. Et cap. 19. *Posse quempiam propter bonas non minui, quam propter malas actiones in odium venire*; quibus fundamentis tyrannica admodum præcepta superstruit: ut e. g. *Depauperandum esse penitus regionem ad securitatem imperii; exercendus magnas crudelitates modico & semel: dandam operam ut Princeps videatur bonus, nec sit; non esse liberandam fidem, nisi quamdiu utile fuerit; dissimulandum, prodendum*: Denique *regnandi causa humanitatem omnem exuendam esse, induendamque ferocissimorum animalium immanitatem*. Sed pessimum est librorum conficiendorum argumentum, ejusmodi præcepta tradenda suscipere, quæ illos nequidem securos præstare possunt, quorum gratia traduntur: nam ut ipse fatetur, non possunt Principes sibi cavere ab eo qui injuriam acceptam ulturus, capitis periculum subire voluerit. Cum contra ad bonum Principem instituendum, quamvis principatum recentem adeptum, mihi videantur contraria prorsus dogmata esse illi proponenda, supponendumque rationes, quibus sibi viam ad imperium struxit,

xit, justas esse; cujusmodi revera credo esse fere omnes, cum à Principibus, qui iis utuntur, tales reputantur, justitia enim inter Principes alios habet limites, quam inter privatos, videturque Deus in hisce casibus jus illis tribuere, quibus vim concessit; sed vel justissimæ actiones sunt injustæ, cum tales ab autoribus habentur. Distinguendum est etiam inter subditos, amicos, sive socios, & hostes; in hos enim fere quidvis audere licet, modo aliquid aut sibi aut subditis emolumenti inde accedat, neque in hoc casu improbo ut vulpina leoninæ affluatur, & vis dolo adjungatur. Imo & omnes illos sub hostium nomine complector, qui vel amici non sunt vel socii, quia licet illis bellum inferre quoties utile fuerit, aut cum crescentes illorum vires suspitionis & metus causas præbuerint. Genus tamen doli excipio quod cum societate tam directe pugnat, ut non credam illius usum esse unquam licitum, quamvis auctori nostro passim probetur, sitque etiam nimis receptus; si quis nempe simulet, se esse eorum amicum quorum perniciem molitur, ut illos eo facilius opprimat. Nimis sacra est amicitia quam ut illa hoc modo abutatur, & qui simulaverit se amare aliquem, ut cum proderet, dignus est postea qui fidem non impetret ab iis, quos vero amore prosequi voluerit, sitque illis odio. Quantum vero ad socios, Princeps debet cum illis fidem sedulo servare, etiam cum ipsi detrimentosum fuerit, nequit enim tantum esse ejus damnum, quantum fama standi promissis utilis est; hanc autem famam consequi nequit, nisi in ejusmodi occasionibus in quibus sit illius damnum aliquod: verum in iis rebus quæ summam illi perniciem minantur, jure gentium promisso suo solvitur. Debet etiam magnam prudentiam adhibere antequam obliget fidem, ut possit illam semper liberare. Et quamvis in rem sit maxima finitimorum parte amica uti, credo tamen satius esse non nisi cum minus validis arcta fœdera inire; nam quantumcunque decreverimus servare fidem, haud tamen debet quispiam ab aliis par expectare, sed debet esse apud omnes constitutum, se ab aliis deceptum iri, quotiescunque illis utile fuerit; utile autem esse potest validioribus quoties ipsis visum fuerit, non item minus validis. Subditos quod spectat, duorum sunt generum, Magnates nempe & Populus. Sub Magnatum nomine eos omnes complector, qui fovendis adversus Principem partibus pares sunt, quorum fides illi perspecta admodum esse debet, secus enim omnes Politici consentiunt debere ipsum curas suas omnes ad eos deprimentos convertere, & quatenus rebus turbandis sunt proclives, esse illos hostium loco habendos. Cæteros vero subditos suos quod spectat, debet præ omnibus illorum odium & contemptum declinare.

nare. Quod credo posse illum semper obtinere, modo jus exacte dicat ex eorum consuetudine, hoc est, secundum leges quibus assueti sunt, nec sit rigidior in puniendo, nec remissior in ignoscendo; neque administris suis omnia permittat, sed munere judiciorum maxime odiosorum ipsis relicto, testificetur reliqua sibi curæ esse. Deinde dignitatem suam ita retineat, ut nihil omittat honorum & formularum, quas ipsi debere Populus credit; sed plures non flagitet, nec palam proferat nisi serias suas actiones, aut eas quæ omnibus probari possunt, voluptatibus suis intra privatos parietes cohibitis, iisque nemini onerosis. Denique immutabilis sit, inflexibilis in consiliis, non quidem iis quæ primum secum constituerit; nam cum nequeat omnibus invigilare, necesse est ut capiat consilium, multorumque rationes auscultet, antequam quidquam statuatur. Sed in rebus quas semel apud se statuisse significaverit, inflexibilis sit, etiam si damnosæ ipsi forent; vix enim tam damnosæ esse possunt, quam fama levitatis & inconstantia. Sic etiam improbo capitis 15 axioma hoc, quod cum homines sint admodum corrupti, fieri non potest quin pessum eat ille, qui bonus semper esse velit; & principem ut se tueatur, debere pravis, cum id occasio postulat, consiliis uti; nisi forsan per hominem bonum intelligat supersticiosum & ineptum, qui non audeat die Sabbati prælium committere, & cujus conscientia pacata esse nequeat, nisi Populi sui Religionem immutet: Sed si cogitemus eum esse virum bonum, qui omnia ea facit quæ sua ipsi ratio dicat, certum est satius esse conari ut boni semper simus. Neque etiam credo id quod habetur cap. 19. posse quempiam ob bonas actiones non minus quam ob malas in odium venire; nisi quatenus invidia est quoddam odii genus; sed diversus est ab hoc sensus autoris; neque enim obnoxii sunt Principes vulgi invidia, sed Magnatum tantum aut finitimorum, apud quos eadem illæ virtutes invidiam movent, quæ metum injiciunt. Quare nunquam à recto cessandum est, ad hoc odii genus declinandum; nec potest Principibus ullum odium nocere, nisi illud quod ex injustitia oritur aut superbia, quas ipsis inesse Populus arbitratur. Videmus enim etiam eos qui capitis damnantur, iudices suos plerumque non odisse, cum se morte dignos existimant: & æquo etiam animo perferuntur mala quanquam immerita, cum ad ea inferenda creditur Princeps cogi, atque hoc ipsum dolere: Justum enim habetur ut utilitatem publicam privatæ anteponat. In hoc solum occurrit difficultas, cum Principi incumbit duabus partibus satisfacere, quæ quid æquum sit, diversimode judicant, ut cum Imperatores Romani civibus & militibus satisfacere necesse haberent: quo casu aliquid utrisque concedere æquum est, nec debet

bet quispiam ad sanam rationem subito reducidos suscipere homines rationi infuetos; sed conandum est, siue publicis libellis, siue concionatorum vocibus, siue similibus rationibus illam eis in animum paulatim inducere. Nam, ut verbo dicam, Populus fert quicquid justum esse ipsi suaderi potest, indignatur vero eo omni quod injustum putat; neque Principum superbia, hoc est, autoritatis cuiuspiam, juris, honorum, quos ipsi debitos non existimat, usurpatio, alia de causa ipsi odiosa est, quam quia illam ut injustitiæ speciem interpretatur. Cæterum neque etiam auctoris hujus opinioni assentior in iis quæ in præfatione sua habet, nempe quod quemadmodum quispiam montes delineaturus debet in planitie versari, ut eorum figuram melius videat, ita debere quempiam esse privatæ conditionis, ut officium Principis recte dignoscatur: delineatio enim exhibet tantum ea quæ eminus conspicua sunt, sed præcipuæ actionum Principis rationes sæpe pendent à circumstantiis adeo singularibus; ut nisi quis vel Princeps ipse sit, vel Principis arcanorum diutissime particeps fuerit, impossibile sit illas assequi. Quare essem merito ridendus, si putarem posse in hoc negotio Celsitudinem tuam quidquam à me doceri; neque etiam hoc est mihi propositum; sed solum ut meæ tibi literæ aliquid præbeant oblectamenti, quod ab iis diversum sit, quibus frui poteris in itinere tuo, quod tibi prosperum præcor; ut sine dubio erit, modo Celsitudo tua instituerit hæc axiomata sequi, quæ docent cuiuslibet felicitatem à seipso pendere, & sapientis esse se fortunæ imperio ita subducere, ut licet iis, quæ sese offerunt, commodis amplectendis non desit, tamen minime putet se infelicem esse, si denegentur. Et quia in omnibus rebus permultæ in utramque partem rationes afferri possunt, immorandum esse præsertim earum considerationi, quæ res præsentis nobis probare possunt. Id vero quod minus vitari posse existimo, sunt corporis morbi, quibus Deum oro te eximat, & sum quanto possum cultu, &c.

EPISTOLA XIV.

Ad Ludovicam Principem Palatinam, &c.

Officii ergo.

INter ea quæ me Principi Elizabethæ sorori tuæ devinciunt, hoc etiam refero, quod cum iussisset ut ad se scriberem, voluerit ut per Celsitudinem tuam literæ meæ commearent. Cum enim sciam quantum te

amet, spero literas meas tuarum comites minus molestas fore, magisque lætitiæ allaturas, quam si solæ redderentur; atque etiam quia hoc mihi occasionem præbet, te per has certiores faciendo me esse, &c.

E P I S T O L A XV.

Ad Elizabetham Principem Palatinam, &c.

De iis quæ ad animi lætitiæ conferunt, illamque vi aliqua conciliandi sibi fortunam pollere; cuius rei exemplum Socrates. Machiavelli librum de Principe minus idoneum esse alacritatis quam tristitiæ excitandæ. Præcipuum præceptum discursuum ejus in Tuum Lævium. Indiciū Cartesii de duobus fontibus.

Maxima me gratia Celsitudo tua affecit, quod per tuas ipsius literas renunciatum mihi volueris itineris tui exitum, felicemque tuum adventum in eum locum ubi à consanguineis tuis magnopere & coleris & amaris, viderisquæ mihi tantum possidere bonorum, quantum in hac vita liceat secundum rationem expectare. Perspecta enim rerum humanarum sorte, essemus in fortunam iniquiores, si tam multos ab illa favores flagitaremus, ut nequidem imaginando ægritudinis causa ulla excogitari posset. Dum nulla sunt coram objecta quæ sensus lædant, neque morbo ullo cruciatur corpus, haud ægre potest animus veræ rationi obsequens sibi acquiescere, neque ad hoc necesse habet oblivisci aut abjicere curam dissitarum rerum, satis est ut conetur nulla propter ea, quibus offendi potest, passione affici: quod quidem cum charitate minime pugnat; quia sapissime possumus iis malis quæ absque passione examinamus, remedia melius invenire, quam iis quibus perturbamur. Sed quemadmodum sanitas corporis, & objectorum jucundorum præsentia multum juvant animum in abigendis à se passionibus omnibus quibus est aliquid cum tristitia cognationis, iisque acciendis quæ ad lætitiæ vergunt: sic vicissim lætus animus multum confert ad firmiorem corporis valetudinem, nec non ad objecta præsentia jucundiora efficienda; quin etiam ausim credere interiore animi lætitiæ vi aliqua pollere ad conciliandam sibi fortunam. Nolle equidem hoc ad imbecillioris animi quæmpiam scribere, ne illum in superstitionem inducerem. Sed quantum ad Celsitudinem tuam, hoc unum metuo, ne me nimis credulum factum rideat: nihilominus innumera habeo experimenta, & insuper auctoritatem Socratis, quibus sententiam meam defendam. Experimenta à me sæpius obser-

observata sunt, quod ea quæ alacriter & sine averfatione aggressus sum, mihi ut plurimum feliciter successerint; eousque ut etiam in aleis, in quibus sola fortuna regnat, semper illam æquiores expertus fuerim, cum lætitiæ, quam cum mœroris causas haberem. Et quod vulgo vocant genium Socratis, sine dubio aliud non fuit, quam quod interiores suas propensiones sequi solitus esset, putaretque incepti exitum prosperum fore, quum secretum quendam lætitiæ sensum perciperet; contra vero improspere, quum tristitiæ. Verum est tamen supersticiosum fore eum, qui hisce crederet, quantum ipsum credidisse ajunt; Plato enim refert illum se domi etiam continuisse, quoties genius ejus exeundi consilium non daret. Sed in gravissimis vitæ negotiis, quæ nonnunquam tam dubia occurrunt, ut docere nequeat prudentia quid sit faciendum, mihi videtur valida subesse ratio, cur genii sui consilium quilibet amplectatur, atque utile esse ut cuivis persuasum sit, eorum inceptorum felicem fore exitum, quæ alacriter, & cum ea, quæ lætitiæ plerumque comitatur, libertate suscipimus. Itaque Celsitudinem tuam hortari ausim, ut cum eo in loco sis in quo præsentia objecta nihil injuncti offerunt, velis etiam dare operam, ut animum tuum contentum efficias: Quod hæc ægre posse mihi videris, animum tantum ad præsentia appellendo, nec de negotiis unquam cogitando, nisi iis horis quibus instat Tabellarii discessus. Arbitror autem feliciter factum fuisse quod Celsitudinis tuæ libri nequiverint tam cito afferri, quam illos expectabas; illorum enim lectio minus idonea est alacritati, quam tristitiæ excitandæ; præsertim istius Principum Doctoris, qui cum ipsis ob oculos ponat tum difficultates, quæ in dignitate eorum tuenda occurrunt, tum crudelitates & perfidias, quas suadet, commiserationem potius quam invidiam in Principes concitat apud privatæ conditionis lectores. Errores ejus & meos Celsitudo tua optime notavit. Verum est enim Cæsaris Borgiæ laudandi studio fuisse eum adductum ut generalia axiomata poneret, quibus privatas actiones vix excusandas defenderet; atque ab eo tempore legi ejus in Titum Livium discursus, in quibus nihil mali animadverti; & præcipuum ejus præceptum, videlicet hostes suos penitus extirpandi, aut illos sibi conciliandi, via media prorsus repudiata, est sine dubio semper tutissimum; sed minus generosum cum nulla subest metuendi ratio. Optime etiam Celsitudo tua animadvertit miraculosi fontis secretum in hoc positum esse, quod plurimi egenti, iique forsitan ab aliis, qui lucrum indesperant, nummis corrupti, vires ejus prædicent. Certum est enim nullam esse panaceam. Sed cum permulti de fonte illo potaverint, laudatur ab iis quibus

quibus profuit, de aliis altum est silentium. Utcunque sit vis purgandi, quæ harum scaturiginum uni inest, & color albus una cum dulcedine & refrigerandi vi, quæ in altera reperitur, indicat illas permeare antimonii & mercurii mineras, quæ duo pessima sunt pharmaca, præsertim vero mercurius; quamobrem nollem cuiquam autor esse ut ex illis potaret. Verum multo minus est periculi ex vitriolo & ferro aquarum Spadanarum, quorum illud utrumque maxime commendat quod lientem immittunt; & melancholiam evacuent. Dabit enim veniam Celsitudo tua ut huic epistolæ finem faciam, unde initium, & ut tibi optem potissimum animi tranquillitatem & alacritatem: utpote quæ sint non solum fructus à bonis cæteris expectatus, sed sæpe etiam ratio augendæ facultatis, qua alia bona comparantur; & quamvis nequeam aliter quam votis tibi prodesse, ausim tamen asserere esse me perfectius, quam quemvis alium, &c.

EPISTOLA XVI.

Ad Ludovicam Principem Palatinam, &c.

Officii ergo.

LIteræ mihi à Beclino redditæ me docent esse me Celsitudini tuæ devinctissimum, & dum reputo eas quas scribo & quas accipio, per tam dignas manus commicare, mihi videtur soror tua Princeps imitari summum numen, quod Angelorum ministerio utitur ad excipiendos hominum, Angelis ipsis longe inferiorum, cultus, suaque nobis iussu significanda. Quia vero eam Religionem profiteor, quæ non vetat quo minus Angelos invocemus, quæso liceat mihi gratias tibi agere, & testari hic esse me multo cum studio, &c.

EPISTOLA XVII.

Ad Elizabetham Principem Palatinam, &c.

Continens nonnulla ad Medicinam & Chymiam spectantia, &c.

NUnquam jucundiores à Celsitudine tua literas accepi, quam sunt hæ novissimæ 29 Novembris datæ. Ex illis enim intelligo esse tibi plus
valem.

valetudinis & lætitiæ, quam in te antehac deprehenderim; at vero præter virtutem quæ tibi nunquam defuit, existimo illa esse potissima duo bona quorum vita hæc capax sit. Non refero inter mala levem istum morbum cujus causa Medici suam tibi operam necessariam fore arbitrati sunt; nam licet nonnunquam sit aliquantisper molestus, tamen in ea, ex qua ortus sum regione, tam frequens est in adolescentibus & iis qui firmissimæ sunt alioqui valetudinis, ut videatur esse sanitatis signum & adversus alios morbos tutamen, potius quam morbus. Et praxis quidem Medicos nostros docuit remedia quibus certo depellatur, sed non consulunt ut iis quispiam utatur alia tempestate, quam verita, quia tunc temporis moribus magis apertis, melius tolli potest causa: Itaque non sine causa Celsitudo tua medicamentis uti recusat, præcipue ingruente hyeme tempestate periculosissima, si autem ad ver usque expectaveris, tum poteris levibus quibusdam purgantibus, aut jusculis refrigerantibus, quibus nihil præter herbas in culina notas admisceatur, & abstinendo cibis sale nimio & aromatibus conditis, facili negotio morbum depellere. Posset etiam phlebotomia ad hoc multum conducere; sed quia remedium hoc habet periculi aliquid, & ejus usus frequentior vitam breviorē efficit, non suaferim ut illam adhibeas, nisi ei assueta fueris: Postquam enim quispiam tribus aut quatuor annis continuis eadem tempestate sanguinem mittere consueverit, idem fere quotannis repetere necesse habet. Cautè etiam fecit Celsitudo tua quod noluerit Chymicis remediis uti; nam quantumvis longa experientia illorum vires comprobata fuerint, tamen vel minima in eorum præparatione, etiam cum optime fieri creditur variatio potest illorum qualitates ita immutare, ut non remedia sint, sed venena. Eodem fere modo se habet scientia in eorum manibus, qui illam non bene docti volunt explicare: Dum enim student aut corrigere quæ didicerunt, aut aliquid iis addere, illam in errorem corrumpunt. Huius rei argumentum mihi videre videor in Regii libro, qui tandem in lucem prodit; cujus capita quædam hic notarem, si quidem putarem fuisse transmissum ad Celsitudinem tuam; sed tam longe distans est hic locus à B. ut judicem autorem expectaturum donec redeas, ut illum tibi offerat; atque ego etiam usque eo differam, ut meam de illo sententiam tibi aperiam. Minime miror quod Celsitudo tua nullos in ea, in qua est, regione doctos reperiât, qui non sint erroribus Scholæ penitus præjudicati; video enim etiam Parisiis & in reliqua Europa, tam paucos alios esse, ut si id antea scivissem, nil fortasse unquam fuisset editurus. Manet tamen hoc solatium, quod, quanquam certus sim non defuisse quamplurimis animum

manus mecum conferendi, nemo tamen adhuc in arenam descenderit; imo & honorificas literas à Patribus Iesuitis accipio, quos eos esse semper existimavi, qui putarent sua maxime interesse ne nova Philosophia divulgaretur, quique mihi minus parcerent, siquid cum ratione in ea carpi posse arbitrarentur. Refero autem inter Celsitudinis tuæ de me bene merita promissum, quo te obstrinxisti Duci B. qui habitat W.S. mea illi scripta te communicaturam; nullus enim dubito quin, nisi tu in istam regionem profecta fuisses, ignotus ibi prorsus essem; haud tamen ambio plurimis innotescere, cujus summa nimirum ambitio est testari posse quod sum, &c.

EPISTOLA XVIII.

Ad Ludovicam Principem Palatinam, &c.

Officii erga.

QUam admirationem sui & venerationem Angeli in eorum, quibus apparent, animis efficiunt, eandem prorsus in me effecit epistola, quæ cum Principis sororis tuæ literis mihi à te reddita fuit; tantumque abest ut opinionem, quam de te conceperam, minuerit, ut contra me certiore faciat non solum Celsitudinis tuæ vultum dignum esse qui cum Angelis conferatur, & quem ad illos representandos Pictores delineent, sed etiam ingenii tui lepores ejusmodi esse, ut illos mirari jure possint Philosophi, & assimilare divinorum istorum geniorum dotibus, qui totum ad benefaciendum propendent, quique non dedignantur iis qui sunt ipsis devoti prodesse. Quæso ergo credas, &c.

EPISTOLA XIX.

Ad Elizabetham Principem Palatinam, &c.

Conqueritur de calumniis Leydensis cujusdam Professoris.

QUanquam forsan multa erunt quæ me ad manendum in Gallia; quando illuc pervenero, invitent, nihil tamen ob stare poterit quin ante hyemem revertar, modo vita mea & sanitas maneant, cum epistola qua me Celsitudo tua dignata est, spem faciat, se sub finem ætatis redituram

dituram Hagam. Hoc sane potissimum est in causa cur hic quam alibi habitare malim; nam quantum ad quietem, quam huc veneram quasitum, prævideo fieri non posse ut illa imposterum, quantum optassem, integra fruam, quia mihi nec fuit, quantum par erat, satisfactum pro injuriis Ultrajecti acceptis, & video novas parari à Theologorum Scholasticorum turba, qui ut me calumniis opprimant, unanimiter conspirasse videntur; ita ut dum omnem movent lapidem quo mihi noceant, promptum foret illis aliquam mihi injuriam afferre, nili defensionis meæ invigilarem. Hujus rei argumentum est, quod tribus abhinc aut quatuor mensibus, quidam ex Leydensium Theologorum Collegio Regens, nomine Revius, quatuor diversas in me theses ventilandas proposuerit, quibus Meditationum mearum sensum perverteret, & suaderet absurdissima in illis haberi & gloriæ Dei contraria; e.g. dubitandum esse, an sit Deus aliquis, imo & velle me ut quis ad tempus absolute neget, Deum esse, & similia. Verum quia homo iste imperitus habetur, adeo ut auditorum pars magna calumnias ejus rideret, amici quos Leydæ habebam, haud existimabant operæ esse monere me quid illic ageretur, donec aliæ etiam theses à Trigl. conscriptæ fuissent, in quibus hæc verba habentur. . . . , unde amici mei, quorum nonnulli etiam Theologi, judicaverunt hominum istorum me blasphemiam accusantium consilia eo spectare, ut opiniones meas in synodo aliqua ubi validiores sint, tanquam perniciosissimas damnandas primum curent, contumeliosum deinde quidpiam, per Magistratus, qui in ipsos credunt, in me aufuri; atque ut irem hisce obviam, operæ esse ut eorum me consiliis opponerem. Quare prolixam ad Leydensis Academiæ Curatores epistolam hac hebdomade scripsi, in qua illorum justitiam imploro adversus duorum istorum Theologorum calumnias. Nescio adhuc quale responsum sim habiturus, sed quatenus hominum hujus regionis ingenium novi, & quantum venerationem non probitatem & virtutem, sed barbam, vocem & supercilium Theologorum, ita ut qui magis perfriatæ sunt frontis & loquaciores, autoritate (quod plerumque fit in Democratiis) hic antecellant, quantumvis à ratione alieni; quædam tantum ab illis emplastra expecto quæ, causam mali cum non tollant, illud tantum diutinum magis & molestum efficiant: Cum ego contra partes meas esse putem totis viribus anniti, ut integram pro hisce injuriis, atque eadem occasione pro Ultrajectinis satisfactionem consequar; quod si jus obtinere nequeam, (prævideo autem vix ac ne vix quidem posse obtineri) esse mihi ex hisce provinciis penitus concedendum. Sed quia omnia hic admodum lente procedunt, sine dubio elabatur minimum annus,

nus, antequam id fiat. Non auderem de hisce minutis ad Celsitudinem tuam scribere, nisi ex eo quod digneris legere libros Domini de Hoglelande & Regii, ob hoc unum quia aliquid quod me spectat, scripserunt, colligerem tibi ingratum non fore mea ex me ipso intelligere. Præterquam quod obsequio & veneratione, quam tibi debeo, meorum tibi actionum rationem reddere teneor. Gratias ago Deo quod Doctor iste, cui Celsitudo tua Principiorum meorum librum commodavit, à te invictenda diu abstinerit, argumentum enim est nullos esse in Principis Electricis aula ægrotos; videmur autem perfectiorem valetudinis gradum obtinere, cum in loco, in quo agimus, valent omnes, quam cum infirmis cingimur. Quin & eo plus otii erit isti Medico ad librum istum perlegendum, suumque de illo iudicium eo melius ferre poterit. Dum hæc scribo redduntur mihi literæ ex Haga & Leyda, ex quibus intelligo dilatatam fuisse Curatorum congregationem, ita ut literæ meæ illis redditæ non fuerint; & video rem nullius momenti magno apparatu agi. Dicunt Theologos huiusce rei iudicium sibi arrogare velle, hoc est inquisitionem Hispanica duriorem in me hic instituere, meque Religionis suæ adversarium declarare; qua in re vellent ut legati Galliæ & Principis Auriaci auctoritatem adhiberem, non ad jus impetrandum, sed ad intercedendum, & prohibendum ne inimici mei ulterius progrediantur. Puto tamen me hoc consilio non usurum; jus tantum petam, quod si mihi denegetur, satius erit discessum meum placide adornare; sed quicquid consilii capiam, aut aggrediar, nihil erit mihi unquam antiquius, quam iussis tuis morem gerere & testificari quantum sim, &c.

EPISTOLA XX.

Ad Elizabetham Principem Palatinam, &c.

Officii ergo, occasione discessus ejus in Galliam, ad conciliandam amicitiam inter Principem Palatinam & Reginam Sueciæ.

CUM non liceat mihi iter facienti per Hagam in Galliam iussa tua capessere, visum est esse officii mei hæc lineolas exarare, quibus Celsitudinem tuam certiores faciam studium erga te cultumque meum, mutato licet cælo, mansurum. Accepi biduo abhinc literas ex Suecia ab eo, qui Regis Galliæ nomine legati munere ibi fungitur, in quibus quaestionem mihi proponit nomine Reginæ, cui fecit ut innotescerem, ostendendo

dendo illi responsum meum ad quasdam superiores ejus literas. Modus autem quo hanc Reginam describit, una cum sermonibus quos ex illa refert, tantum mihi de illa opinionem injiciunt, ut mihi videamini altera alterius commercio dignæ; habetque reliquus orbis tam paucas vestræ dignas, ut difficile non foret Celsitudini tuæ arctam cum illa amicitiam contrahere; quod quidem præter animi oblectationem, quam inde tibi percipere liceret, esset variis de causis forsan optandum. Scripseram antehac ad amicum istum meum, quem in Suedia legatum agere dixi, respondendo ad literas in quibus de illa Regina sermonem faciebat, non esse apud me incredibile id quod de illa scribebat, cum ex Celsitudine tua, quam noveram, exploratum haberem quanto intervallo ii qui sunt natalibus clari, possent alios superare, &c. sed non memini an hoc in iis haberetur, quas ille Reginz ostendit, an vero in superioribus aliis; & quia verisimile est eum in posterum ostensurum illi literas quas à me accipiet, conabor aliquid semper iis inferere, quod Celsitudinis tuæ familiaritatis illi desiderium moveat, nisi prohibueris. Impositum fuit silentium Theologis qui mihi nocere studebant, sed adulando illis, & quantum fieri poterat cavendo nequa ratione offenderentur, quod jam tribuitur temporis; sed vereor ne temporis hujus nullus sit futurus finis, illisque tantum indulgeatur, ut tandem intolerabiles evadant. Editio Gallica Principiorum meorum absolvitur, & quia postrema excudetur epistola, ejus ad Celsitudinem tuam exemplum mitto, ut si quid occurrat, quod tibi minus arrideat, aut immutandum videatur, id monitum me velis, &c.

EPISTOLA XXI.

Ad Elizabetham Principem Palatinam, &c.

Monita circa morbum quandam.

NON poterat iter meum in fausto ullo casu turbari, cum felix adeo fuerim ut mei interea memor esset Celsitudo tua: Humanissima illa epistola quæ hoc mihi probat, est preciosissima omnium, quas possem in hac regione accipere. Nihil mihi ad felicitatem defuisset, nisi ex illa intellexissem morbum, quo Celsitudo tua confictebatur antequam Haga discederem, aliquid in ventriculo debilitatis reliquisset. Remedia quæ elegisti, dicta nempe & exercitium, sunt sententia mea omnium opti-

ma; præpositis tamen remediis animæ, quæ in corpus sine dubio multum valet, ut probant ingentes illæ alterationes, quas ira, metus, cæteræque passiones in illo excitant. Quod autem spiritus in has vel illas partes, in quibus utiles esse possunt, aut noxii, ab ea dirigantur, id non fit ex voluntate ejus directe, sed solum aliud quid volendo aut cogitando. Corporis enim nostri compages est ejusmodi, ut certas cogitationes certi motus naturaliter consequantur; sic rubor vultus pudorem, lacrymæ commiserationem, risus lætitiâ consequitur. Nullam autem cogitationem noverim quæ ad sanitatem conservandam magis pertineat, quam ut quis animum penitus inducat, corporum nostrorum compagem tam firmam esse, ut cum semel valemus, haud facile in morbum incidere possimus, nisi vel insignis aliqua intemperantia, aut cælum, aut causæ aliæ exteriores nobis nocuerint; & cum ægrotamus, facile posse nos sola vi naturæ restitui, præsertim quamdiu juvenes sumus. Hæc persuasio est sine dubio longe verior & rationi magis consentanea, quam quorundam hominum opinio, qui ex Astrologi alicujus aut Medici conjectura animum inducunt esse sibi tali tempore moriendum, atque ob hoc unum sæpe morbo corripiuntur, & non raro moriuntur; quemadmodum permultis factum vidi. Sed non possem graviter non dolere si putarem Celsitudinis tuæ morbum adhuc durare, & malim sperare te omnino convaluisse; quod tamen ut certo sciam, vehementer cupio reverti in Hollandiam. Intra quatuor aut quinque dies cogito in Pictaviâ aut Armericâ, ubi sunt ea quæ me huc adduxerunt negotia; sed quamprimum illa componere potuero, nil tam cupio, quam ea repetere loca, in quibus Celsitudinem tuam alloqui mihi aliquando contigit. Quanquam enim plurimos hic colam & habeam in precio, nihil tamen vidi quod me detinere queat, Sumque magis quam ut dicere valeam, &c.

EPISTOLA XXII.

Ad Elizabetham Principem Palatinam, &c.

Judicium Cartesii de Regii libro, cui titulus est, Fundamenta Physices.

TRanquillitas qua intelligo Celsitudinem tuam frui in loco in quo agis, vetat ne tuum reditum optare auserim, licet id à me ægre impetrem, præsertim cum nunc temporis Hagæ-Comitum sim; & quia ex tuis 21 Febr. datis video te non esse hic expectandam ante finem ætatis, de-

decrevi iter in Galliam suscipere privatorum meorum negotiorum causa, cum consilio revertendi circa hyemen; neque ante duos menses proficiscar, ut Celsitudinis tuæ iussa interim capessere liceat, quæ in me semper plus valebunt, quam quidlibet aliud. Gratia sit Deo quod perfecta jam valetudine fruaris; sed ignoscas, quæso, si ausim sententiæ tuæ contradicere, qua decrevisti remediis non uti, liberatis manibus morbo, qui illas tentarat. Metuendum est enim tum Celsitudini tuæ, tum Principi forori, ne humores qui se hac via purgabant, tempestatis frigore repressi, eundem verno tempore morbum reducant, aut in alicujus alterius morbi periculum postmodum conjiciant, nisi hoc bona dixerat prævertatur, utendo tantum cibus & potu sanguinem refrigerantibus, & sine violentia purgantibus. Nam quantum ad remedia sive Pharmacopolarum, sive Empyricorum, tam male de illis sentio, ut non ausim cuiquam autor esse, ut illis unquam utatur. Nescio quid ad Celsitudinem tuam de libro Regii scripserim, quod tibi præbeat occasionem quærendi quid in eo observaverim; forsitan meam tibi de illo sententiam non dixi, ne tuum iudicium præverterem, si modo librum jam tum habuisses; sed cum intelligam te non habere, ingenue dicam non mihi videri operæ pretium esse, ut illius legendi laborem Celsitudo tua suscipiat. Nihil de Physica habet præter assertiones meas malo ordine digestas, verisque suis argumentis destitutas, ita ut paradoxæ videantur; & quod in initio habetur, probari nequit nisi ex iis, quæ sub finem occurrunt. Nihil fere de suo intexit, & pauca de iis, quæ non tractavi; sed malam tamen suam fidem eatenus prodidit, quod cum amicitiam erga me profiteretur, & sciret mihi non esse animum ut quod de animalis descriptione composueram, divulgaretur, cōusque ut id ipsi ostendere renuissem, obtendens, quod si semel id vidisset, non posset sibi temperare, quin apud auditores suos hac de re sermonem faceret, multa tamen ut sua de eo sibi arrogaverit. Cum enim rationem invenisset, qua me inscio illius exemplo uno potiretur, descripsit nominatim totum illum locum, in quo de musculorum motu loquor, & considero, exempli gratia, duos ex musculis iis qui oculum movent; quæ quidem de re duas aut tres paginas habet, bis in ejus libro ad verbum repetitas, adeo ipsi placebat hoc plagium; & nihilominus non intellexit quid scriberet, præcipuum enim rei cardinem omisit, nempe spiritus animales, qui à cerebro in musculos defluunt, non posse per eosdem per quos adveniunt, meatus regredi, sine qua observatione quicquid ille scribit, nihil valet; schema autem, quia meum illi deerat, aliud construxit, quod ignorantiam ejus clare arguit. sub

sub prælo librum, in quo reliquum scriptum meum expecto, mutata methodo, transcriptum. Desumpsisset autem sine dubio multa alia, sed auidi illum non accepisse exemplum, nisi cum libri ejus impressio absolueretur. Sed quemadmodum cæco assensu sequitur quicquid me sentire arbitrat de iis omnibus quæ vel Physicam vel Medicinam spectant; sic in Metaphysicis cæco impetu contradicit, de quibus tamen illum rogaveram ne scriberet, quia hæc nihil ad illum attinent, & certus eram nil boni posse illum de hoc argumento scribere. Sed nihil impetravi, & cum non esset illi animus mihi in hoc morem gerere, nil pensi habuit etiam in aliis offensæ causam præbere. Cras tamen feram ad Dominam P. S. ejus libri exemplum, cui titulus est, *Henrici Regii fundamenta Physicæ*, una cum libello quodam amicissimi mei D. de Hogelande, qui contrariam prorsus viam iniit; Regius enim nihil scripsit quod non sit ex me desumptum, quodque insuper mihi non adversetur; alter vero nihil scripsit, quod proprie meum sit, (haud enim credo illum scripta mea unquam legisse) & tamen nihil habet, quod mecum non faciat, quippe qui eadem mecum principia fuerit secutus. Rogabo Dominam L. ut duos hosce libros, qui magni non sunt, adjungi curet primis fasciculis, quos per Hamburgum missura est, iisque adjiciam Meditationum mearum versionem Gallicam, si illam ante profectionem meam accepero, jamdudum enim rescripserunt mihi istam editionem absolutam esse. Vale.

EPISTOLA XXIII.

Ad Elizabetham Principem Palatinam, &c.

Præcepta nonnulla ad valetudinis conservationem spectantia.

NON potui sine dolore summo legere literas, quibus me Celsitudo tua cohonestavit, quod viderem tam raræ & perfectæ virtuti deesse sanitatem & res, quas meretur, prosperas: facileque intelligo ægritudinum multitudinem quæ tibi perpetuo obversantur, quæque sunt superatu eo difficiliore, quod plerumque sint ejusmodi, ut non jubeat recta ratio ut illas directe impugnemus & abigere conemur. Sunt illæ hostium domesticorum instar, quibuscum habitare coacti, debemus salutem nostræ indefinenter invigilare, ne nobis noceant. Unicum autem hic remedium invenio, ut nempe imaginationem & sensus, quantum fieri potest, ab illis abducamus, iisque, si quando id jusserit prudentia, consideran-

derandis intellectum solum adhibeamus. Hic autem mihi videtur facile deprehendi posse discrimen quod inter intellectum & imaginationem si-
ve sensum intercedit; est enim tam magnum, ut credam hominem, cui ni-
hil alioqui ad beatitudinem deesset, sed qui perpetuo tamen spectaret tra-
gedias, quarum actus omnes functi essent, quique totus esset in obje-
ctorum trilitium & commiseratione dignorum consideratione, sciretque
nihilominus illa ficta esse & fabulosa, ita ut quamvis lacrymas ex oculis
ejus elicerent, ejusque imaginationem commoverent, intellectum ta-
men non afficerent; credo, inquam, hoc unum fore satis ut cor ejus ad se
contrahendum & suspiria emittenda assuefieret; deinde circulatione san-
guinis tardata & segnius procedente, crassiores sanguinis hujus partes se
sibi mutuo agglutinantes possent haud ægre lienem oppilare, se poris ejus
implicando, iisque immorando; partes autem subtiliores agitationem
suam retinentes possent pulmonem alterare, tussimque creare, quæ pro-
gressu temporis admodum periculosa evaderet. E contrario vero homo
cui essent innumeræ & veræ ægritudinis causæ, sed qui tanta cura ima-
ginationem suam ab illis avocaret, ut de illis nunquam nisi rerum neces-
sitate adductus, cogitaret, & reliquum tempus ad eorum tantum obje-
ctorum considerationem conferret, quæ oblectationem & lætitiâ ipsi
afferre possent, (præterquam quod id ipsi perquam utile foret, ut de re-
bus quæ sua referrent rectius judicaret, quippe quod illas absque passio-
ne dupliceret) nullus dubito quin id unum læciendæ ejusdem hominis
valetudini sufficeret, quanquam lien ejus & pulmo pravo sanguinis tem-
peramento ex tristitia inducto, periculose jam pridem affecti fuissent: Præ-
sertim si Medicinæ etiam remediis uteretur ad eam sanguinis partem quæ
obstructiones facit diluendam; ad quod Spadanas aquas utilissimas esse
judico: Maxime vero si illas potando Celsitudo tua observaverit id quod
solent Medici præcipere, videlicet, ut quis liberet mentem suam ab om-
nibus anxii cogitationibus, imo & seriis scientiarum meditationibus,
neque aliud curet, quam ut illos imitetur, qui nemoris virorem, florum
colores, avium volatum & alia id genus aspicientes animum inducunt se
de nihilo cogitare: Quod quidem est tempus non perdere, sed optime
collocare; possumus enim nobis interea satisfacere spe firmioris valetudi-
nis hac ratione recuperandæ, quæ est cæterorum bonorum, quorum hæc
vita capax est, fundamentum. Equidem scio me nihil hic scribere quod
Celsitudo tua in seipso melius non sciat, neque hic theoriam tam diffici-
lem esse, quam praxim; sed gratia summa qua me afficis, dum testaris
non esse tibi ingratum sententiam meam audire, facit ut illam ausim scri-
bere,

bere, imo & adicere quid in me ipso expertus fuerim; morbum nempe fere similem, & quidem periculosiorem remedio de quo jam dixi, sanatum fuisse. Cum enim natus essem matre, quæ paucis post natiuitatem meam diebus obiit morbo pulmonis ægitudinibus nonnullis creato, hæreditariam ab illa tussim contraxeram, & pallidum colorem, qui ultra vicesimum ætatis meæ annum duravit, & ex quo Medici omnes, qui me ante illud tempus viderunt, præmaturam mihi mortem interminati fuerant; sed credo propensionem quæ in me semper fuit, ad obvia quælibet inspicienda ex ea parte, qua mihi iucundiora videri possent, atque ad me ita componendum, ut præcipua mea beatitudo à me uno penderet, in causa fuisse, cur iste morbus, qui mihi veluti connatus erat, paulatim omnino evanuerit. Sum admodum devinctus Celsitudini tuæ, quod sententiam suam mihi aperire voluerit de Equitis Digbæi libro, quem legere non potero donec fuerit Latinitate donatus, quod quibusdam esse propositum, intellexi ex Domino Jonson, qui heri hic erat. Mihi etiam dixit, posse me meas ad Celsitudinem tuam literas per Tabellarios ordinarios mittere, quod alias non fuisset ausus, hancque scribendam distuleram, donec amicus quidam meus, cui illam traderem, Hagam peteret. Vehementer doleo abesse Dominum Pollot, ex quo valetudinis tuæ statum intelligere poteram; sed literæ quæ per Tabellarium Alkmariensem ad me mittuntur, mihi nunquam non redduntur, & cum nihil tam vehementer cupiam, quam ut possim Celsitudini tuæ inservire, nihil est quod me feliciorem præstare possit, quam si tuis me mandatis cohonestaris, &c.

EPISTOLA XXIV.

Ad Elizabetham Principem Palatinam, &c.

Quomodo sedandi sint animi tumultus, qui ex rebus adversis inopinato oriuntur.

Celsitudinem tuam humillime rogo ut mihi ignoscat, si perlectis literis tuis ob morbum tuum dolere nequeam. Animadverto enim in illis tam perspicuas cogitationes, tamque validas ratiocinationes, ut nequeam animum inducere mentem illis concipiendis parem in corpore infirmo habitare. Utcunque sit, cognitio, quam Celsitudo tua testatur se habere morbi, & remediorum quibus iste tuus morbus removeri possit.

fit, me certum facit non defuturam tibi etiam industriam ad illa adhibenda requisitam. Scio equidem impossibile fere esse primis, quos nova in nobis infortunia excitant, tumultibus resistere, quinimo optimorum sæpe ingeniorum affectus quam maxime violentos esse, inque illorum corpus quam vehementissime agere; sed sequenti die sedata per somnum commotione, quam ejusmodi casus in sanguine excitant, mihi videtur posse quilibet animo componendo & tranquillando tum demum operam dare; quod fit incumbendo considerationi emolumentorum omnium, quæ nobis ex eo accedere possunt, quod ut magnum malum pridie respectabamus, nostramque à malis, quæ in eo imaginati fueramus, attentionem avocando. Nulli enim sunt eventus usque adeo tristes, aut vulgi judicio tam absolute mali, quin possit ingeniosus quispiam illos ex aliqua parte intueri, qua ipsi utiles videantur. Et certe potest Celsitudo tua generale hoc ex fortunæ injuriis solatium percipere, quod multum fortasse pertinuerint ad animum tuum eo usque excolendum; quod quidem bonum est imperio anteponendum. Res admodum secundæ præstringunt mentis aciem, atque ita inebriant, ut illæ homines possideant potius, quam ab hominibus possideantur; & quanquam animis tui similibus id non accadat, tamen pauciores ingenii exercendi occasiones suppeditant, quam adversæ; & quemadmodum existimo nullum esse in orbe bonum præter rectam rationem, quod possit dici absolute bonum, ita etiam statuo nullum esse malum ex quo rationis ope aliquid utilitatis percipi non possit. Conatus sum antehac Celsitudini tuæ suadere otium, quod putarem nimis seriis occupationibus debilitari corpus, ex animi labore; sed nollem ideo suadere ut abjicias curas necessarias ad abducendam cogitationem ab objectis quæ te tristitia afficere possunt; neque etiam dubito quin studii oblectamenta, quæ aliis admodum laboriosa forent, possint tibi recreationis loco nonnunquam esse. Felicem me duxerim, si quid ad ea faciliora efficienda conferre possim, & longe vehementius cupio Hagam petere, ut addiscam quæ sint Spadanarum aquarum vires, quam horti mei plantarum vires hic experiri, aut curare quid Groningæ & Ultrajecti pro me aut contra statuatur: Quare intra quatuor aut quinque dies hanc epistolam sequar, & maneo, &c.

EPISTOLA XXV.

Ad Elizabetham Principem Palatinam, &c.

Rationes propter quas à Tractatu de Eruditione conscribendi abstinuerit.

ACcepi Cellitudinis tuæ literas 23 Dec. datas, eodem fere tempore quo superiores; & fateor nescire me quid sim ad superiores illas responsurus, quia Cellitudo tua in illis scribit velle se ut tractatum de Eruditione, de quo apud illam sermonem aliquando feci, conscribam; nec enim certe quidquam vehementius cupio, quam iussis tuis, morem gerere. Sed dicam hic rationes quamobrem de tractatu hoc conscribendo consilium abjecerim, quæ si Cellitudini tuæ non satisfaciant, illud instaurabo. Prima est, quod nequeam omnes, quas res postulat, veritates in eo exponere, quin Scholasticos contra me supra modum irriterem, non sum autem in ea conditione ut eorum odium possim prorsus contemnere. Altera est, quod eorum, quæ in illo tractare mihi propositum erat, nonnulla attigerim in præfatione, quæ Gallicæ Principiorum meorum versioni, quam puto Cellitudinem tuam accepisse, præfixa est. Tertia est, quod aliud jam præ manibus scriptum habeam, Cellitudini tuæ non minus fortasse placiturum, animalis nempe & hominis functionum descriptionem. Quod enim duodecim abhinc aut tredecim annis tumultuario de hoc scripseram, quodque à Cellitudine tua visum fuit, cum venerit in plurimorum manus qui illud male exscripserunt, credidi mea interesse, ut illud emendatius facerem, hoc est, incudi redderem; imo & ausus sum octo tantum abhinc aut decem diebus aggredi explicationem modi quo ab ortus sui principio animal formatur; animal, inquam, in genere: hominem enim in particulari, non audeo, deficientibus me ad hoc experimentis. Cæterum reliquam hanc hyemem reputo, ut maxime vacuum & solutum tempus quod mihi per totam fortasse vitam continget; id quod in causa est ut malim illam huic studio, quam aliis quæ minus attentionis requirant, impendere. Ideo autem metuo ne mihi imposterum minus otii suppetat, quod negotiis domesticis plurimisque de causis cogar ætate proxima in Galliam reverti, ibique proximam hyemem agere. Hoc etiam honore ibi affectus sum, quod pensio annua fuerit mihi non roganti nomine Regis oblata; quod tamen me detinere non poterit; sed multa potest ferre annus, nec tamen quidquam obstare poterit, quo minus felicitatem vivendi in eodem cum Cellitudine tua loco, patriæ propriæ,
aut

aut cuius regioni data occasione anteponam. Non expecto ante longum tempus responſionem ad Epistolam de summo bono, quia Amſtedami detenta ſuit ſere per menſem culpa illius ad quem illam miſeram Stokholmum mittendam. Sed quamprimum reſponſum accepero, faciam ut id Celſitudo tua reſciat: Nihil novi in illa habebatur, quod dignum eſſet ut ad te ſcriberetur. Accepi ab eo tempore nonnullas ex iſta regione literas, & ſi vera ſint quæ de Regina ad me ſcribuntur, oportet illam eſſe virtutis amiſſiſſimam & acerrimi iudicii; nunciant etiam ſe oblaturos illi Principiorum meorum verſionem, quorum primam partem cum voluptate lecturam illam aſſirmant, cæteris non imparem, ſi ipſi per negotia liceret. Mitto ad te cum hac epiſtola libellum non magni momenti, quem tamen in eundem faſciculum non conjicio, quia tanti non eſt ut vecturæ pretium compenſet. Illum conſcripſi injuriis Domini Regii lacelſitus, ſuitque impreſſus opinione mea citius; imo & adiuncti ſunt verſus & præſatio, quæ quidem non probo, quanquam verſus autorem habent Dominum Hey, ſed nomen ſuum apponere non auſus eſt, ſicut etiam revera non debuit, &c.

EPISTOLA XXVI.

Ad Elizabetham Principem Palatinam, &c.

Illos, qui in maximo ſplendore vitam agunt, commiſeratione potius quam invidia dignos eſſe.

ACcepi tandem ternas literas quibus me Celſitudo tua cohoneſtavit, mihiſque inviolatæ redditæ ſunt; ſed cum earum primæ tricelſimo Junii datæ, Pariſios fuiſſent perlatæ dum regionem hanc repeterem, ii qui illas meo nomine acceperant, expectaverunt ut de reditu meo certiores fierent, antequam illas ad me transmitterent, atque ita factum eſt, ut ante hodiernum diem mihi redditæ non fuerint, quo etiam accepi recentiſſimas tuas 23 Aug. datas, ex quibus intelligo contumelioſum illum agendi modum, quem miror; crediderim autem cum Celſitudine tua illius autorem eum non eſſe quem dicunt. Utcunque ſit, non exiſtimo eſſe cur quiſpiam ægre ferat, quod ejuſmodi iter non inſtituat, in quo, ut Celſitudo tua optime advertit, incommoda erant certa, incerta vero admodum commoda. Quod ad me attinet, illud in Galliam Deo gratias, abſolvi, ad quod ſuſcipiendum fueram adactus, nec me pœnitet itineris, ſed magis gaudeo de reditu. Neminem ibi vidi cujus conditio

mihi videretur invidenda, & ii quorum maximus est splendor, mihi visi sunt præ cæteris commiseratione digni. Non potui tempestate ulla proficisci, quæ tranquillæ & solitaria vitæ felicitatem, modicæque fortunæ divitias mihi melius persuaderet. Certe si suam Celsitudo tua fortem cum Reginarum aliarumque Europæ Principum conditione conferrat, eandem inter utramque deprehendes esse differentiam, quæ eorum est, qui in portu quiescunt, & qui in medio mari procella jactati periclitantur; quanquam autem naufragio in portum acti fuerimus, modo tamen suppetant necessaria ad vitam, haud debemus esse tranquillo minus animo, quam si quovis alio modo illuc appulissemus. Inauspicati casus quibus obnoxii sunt, qui in publicæ rei negotiis versantur, & quorum felicitas precaria est, intimum illorum cor transfigunt; cum è contrario venenatus iste vapor ex arboribus sub quibus placide deambulabat Celsitudo tua, diffusus, non infecerit, ut spero, nisi exteriorem cutem, quæ si fuisset aqua vitæ continuo purgata, nihil fortasse mali fuisset inde perpeffura. Nihil literarum quinque abhinc mensibus accepti ab amico, de quo ad Celsitudinem tuam scripseram, & quia in ejus novissimis rationes dabat, cur mihi responsum non fecisset Princeps illa, cui meas ipse reddiderat, judico amici ultius silentium ex hoc tantum proficisci, quod responsum adhuc expectet, aut forsan quod ipsum aliquo modo pudeat responsum non habere quod mihi det, sicuti speraverat. Ego vero similiter nolim ad ipsum prior scribere, ne literis meis videar id ipsum illi exprobrare. De illo tamen, cum essem Parisiis, sæpe audiebam à consanguineis ejus, ad quos singulis hebdomadis literas dabat; sed postquam intellexerit me hic esse, nullus dubito quin ad me scripturus sit, & nunciaturus quicquid de eo noverit quod Celsitudinem tuam spectat, scit enim id mihi esse cordi. Sed quibus non contigit te videre, quique virtutum tuarum singularem admodum cognitionem non habent, vix possunt concipere quod quis tam perfecte esse possit, atque ego sum, &c.

EPISTOLA XXVII.

Ad Elizabetham Principem Palatinam, &c.

*De Caroli I Regis Angliæ cade, & de restitutione Principis Palatini
in partem Palatinatus.*

INter plurimos, qui variis ex locis simul afferuntur, pessimos rumores, nihil me vehementius perculit, quam Celsitudinis tuæ morbus, &c.

& quanquam te convaluiffe etiam intellexim, tamen infident animo meo triftitiæ veftigia haud ita cito delenda. Propenfio ad carmina facienda, quam in fuo morbo Celſitudo tua experta eſt, mihi Socratem revocat in mentem, cui Plato refert fuiſſe ſimilem in carcere impetum. Credo autem poëticum hunc impetum oriri ex vehementi ſpirituum animalium agitatione, quæ corum poſſet imaginationem penitus turbare, quibus minus firmum eſſet cerebrum, ſed quæ firmiora tantum calefacit & ad poëſim diſponit; atque ejuſmodi impetum puto eſſe ingenii ſolidioris & vulgaribus ſublimioris indicium. Si nefeirem huiusmodi eſſe tuum, timerem ne te funcſtus Anglicarum tragœdiarum exitus ſupra modum angere; ſed ſpero Celſitudinem tuam fortunæ injuriis aſſuetam, & in vitæ periculo non pridem verſantem, haud ita turbatam iri, audita unius ex conſanguineis ſuis morte, ac ſi nullas antea calamitates fuiſſet perpeſſa. Et quanquam mors iſta uſque adeo violenta, aliquanto plus terroris præ ſe ferat, quam naturalis; nihilominus ſi recte perpendatur, pulchrior eſt, felicitior & dulcior; ita ut idipſum quod hominum vulgus maxime affligit, debeat eſſe Celſitudinis tuæ ſolacium. Non enim exigua eſt gloria in ea occaſione mori, quæ miſerationem, laudem & deſiderium eorum omnino omnium quibus ineſt humanus aliquis ſenſus, cuiſpiam conciliat. Eſt autem certum quod abſque hoc ſpecimine Regis nuper mortui clementia, cæteræque virtutes, nunquam adeo ſpectatæ fuiſſent & laudatæ, ac ſunt & erunt impoſterum ab iis omnibus, qui hiftoriam ejus lecturi ſunt. Neque etiam dubito quin in noviffimis vitæ ejus momentis plus alacritatis conſcientia ejus ipſi attulerit, quam ægritudinis indignatio, quam ſolam inter affectus, quibus eſt aliquid cum triftitia affinitatis, fuiſſe in ipſo deprehenſam ferunt. Quantum vero ad dolorem, illum nullo modo æſtimandum cenſeo: eſt enim adeo brevis, ut ſi homicidæ poſſent adhibere febrem, aliumve morbum lethalem ad necandos homines, non immerito crudeliores habendi eſſent, quam cum illos ſecuri percutiunt. Sed non auſim tam funeſtæ materiæ diu inſiſtere, hoc unum addo, longe ſatius eſſe ſpe falſa liberari, quam ea fruſtra lactari. Dum hæc ſcribo mihi redduntur literæ ex eo loco unde ſeptem abhinc aut octo menſibus nullas acceperam; atque inter illas etiam ab ea, ad quam anno abhinc tractatum de paſſionibus miſeram, propria ipſius manu exaratæ, per quas mihi gratias agit. Cum poſt tam longum tempus meminerit mei tam vulgaris hominis, non eſt metus ne Celſitudinis tuæ epiftolis non ſit reſponſura, licet quatuor menſes hætenus diſtulerit. Scribunt mihi illam demandaſſe alicui ex miniſtris ſuis Principiorum meorum ſtu-

studium, qui illorum lectionem ipsi faciliorem sit effecturus; haud tamen puto satis ipsi otii fore, ut ad illa animum appellat, quanquam id velle videatur. Disertis verbis mihi gratias agit pro tractatu de Passionibus; sed de literis quibus erat adjunctus, ne verbum quidem, nec quidquam ex illa regione scribitur quod Celsitudinem tuam spectet. Qua in re aliud conjectura assequi nequeo, nisi quod, cum pacis Germanicæ conditiones sint forsan familiæ vestræ iniquiores, qui ad id contulerunt, dubitant annon sis erga illos male affecta, atque ideo ab amicitia tibi significanda abstinent. Semper sollicitus fui ex quo hæc pax facta est, quod ignorarem an Princeps Elector frater tuus illam accepisset, meamque de hoc sententiam ad Celsitudinem tuam citius scribere fuisset ausus, si suspicari potuissem, hoc ab ipso in deliberationem vocari; sed quia me latent rationes quibus ipse moveatur, temere facerem, si vellem meum hic iudicium interponere. Hoc unum possum in universum dicere, quod, cum de Principatus ab aliis, qui armis superiores sunt, occupati aut petiti restitutione agitur, non mihi videantur ii, qui se sola æquitate & jure gentium teneant, debere unquam sperare se omnia ex voto impetraturos; & potius longe causam esse, cur grati sint erga eos, qui partis ipsis restituendæ sunt autores, quam cur illos oderint qui reliqua retinent; & quamvis nemo possit in malam partem accipere, quod victi de jure suo totis viribus contendunt, quamdiu validiores deliberant, postquam tamen de conditionibus inter illos convenit, puto prudentiæ esse ut præ se ferant esse sibi factum satis, licet revera non sit; & gratias agant non solum iis, qui autores sunt, ut aliquid ipsis restituatur, sed iis etiam, qui omnia ipsis non adimunt, ut utrorumque hac ratione amicitiam sibi concilient, aut saltem odium declinent; id enim ad se postea tuendum conferre multum potest. Præterquam quod à promissis ad effecta magnum sit adhuc intervallum; & si validioribus inter se solis conveniat, facile sit rationes invenire, cur inter se partiantur id quod fortassis non nisi ex mutua tantum invidia alii cuipiam reddere voluissent, ne nimis potens evaderet, qui ejus spoliis fuisset locupletandus. Minima pars Palatinatus præstat Tartarorum aut Moscovitarum imperio, & post biennalem aut triennalem pacem nulli regioni amœnitate cedit. Quod ad me attinet qui nulli loco sum alligatus, hæc provincias ipsamve Galliam ista regione facile commutarem, vel sola loci amœnitate adductus, modo ut quiete æque tuta illic frui liceret. Sed nullus est in orbe locus, quantumvis ingratus aut incommodus, in quo me felicem

non

non arbitrarer reliquos vitæ dies acturum, modo in eo esset Celsitudo tua, possemque illi utcumque inservire; sum enim totus, &c.

EPISTOLA XXVIII.

Ad Elizabetham Principem Palatinam, &c.

Officii perfunctio occasione sumpta ex morbo sua Celsitudinis. In quo consistat differentia fortis animi ab humili & gregario. Præcepta contraries adversas.

STupui admodum cum intelligerem ex literis Domini P. Celsitudinem tuam diu ægrotasse; & solitudinem meam odi, quippe causam cur id citius non resciverim. Certe quamvis ita sim ab orbe divitus, ut eorum quæ in eo aguntur nihil audiam, tamen quo sum erga Celsitudinem tuam animo, non potuissem valetudinis tuæ tamdiu incertus esse, quin Hagam petiissem de ea percontaturus, nisi Dominus P. duobus abhinc aut circiter mensibus festinanter scribens pollicitus fuisset se iterum daturum ad meliteras per proximum Tabellarium; & quia solet de Celsitudinis tuæ valetudine certiorē me facere, putavi dum nullas ab illo acciperem, te in eodem statu semper esse; sed ex novissimis ejus intelligo Celsitudinem tuam per tres aut quatuor hebdomadas cum febris lenta, nec non sicca tussi conflictatam fuisse, quibus cum per quinque aut sex dies fuisses liberata, morbum recruduisse, & tamen quo tempore scriberet literas suas (quæ nonnisi post quatuordecim fere à scriptione dies mihi reddita fuerunt) Celsitudinis tuæ morbum iterum in melius vergere. Qua in re ægrotantem video tam periculosi morbi, & cui mihi videtur Celsitudo tua tam certo mederi posse, ut nequeam abstinere quo minus meam de hac re sententiam ad te rescribam. Quamvis enim non sim Medicus, tamen spero libertatem meam non fore tuæ Celsitudini ingratam, cum volueris æstate superiori meam de alio, quo tum tenebaris morbo, sententiam rescire. Lentæ febris causa, ut plurimum est tristitia: Fortunæ autem in familia tua afflicta pertinetia tam multas tibi præbet perpetuo, tamque publicas & luculentas ægritudinis causas, ut absque multa conjectura, aut experientia possit quispiam conjectare hinc derivari præcipuam morbi tui causam; est autem periculum ne penitus removeri nequeat, nisi virtutis tuæ vi animum tuum ita comparaveris, ut invitis fortunæ injuriis sis contenta. Equidem scio inconsultum

H

fore

fore lætitiā suadere velle homini, cui novas quotidie ægritudinis causas fortuna immittit, neque sum ex inhumanis istis Philosophis, qui sapientem suum omnis passionis expertem velint. Scio etiam Celsitudinem tuam non tam privatis, quam familiæ & amicorum rebus adversis affici; quod ut virtutem præ cæteris amabilem colo. Sed mihi videtur differentia fortis animi ab humili & vulgari in hoc potissimum consistere, quod hic passionibus suis se permittat, nec felix sit aut infelix, nisi prout ipsi contigerint res grata aut ingrata; cum ex adverso fortis tam validis tamque efficacibus rationibus utatur, ut licet affectus habeat, imo & sæpe vulgaribus violentiores, ratio tamen semper domina maneat, ita ut calamitates ipsæ ad perfectam, qua in hac jam vita frui datur, felicitatem conducant. Hinc enim se ut immortales considerando summarumque voluptatum capaces, inde autem se mortalibus & caducis corporibus multis infirmitatibus obnoxiiis, paucosque intra annos perituris, conjunctos esse, nihil quidem omittunt, quo fortunam sibi in hac vita æquam reddere conentur; sed illa tamen respectu æternitatis non est illis tanti, quin ejus non secus quam comædiarum exitum spectent. Et quemadmodum tristitia & lugubria scenarum spectacula nos sæpe non minus delectant quam læta, licet lacrymas ex oculis nostris eliciant; sic fortiores illi, de quibus loquor, animi ex casibus suis omnibus etiam gravissimis voluptatem arcanam percipiunt. Sic dolorem in corpore suo sentientes, se in illo patienter ferendo exercent, estque ipsis volupe suas ita vires experiri. Sic amicorum casus, si quando ingruunt graviore, dolent quidem, utque illis eos expediant nihil intentatum relinquunt, imo si res id poposcerit, se morti objicere illorum causa non detrectant; sed officii in hoc præstiti, actionisque laudabilis & honestæ conscientia reficit illos magis, quam deiecit tristitia ex commiseratione orta. Denique quemadmodum rebus maxime lætis nunquam inebriantur aut insolescunt, sic neque etiam adversis deprimuntur, aut ægritudini tantum indulgent, ut ex eo corpus quicum conjuncti sunt, in morbum incidat. Metuerem ne ratiocinium hoc risum commoveret, si eo apud alium aliquem uterer; sed quia Celsitudinis tuæ animo nullum novi nobiliorem aut sublimiorem, summam etiam felicitatem ipsi deberi arbitror, eaque te potituram spero, modo velis oculos in ea, quæ infra te subsidunt conijcere, & bonorum quæ possides, quæque tibi adimi nequeunt, valorem conferre, aut cum iis quibus te spoliavit fortuna, aut cum injuriis quibus te in consanguineis tuis insequitur; tum enim videbis quantum causæ sit, cur propriis bonis contenta esse debeas. Summum quo te prosequor

sequor studium me in hunc discursum rapuit, quem excusatum habeas quæso, quippe profectum ab homine tibi devotissimo, &c.

EPISTOLA XXIX.

Ad Elizabetham Principem Palatinam, &c.

De conjunctione animæ & corporis, & de potentia agendi in se invicem.

GRATIA qua me Celsitudo tua cohonestavit, sua ad me iussa scripto transmittendo, major est quam ausus fuisssem sperare; meosque defectus melius sublevar, quam id quod vehementer cupieram, cum nuper Hagæ-Comitum essem, ut illa nempe coram acciperem, si ad te salutandam admitti licuisset: mihi enim nimis multa simul ac semel fuissent miraculo, & discursus plusquam humanos audiendo, proficiscentes ex corpore eorum consimili, quibus Pictores Angelos induunt, incessisset me admiratio, non secus quam eos, qui ex terra recentes in cælum invenerunt: Quod quidem me ad respondendum Celsitudini tuæ minus idoneum fecisset, jamque hanc in me imbecillitatem, cum te antehac alloquerer, sine dubio deprehendisti; quam ut clementia tua sublevaret, cogitationum tuarum vestigia chartæ commisitisti, in qua illas sæpius relegendo, illarumque considerationi assuescendo, minus quidem præstringor, sed magis tamen crescit earum apud me admiratio, quatenus non solum prima fronte ingeniosæ, sed & eo solidiores & sagaciores videntur, quo accuratius examinatæ. Certe enim possum sincere dicere, quæstionem, quam mihi tua Celsitudo proponit, eam videri, quæ post scripta mea perfecta optimo jure proponi possit. Nam cum duo sint in anima humana, ex quibus pendet tota cognitio, quam de ejus natura habere possumus, quorum unum est quod cogitet, alterum quod unita corpori possit cum illo agere & pati, nihil fere de hoc posteriore dixi, & priori tantum explicando studui; quia præcipuum meum institutum erat probare distinctionem, quæ inter animam & corpus intercedit, ad quod prius tantum illud conducere potuit, hoc vero obfuisse. Sed quia Celsitudo tua tam perspicax est, ut nihil dissimulari patiat, conabor hic explicare modum quo animæ & corporis conjunctionem concipio, & qua ratione possit illa hoc movere. Primo adverto inesse nobis notiones quasdam primitivas, quæ sunt veluti archetypæ, ad quarum exemplar cæteras nostras cognitiones formamus. Paucissimæ autem sunt ejusmodi no-

tionem: Nam post generaliores entis, numeri, durationis, &c. non habemus pro corpore nisi notionem extensionis, ex qua figura & motus notiones oriuntur, pro anima vero sola non habemus nisi cogitationis notionem, in qua perceptiones intellectus, & voluntatis inclinationes continentur; denique pro anima & corpore simul non habemus nisi illorum conjunctionis notionem, ex qua pendet notio facultatis illius qua pollet anima ad movendum corpus, necnon facultatis ejus quæ inest corpori ad agendum in animam, sensus videlicet illius & passionem præducendo. Adverto insuper totam hominum scientiam in hoc uno positam esse, ut hæ notiones recte distinguantur, ita ut non tribuatur illarum quælibet nisi rebus iis ad quas pertinet. Cum enim difficultatem aliquam explicare volumus ope notionis alicujus quæ ad illam non pertinet, non possumus non falli: quemadmodum etiam cum volumus harum notionum unam per alteram explicare; cum enim primitivæ sint, non potest illarum quælibet nisi per seipsam intelligi. Quia autem sensuum usus reddidit nobis extensionis, figurarum & motuum notiones longe magis familiares quam cæteras, præcipua errorum nostrorum causa est, quod hæc plerunque notiones adhibeamus iis, ad quas non pertinent, explicandis; ut e. g. cum ad concipiendam animæ naturam imaginationem adhibere volumus; aut cum volumus modum concipere quo anima movet corpus, per eum quo corpus aliquod ab alio corpore movetur. Quare cum in Meditationibus, quas Celsitudo tua legere dignata est, conatus fuerim notiones, quæ ad animam solam pertinent, explicare, illas ab iis distinguendo, quæ ad corpus solum pertinent, post hæc statim venit explicandus modus eas concipiendi, quæ ad animæ & corporis conjunctionem pertinent, absque iis, quæ ad corpus solum, vel ad animam solam referuntur. Ad quod mihi videtur pertinere id quod ad finem mei ad sextas objectiones responsi pag. 409. editionis Amstelodamensis scripsi; non enim possumus notiones hæc simplices alibi quærere quam in anima nostra, quæ natura sua illas in se omnes habet, sed non semper à se invicem distinguit, aut objectis, quibus tribuendæ sunt, assignat: Sic puto nos olim confudisse notionem facultatis illius qua anima agit in corpus, cum notione facultatis qua corpus aliquod agit in aliud corpus; & nos illarum utramque tribuisse, non animæ, (illam enim nondum noveramus) sed variis corporum qualitatibus, ut e. g. gravitati, calori & reliquis; quas reales esse imaginati sumus, hoc est, existentiam habere ab existentia corporum distinctam, & proinde substantias esse, licet qualitarum nomine illas insignierimus. Atque ad illas concipiendas usi sumus nunc notionibus

nibus quæ ad corpus, nunc vero iis quæ ad animam cognoscendam nobis insunt; prout materiale fuit aut immateriale id quod illis tribuimus, e. g. supponendo gravitatem esse qualitatem realem, de qua aliud non novimus, nisi quod vi polleat impellendi versus terræ centrum corpus cui inest, nullo negotio concipimus qua ratione illa corpus hoc moveat, aut quomodo illi adjuncta sit; neque id fieri putamus nexu quopiam aut contactu reali superficiei unius cum alia, experimur enim inesse nobis peculiarem ad hoc concipiendum notionem: verum puto nos hac notatione perperam usos fuisse, cum illam assignavimus gravitati, quæ nihil est à corpore realiter distinctum, quemadmodum in Physica demonstraturum me spero, sed nobis inditam fuisse ad concipiendum modum quo anima movet corpus. Si plura adderem, testarer me ignorare eximium Celsitudinis tuæ ingenium, nec temeritate vacarem, si putarem responso meo tibi penitus satisfactum iri: sed utrumque conabor declinare, nihil ultra hic addendo, nisi quod siquid sim scribendo aut dicendo quod tibi possit arridere, maximè semper gratiæ duxerim aut calamum ad hoc sumere, aut Hagam proficisci, nec quicquam mihi antiquius erit quam ut iussis tuis morem geram. Sed locum hic habere nequit juramentum Harpocratis, quod mihi observandum præcipis, cum mecum nihil communicaveris, quod dignum non sit quod omnes videant & admirentur. Hoc tantum dicam quod cum literæ tuæ sint mihi magni, illis utar ut thesauris suis avari, qui illos quo pluris faciunt, eo majori cura recondunt, illorumque aspectum cæteris invidendo, summam suam in eorum contemplatione felicitatem ponunt. Sic illarum contemplatione solus libenter fruatur; nec quicquam magis ambio, quam ut dicar, & sim revera, &c.

EPISTOLA XXX.

Ad Elizabetham Principem Palatinam, &c.

Continuatio præcedentis Epistolæ, de conjunctione corporis & animæ.

Devinctissimus sum Celsitudini tuæ, quod quamvis per superiores experta fueris quam male explicuerim quæstionem à te propositam, digneris adhuc me de eadem materia iterum consulere, & dare occasionem omiſsa observandi; quorum quidem præcipua mihi videntur esse, quod postquam tria idearum sive notionum primitivarum genera

distinxissem, quorum quodlibet peculiari modo, non vero ex mutua comparatione cognoscitur; notiones videlicet, quas de anima, de corpore, deque animæ & corporis conjunctione habemus; explicanda veniebat differentia, quæ inter tria hæc notionum genera intercedit, atque inter animæ operationes, quarum ope illas efformamus, erantque rationes exponendæ, quibus illarum quælibet familiaris nobis & facilis reddatur; deinde data ratione, cur gravitatis comparatione fuerim usus, ostendendum fuerat, quod quamvis possit quispiam animam ut materialem concipere, (quod proprie est ejus cum corpore conjunctionem concipere) nihilominus postea cognoscitur illam esse ab eo separabilem; quod totum est, ut puto, argumentum mihi à Celsitudine tua præscriptum.

Primum igitur adverto, magnam esse inter tria hæc notionum genera differentiam; in eo quod anima seipsam tantum concipiat per intellectum purum: corpus, hoc est, extensio, figura, & motus potest etiam per intellectum solum concipi, sed multo melius per intellectum imaginatione adjutum: Denique ea, quæ ad animæ & corporis conjunctionem pertinent, non nisi obscure per intellectum solum, aut etiam per intellectum imaginatione adjutum cognoscuntur; sed per sensus clarissime; unde fit, ut qui nunquam philosophantur, quique suis tantum sensibus utuntur, non dubitent quin anima corpus moveat, & corpus in animam agat, sed utrumque, animam sc. & corpus, ut unum & idem considerant, hoc est, eorum conjunctionem concipiunt; duarum enim rerum conjunctionem concipere, aliud non est, quam illas ut unum quid conciperé. Cogitationes autem Metaphysicæ, quæ intellectum purum exercent, juvant ad animæ notionem nobis familiarem efficiendam: Mathematico vero studium, quod in figurarum & motuum consideratione imaginationem præcipue exercet, nos assuefacit corporis notionibus distinctissimis formandis: Denique utendo vita & consuetudine communi, & abstinendo à meditatione, & studio rerum, quæ imaginationem exercent, discimus animæ & corporis conjunctionem concipere. Metuo fere, ne Celsitudo tua putet, me hic serio non loqui; sed hoc pugnaret cum veneratione, quam tibi debeo, & cui nunquam deëro. Et certe possum ingenuè profiteri, præcipuam, quam in studiis meis secutus sum, regulam, & quam puto mihi præ cæteris profuisse in cognitione nonnulla comparanda, fuisse, quod paucissimas singulis diebus horas iis cogitationibus impenderem, quæ imaginationem exercent; per annum autem paucissimas iis, quæ intellectum solum; reliquum vero tempus sensibus relaxandis, & animi quieti dederim; imaginationis vero

exerc-

exercitiis annuero etiam colloquia seria, illudque omne, quod attentionem poscit. Hanc ob causam rus concessi; nam quamvis in urbe totius mundi negotiosissima, possem mihi tot horas liberas seponere, quot nunc ad studia confero, non possem tamen illas tam utiliter collocare, fatigato nimirum animo ex attentione ad vitæ strepitum requisita. Quod quidem hic ad Celsitudinem tuam scribo, ut testificer me revera mirari, quod inter negotia & curas, quibus eximia ingenia & Principes nunquam vacui sunt, potueris meditationibus us vacare, quæ ad distinctionem inter animam & corpus recte perspicendam requiruntur. Sed puto ex his Meditationibus potius quam ex aliis cogitationibus, quæ minoris sint attentionis, factum fuisse, ut in notione, quam de illorum conjunctione habemus, obscuritatem inveneris; quia non mihi videtur ingenium humanum posse distincte & simul concipere distinctionem corporis & animæ, eorumque conjunctionem; ad hoc enim concipi debent ut unum quid, & simul ut duo diversa, quod repugnat; atque hæc de causa (supposito quod Celsitudinis tuæ animo præsentibus adhuc sint rationes, quibus animæ & corporis distinctio probatur, nec velim te rogare, ut iis omissis, conjunctionis, quam in se quisque absque Philosophia experitur, notionem tibi repræsentantes, nempe te esse unam personam præditam corpore & cogitatione ita comparatis, ut hæc cogitatio possit corpus movere, atque ea quæ & sibi & corpori accidunt, persentiscere) usus sum comparatione gravitatis, aliarumque qualitaturn, quas corpori unitas esse vulgo imaginamur, haud secus quam cogitatio corpori nostro unita est. Neque curavi quod in hoc claudicaret comparatio, quod hæc qualitates non sint ut vulgo concipiuntur, reales, quia credidi Celsitudini tuæ penitus jam persuasum esse, animam esse substantiam à corpore distinctam. Sed quoniam Celsitudo tua advertit, facilius esse, materiam & extensionem animæ tribuere, quam ejusmodi facultatem, qua ipsa moveat corpus, aut à corpore moveatur, & sit tamen expertus materiæ: Quæso ne dubites materiam hanc, hancque extensionem animæ tribuere, hoc enim aliud non est, quam illam corpori unitam concipere: Postquam autem hoc probe conceperis, fuerisque in te experta, haud ægre poteris tecum reputare materiam, quam huic cogitationi tribuis, non esse cogitationem ipsam, hujusque materiæ extensionem diversæ esse naturæ, ab hujus cogitationis extensione; quatenus scilicet prior ad quendam locum determinata sit, ex quo omnem aliam corporis extensionem excludit, posterior non item; & sic Celsitudo tua ad cognitionem distinctionis, quæ inter animam & corpus intercedit, nullo negotio regredietur,

dicitur, quaquam illorum conjunctionem etiam conceperit. Denique quemadmodum credo perquam necessarium esse, ut quilibet semel in vitis probe conceperit Metaphysicæ principia, quippe quæ Dei, animæque nostræ cognitionem nobis afferant, ita etiam credo noxium admodum fore intellectum ad eorum Meditationem sapius adicere, quia imaginationis & sensuum functionibus æque bene vacare non possit; sed satius esse, ut quispiam sat habeat memoria & fide tenere conclusiones, quas ex illis semel deduxerit, & reliquas deinde horas studio destinatas impendat cogitationibus iis, in quibus intellectus cum imaginatione & sensibus agit; summum meum erga Celitudinem tuam studium spem facit, tibi ingratam non fore libertatem meam, hicque prolixiorum discursuum instituisse, in quo omnes quæstionis propositæ difficultates enucleare fuisset conatus; sed molestum quid Ultrajecto mihi modo nunciatur, nempe me à Magistratu citari, ut id quod in unum ex istius urbis concionatoribus scripti, probatione defendam, quamvis fuerim ab homine isto turpissimis calumniis lacessitus, sitque omnibus satis superque notum id quod de illo scripti; quare cogor hic finem facere, ut dispiciam quæ ratione hæc me vitiligationibus, quamprimum fieri poterit, expediam. Vale.

E P I S T O L A XXXI.

Ad Elizabetham Principem Palatinam, &c.

Officii ergo, occasione illorum quæ ad Reginam Sueciæ, de summo in hac vita bono, scripserat.

CUM jam libertatem sumpserim scribendi ad Celitudinem tuam de commercio, quod in Suecia habeo, officii mei esse duco, ut pergam dicere redditas mihi fuisse nuper literas ab amico illo meo, qui ibi agit, per quas nunciat Reginam, cum profecta esset Upsaliam Academicæ istius regionis sedem, voluisse audire dicentem quendam eloquentiæ Professorem Academicæ istius, amico meo iudice, præ cæteris doctum & poligum, cui dicendi argumentum fuerat de summo vitæ hujus bono ab ipsa præstitutum; sed audita oratione, dixisse illam, homines istos materias tantum attingere, meamque de hoc sententiam esse rogandam; ad quod cum respondisset amicus ille meus scire se, me esse in scribendo de ejusmodi argumentis moderatissimum; sed, si visum esset Majestati suæ

sua, ut me ejus nomine rogaret, non dubitare quin conaturus esse illi satisfacere; tum illam sedulo ei mandasse, ut me de hoc consuleret, atque ab ipso promissum expressisse, se per proximum tabellarium de hoc ad me scripturum; ita ut me ad scribendum hortetur, idque ad Reginam ipsam; measque ipsi literas se traditurum, & gratas fore pollicetur. Occasionem hanc minime negligendam duxi, & mecum reputans non potuisse illum, dum hæc scriberet, eas adhuc accepisse in quibus verba faciebam de literis, quas ad Celsitudinem tuam de eadem materia dedi, putavi consilium meum, hac in parte irritum, aliter ineundum esse. Quare scripsi literas ad Reginam, in quibus, sententia mea strictim exposita, addo me multa mista facere, quia, cum mihi ob oculos ponam negotiorum numerum, quæ in magni Regni administratione occurrunt, & quorum ipsa sua Majestas curam suscipit, non audeo illam diutius detinere: sed mittere me ad D. Chanutum manuscripta quædam in quibus meam de eadem materia sententiam fusius exposui, ut si illa videre cupiat, ipsi ab illo offerantur. Manuscripta autem hæc, quæ ad D. Chanutum transmittō, sunt epistolæ, quas in librum Senecæ de vita beata ad Celsitudinem tuam dedi, usque ad eam sextæ partem, in qua post traditam passionum in genere definitionem, dico videri mihi difficile eas enumerare. Præterea mitto ipsi parvum illum de Passionibus tractatum, quem ex autographo, quod servaveram, admodum confuso non sine negotio describendum curavi. Atque addo me non rogare illum, ut hæc statim scripta Reginæ offerat, ne forte peccarem in cultum, quem Majestati ejus debeo, si ad illam mitterem epistolas, quas ad alios dedi, cum debuisssem potius ea ipsi scribere, quæ grata fore existimassem; sed si velite de iis apud illam sermonem movere, dixeritque fuisse ad se missa, tumque illam incesset animus ea videndi, me ab hoc scrupulo liberum futurum; mihi que persuasum esse, fore ipsi fortasse jucundius ea legere, quæ ad alium quempiam scripserim, quam quæ ad ipsam, quia eo certius ipsi constare poterit, nihil in ejus gratiam immutatum fuisse aut corruptum. Haud in rem judicavi quicquam de Celsitudine tua ultra scribere, imo neque nomen tuum exprimere, quod tamen propter superiores literas amicū meum latere non poterit. Sed dum mecum reputo, quod, quamvis virtutem & virtutis studiosos summo ille honore prosequatur, ita ut nullus dubitem, quin Celsitudinem tuam tantum colat, quantum debet, tamen non nisi raro in suis literis mentionem de te fecerit, quanquam in omnibus meis aliquid de te scripserim; putavi hoc illū scrupulo teneri, quod dubitet, an iis, à quibus missus est, futurum sit

fit gratum, ut de hoc apud Reginam agat. Sed si mihi detur deinceps occasio ad illam scribendi, non ego interprete; & scopus, ad quem spectavi, hæc illi scripta transmittendo, est, ut coner in illa excitare studium huius cogitationibus magis incumbendi, & si illi, ut spes mihi facta est, arri-deant, occasionem habeat de illis cum Cellitudine tua conferendi. Vale.

EPISTOLA XXXII.

Ad Dominum Chanutum.

Officii ergo. Causa propter quam tractatum de Meteoris edideris.

SI ad te scripsissem quoties id habui in animo, ex quo per hanc regionem profectus es, crebrioribus te literis interturbassem: nam ne unus quidem dies præterit, quo id non venerit mihi sæpius in mentem. Sed expectavi donec daretur occasio scribendi ad D. Brasset, ne viderer velle ejus opera uti, solummodo ad literas transmittendas: cum autem hæcenus data non sit, ut spes erat, destinavi cras Hagam petere, ut has pro te ad illum deferam. Summus hyemis rigor me ad vota pro tua tuorumque omnium valetudine facienda adduxit; observatum est enim hic acerbiores nullas fuisse ab anno 1608. si idem sit in Suedia, spectaveris illic totam septentrionis glaciem. Hoc tamen solatii habeo, quod plura ista regio contra frigas præsidia suppeditet, quam Gallia, nec dubito quin illa non neglexeris. Si ita est, maximam temporis partem in hypocausto traduxeris, ubi puto te non fuisse publicis negotiis usque adeo occupatum, quin tibi superfuerit aliquid ad Philosophiam otii; & si dignatus fueris ea, quæ de illa scripsi, examinare, mihi pergratum erit moneri à te errorum, quos in illis deprehenderis. Nondum enim potui in quenquam incidere, qui id fecerit; & video maximam hominum partem tam perperam judicare, ut illorum opinionibus stare minime debeam; sed tuæ erunt mihi oraculorum instar. Si quando etiam oculos extra hypocaustum tuum conjiciens, alia forte in aëre meteora animadvertes, quæ ea de quibus scripsi, posses utilissima de illis me docere. Unica observatio, quam de nive hexagona mihi contigit facere anno 1635. causa fuit tractatus, quem de illa edidi. Si omnia, quæ ad reliquam Physicam desiderarem, experimenta de nubibus deciderent, & ad illorum cognitionem oculis tantum opus esset, spes esset me brevi facturum illi finem; sed quia ad illa faciendâ requiruntur etiam manus, quas
ad

ad hoc idoneas nullas habeo, penitus deficit animus illi allaborandi. Quod tamen non obstat, quo minus aliquid semper perscruter, vel ad hoc unum *ut doctus emoriar*, & ut possim cum amicis, quos celatum quicquam nolim, privatim de iis differere. Sed conqueror, quod magna sit in orbe, ratione amplitudinis ejus, cordatorum virorum penuria; vellem omnes in urbem unam convenissent, tu enim cremo meæ libenter valedicerem illorum civis futurus, si me asciscere dignarentur: Quanquam enim fugiam multitudinem, quippe refertam ineptis plurimis & importunis, puto tamen summum vitæ bonum in eorum, quos æstimamus, usu consistere. Nescio an in istis, in quibus versaris, locis incidas in multos, qui consuetudine tua digni sint; sed quia est mihi animus Parisios aliquando reverti, vix possum non ægre ferre, quod Regni administri id tibi muneris injunxerint, quod tetam procul ablegat, utque velim apud te certum, præsentiam tuam fore mihi inter præcipuas proficiscendi causas, sum enim singulari animi affectu, &c.

EPISTOLA XXXIII.

Ad Dominum Chanutum.

Certissima via, qua vita instituenda ratio innotescit. Physices notionem conducere ad id ut mortem non timeamus.

NON sine voluptate cognovi ex tuis, haud ita dissitam esse hinc Sueciam, quin intra paucas hebdomadas possim à te aliquid novi audire, atque ita me posse nonnunquam tecum literas communicare, & venire in societatem studii ad quod te accinctum video. Cum enim Principia mea relegere & examinare digneris, non dubito quin obscura multa & vitiosa in iis deprehensus sis, quæ rescire mea multum interest, & quorum sperare nequeo, me ab ullo alio æque bene monitum iri, atque à te. Timeo solum ne lectionis hujus satietatem cito capias, quia id, quod scripsi, non nisi magno intervallo respicit Ethicam, quam præcipuum tibi studium delegisti. Non quod tecum omnino non sentiam, in eo quod judicas certissimam viam, qua innotescat vitæ instituendæ ratio, esse ut cognoscamus ante omnia quales simus, quis sit mundus hic quem incolimus, & quis mundi hujus Creator, vel domicili, in quo habitamus, Dominus; sed præterquam quod non contendo, neque ullo modo polliceor vera esse omnia ea, quæ scripsi, maximum est intervål-

lum inter generalem cœli & terræ notionem, quam in Principiis meis tradere sum conatus, & particularem humanæ naturæ cognitionem, de qua nondum tractavi. Nihilominus ne videar velle te ab instituto tuo retrahere, confidenter dicam, qualemcunque illam Physices notionem, quam assequi conatus sum, plurimum mihi profuisse in fundamentis Ethicæ certis stabilendis; mihiq; me hac in parte facilius satisfecisse, quam in aliis, quæ Medicinam spectant plurimis, in quibus tamen longe plus temporis collocavi. Ita ut loco mediorum vitæ producendæ idoneorum, multo facilius & tutius bonum invenerim, mortem sc. non timere, neque tamen tristari, ut solent ii, quorum sapientia ex alienis documentis tota desumpta est, iisque fundamentis innixa, quæ ab hominum tantum prudentia & autoritate pendent. His addam, quod, dum crescunt horti mei plantæ, ex quibus experimenta quædam ad Physicam meam continuandam necessaria expecto, nonnunquam etiam in particularibus Ethicæ questionibus animum meum exerceam. Sic exiguum de natura Passionum animæ tractatum hac hęcine delineavi, tamen absque consilio illum in lucem edendi; neque ab aliis scribendis etiam nunc abhorretem, nisi mihi fastidium attulisset paucitas eorum, qui scripta mea legunt, & me negligentem fecisset; ero tamen in iis, quæ meum erga te officium spectant, nunquam non diligens. Sum enim ex intimo animo, &c.

EPISTOLA XXXIV.

Ad Dominum Chanutum.

Officii ergo. Encomium Regina. Cur de Ethica non scripseris. Culminia ipsi afflita. Ipsius symbolum. Quousque ab ira nobis cavere debeamus.

Nisi cruditionem tuam in pretio minime vulgari haberem, nec esset mihi summum discendi studium; haud importune adco flagitasset, ut scripta mea examinares. Minime solitus sum hoc quenquam rogare: quinimo inculca illa in lucem edidi, & absque ornatu ullo, qui posset oculos vulgi allicere; ne scilicet ab iis perspicerentur, qui hærent in cortice, sed ab ingeniosis tantum nonnullis, qui illa sedulo examinerent, ut nonnihil ab illis doctior evaderem. Sed me quanquam nondum fueris hac gratia dignatus, tamen multis aliis nominibus devinxisti, & potissimum quod honorificum de me apud plurimos sermonem feceris, ut habeo compertum; imo & Dominus Clerfelier scripsit ad me, te
ex-

expectare ab illo Meditationes meas Gallice conscriptas, regionis, in qua es, Reginae offerendas. Nunquam certe ea me incessit ambitio, ut nomen meum tantæ dignitatis hominibus innotescere cuperem, & si vel æque prudens fuisset, ac simias apud barbaras quasdam gentes haberi fama est, nunquam apud ullos audivissem librorum autor: Dicunt enim gentes illas credere simias posse, si vellent, loqui, sed à loquendo abstinere, ne ad laborem subeundum adigantur; quia vero ea mihi prudentia defuit, ut mihi à scribendo temperarem, minus jam otii & quietis habeo, quam prudenter tacenti suppetiisset. Sed quoniam jam est commissa culpa, innumerisque Scholasticis notus sum, qui scripta mea torvis oculis intuentur, & quo mihi noceant undique conquirunt, interest mea plurimum, ut primi etiam ordinis hominibus, ex quorum autoritate & virtute quæram præsidium, innotescere cupiam. Hanc autem Reginam tantis laudibus celebratam audio, ut cum sæpe fuerim conquestus de iis, qui Magnatis cujuscumque notitiam mihi conciliare studuerunt, contra non possum tibi gratias non agere, quod de me apud illam sermonem habere dignatus fueris. Vidi Dominum de la Thuillerie recentem ex Succia, qui virtutes ejus mihi tam magnifice descripsit, ut inter omnes, quas mihi recensuit, ejus laudes, postrema sit, Reginam esse, nec eorum, quæ narrabat, magnam partem ausus fuisset credere, nisi in ea Principe, cui Principia mea nuncupavi, exploratum habuisset, Optimatibus cujuscunque sexus non esse opus ætate multa, ut virtute & eruditione cæteros homines longe superent. Sed valde timeo ne ea, quæ vulgavi scripta, parum digna sint quibus legendis immoretur, atque ita ex eorum commendatione gratiam nullam in eas. Si de Ethica in illis egissem; spes forsan subesse posset, fore illa ipsi jucundiora; sed ab hoc est mihi sedulo abstinendum. Regentes sunt adeo insensu ob innocua mea Physices principia, quod nullam in iis calumniandi materiam reperiant, ut si de Ethica postmodum tractarem, nullum facturi essent oblatrandi finem. Nam cum quidam P. N. crediderit sibi satis causæ esse, cur me tanquam Scepticum accusaret, quod Scepticos refutaverim; & cum concionator quidam conatus fuerit suadere me esse Atheum, hanc unam rationem afferens, quod Dei existentiam probare aggressus sim; quid non dicturi essent, si rerum omnium, quas vel optare vel timere possumus, valorem justum ad examen revocarem? Qualis, nempe, futurus sit animæ post mortem status? Quousque vitam amare debeamus? Et quales nos esse debeat, ut nulla sit causa, cur de ejus jactura solliciti simus? Statuerem licet opiniones & Religioni quam maxime consentaneas, & pu-

blicæ rei utilissimas, contrarias tamen utrique mihi nihilo secius affingerent. Adeo ut animum inducain, non posse me mihi imposterum melius consulere, quam si à libris componendis abstincam; assumptoque hoc symbolo, (*Ille mors gravis incubat, qui notus nimis omnibus, ignotus moritur sibi*) dehinc studeam tantum, ut me erudiam, measque cogitationes non communicem, nisi cum iis quibus licebit privatim uti. Velim autem credas me pro summa felicitate habiturum, si tecum id liceret; sed non puto me in ea, in quibus nunc temporis agis, loca unquam profecturum, aut te in hæc concessurum; hoc tantum spero, post aliquot forsan annos Gallias repetentem te in eremo mea substiturum aliquot dies, quibus detur mihi aperto tecum animo colloqui. Breve tempus multis dicendis sufficit, neque credo longa consuetudine opus esse ad arctas amicitias, modo fundentur in virtute, contrahendas; qua hora te primum vidi, tuus in solidum fui, & quemadmodum de tua erga me benevolentia nullus dubitavi, ita etiam tibi persuasum habeas velim, non esse me tibi minus addictum, quam si totam tecum vitam meam egissem. Cæterum exinde quod passionum cognitioni studui, videris inferre velle nullas mihi superesse: Sed contra dicam, me illas examinando invenisse bonas fere omnes, atque ad hanc vitam ita utiles, ut adempto illarum sensu nulla esset ratio cur anima nostra cum corpore suo vel uno momento juncta manere vellet. Fateor quidem iram ex iis unam esse, à quibus cavendum existimo, eo quod habeat pro objecto offensam acceptam, atque ideo debemus animum nostrum consueque elevare, ut injuriæ nobis ab aliis illatæ ad nos non pertingant. Sed pro ira opinor fas esse indignationem concipere, & fateor me ea sæpius affici contra eorum, qui docti haberi volunt, ignorantiam, quando cum malitia conjuncta est. Sed credas velim meos erga te affectus alios non esse, quam virtutis tuæ admirationem, & singulare studium, quo fit ut sim, &c.

EPISTOLA XXXV.

Ad Dominum Chanutum.

Responsio ad tres Quæstiones: 1. Quid sit amor. 2. An solo lumine naturali Deum amare doceamur. 3. Inter inordinatos affectus, & pravos eorum usus, an deterior sit amor, an odium.

GRatissima illa, quam à te modo accepi epistola non finit ut quiescam, donec ad eam dederim responsum, quamvis ejusmodi in eà quæ-

quæstiones proponas, quas longe doctiores vix brevi tempore excussas darent; sed quia scio, non fore me parem, longiori quantumvis examine, illis plane expediendis, in aliam chartæ cito committere id, quod mihi dicitur ardoris impetus, quam diutius de eo cogitare, & scribere non meliora.

Rogas meam tribus de rebus sententiam: 1. Quid sit amor. 2. An solo lumine naturali Deum amare doceamur. 3. Inter inordinatos affectus & prævios eorum usus, an deterior sit amor, an odium.

Ut ad primum respondeam, distinguo inter amorem pure intellectualem sive rationalem, atque cum amorem, qui est passio: Prior non mihi videtur aliud esse, quam quod, ubi anima nostra bonum aliquod, sive præsens sive absens, percipit, quod sibi conveniens esse judicat, se cum illo voluntate conjungit, hoc est, seipsam cum hoc bono considerat veluti totum aliquod, cujus illud est pars una, ipsa vero pars altera. Deinde si præsens est, hoc est, si illud possidet, vel ab illo possidetur, aut denique cum ipso conjuncta est, non solum voluntate, sed etiam realiter & de facto, eo modo, quo ipsi convenit conjungi, motus voluntatis ejus, qui eam cognitionem comitatur, qua scit hoc esse sibi bonum, est ejus lætitia. Si vero absens sit, motus voluntatis ejus, qui eam cognitionem comitatur, qua scit se illo privari, est ejus tristitia. Motus autem ille, qui cognitionem istam comitatur, qua scit acquisitionem ejus sibi fore bonam est ejus desiderium. Omnesque hi voluntatis motus, in quibus consistit amor, lætitia, tristitia, & desiderium, quatenus sunt rationales cogitationes, non vero quatenus passionibus, possent in anima nostra corpore quamvis nudata locum habere. Nam e. g. si anima adverteret plurima esse in natura cognitu pulcherrima, voluntas ejus procul omni dubio ferretur ad amandam rerum harum cognitionem, hoc est, ad eam considerandam, tanquam ad se pertinentem. Et si præterea animadverteret se hac cognitione præditam esse, lætitiâ inde perciperet; si consideraret sibi illam deesse, tristitia afficeretur; si putaret illius sibi acquisitionem bonam fore, ejus desiderio moveretur; nec quicquam est in omnibus hisce voluntatis motibus, quod ipsi obscurum foret, aut cujus cognitionem perfectissimam non esset habitura; modo in cogitationes suas reflecteret. Sed quamdiu anima nostra cum corpore conjuncta est, rationalem hunc amorem fere semper comitatur alter, qui sensitivus dici potest, & qui (ut de omnibus passionibus, appetitibus, & sensibus, pag. 208. Principiorum meorum generatim dixi) aliud non est, quam confusa cogitatio motu nervorum aliquo in anima excitata, qua ad aliam hanc clariorem

riorem cogitationem disponitur, in qua rationalis amor consistit. Nam quemadmodum in siti, siccitatis in gutture sensus est cogitatio confusa qua ad bibendi desiderium disponimur, sed non ipsum desiderium; sic in amore oritur circa cor, nescio quis calor, & magna in pulmone sanguinis copia, qua fit, ut etiam brachia quasi ad aliquid amplectendum aperiamus, hocque animam veluti inclinat, ut oblatum objectum secum voluntate sua jungat. Sed cogitatio, qua hunc anima calorem percipit, diversa est ab ea, quæ illam cum objecto conjungit; imo & nonnunquam accidit, ut iste amoris sensus in nobis reperiat, nec tamen ad quicquam amandum voluntas nostra feratur, quia nihil occurrit, quod amore nostro dignum judicemus. Contra etiam fieri potest ut bonum aliquod magnum cognoscamus, & cum illo voluntate jungamur, nec ulla tamen passione moveamur, quia ad hoc non est recte dispositum corpus. Sed ut plurimum hi duo amores simul conjuncti sunt: tale est enim inter utrumque vinculum, ut cum anima judicat objectum aliquod esse seipsa dignum, cor statim disponatur ad motus qui amoris passionem excitant; corde autem ab aliis causis ita disposito, anima qualitates amabiles fingit in ejusmodi objectis, in quibus alias nihil nisi vitia animadverteret. Neque porro mirum est, quod quidam cordis motus cum quibusdam cogitationibus, quibuscum similitudinem nullam habent, sint naturaliter ita conjuncti; ex eo enim quod animæ nostræ ea sit natura, ut corpori uniri potuerit, hoc etiam habet proprium, ut cogitationum suarum quælibet possit quibusdam corporis hujus motibus aut dispositionibus ita adjungi, ut eadem dispositiones in illo aliàs redeuntes, eandem in anima cogitationem reducant, & vicissim ut eadem cogitatio recurrens præparet corpus ad eandem dispositionem accipiendam. Sic cum linguam aliquam addiscimus, literas, sive quarundam vocum, quæ materiales sunt, pronuntiationem jungimus cum earum significationibus, quæ sunt cogitationes: ita ut auditis iterum iisdem vocibus, easdem res concipiamus, atque iisdem rebus conceptis, eadem voces in memoriam recurrant. Primæ autem corporis dispositiones, quæ statim ab ortu cogitationes nostras sic comitantur sunt, debuerunt sine dubio arctius cum illis jungi, quam illæ quæ eas postmodum comitantur. Ut autem examinem caloris, quem circa cor sentimus, aliarumque corporis dispositionum, quæ amorem comitantur, originem, animadverto statim à primo momento, quo anima nostra fuit cum corpore conjuncta, verisimile esse illam affectam fuisse lætitia, statim vero post amore, dein forsan etiam odio & tristitia; atque easdem corporis dispositiones, quæ

has

has in illa passionum tum effecerunt, earum etiam passionum cogitationes naturaliter postmodum comitatas fuisse. Primam autem ejus passionem judico fuisse lætitiā; quia non est verisimile animam huic corpori immisissam fuisse, nisi cum esset recte dispositum, recta autem hæc dispositio nos lætitiā naturaliter afficit. Dico etiam amorem subsecutum fuisse, nam cum corporis nostri materia indefinenter effluat, haud secus quam aqua fluminis, sitque opus ut nova in ejus locum succedat, haud sere verisimile est corpus fuisse recte dispositum, quin aliquid etiam adfuerit materiæ ipsi alendo admodum idoneæ; anima autem se voluntate conjungens cum hac nova materia, amore erga illam affecta fuit: quem admodum etiam, si postea factum est ut alimentum hoc deesset, anima ex hoc tristitiā contraxit; & si qua alia materia in ejus locum subierit, quæ ad corpus alendum fuerit minus idonea, odio in illam affecta fuit.

En quatuor illas passiones, quas in nobis primas fuisse existimo, & quas ante nativitatem nostram solas in nobis fuisse opinor: atque etiam puto non fuisse illas nisi sensus sive cogitationes admodum confusas, quia tum anima erat materiæ ita alligata, ut nondum posset nisi diversis ab ea impressionibus recipiendis vacare; & quamvis quibusdam post annis aliis lætitiis, aliisque amoribus affici demum coeperit, quam iis, qui à recta tantum constitutione, & convenienti corporis alimento pendent, nihilominus id, quod in ejus lætitiis aut amoribus intellectuale fuit, habuit semper comites sensus illos, quos passiones illæ in ipsa primum excitaverant, imo & motus sive functiones naturales, quæ tum in corpore erant: ita ut, quia amor ante nativitatem nonoriebatur, nisi ex convenienti alimento, quod in jecur, cor, pulmonem magna copia affluens; majorem solito calorem in illis excitabat, hinc sit quod calor iste amorem semper comitetur, quamvis à diversis longe causis proficiscens. Et nisi esset nimis longum, possem percurrere singulas ostendere cæteras corporis dispositiones, quæ ab incunte vita quatuor hæc passiones comitatæ sunt, illas etiam nunc comitari. Sed solum dicam, confusos hosce infantia nostræ sensus, qui cum cogitationibus à ratione proficiscentibus, per quas id amamus quod amore dignum judicamus juncti permanent, causam esse, cur amoris natura sit nobis cognitu difficilis. His adde, multas alias passiones, ut lætitiā, tristitiā, desiderium, timorem, spem, &c. se amori varie immiscentes, impedire quo minus agnoscamus, quid sit illud, in quo amor proprie consistit. Quod de desiderio præsertim est advertendum; tam crebro enim pro amore sumitur, ut id in causa fuerit, cur duo amorum genera distinxerint; unum, quem

K

vocat

vocant amorem benevolentiae, in quo desiderium istud minus apparet; alterum concupiscentiae, qui nihil aliud est quam vehementissimum desiderium in amore, quanquam plerumque debili, fundatum.

Sed opus esset grandi volumine ad ea omnia pertractanda, quae hanc passionem spectant; & quamvis ea sit ejus natura, ut, quantum fieri potest, hominem faciat sui communicativum, atque adeo me incitet ad laborandum, ut plura de ea hic tibi dicam, quam quidem nunc mihi nota sunt, me tamen reprimere volo, ne tibi epistolae hujus prolixitas tædium afferat. Itaque ad secundam tuam quaestionem transeo, nempe, Utrum solo lumine naturali Deum amare doceamur; atque an hujus luminis vi Deus amari possit. Video duas esse validas dubitandi rationes: Prior est, quod ea Dei attributa, quae ut plurimum in considerationem veniunt, tanto nos superent intervallo, ut neutiquam concipiamus posse illa esse nobis convenientia, quod in causa est, ut nos iis voluntate non jungamus. Altera est, quod nihil sit in Deo, quod sub imaginationem cadat, unde fit ut, quamvis intellectuali illius amore quispiam afficeretur, sensitivo tamen affici posse haudquaquam videretur, quia ut ab intellectu in sensus propagaretur, deberet per imaginationem transire. Quare non miror si qui Philosophi sibi persuadeant, sola Christiana Religione reddi nos amoris ejus capaces, quatenus nimirum ab illa accepimus mysterium incarnationis, in quo Deus se eousque depressit, ut similis nobis fieret; eosque qui absque mysterii hujus cognitione visi sunt erga numen aliquod zelo fervere, nullo tamen erga verum Deum affectos fuisse, sed tantum erga Idola quædam, quibus nomen ejus indiderunt; non secus quam Ixion, Poëtis fabulantibus, nubem pro Deorum Regina amplectebatur. Nihilominus nullus dubito quin sola naturæ nostræ vi possimus Deum revera amare. Non equidem assero hunc amorem fore absque gratia meritorium; hoc Theologis extricandum relinquo: Sed ausim dicere, hanc esse passionem omnium, quibus in hac vita affici possumus, jucundissimam & utilissimam; imo & vehementissimam omnium esse posse, quanquam ad hoc valde attenta meditatione sit opus, quia aliorum objectorum præsentia indefinenter ab ea avocamur. Via autem, quam incundam puto, ut ad Dei amorem perveniamus, est, ut attendamus eum esse mentem, sive cogitans quid, quæ in re, cum animæ nostræ natura aliquam cum ejus natura cognationem habeat, animum inducimus illam esse à suprema eius intelligentia emanationem quandam, *Et divine quasi particulam aure*. Imo & quia videtur cognitio nostra posse gradatim in infinitum augeri, Dei autem cognitio, cum infinita sit, metant tenet, ad quam tendit nostra; si nihil

ultra

ulterius pensitemus, possumus eo clementiæ venire, ut Dii esse cupiamus, & sic errore gravissimo Divinitatem tantum, non Deum amemus. Sed si insuper attendamus ad infinitudinem potentiæ ejus, per quam tam multa creavit, quorum pars sumus minima; ad providentiæ ejus extensionem, qua sit ut unica cogitatione quicquid fuit, est, erit, aut esse potest, intueatur; ad decretorum ejus infallibilitatem, quæ quanquam liberum nostrum arbitrium non evertant, nequaquam tamen mutari possunt; denique hinc tenuitatem nostram, inde rerum omnium creaturarum magnitudinem perpendendo, & qua ratione illæ à Deo pendeant, illasque modo potentiæ ejus congruo æstimando, non vero pyxide veluti quadam concludendo, (quod ii faciunt qui volunt mundum esse finitum) harum omnium rerum meditatio hominem earum probe gnarum tanto gaudio perfundet, ut jam se satis vixisse arbitraturus sit, quod ejusmodi cognitiones Deus illi indulerit, nedum ut erga illum tam iniquus sit & ingratus, ut locum ejus occupare cupiat; seque cum illo voluntate sua conjungens, tam perfecte eum amat, ut nihil prius habeat in votis, quam ut Dei voluntas fiat; unde sit ut mortem, dolores, ærumnas metuere desinat, cum sciat nihil posse sibi accidere, nisi quod Deus decreverit; divinumque hoc decretum tantopere amat, tamque justum & necessarium existimat, habetque ita perspectum se illi subijci debere, ut etiam cum ab illo mortem, aut aliud quid mali expectat, si per impossibilem hypothesim esset penes ipsum, haud vellet tamen illud immutare. Sed si mala aut calamitates non refugit, quispe quæ sibi à providentia divina immittantur; certe longe minus bona repudiat, licitasque voluptates, quibus in hac vita frui potest, cum ab eadem etiam providentia proficiantur; atque ita dum bona lætus amplectitur, malorum omnium metu vacuus, suo in Deum amore perfecte beatus efficitur. Equidem fateor debere animam se à sensuum commercio admodum divellere, ut sibi veritates eas ob oculos ponat, quæ hunc in illa amorem excitent; unde sit ut non videatur anima posse amorem hunc in facultatem imaginatricem propagare, ut ibi in passionem convertatur. Verumtamen neutiquam dubito quin id fieri possit; nam quanquam eorum, quæ sunt in Deo, amoris scil. nostri objecto, nihil imaginari possimus, possumus tamen nostrum hunc amorem imaginari, qui in hoc consistit, quod nos objecto cuiquam unire velimus, hoc est, respectu Dei nosmet considerare tanquam rerum creaturarum immensitatis particulam aliquam minutissimam; nam pro diversitate objectorum potest quispiam vel se cum illis, vel illa secum diversis modis conjungere; &

sola conjunctionis hujus idea sufficit calori circa cor excitando, & vehementissimæ passioni efficiendæ. Verum porro est lingua nostræ usum, & servitutis aulicæ formulas non sinere, ut iis, qui nos dignitate longe superant, dicamus nos amare illos, sed solum colere, in honore, in pretio habere, esseque nos illis obsequentissimos & devotissimos, cujus rei ratio mihi videtur esse, quod amicitia, si modo reciproca sit, faciat homines aliquomodo pares; atque ita dum conamur magnatis cujuspiam benevolentiam captare, si diceremus nos amare illum, putaret forsan nos cum illo tanquam cum pari agere, ipsique injuriam facere. Sed quia Philosophi non solent varia nomina rebus, quæ in eadem definitione conveniunt, imponere, neque aliam amoris definitionem novi, nisi quod sit passio, quæ nos cum aliquo objecto voluntate conjungit, sive objectum hoc sit nobis æquale, sive majus, sive minus; mihi videtur illorum lingua dicendum esse, nos posse amare Deum. Et si te bona fide rogarem annon magnam illam, apud quam nunc agis, Reginam ames, licet diceres te veneratione tantum & stupore erga illam affici, nihilosecius judicarem esse tibi vehementissimum erga illam affectum: stylus enim tuus tam leniter fluit, ubi de illa scribis, ut licet illud omne credam, quod de illa narras, tum quia te veracem novi, tum quia de illa ab aliis multa fando accepi, haud tamen credo posse te, nisi summo studio permotum, illam, ut facis, describere; aut in tanti luminis vicinitate versari caloris expertem. Tantum autem abest ut amor, quo objecta, quæ supra nos sunt, amplectimur, minor sit eo, quo alia prosequimur, ut contra credam cum esse natura sua perfectiorem, ita ut majori ardore ea quæ amatum objectum spectant, amplectamur. Hoc enim præstat in nobis amoris natura, ut nos cum objecto amato consideremus tanquam totum aliquod, cujus pars tantum una sumus, ita ut curas, quas in nosmet tantum solebamus conferre, ad totius hujus conservationem ita transferamus, ut majorem aut minorem illarum partem nobismet sigillatim retineamus, prout æstimamus nos esse magnam aut exiguam totius illius partem cui amorem nostrum addiximus; ita ut, si nosmet voluntate conjunxerimus cum objecto aliquo, quod nobis minoris faciamus, e. g. si florem, ævem, ædificium, aut simile quid amemus, altissima perfectio, quo possit hic amor pertingere secundum rectum illius usum, exigere nequeat, ut vitam nostram ad ejusmodi rerum conservationem in periculum adducamus, quia illæ inter partes totius illius, quod nobiscum componunt, nobiliorem locum non tenent, quam unguis aut capilli inter corporis nostri partes; esset autem dementiæ totum corpus in periculum adduce-

re ad capillorum conservationem. Sed cum duo homines mutuo sese amore prosequuntur, charitas exigit, ut illorum unusquisque amicum suum seipso pluris faciat, adeoque illorum amicitia perfecta non est, nisi parati sint alter in alterius gratiam dicere, *Me me, adsum qui feci, in me convertite ferrum*, &c. Sic ubi privatus quispiam cum Patria sua vel Principe se voluntate conjungit, si perfectus sit amor ejus, non debet se considerare nisi ut admodum exiguum totius, quod cum illis componit, partem, & proinde non magis metuere se morti certissimæ illorum causa objicere, quam aliquid sanguinis brachio mittere, ut reliquum corpus melius valeat. Hujusque amoris exempla quotidie cernuntur, etiam in infimæ sortis hominibus, qui pro Patriæ bono, aut magnate aliquo, quem amore prosequuntur, vitam libenter profundunt. Ex quibus omnibus liquet nostrum erga Deum amorem debere esse omnium longe summum & perfectissimum.

Non vereor ne Metaphysicæ hæc cogitationes ingenium tuum nimis exerceant; scio enim illud esse omnibus par: sed fateor meum illis fatigari, sensibilibusque objectorum præsentiam non sinere, ut illis diutius immorer. Quare ad tertiam questionem transeo, nempe, inter inordinatos affectus uter sit deterior amoris an odii excessus. Sed mihi videtur hæc questio magis impedita, quam reliquæ duæ, quia tuam hac in re mentem minus explicuisti, & potest hæc difficultas varios sensus admittere, qui mihi videntur omnes sigillatim examinandi. Potest dici passio una aliâ deterior; vel quia nos magis à virtute removel; vel quia tranquillitati nostræ magis repugnat; vel denique quia nos ad majores excessus rapit, majoraque cæteris hominibus mala inferenda.

Primo quidem sensu mihi videtur res dubia. Nam pensitata utriusque hujus passionis definitione, judico quidem ex amore in objectum indignum, posse nos deteriores fieri, quam ex odio erga objectum amore nostro dignum; gravius enim est periculum cum re mala conjungi, atque in eam veluti transformari, quam ab aliqua, quæ bona est, voluntate disjungi. Sed cum ad propensiones, sive habitus ex his passionibus germinantes attendo, muto sententiam: cum enim videam amorem quantumcunque inordinatum habere semper bonum pro objecto, non mihi videtur posse mores nostros æque corrumpere, ac odium, quod nihil nisi malum sibi proponit. Et quidem experientia videmus optimum quemque paulatim malum fieri, cum ad quempiam odio prosequendum adigitur. Quamquam enim odium ejus justum sit, tamen sibi tam sæpe ob oculos ponit & mala ab inimico accepta, & ea quæ illi

vicissim precatur, ut malitiæ paulatim assuefiat. Ex aduerso autem qui se in amorem conjiciunt, quantumvis inordinatum & futilem, nihilominus meliores exinde non raro evadunt, quam si aliis cogitationibus animum adjicerent. Secundo sensu nulla difficultas occurrit; odium enim comitem semper habet tristitiam & ægritudinem; & quantacunque voluptate perfundantur nonnulli, mala aliis inferendo, mihi certe videtur illorum voluptas Dæmonum voluptati non absimilis, qui juxta Religionem nostram pœnis æternis-damnati putant se de Deo vindictam sumere, dum homines apud inferos indefinenter cruciant. Verum ex aduerso amor, quantumvis inordinatus, voluptatem affert; & licet Poëtæ illum passim exagitent, tamen puto homines sibi ab illo naturaliter temperaturos, nisi plus ex eo dulcedinis, quam amaritudinis perciperent: Calamitates vero omnes, quarum causa amor tribuitur, ab aliis tantum, quæ illum comitantur, passionibus, temerariis nempe desideriis & spe vana proficiscuntur. Sed si quærat, utra passionum harum nos ad majores excessus rapiat, nosque ad majora cæteris hominibus mala inferenda possit adigere, mihi videtur esse dicendum amorem; quia naturaliter majorem habet efficaciam & vigorem, quam odium; atque etiam quia amor, quo rem parvi momenti prosequimur, multo majora mala non raro parturit, quam odium quo in majoris momenti rem ferimur. Quod autem odium minus vigeat, quam amor, probo ex utriusque origine: Si enim verum est, primos nostros amoris sensus hinc ortos fuisse, quod cor nostrum magnam alimenti sibi convenientis copiam acciperet; contra vero primos nostros odii sensus ex alimento noxio cor petente fuisse productos, nuncque etiam eosdem motus easdem passiones comitari, ut supra dictum est, liquet quod, cum amamus, purissimus è venis sanguis ad cor magna copia affluat, quo fit ut spiritus animales multi ad cerebrum transmittantur, atque ita vi majore, vigore & animo donemur. Cum è contra in odio, fellis amaritudo & lienis acrimonia se sanguini nostro immiscentes, impediant quo minus tam multi, talesque spiritus ad cerebrum perveniant, atque ita fit quispiam debiliior, frigidior & timidior. Meamque sententiam confirmat experientia; nam Heroës illi, ut Hercules, Rolandi, iique omnino omnes, qui fortiori sunt præ cæteris animo, vehementius ardent, quam reliqui; contra vero debiles & ignavi ad odium procliviores sunt. Equidem ira potest homines audaces efficere, sed illa vires suas mutuatur ab amore, quò se quisque prosequitur, qui semper est ejus fundamentum; non vero odium, quod illam tantum comitatur. Desperatio etiam in magnos impetus animum adigit, metusque ad magnas cru-

crudelitates; sed inter hosce affectus, & odium est aliquid discriminis. Superest mihi adhuc probandum, inordinatum amorem, quo objectum aliquod parvi momenti prosequimur, posse plura mala parturire quam odium erga bonum quodpiam majoris momenti. Ratio autem, qua id probabo, est, quod malum ex odio proficiscens ultra objectum quod odio prosequimur non extendatur, cum è contra inordinatus amor nulli rei parcat, præterquam objecto suo, quod plerumque non est valde extensum, comparatum cum rebus aliis omnibus, quarum jacturam & perniciem moliri paratus est, modo id furoris sui & dementiæ irritamentum esse possit. Dicet fortasse aliquis odium esse malorum, quæ amori tribuuntur, causam proximam, quia si quid amamus, eadem opera odio habemus quicquid ipsi adversatur: sed amor semper magis reus est malorum, quæ hoc modo fiunt, quam odium, quippe qui sit prima illorum causa, & quia unius objecti amor potest aliorum plurimorum odium concitare. Præterea gravissima, quæ ex amore proficiscuntur, mala non sunt ea, quæ ex odio fiunt; sed majora & periculosiora sunt ea, quæ amor ob unicam amati objecti, vel suam ipsius voluptatem facit, aut vero fieri finit. Venit mihi in mentem impetus quidam Theophili, qui hic exempli hoco apponi potest; inducit quendam amore percuntem his verbis:

Dieux! que le beau Paris est une belle proie!

Que cet amant fit bien,

Alors qu'il alluma l'embrasement de Troie

Pour amortir le sien.

Latine sic,

Dii! quam bello Paridi contigit bella preda!

Quam iste amans fecit præclare,

Cum ille accenderet ignem Trojanum

Ut resingeret suum.

Unde liquet gravissima quæque & funestissima nonnunquam mala posse, ut dixi, esse inordinati amoris irritamenta, illumque jucundiores efficere, quatenus pretium ejus augent. Nescio an cogitationes meæ, cum tuis in hoc consentiant, sed prohteor illas in hoc saltem consentire, quod quemadmodum multum mihi benevolentia significari, sic sum ardentissimo animi affectu, &c.

EPISTOLA XXXVI.

Ad Dominum Chanutum.

*De extensione mundi, ejusque creatione ac duracione. Quomodo intelligi
debeat, Deum cuncta propter hominem creasse: Causa quibus
ad hominem unum magis quam alium
amandum ferimur.*

CUM hac transirem iter habens in Galliam, intellexi ex Domino Braslet se misisse Egmondam ad me quasdam tuas literas, & quamvis satis urgeret iter meum, tamen illas expectare decreveram; cum autem perlata fuissent in hospitium meum trihorio, postquam excesseram, ad me statim delatae sunt. Perlegi illas avide. Magna in illis amicitiae tuae & prudentiae argumenta reperi. Subiit autem animum meum inetus cum primas lineas legerem, in quibus scribis Dominum du Rier sermonem fecisse apud Reginam de quibusdam meis literis, velleque illam eas videre. Deinde animum recepi, cum eo devenissem, ubi scribis perfectas coram illi non displicuisse, nec certe satis scio an major in me admiratio fuerit, quod ista tam facile intellexerit, quae etiam doctissimis perobscura videntur, an vero laetitia, quod ipsi non duplicuerint. Sed ingeminata est admiratio mea, cum vim & pondus objectionum percepi, quas Majestas sua proposuit in eam, quam universo assignavi, extensionem; optaremque ut me literae tuae insolito meo hospitio reperissent, in quo potuissem melius quam in diversorio animum colligere, quaestionemque tam difficilem, tantoque cum judicio propositam melius forsitan expedire. Nolim tamen hoc in excusationem prae texere; & modo liceat mihi cogitare, me ad te unum scribere, ne veneratio inducat confusionem in imaginationem meam, quicquid in hoc argumentum noverim conabor hic exponere.

Primo memini Cardinalem Cusanum, Doctoresque alios plurimos supposuisse mundum infinitum, neque tamen propterea ab Ecclesia unquam fuisse correptos; contra videtur ad Dei cultum pertinere ut ejus opera amplissima teneantur; meaque, quam illorum sententia, commodius admitti potest, quia non dico mundum esse infinitum, sed tantum indefinitum. Quae quidem duo inter se haud parum differunt: ad hoc enim ut quis dicat infinitum quid esse, ratione aliqua niti debet, qua probeat rem ita se habere, quod de Deo tantum probari potest; sed

ad

ad hoc ut dicam esse quid indefinitum, satis est si nulla sit ratio, qua probari possit id esse finitum. Mihi autem videtur probari non posse, imo neque concipi, ullos esse fines materiæ ex qua constat universus orbis. Cum enim materiæ hujus naturam perscrutor, invenio positam esse totam in eo, quod extensa sit secundum longitudinem, latitudinem, & profunditatem; ita ut quicquid præditum est tribus hæc dimensionibus, sit materiæ hujus pars. Neque vero potest spatium ullum dari omnino vacuum, hoc est, quod nullam contineat materiam, quia tale spatium concipere nequimus, quin tres hæc in illo dimensiones, & proinde materiam concipiamus. Mundum autem finitum supponendo, concipiuntur ultra ejus fines spatia quædam tribus hæc dimensionibus prædita, & proinde non pure imaginaria, quæ Philosophi vocant, sed continentia in se materiam; quæ cum alibi esse nequeat, quam in mundo, liquet mundum extra fines ipsi præscriptos extendi. Cum ergo rationem nullam noverim, qua probeam, imo neque concipere queam, mundi fines ullos esse, illum indefinitum voco; sed negare tamen nequeo illius forsitan fines aliquos esse Deo notos, licet illis comprehendendis impar sim; quare non dico absolute esse infinitum.

Extensio autem ejus ita considerata, & cum ejus duratione comparata, mihi videtur tantum occasionem præbere putandi, nullum posse ante mundi creationem concipi tempus, quo Deus, si voluisset, non potuisset illum creare. Neque est cur exinde quispiam concludat, fuisse revera mundum ante tempus indefinitum creatum; quia existentia mundi actualis, sive vera, quam retro abhinc quinque aut sex millibus annorum habuit, cum ejus existentia possibili, sive imaginaria, quam antea habere potuit, necessariam connexionem non habet; ut habet actualis existentia spatorum, quæ circa globum (hoc est circa mundum, quatenus supponitur finitus,) concipiuntur, cum actuali hujusce globi existentia. Præterea, si ex indefinita mundi extensione durationis ejus æternitas respectu temporis præteriti inferri posset, potiori longe jure posset ex durationis, quam imposterum habiturus est, æternitate concludi. Docet enim fides, quod quamvis terra & cæli sint perituri, hoc est, speciem mutaturi; nihilominus mundus (hoc est, materia, ex qua terra & cæli constant,) nunquam periturus est; quemadmodum patet exinde quod corporibus nostris, & proinde etiam mundo in quo erunt, æternæ post resurrectionem vitæ spem faciat. Verum ex hac duratione infinita, quam mundus imposterum habiturus est, non inferitur fuisse illum ab

æterno; quia omnia durationis ejus momenta sunt à se invicem independentia.

Quantum ad eas, quas religio homini tribuit, prærogativas, & quæ videntur vix fidem impetraturæ, si indefinita supponatur universi extensio, illæ explicatione aliqua egent: quanquam enim possumus dicere, omnia nostri causa fuisse creata, quatenus nobis est illarum usus aliquis, haud tamen scio esse de fide, quod homo sit creationis finis; sed dicuntur omnia propter ipsum (Deum nempe) facta esse, Deum solum esse causam universi finalem, non minus quam efficientem. Quantum vero ad creaturas, quia illæ sibi mutuo intervniunt, potest illarum unaquæque hoc sibi vindicare, quod omnia illa ejus causa facta sint, quorum est sibi aliquis usus. Nec ignoro sex creationis dies in Genesi ita descriptos esse, ut videatur homo esse præcipuus ejus finis; sed regeri potest, hanc historiam de Genesi hominis gratia conscriptam fuisse, atque ideo Spiritum Sanctum ea potissimum notare voluisse, quæ hominem spectant, nec de rebus ullis ibi institutum esse sermonem, nisi quatenus ad illum referuntur. Et quia concionatores, dum Dei in nobis amorem excitare student, solent varios, quos ex aliis creaturis usus percipimus, nobis ob oculos ponere, dicuntque fuisse illas à Deo nostri causa factas, neque alios fines commemorant propter quos etiam dici potest illas factas fuisse, quia nempe ad eorum propositum non faciunt, hinc est quod valde propendamus ad credendum, non fuisse illas nisi nostri causa creatas. Sed longius multo procedunt concionatores. Dicunt enim singulos homines debere gratias Jesu Christo pro toto illo, quem in cruce effudit, sanguine, quali prorsus pro uno tantum homine mortuus esset; qua in re verum quidem dicunt: sed quemadmodum hoc non impedit quo minus eodem illò sanguine ingentem aliorum hominum numerum redemerit; sic non video cur mysterium incarnationis, aliaque quibus Deus hominem ornavit, beneficia impendant quo minus innumera alia in innumeras alias creaturas contulerit. Et quamvis non ideo concludam ullas esse in stellis, aut alibi, creaturas intelligentes; nullam tamen rationem video, qua probari possit nullas esse; sed ejusmodi quæstiones indeterminatas semper relinquo, potius quam quicquam de iis aut negem aut affirmem. Nihil mihi videtur hic superesse difficultatis, nisi quod, postquam quis diu credidit esse homini multas præ cæteris creaturis prærogativas, videatur homo omnibus illis exui, si contraria sententia admittatur. Sed distinguo inter ea bona, quæ vilesceere possunt exinde, quod alii similia possideant, atque ea, quorum pretio nihil propterea

pterea decedit. Sic homo qui haberet tantum mille pondo auri ditissimus esset, si nemo præter illum tam multa haberet, atque idem pauperrimus, si nemo non multo plura possideret; parique ratione ex laudabilibus quibusvis dotibus maiorem gloriam consequuntur ii, qui illis præditi sunt, quo pauciores sunt qui illas possideant; quapropter moris est alienæ gloriæ & divitiis invidere. Sed virtus, scientia, sanitas, aliaque omnia omnino bona in se considerata, absque respectu ad gloriam, neutiquam in nobis imminuuntur, exinde quod in plurimis etiam aliis reperiantur, adeoque nulla est ratio cur illa in multis esse doleamus. Bona autem, quæ in omnibus indefiniti mundi creaturis intelligentibus inesse possunt, in hoc numero sunt; nostris enim nihil propterea decedit. E contrario cum Deum amamus, atque per illum nos voluntate coniungimus cum rebus omnibus creatis, quo majores, nobiliores, perfectioresque illas concipimus, eo pluris nosmet etiam facimus, quia partes sumus totius perfectioris; eoque major causa subest, cur Deum ob operum ejus immensitatem laudemus. Hanc opinionem confirmat Scriptura, dum passim loquitur de Angelorum multitudine innumerabili; cogitamus enim Angelorum etiam postremos hominibus longe perfectiores esse: Illamque etiam confirmant Astronomi, qui stellarum magnitudinem metientes, illas terra longe majores deprehendunt: si enim ex indefinita mundi extensione inferatur alibi, quam in terra, incolas haberi, idem etiam inferri potest ex ea, quæ ipsi ab Astronomis tribuitur, extensione, quandoquidem nemo est illorum qui non judicet terram totius cæli respectu minorem esse, quam arenulam respectu montis.

Transco jam ad quæstionem tuam de causis quibus ad hominem unum magis quam alium, etiam incognitis meritis, amandum ferimur; duasque adverto, quarum una in animo est, alia in corpore. Verum ea, quæ est in animo, tam multa supponit de natura animarum nostrarum, ut non auisim ea omnia in una epistola exponenda suscipere; quare dicam tantum de ea, quæ est in corpore. Consistit autem hæc in cerebri nostri partium dispositione, sive hæc dispositio ab objectis per sensus, sive ab alia aliqua causa inducta fuerit. Objecta enim, quæ sensus nostros afficiunt, movent quasdam cerebri nostri partes nervorum ope, certasque in coplicas faciunt, quæ quando ab agendo cessat objectum, evanescent; sed pars ea in qua receptæ fuerunt, manet postmodum disposita, ad plicas eodem pacto denuo recipiendas ab alio quovis objecto, quod sit priori quadantenus, licet non per omnia, simile. Ex. gr. cum essem puer, amabam æqualem mihi puellam, cui erant limuli oculi; hocque pacto im-

pressio, quæ per visum in cerebro meo recipiebatur, ita adjungebatur impressioni, quæ in eo etiam fiebat ad commovendam in me amoris passionem, ut etiam diu post, quoties in aliquas inciderem, quibus essent similes oculi, me ad illas præ aliis amandas proclivem deprehenderem; ob hoc scilicet unum, quod hoc vitium præ se ferrent; neque tamen sciebam hanc mihi amandi causam esse; è contrario ex quo hoc necum reputans agnovi esse vitium, eo amplius commotus non fui. Pari ratiocinio, cum quempiam amamus latente causa, credere est id inde fieri, quod ipsi insit aliquid simile iis, quæ in objecto quoque antea amato fuerunt, quamvis quid sit illud nesciamus. Quanquam autem perfectio sit sæpius quam vitium, id quod nos ad amorem ita allicit; nihilominus quia nonnunquam fieri potest, ut sit vitium, quemadmodum in allato à me exemplo, non debet sapiens quispiam huic affectui plane indulgere, antequam ejus, erga quem se ita commotum perentiscent, meritum perpenderit. Verum quia fieri non potest ut eos omnes pariter amemus, in quibus paria merita deprehendimus, credo debere nos illis omnibus parèem tantum æstimationem; & cum potissimum vitæ bonum sit amare aliquos, magnam esse causam, cur eos anteponamus, quibuscum secreta propensione conjungimur, modo aliquid etiam meriti in iis deprehendamus. Præterquam quod ubi secreta hæc propensiones causam habent in animo, non vero in corpore, puto esse iis nunquam non obsequendum. Præcipuum autem, quo discernantur, *reciprocum* est, quod quæ ab animo proficiuntur, reciprocæ sint, quod aliis plerumque non contingit. Tuæ autem erga me benevolentia argumenta me tam certum faciunt mutuam esse eam, qua te amplector, amicitiam, ut ingrati prorsus animi postulandus essem, inque omnes amicitia leges peccaturus, nisi essem summo cum studio, &c.

EPISTOLA XXXVII.

Ad Dominum Chanutum.

Officii ergo, occasione scriptorum, qua ad illum pro Regina Suecia miserat.

Fateor pigere me quod scripta, quæ ad te pro Suecia Regina transmiseram, tanta cum laude excipienda curaveris, vereor enim ne quæ major fuerit incomparabilis Reginae de illis opinio, eo sequior demum futura sit, cum illis perfectis nihil reperiet, quod æquet spem, quam apud illam

illam fecisti. Aliud etiam doleo, nimirum quod, cum fasciculus meus fuerit Amstelodami per tres hebdomadas detentus, (quod intellexi factum fuisse propterea quod putarent esse illum per mare transmittendum, atque ideo opportunitatem expectarent) per hoc temporis spatium non tentaverim aliquid, quod esset tanta expectatione minus indignum. Nam licet in meis ad illam literis operam omnem & ingenium contulerim, tamen novissimæ cogitationes primis clariores esse solent, & præterea rescribendo festinaveram, mea saltem promptitudine testaturus, quam avide persequeretur mandatum istud, quod summi honoris loco habebam. En Domine, omnes, quas possim fingere, tristitiæ causas, quibus modum aliquem ponam summæ qua perfundor lætitiæ, dum intelligo magnam illam Reginam non dedignari mea quæ mihi scripta legere, eaque cum otio pensitare; ausim enim sperare inanes non fore cogitationes eas, quæ in illis continentur, si modo ipsa illas gustaverit; amo & quia inter orbis Dominos ipsa locum tenet, posse eas in publicum bonum cedere. Mihi porro videor expertus fuisse, illarum considerationem confirmare animum in exercitio virtutis, magisque ad beatitudinem nostram conducere, quam quidvis præterea aliud. Sed vix est ut illas ita expresserim, ut quales mihi, tales etiam aliis videantur: Valde aveo rescire, quale sit Reginæ de illis iudicium, maxime verò quale sit tuum. Multo plus valet vox ad suadendum, quam charta, nec dubito quin Reginam facile pertrahas in sententiam tuam, saltem si non sit mihi indecora; nec enim tuæ erga me benevolentiae quotidiana argumenta sinunt ut secus de te sentiam. Viderem libenter orationem Domini F. propter argumentum, quod in illa tractatur, illamque petam à Domino Braslet, quam primum illam acceperit. Cæterum propositum est mihi ire Parisios mensis proximi initio, posseque dicere referre mea, ut te ibi tam cito non videam, propter officia, quibus me in Succia prosequeris; sed mei rationem nullam habeo, cum de amicorum satisfactione agitur; fateorque insuper non optaturum me laboriosam provinciam, quæ animi excolendi otium mihi adimeret, etiamsi magno honore & utilitate compensaretur. Dicam autem non videri mihi tuam esse ex illarum numero, quæ animi excolendi otium adimant; è contrario occasiones ad hoc subministrat, cum agas apud Reginam ingenio multo pollentem, sitque opus prudentia minime mediocri, ut quispiam & dominis suis plane satisficiat, & iis placeat ad quos missus est, atque interea probi tantum hominis personam sustineat, quod te facere persuasum habeo. Magna semper voluptas percipi potest ex arduis ingenii occupationibus, si quidem nobis

bene cedant, etsi ejusmodi non sint, ut illarum optionem, si nostri arbitrii fuissent, facturi fuissimus. Cum tuum sit natum ad omnia, minime dubito quin ex legatione, qua tanta cum laude fungeris, voluptatem multam percipias. Si tamen instaret reditus tui tempus, esseque Lutetiam brevi reversurus, bearet me præsentia tua. Sin vero in Suecia diutius commoraturus es, erit mihi solatio, quod sperem te peracturum in concilianda mihi magnæ illius Reginæ benevolentia, erga cujus virtutes magnam mihi venerationem & studium indidisti, &c.

E P I S T O L A XXXVIII.

Ad Dominum Chanutum.

Encomium Regina Suecia. Tria precepta in gratiam illorum, qui se ad Principia ejus legenda accingunt.

HAud immerito existimas multo potiore causam esse, quam obrem mirer, quod Regina negotiis indefinenter districta, meminerit post plurimos menses epistolæ, quam ad illam dederam, & quod responsum dare non fuerit gravata, quam quod citius non responderit. Admirationem mihi fecit, quod tam eleganter & tam facile scriberet Gallice. Gens nostra ipsi hoc nomine valde devincta est, mihiq; videtur hæc Princeps ad Dei imaginem eo meliori jure creata, quam cæteri homines, quo curas suas ad maiorem simul diversarum occupationum numerum extendere potest. Nam solus Deus est in tota rerum universitate cujus mens nunquam defatigatur, & qui non minus exacte capillos nostros habet in numerato, vermibusque etiam minimis prospicit, quam cælos movet & astra. Quanquam autem literas, quibus me dignata est summa hæc Princeps, acceperim tanquam gratiam à me plane immeritam, mirerque quod eas scribere non fuerit gravata, haud tamen æque miror, quod Principia mea legere animum induxerit; persuasum enim habeo multas in illis contineri veritates, alibi vix repericndas. Equidem dici potest hæc de rebus Physicis veritates parvi momenti esse, & videri ad ea nequaquam attinere, quæ scire Reginam decet: sed cum hujus ingenium sit rerum omnium capax, Physicæque hæc veritates fundamentum sint altissimæ & perfectissimæ Ethicæ, aulim sperare illarum cognitionem ipsi ingratam non fore. Gauderem vehementer si te una cum D. Freinshemio elegisset ad se in hoc studio sublevandam; mihiq; per gratum feceris, si me moni-

tum

rum habueris locorum in quibus mentem meam minus aperui. Responderem tibi sedulo iisdem ipsis diebus, quibus literæ tuæ mihi redderentur, sed hoc ad me tantum erudiendum conferret; nam tam longe abhinc distat Stokholmum, & per tot manus commeant literæ, antequam illuc perferantur, ut difficultates obvias longe citius esses ipse soluturus, quam earum solutionem à me accepturus. Hic autem duo tantum aut tria adverto, quæ de hoc libro me docuit experientia. Primum est, quod, quanquam pars ejus prima non sit nisi Meditationum mearum compendium, minime tamen opus sit ad ejus intelligentiam Meditationibus istis legendis immorari, quippe quæ permultis longe difficiliore videantur, timerem autem ne Reginæ tædium allaturæ essent. Alterum est, quod, non opus sit immorari examinandis motus regulis, quæ habentur art. 46. 2. Partis & sequentibus, quia ad reliqua intelligenda non sunt necessario requisitæ. Tertium est, quod in hoc libro legendo meminisse oportet, quod, quanquam nihil in corporibus considerari præter particularum, ex quibus illa constant, magnitudines, figuras & motus, tamen luminis, caloris, aliarumque sensibilibus qualitaturnaturam in eo explicasse me contendam; suppono enim hæc qualitates non secus quam titillationem & dolorem sensibus nostris inesse, non vero in iis, quæ sentimus, objectis, quibus nihil inest præter figuras quasdam & motus, qui sensationes eas generant, quas dicunt lumen, calorem, &c. quod sub finem quartæ tantum partis declaravi & probavi; & tamen ad rem facit hoc scire & ab initio libri advertere, ut melius intelligatur. Cæterum excusatum me habeas velim, quod tuæ ad me literæ Parisiis me quæsutum iverint, & tibi citius non nunciarim reditum meum in Hollandiam, quam quinque abhinc mensibus repetii. Sed putabam Dominum Cl. de hoc ad te scripturum, quia cum essem in Gallia de te sæpius ab illo audiebam; meum autem reditum data opera silebam, ne viderer illum exprobrare iis, qui me illuc acciverant. Reputavi scilicet mecum mihi prorsus idem accidisse, ac si vocatus ab amicis in prandium, offendissem adveniens culinam incompositam, ollamque subversam; ac propterea, ne dolorem illorum augerem, silens illico redii. Sed me docuit hæc experientia ne ullum unquam iter aggrediar promissis adductus, pergameno licet inscriptis. Et quanquam nihil me hic loci moretur, nisi quod nullum locum noverim, in quo commodius esse possim, tamen periculum est, ne reliquam vitam hic traducam; vereor enim ne procellæ nostræ Gallicæ non tam cito componantur, siquæ indices segnior, ita ut ægre possem adduci ad itineris incommoda iterum subeunda. Sed spero te ex Suecia

Succia aliquando rediturum, meque tū prætereunte te hic demum fruiturum. Ero autem per totam vitam, &c.

Epistola huic adjuncta nihil continet præter officiosa verba, cum enim non fuisset de re ulla rogatus, me tenuit veneratio, ne si de ulla tractarem, viderer philologus, & tamen exultavi officii mei esse ut scriberem.

EPISTOLA XXXIX.

Ad Reginam Succiz.

Officii ergo, occasione sumpta ex ejus responsō.

SI mihi contigisset videre epistolam cælo demissam, atque ad me de nubibus descendentem, haud magis obstupuissem, nec majori illam veneratione acciperem, quam eam qua me Majestas tua dignata est. Sed gratiarum, quas per illas agis, me usque adeo indignum esse agnosco, ut eas nequeam accipere, nisi ut favorem, quo me liberare nunquam possim. Responsum meum satis superque compensatum fuerat, quod Majestatis tuæ nomine fuisset à D. Chanutō de summo bono interrogatus; cumque ex illo postmodum intellexissem, fuisse responsum hoc benigne exceptum, non poteram pro tantula re quicquam majus aut sperare aut optare: præsertim à Principe, quàm in tanta dignitate Deus collocavit, quæ tam multa secum trahit magni momenti negotia, quorum ipsa curas suscipit, & cujus vel minimæ actiones ad universi orbis bonum tantopere conferre possunt, ut quilibet virtutis studiosus se beatum existimare debeat, si quando in occasionem incidat illam officiis suis prosequendi. Et quia in hoc numero peculiariter esse me prædico, ausim hic apud Majestatem tuam profiteri, non posse illam quicquam mihi tam arduum impedire, quin sim iustus ejus, quoad potero, exequendis nunquam non paratissimus futurus; nec si essem origine Suecus aut Finlandus, posse meum erga eam studium majus esse aut perfectius quam est, &c.

EPISTOLA XL.

Ad Dominum Chanutum.

Officii & negotiorum ergo.

Mirum est quam bene tempora dimetiari; cum enim huc iter facerem, offendi Hagæ epistolam, quam accipere me volueras, antequam

quam Hollandia excederem; in hoc solum sero allata fuit, quod cum proficisci decrevissem eo ipso, quo mihi reddita fuit, die, coactus fu-
rim in meum ad hanc civitatem adventum responsionem differre. In-
terea non defuit mihi otiumvolvendi animo egregiam illam, quam de-
scribis, venationem, in qua asciscuntur libri, atque ubi spem facis meum
præ multis aliis hoc honore affectum iri, ut à Regina relegatur. Magna
opinio, quam de ingenio summæ hujus Principis habeo, metum facit ne
hoc illi scriptum minus ardeat, quandoquidem perlecto jam eo, ut scri-
bis, noluit tamen suam tibi de illo sententiam aperire. Sed me reficit quod
addis, esse ipsi propositum illud relegere: haud enim illi immorari di-
gnaretur, si nihil in eo deprehendisset, quod ipsi probaretur. Hacque
mihi opinione blandior, cogitationibus meis non tam veritatem, quam
ordinem, concinnitatem, & elocutionis ornatum deesse; unde fit ut ex
secunda lectione promptiorem assensum expectem, quam ex prima. Di-
ces forsan me mihi nimis plaudere. Sed quæso culpam in cælum Pari-
sienſe potius, quam in ingenium meum conſeras: Puto enim me tibi jam
olim dixiſſe hoc cælum aſſlare mihi chimæras, potius quam Philoſophi-
cas cogitationes. Tam multos quoque alios video, qui in opinionibus &
rationibus ſuis decipiuntur, ut mihi videatur is morbus eſſe hic epidemi-
cus. Innocentia eremi, quam nuper reliqui, mihi multo magis ardebat,
& vix mihi temperabo, quin illam brevi repetam, ſed ubicunq; terra-
rum ſim, credas velim me eſſe, &c.

EPISTOLA XLI.

Ad Elizabetham Principem Palatinam, &c.

Officii ergo.

QUANquam non ſim neſcius, me non eſſe in ejuſmodi aut loco aut
conditione, quæ mihi præbere poſſunt occaſionem inſerviendi Cel-
ſitudini tuæ, tamen officio & ſtudio ergate meo eſſem deſuturus, ſi no-
vus regionis huiuſce hoſpes humillimi mei erga te obſequii teſtimonia
non renovarem. Incidi hic in eum rerum ſtatum, quem non potuiſſet
humana prudentia prævidere. Parlamentum una cum cæteris ſupremis
curiis quotidie nunc congregatur, ærarii adminiſtrationi proſpecturum,
idque fit jam annuente Regina, ita ut veriſimile ſit rem in longum abitu-
ram. Sed quiſ ſit illius exitus futurus, vix licet judicare. Dicunt eſſe illis

M

propo-

propositum satis pecuniæ cogere ad bellum gerendum, magnosque exercitus alendos, idque integro à vectigalibus populo; hanc viam si ineant, mihi persuadeo optimam fore, qua ad pacem generalem tandem deveniatur. Sed interea caute fecissem, si in ea regione mansissem, quæ jam pace fruitur; & nisi hæ procellæ quamprimum defæviant, animus est intra quinque aut sex hebdomadas Egmundam concedere, ibique manere donec serenius sit celum Gallicum. Interim pede uno regionem unam, alio aliam tenens, mihi videtur conditio mea eatenus felicissima, quod sum liber; & opinor eos, qui in magna sunt fortuna, differre ab aliis ægritudinum acrimonia, magis quam voluptatum copia; etenim cum omnes, quibus frui possunt, voluptates sint ipsis familiares, afficiuntur minus illis, quam calamitatibus, quibus inopinantes & imparati premuntur. Debet hoc eos solari, quos incommodis suis fortuna assuefecit. Utinam esset illa votis tuis obsequens, ut ero per totam vitam, &c.

EPISTOLA XLII.

Ad D. Chanutum.

Accipitur in Sveciam.

NOvissimæ literæ, quas ad memisisti Parisios, in manus meas non pervenerunt; sed earum exemplum Domini Brasset curâ mihi modo redditum fuit; summæque gratiæ duco, quod ex illis intelligo, Reginæ Sveciæ visum esse, ut illam salutatum eam. Tanta veneratione suscipio altas & eximias Principis hujus dotes, ut placitorum ejus minimum sit mihi pro summo mandato; quare hoc iter in deliberationem neutiquam adduco, obsequendî certus. Sed quia tempus nullum mihi præfigis, idque proponis tanquam deambulationem, ex qua possem hac ipsa ætate reverti, cogitavi non fore facile, ut tam brevi tempore Majestati suæ multum satisfaciam, & fore ipsi forsan jucundius, ut longius spatium capiam, hyememque Stokolmi traducam. Qua ex re commodum accedet mihi haudquaquam contemnendum, homini certe non amplius juveni, & qui viginti annorum quiete à labore prorsus desuevi; scilicet non erit necessarium, ut iter aggrediar incunte vere, aut sub finem autumnî, sed potero tempestatem tutissimam aptissimamque, mediam nempe ætatem, sumere; præterquam quod spero mihi interea fore otium prospiciendi negotiis quibusdam meis. Itaque antequam proficiscar,

ciscar, decrevi expectare alias à te literas, quibus acceptis obtemperabo sedulo iis omnibus, quæ Majestatis suæ nomine mihi in mandatis fuerint, aut quæ ipsi grata esse renunciaris; nescio enim utrum in rem sit, ut sciat me hanc moram petivisse; neque etiam ausim ad illam scribere, quoniam veneratio & studium suadent fore officii mei, ut vel ante ipsos veredarios in Sueciam festinarem; sed amicitia & prudentia tuæ excusationes meas committo. Cæterum nescio quibus verbis gratias tibi acturus sim, qui tanta mihi, tuasque vel ipsas ædes offeras. Illas nec accipere audeo, nec recusare. Hoc unum scias velim, me quoad potero, curaturum ut nec tibi, nec tuorum ulli molestus sim.

EPISTOLA XLIII.

Ad Dominum Chanutum.

Ægre adducitur ad suscipiendum iter in Sueciam.

Binas, si placet, literas hac vice accipies; cum enim cogitarem, velle te forsitan unas Regina Sueciæ ostendere, rejeci in has id quod judicavi haud esse in rem ut videret, nimirum ægrius multo adduci me ad hoc iter instituendum, quam ego ipse putassem. Non quod huic Principi inservire summopere non cupiam. Verbis tuis tantam fidem habeo, ejusque mores & ingenium, prout descripsisti, tantopere suspicio & colo, ut quanquam ipsa careret summa ea, in qua est, dignitate, nec esset genere nisi vulgari, tamen aggressurus essem longius multo & difficilior quam in Sueciam iter, oblaturus ei quicquid ad vota ejus implenda penes me esset, si modo liceret sperare utile ipsi fore iter meum. Sed me docuit experientia paucissimos esse, etiam inter ingeniosissimos viros & sciendi cupidissimos, qui possint à se impetrare spatium introspectendi in opiniones meas; ita ut id sit vix expectandum à Regina, quam innumeræ alix occupationes abstrahunt. Docuit me etiam experientia, quod, quamvis opiniones meæ prima fronte miræ videantur, quia à vulgaribus recedunt, tamen semel comprehensæ, tam simplices & sensui communi conformes deprehendantur, ut cesset prorsus admiratio, proindeque earum pretium. Etenim ita est hominum ingenium, ut eas tantum res in pretio habeant, quæ ipsis admirationem efficiunt, & quas plane perspectas non habent. Sic quanquam sanitas sit bonorum omnium, quæ ad corpus pertinent, summum, tamen illud est de quo minus co-

gitamus, quodque gustamus minus. Veritatis cognitio est animæ veluti sanitas; cum possidetur, vix cogitationem moratur; & quamvis nihil æque cupiam, ac aperte & gratis impetiri pauxillum illud, quod scire me opinor, tamen in neminem fere incido, qui id discere dignetur. At vero video eos, qui jactant arcana ex. ca. in Chymia aut Astrologia judiciaria, quantumlibet ignaros & ineptos offendere curiosos, qui imposturas eorum caro emant. Cæterum videtur fortuna mihi invidere, propterea quod nihil unquam ab illa expectare voluerim, quodque vitam meam ita instituere fuerim conatus, ut nihil in me juris haberet; data enim occasione, mihi nunquam non adversatur. Hoc sum expertus in tribus, quæ in Galliam suscepi, itineribus, ex quo in hanc regionem concessi; sed præsertim in novissimo, quod mihi veluti nomine Regis fuerat imperatum: atque ut ad id faciendum allicerer, missæ fuerant ad me literæ in pergamenâ scriptæ, Regioque sigillo optime munitæ, quæ continebant clogia multo majora, quam essem meritis, una cum satis honesto annuo donio; & præterea privatarum eorum, qui Regias ad me transmittebant, literæ mihi statim post adventum meum multo majora pollicebantur. Sed simul illuc appuli, ex tumultibus inopinato ortis factum est, ut nec præstita fuerint promissa, invenerimque exactam fuisse à cognato quodam meo, pro expediendis Regiis literis, quæ ad me missæ fuerant, pecuniam illi à me refundendam; ita ut non videar fuisse profectus Parisios, nisi ut pergamenam emerem longe carissimam, inutilissimamque omnium quæ in manus meas unquam venerint. Hoc tamen parum laboro, nec tribuissem nisi misero rerum publicarum statui, fuissetque nihilo fecius contentus, si vidissem iter meum, iis, qui me acciverant, prodesse potuisse, sed fastidium mihi maximum attulit, quod illorum nullus testatus fuerit velle se quicquam de me nosse præter vultum; ita ut locus sit, neque immerito, existimandi, fuisse me ab illis in Galliam accitum Elephantis aut Pantheræ instar, ad novitatem scilicet, haudquam vero ad utilitatem. Nihil quidem tale suspicor de eo, in quo es, loco, sed tam infelices fuerunt omnium, quæ viginti abhinc annis institui, itinerum exitus, ut metuam ne me nihil aliud in hoc inaneat, quam aut ut incidam in prædones, qui me spolient, aut naufragium, quo peream. Horum tamen nihil me morabitur, modo putes summam illam Reginam pergere in proposito examinandi scripta mea; & si tempus ad hoc habeat, felicem me existimarim, si possim ipsi quocunque pacto inservire. Sin minus, & aliqua tantum curiositate ducta fuerit, à qua liberum jam animum habeat, oro te & obtestor facias ut illi non displi-

displaciat, si me ab hoc itinere excusatum velim. Eroque per totam vitam, &c.

Egmondæ ultimo Martii 1648.

EPISTOLA XLIV.

Ad Elizabetham Principem Palatinam, &c.

Officii ergo.

Mensis est præterpropter ex quo ad Celsitudinem tuam scribens, nunciabam accepisse me literas ex Suecia; alix mihi modo redduntur, per quas inquit nomine Reginæ ad faciendum illuc iter verno hoc tempore, ut possim ante hyemem reverti: sed ita respondi, ut quamvis proficisci non renuam, tamen non nisi circa mediam æstatem discessurum me credam. Pluribus de causis moram hanc flagitavi, sed præsertim ut liceret mihi Celsitudinis tuæ iussu ante discessum meum capessere. Edidit jam olim tam publica mei erga te studii argumenta, ut si eorum quæ te spectant incuriosus viderer, culpandus essem magis, quam si videar occasiones sedulo quærere mea tibi officia persolvendi. Quare Celsitudinem tuam humillime obsecro ut me monitum velis, si quid sit, in quo existimes posse me aut tibi aut tuis prodesse, sitque apud te certum, non esse tibi minus in me juris, quam si per totam vitam domesticus tuus fuisssem. Oro etiam ut mihi significes, quid velis me respondere, si mentio fiat epistolarum Celsitudinis tuæ de summo bono, quas in meis anno superiore commemoraveram, illasque videre cupiant. Rationem inii, quasi hyemem ibi traducturus sim, annoque tantum proximo rediturus. Tum credibile est totam Germaniam pacatam fore, & si vota mea implcantur, instituiam reditum meum per locum eum, in quo eris, ut possim melius testari me esse, &c.

EPISTOLA XLV.

Ad Dominum Chanutum.

Officii & negotiorum ergo.

Philosophia illa cui studeo, nequaquam docet abjiciendum esse passionum usum, quas quidem pro tranquillitate Gallix vehementior-

M 3

res

res gero, quam eorum quisquam, qui procellis Gallicis vel maxime implicetur; unde judicare poteris, quantum sim tibi devinctus, quod mihi impertitus fueris gratos eos nuncios, quos ex Sancto Germano accepisti. Nihil defuisset lætitiæ meæ, nisi in novissimis novellis legissem, Archiducem tendere Parisios, ipsique permissum fuisse Successiones usque transitum. Ad magnas angustias redactas esse res oportet, cum expectatur auxilium ab iis, quorum liquet maxime interesse, ut mala nostra durent. Deum oro, ut fortuna Galliarum omnium superet conatus, qui ipsi nocere student. Quantum ad deambulationem, ad quam fui invitatus, si non esset longior, quam à domo tua ad Hagæ Turonum lucum, esset iam promptu consilium. Sed ea est itineris longinquitas, ut non sit abs re ante profectionem deliberandi spatium sumere. Itaque quanquam sit difficile ut morem non geram mandato à tanta Regina proficiscenti, tamen haud credo me ante tres menses hinc discessurum. Sed quocunque terrarum sim iturus, credas velim me pari semper studio futurum, &c.

E P I S T O L A XLVI.

Ad D. Chanutum.

De itinere suo in Sueciam suscipiendo.

NEmini mirum fuit, quod Ulysses, relictis Calypsus & Cyrces incantatis insulis, in quibus poterat nullo non voluptatis genere frui, spretoque Syrenum cantu, in petream & sterilem regionem concederet; quia nimirum patria ejus erat: Sed fateor hominem in hortis Turonentibus natum, nunc vero regionis ejus incolam, quam si mellis minus, at plus lactis habere credibile est, quam terram Israëlitis à Deo promissam, haud facile posse adduci, ut eam ursarum patriam commutet, inter rupes & glaciem concessurus. Verum tamen quia eadem hæc regio ab hominibus etiam incolitur, quorum Regina scientia, intelligentia, & ratione antecellit doctos omnes Collegiorum & Cœnobiorum, quæ regionum, in quibus vixi, fertilitas protulit, animum induco loci amenitatem ad sapientiam nequaquam requiri, hominesque non esse arborum similes, quas observant parcius crescere transplantatas in solum macrius eo in quo satæ fuerant. Dices forsan, me tibi nihil hic præter fimenta & fabulas reponere, pro veris & magni momenti rebus, quas
mihi

mihi nunciasti; sed solitudo mea meliores jam fructus non suppeditat, & lætitia qua perfruor, cum intelligo Galliam fuisse in sævissima procella naufragio ereptam, animum meum ita exhilarat, ut nequeam hic ferium quicquam ultra addere, nisi quod sum, &c.

EPISTOLA XLVII.

Ad D. Chanutum.

Pollicetur se iterum in Sueciam.

SI novissimæ tuæ mihi eo tempore reddita fuissent, quo perferri debuerant, credo quod te Stokolmi visurus fuisssem, antequam has accipias; sed quia duodecim aut tredecim dies inter Hagam & Alkmariam detentæ fuerunt, factum est ut classis Suedicæ Præfectus F. huc venerit prius quam ex iis cognovissem quis ille esset; ita ut quanquam plurima usus sit urbanitate, ut ad iter secum faciendum me invitaret, haud tamen mihi videbatur satis causæ esse, cur consilium inirem diversum ab eo, quod paucis ante diebus ad te scripseram, nempe expectatum me alias adhuc à te literas, antequam proficiscerer. Ex verbis enim ejus colligebam quidem te mea causa ad illum scripsisse; sed hoc non secus, quam ut amicitia tuæ argumentum, interpretabar: Quod vero mihi multa offerret, urbanitati tantum tribuebam; quia cum nescirem, illum esse ex Suedicæ classis Præfectis unum, non videbam qua in re posset præsentia ejus ad itineris securitatem aut commodum conferre. Neque porro de me tam bene sentiebam, ut putarem Reginam, quæ tantis negotiis vacat, omniaque vitæ suæ momenta tam utiliter collocat, mandare tibi voluisse, ut me illi commendares. Gratia hæc me tantopere devincit, ut nihil me morari queat, quamprimum literas à te accepero; & vehementissime cupio proficisci, ut tibi dicam me esse, &c.

pellem, oremque ut à me scrupulum amoveas, quem iniecit mihi summum desiderium parendi Reginæ Dominæ tuæ, jubenti ut Stokolmum proficiscar illam salutatum. Dominus Chanutus testis erit, fuisse me adornatum professioni, antequam huc appelleret, & conatum fuisse difficultates omnes superare, quæ morari solent professionis & ætatis meæ hominem, domicilium solitum relictum seque tam longo itinere commissurum. Sed, quanquam me ad professionem accinctum deprehenderit, deprehenderimque etiam esse illi in expedito rationes, quibus hoc mihi iter suaderet, si minus apud me constitutum fuisset; tamen quia non dixit, esse sibi ullum à Regina mandatum, quod festinationem juberet, ætasque adhuc longa est, aliquam ipsi difficultatem proposui, de qua visum est ipsi ut te consulerem; Nempe cum non potuerim me ad iter illud comparare, quin id permulti resciverint, habeamque inimicos plurimos, non quidem, Deo gratias, privati mei nominis, sed propterea quod sim novæ Philosophiæ Autor, nullus dubito quin nonnulli in Succiam scripserint, ut me illic traducere conentur. Equidem non timeo ne in Majestatis suæ animum quicquam valeant calumniæ, sed quia Principum maxime interest, ut etiam levissimas occasiones fugiant, quas possent subditi arripere eorum actiones improbandi, pigeret me admodum, si præsentia mea materiam datura esset illorum obrectationi, qui vellent criminari, illam esse studio plus nimis addictam, aut excipere diversæ Religionis homines, aut alia id genus. Et quamvis vehementer cupiam ire salutatum Majestatem suam, in alim tamen in itinere mori, quam ut illuc adveniens occasionem darem rumoribus ipsi vel minimum contumeliosis. Itaque, Domine, te rogo, non ut de his apud Reginam sermonem facias, sed ne graveris ad me scribere, quid ex ejus propensione & temporum statu judicaveris esse in rem ut faciam; tibi enim sedulo obtemperabo, sive jubeas ut expectem Domini Chanuti reditum, (quicquid enim ille dicat, haud credo cum reliquisse illic uxorem suam, ut sola redeat) sive malis ut me itinere committam statim post tuas acceptas. Unum præterea te rogo, nimirum quod, cum amicus quidam meus à me importune flagitaverit, ut exiguum de Passionibus tractatum, quem Majestati suæ antehac obtuli, ei concederem, sciamque animum ei esse illum typis committere, una cum præfatione quadam sua, nondum tamen ausus fuerim illum ei mittere, quod nesciam an Majestati suæ futurum sit gratum, ut quod ipsi privatim oblatum fuit, publici juris fiat, etiam ipsi non dicatum. Sed quia tractatus iste minor est, quam ut præferre mereatur tantæ Principis nomen, cui potero majus aliquod opus postea

N

nun-

nuncupare, si istud homagii genus ipsi non displiceat, putavi non fore ipsi forsan ingratum, ut hujus amici postulato annuam. Atque hoc est quod te etiam atque etiam rogo ut me doceas, curarum enim mearum summa est, ut ipsi morem gerere & placere studeam. Ceterum ut scias qui agam cum iis quibuscum amicitiam inco, velim id mihi gratia apponas quod patiar me officiis tuis præverti. Vale.

EPISTOLA L.

Ad Elizabetham Principem Palatinam, &c.

Officii ergo, postquam Stokolmum appulisset.

CUM appulerim Stokolmum quatuor abhinc aut quinque diebus, existimavi in primis esse officii mei, ut humillima mea Celstitudinis tua obsequia denuo offerrem, quo scias neque cæli neque regionis mutatione quicquam posse in studio erga te meo mutari. Nondum licuit mihi videre Reginam, nisi bis, sed mihi videor illam jam satis nosse, ut ausim dicere non esse illi minus meriti, quam fama fert, esse vero plus virtutis. Præter magnanimitatem, & Majestatem, quibus actiones ejus omnes fulgent, elucet in iis lenitas quædam & humanitas, qua virtutis studiosum quemque, cui ad illam pateat aditus, sibi totum devinciat. Illa me in primis percontata est, nunquid de te nuper audivissem, neque dubitavi quid de Celstitudine tua sentirem, ilico profiteri; cum enim vim ingenii ejus perspicerem, minime veritus sum ne hoc apud illam paritum esset invidiam; ut etiam certus sum non invisum fore Celstitudini tuæ, quod meam de hac Regina opinionem ad te libere scribam. Ipsa est literarum studio admodum addicta; sed quia nondum scio, an unquam dederit operam Philosophiæ, judicare nequeo quomodo ipsi sapiet, atque an ei vacare poterit, ac proinde an sum illi ullo pacto satisfactorus, aut quapiam in re profuturus. Magnus ille ardor, quo literas amplectitur, eam ad Græcam linguam potissimum excolendam nunc temporis excitat, veterumque libros magna copia conquirendos, sed hanc fortasse sententiam mutabit; sin minus, virtus, quam in illa deprehendo, me semper adducet ad utilitatem ejus anteponendam placendi studio; ita ut nihil sit obstiturum quo minus libere ipsi dicturus sim id quod sentio; si vero id ipsi minus arrideat, quod tamen non puto, hoc saltem mihi inde accedet boni, quod officio meo functus, habiturus sim

occa-

occasionem eo citius repetendi solitudinem meam, extra quam vix fieri potest, ut in veritate indaganda quicquam progrediar; in hoc autem summum meum vitæ hujus bonum posui. D. Freinshemius à Majestate sua impetravit, ut Regiam non adirem, nisi iis horis, quibus me colloquio suo dignari voluerit, atque ita non erit mihi difficile aulicum agere; id vero est ingenio meo accommodatissimum. Cæterum quanquam Majestatem suam summa veneratione prosequar, haud tamen puto quicquam esse, quod ultra ætatem proximam morari me hic possit: Sed de futuro nihil possim certo polliceri, nisi quod sim mansurus per totam vitam, &c.

EPISTOLA LI.

Ad Elizabetham Principem Palatinam, &c.

Cur argentum vivum aqua sit gravius. Cur particula striata in centro terre non destruantur. Cur magnetis virtus in terra minor videatur, quam in exiguis magneticis lapidibus.

QUOD Celstudini tuæ non displicuerit, ut palam testarer quantum te colam, tantæ gratiæ duco, ut non potuerit aliud quidquam me tibi magis devincire; neque vero timeo ne quis criminetur quicquam à me in Ethica fuisse corruptum, dum meam de illa sententiam exponerem; est enim tam verum & clarum id quod de Ethica scripsi, ut mihi persuadeam neminem ratione præditum id non concessurum. Verum timeo ne magis dubia sint & obscura ea, quæ in reliquo libro habentur, cum nonnullas in iis difficultates Celstudio tua deprehendat. Ea certe quæ spectat argenti vivi gravitatem, est notatu admodum digna, fuissetque confatus illam expedire, nisi quod mihi nondum satis perspecta erat metalli hujus natura, verebarque ne quid dicerem, quod minus congrueret cum iis, quæ essem deinceps experturus; hoc unum in præsens possum dicere, esse mihi persuasum aëris, aquæ, cæterorumque corporum particulis plurimos poros inesse, quos potest materia subtilissima pervadere, hoc enim satis sequitur ex modo, quo dixi illas formari; ut autem intelligatur cur argentum vivum, cæteraque metalla sint graviora, satis est si dicamus illorum partibus inesse pauciores ejusmodi poros. Nam e. g. quanquam admitteremus aquæ & argenti vivi partes ejusdem esse magnitudinis & figuræ, illarumque motus esse similes; si modo supponamus par-

tium aquæ quamlibet esse instar funiculi molliis & laxi, vivi autem argenti partes, cum pauciores poros habeant, esse aliorum funiculorum instar multo duriorum & constrictiorum, satis indeliquebit argentum vivum debere esse multo gravius, quam aquam. Quantum autem ad particulas striatas, mirum non est quod ab igne, qui in terræ centro existit, non destruantur; ignis enim ille, cum non constet uisi ex sola materia subtilissima, potest quidem illas citissime rapere, non vero facere ut in dura ulla alia corpora impingant; quod quidem ad illas frangendas aut dividendas requireretur. Cæterum particulæ hæc striatæ tanto circuitu non aguntur, quin à polo ad polum revertantur; suppono enim maximam illarum partem per interiores terræ partes transire, nec ullas per aërem nostrum regredi, præter eas, quæ transitum inferius non inveniunt; atque hæc est ratio quam assero, cur magnetis virtus in tota terræ mole minor videatur, quam in exiguis magneticis lapidibus; sed ignoscat Celsitudo tua, si nihil nisi valde confuse hic scribo; nondum habeo librum, cujus paginas adnotare dignata es, sumque in itinere perpetuo; sed spero intra duos aut tres menses me salutaturum te Hagæ Comitum. Vale.

EPISTOLA LII.

Ad Magnatem quendam.

Responsio ad quatuor quæstiones, 1. De causa caloris in animalibus. 2. De causa febris, ejusque horrore. 3. De spiritibus animalibus, & vitalibus. 4. De causa somni.

SI esset mihi tantum ingenii & scientiæ, quantum erga Excellentiam tuam studii, quæstionibus certe tuis apposite responsurus essem; licet autem verear ne mihi sit ad hoc minus ingenii & cognitionis, tamen cogit me meum erga te studium, ut id aggrediar. Sed cum venia tua incipiam à secunda difficultate de caloris & frigoris in animalibus causa; quia perpenſa illa, & deinde tertia & quarta, commodius erit de prima postmodum agere. Mihi videtur totus animalium calor in hoc consistere, quod habeant in corde ignem quendam non lucidum, ejusque non absimilem, qui in aqua forti, injecta pulveris chalibei satis magna copia, excitatur; nec non illius, qui in fermentationibus omnibus animadvertitur. Ignis istius pabulum est sanguis, qui juxta circulationem ab Hervæo Medico Anglo felicissime detectam, singulis momentis in cor influit; sanguis au-

autem iste calefactus & rarefactus in corde, hinc per arterias ilico fluit in cæteras corporis partes, quibus hac ratione calorem impertit. Hic autem calor potest aliquo sensu dici major æstate quam hyeme, quia ejus in corde causa minor non est, & sanguis in eo calefactus refrigeratur minus ab externo aëre. Verum dici etiam potest major esse hyeme, unde fit ut major sit tum temporis esuries, cibique melius concoquantur; & ratio est quod hyeme partes illæ sanguinis calidiores, subtiliores nempe & concitiores, non tam facile per cutis poros, frigore tum coarctatos, quam æstate transpirent; quapropter majori copia in ventriculum feruntur, ubi ciborum coctionem adjuvant.

Tertia quæstio est de horrore febrim antecedente, cujus causam non existimo aliam esse, quam quod febris oriatur ex humore quodam in mesenterium aut aliam aliquam corporis partem confluente, qui post unum, aut alterum, aut tertium diem (quod quidem tempus requiritur, ut humor iste maturescat & fiat fluidus, unde fit ut febris sit quotidiana, aut tertiana, aut quartana) per venas fluit, seque hac ratione sanguini immiscens, & cum eo in cor delatus, obstat quo minus possit sanguis æque ac alias ibi calc fieri & dilatari, proindeque pristinum in reliquis corporis partes calorem inferre; quod quidem causa est tremoris, quo febricitantes corripuntur. Sed hoc non fit, nisi in initio paroxysmi: quemadmodum enim lignum viride extinguit ignem, cum primum ei injicitur, tandem vero probe accensum flammam acriorem emittit, quam aliud lignum; sic postquam corruptus iste humor acuerit aliquandiu sanguini permixtus, demum calefit & dilatatur magis in corde quam ipse sanguis; quod quidem facit paroxysmi æstum, qui durat quoad corruptus iste humor totus exhalatus fuerit, aut ad naturalem sanguinis constitutionem redactus. Febris autem nunquam non cessaret ad finem paroxysmi, si impediri posset, ne humoris novi quicquam in eundem locum succederet, in quo prior ille fuerat corruptus; & quia innumeri varii modi esse possunt, quibus hoc impediatur, propterea febris innumeris variis remediis sanari potest, quæ tamen omnia incerta sunt.

Quarta, eaque ultima quæstio est, de spiritibus animalibus, & vitalibus, deque eo quod per transpirationem exhalatur; ad quam expeditum est responsum, supposito quod sanguis in corde dilatetur eo, quo jam dixi, modo, & prout in discursu de mea Methodo satis fuisse explicui. Quod enim Medici vocant spiritus vitales, aliud non est quam sanguis in arteriis contentus, à venarum sanguine non diversus, nisi quod rarior sit & calidior, quippe recens in corde calefactus & dilatatus. Quod ve-

ro illi vocant spiritus animales, aliud non est, quam vividiores & subtiliores sanguinis hujus partes, quæ per arteriarum carotidum ramusculos veluti per cribrum percolatæ, se à crassioribus secreverunt, atque inde in cerebrum delatæ sunt, unde per nervos in musculos omnes diffunduntur. Denique quicquid è corpore per transpirationem insensibilem effluit, aliud non est, quam sanguinis partes quædam adeo subtiles, ut dum exhalantur, corporis poros possint pervadere; idem porro sanguis tam sæpe calefit & rarefit fluendo per cor & refluendo, juxta doctrinam de circulatione, ut partium ejus nulla sit, quæ tandem non redatur satis subtilis ut hoc demum modo exhaletur.

Redeo ad primam tuam quæstionem, videlicet, de causa somni, quam quidem in hoc consistere existimo, quod, queniadmodum videmus navium vela nonnunquam corrugari, eo quod ventus placidius spiret, quam ut illa distendere queat; sic spirituum animalium à corde proficiscentium tanta semper non est copia, ut cerebri medullam impleant, porosque ejus apertos omnes teneant; unde oritur somnus; Clausis enim cerebri poris, sensuum usu caremus, nisi violenta aliqua agitatione spiritus excitentur, qui poros istos aperiant. Opium autem, papaver, cæteraque Pharmaca somnifera, faciunt ut pauciores spiritus à corde ad cerebrum mittantur. Unde etiam facile reddi potest ratio cæterarum causarum, quæ somnum vel inducere, vel impedire experientia deprehenduntur. Sed vereor ne epistolæ hujus prolixitas somnum quoque inducat; quare hoc unum addam, me nunquam fore somnolentum, cum credam esse me quicquam aut faciendo, aut scribendo, quod Excellentie tuæ gratum sit, &c.

EPISTOLA LIII.

Ad Magnatem quendam.

Officii ergo. Quomodo esuries & sitis sentiantur. De causa motuum generalium. De vacuo. Vnumquemque posse sibi ipsi optimum esse medicum.

EPistola, quam 19 Junii ad me dedit Excellentia tua, substitit quatuor menses per itinera, nec mihi ante hunc diem reddita fuit, quod obstitit quo minus potuerim hanc occasionem citius capere, tibi significandi esse mihi tam gratum animum pro favoribus, quibus me immerentem prosecutus es, & iis tuæ erga me benevolentie argumentis,

tis, quæ ex Dominis N. & M. aliisque intellexi, ut nihil mihi antiquius unquam sit futurum, quam ut tibi per omnia, quoad potero, coner inservire. Quemadmodum autem præcipuus fructus, quem ex scriptis à me vulgatis percepi, est, quod illorum occasione in Excellentia tuæ notitiam venerim: sic nihil est quo possim validius adduci ad aliud quicquam imposterum vulgandum, quam si sciam id tibi gratum fore. Sed quia tractatus de animalibus, cui ante quindecim annos allaborare incepi, plurima prærequirit experimenta, sine quibus fieri non potest utillum absolvam; nondum autem habui, nec scio quando sim habiturus opportunitatem illa faciendi, non possum illius editionem ante longum tempus mihi polliceri. Interea jubenti tibi morem geram per omnia, & in summa gratia deputo, quod meam de nonnullis Philosophiæ difficultatibus sententiam velis rescire.

Mihi persuadeo esuricem & sitim eodem modo sentiri, quo colores, sonos, odores, & generatim omnia sensuum externorum objecta, nempe nervorum ope, qui tenuium ad instar filorum à cerebro ad reliquas corporis partes protenduntur; ita ut mota partium illarum quapiam, moveatur etiam ea cerebri pars, ex qua nervi isti derivantur; ejusque partis motus excitat in anima sensum illum, qui parti isti tribuitur. Quod quidem in Dioptrica fuscè tractavi; & sicut ibi dixi, varios nervi optici motus efficere, ut anima sentiat omnes colorum & luminis diversitates; sic credo nihil aliud esse, quod esurici sensum creet, quam quandam nervorum versus fundum ventriculi protensorum motum; nec aliud quicquam esse, quod sitis sensum efficiat, quam alium eorundem nervorum motum, & simul eorum qui versus guttur protenduntur. Ut vero intelligatur, quid sit quod nervos istos ita moveat, adverto quod quemadmodum esurientibus nobis, & cibos mensæ appositos videntibus humor quidam in os affluit; ita etiam magna humoris ejus copia in ventriculum plerumque affluit, eaque illuc per arterias defertur, quia nimirum illarum extremitates ibi desinentes, aperturas habent adeo angustas, atque ejusmodi figuræ, ut transitum quidem huic liquori præbeant, non vero aliis sanguinis partibus; estque veluti quædam aquæ fortis species, quæ inter ciborum manducatorum particulas irrepens, illis diluendis inservit, atque ex iis chylum componit, & cum iis in sanguinem per venas postmodum refluit. Verum si hic liquor in ventriculum hoc pacto affluens, nullos ibi cibos diluendos reperiat, tum vim suam convertit in membranulas, ex quibus ventriculus constat, atque hoc pacto nervos, quorum extremitates hisce membranulis adhaerent, eo agitat modo,

modo, quia ad esuriei sensum in anima efficiendum requiritur. Itaque non potest non percipi sensus iste, cum nulli sunt in ventriculo cibi, nisi obstructionibus nonnullis arceatur hic liquor ab aditu in ventriculum, aut frigidis quibusdam & glutinosis humoribus vis ejus retundatur; aut corrupto sanguinis temperamento, liquor ab illo in ventriculum immixtus diversâ sitâ solito naturâ; (harum enim causarum semper una est, quæ ægrotis appetentiam cibi adimit) aut vero fieri potest, ut sanguis etiam non corruptus ejusmodi liquoris parum aut nihil contineat, quod credo iis accidere, qui jejuni diu permanserunt. Dicunt enim appetentiam cibi in illis post aliquot dies cessare; cujus ratio est, quod liquor iste omnis potuerit per id temporis à sanguine puro recedere, & vel in sudorem abiisse, vel per transpirationem insensibilem, vel per urinam. Hocque historiam confirmat de homine quodam, quem sub terra per tres hebdomadas conditum, epota tantum propria urina vitam retinuisse narrant: cum enim sub humo conclusus esset, sanguis ejus per transpirationem insensibilem minus, quam in aëre libero minuebatur.

Præterea existimo sitim etiam ex eo oriri, quod serum sanguinis, quod per arterias ad ventriculum & guttur sub aquæ specie affluere solet, atque hoc pacto partes illas humectare, interdum etiam sub vaporis specie adveniat, atque ita guttur exsiccet, eademque operamur ejus agitet eo modo, qui ad bibendi desiderium in anima excitandum requiritur, ita ut non major sit differentia inter vaporem hunc qui sitim excitat, liquoremque illum qui esuriem facit, quam inter sudorem, & id quod per transpirationem insensibilem ex toto corpore exhalatur.

Quantum ad generalem omnium, qui in mundo sunt, motuum causam, nullam aliam concipio præter Deum, qui à primo creatæ materię instanti partes ejus omnes varie movere incepit, & nunc eadem actione, qua materiam conservat, motus etiam illi inditi eandem omnino quantitatem in illa conservat; quod quidem in secunda Principiorum meorum parte explicare sum conatus. In tertia autem descripsi tam accurate materiam, ex qua Solem constare opinor: deinde in quarta, quænam sit natura ignis, ut nihil hic adjicere queam, quod non foret obscurius. Dixi etiam diserte in 18. art. 2. part. secundum me implicare contradictionem, quod detur vacuum; propterea quod eandem habemus de materia ac de spatio ideam; & quia hæc idea reale quid nobis repræsentat, nobismet ipsis contradicimus contrariumque asseri-

asserimus ejus quod cogitamus, cum dicimus spatium aliquod esse vacuum, hoc est, id, quod ut reale quid concipimus, realitatis nihil habere.

Valetudinis conservatio semper fuit primarius studiorum meorum scopus, nec dubito quin multa Medicos hactenus latuerint, quorum cognitioni assequendæ pares simus. Sed quia tractatus de animalibus, quem molior, quemque nondum potui absolvere, est tantum aditus ad hæc cognitiones, absit ut illas habere me venditem; nec aliud de hoc impræsentiarum dicere possum, nisi quod sim in Tiberii sententia, qui putabat eos qui ad tricesimum ætatis annum pervenissent, satis expertos fuisse quid sibi aut noxium aut utile sit, ut sibi ipsis Medici sint. Revera puto neminem esse tam modici ingenii, quin possit quovis Doctore melius observare, quid ad sanitatem suam prosit, modo ad id aliquantulum attendat. Deum oro ut valeas una cum fratre tuo, &c.

EPISTOLA LIV.

Ad Magnatem quendam.

Ejus judicium de Chymicis. De generatione lapidum. De lateribus. De argento vivo. Ejus judicium de D. Digbi. Utrum bruta cogitent.

LIteras tuas in summo pretio habeo, tum propter honorem, qui mihi ex illis accedit, tum quia in iis elucet ejusmodi ingenium, ut clarissimis tuis natalibus plus splendoris afferat, quam ab illis accipat. Sed videtur præterea fortuna velle illas referre inter primaria mea bona, etenim illas per itinera detinet, nec sinit ut mihi reddantur, nisi postquam id impedire omni ope conata est. Sic unas anno superiore accepi, quæ quatuor mensium spatio Parisiis huc perlatæ fuerant, hæc vero quas modo accipio quinto Januarii datæ fuerant; sed quia D. B. fecit me certiores te non esse hujus moræ nescium, excusationes non quæram cur citius non responderim. Et quia ea, de quibus ad me scribis, aliud non sunt quam speculationes circa scientias, quæ à fortunæ aut temporis vicibus non pendent, spero tibi non fore minus gratum, id quod impræsentiarum sum responsurus; quam si id decem abhinc mensibus accepisses.

Excellentiæ tuæ de Chymicis judicio omnino adstipulor, & credo illorum verba tantum ab usu communi remota crepare, ut id scire videantur,

O

quod

quod ignorant. Puto etiam id quod dicunt de resuscitandis floribus vi salis eorundem florum, esse figmentum absque fundamento, & spiritus plane aliis pollere viribus, quam plantas ex quibus extrahuntur; quod clarissime experiri licet in vino, aceto, & aqua vitæ, quæ ex iisdem uvis extrahi possunt, & tamen tam diversis saporibus & viribus pollent. Denique secundum me illorum sal, sulfur, & mercurius non magis inter se discrepant, quam quatuor Philosophorum elementa, nec multo magis quam aqua à glacie, spuma, & nive: puto enim corpora omnia ex eadem materia constare, neque quicquam esse, quod diversitatem inter illa inducat, nisi quod particulæ materiæ, ex quibus constant, diversas habeant figuras, aut diversimode dispositæ sint. Quod quidem spero Excellentiam tuam posse satis fuscè explicatum videre in Principiis meis Gallice prope diem edendis.

De generatione lapidum nihil ultra scio, nisi quod illos à metallis distinguam, quatenus particule, ex quibus metalla constant, sint notabiliter crassiores particulis lapidum; ab ossibus autem, lignis duris, aliisque animalium, aut vegetabilium partibus, quod non crescant, ut hæc, ope succi cuiuspiam per canaliculos fluentis in omnes corporis sui partes, sed solum additione particularum quarundam, sese illis exterius adjungentium, aut vero in illorum poros sese ingerentium. Itaque non miror fontes quosdam esse, in quibus lapides generentur; si quidem opinor fontium istorum aquam deterere è rupibus, quas permeant, particulas quasdam, illasque secum deferre; particulas autem istas ejusmodi figuræ esse, ut facile inter se componantur, quando coeunt iis in locis, in quibus aqua vivida minus, minusque quam in rupium istarum venis agitata, finit ut in fundum decendant; nec vero dissimilis est ratio eorum, qui in hominum corporibus procreantur. Haud etiam miror modum, quo lateres fiunt: etenim credo eorum duritiem hinc proficisci, quod actio ignis ex eorum poris exturbet, non solum partes aquæ, quas longas & tenuium anguillarum instar lubricas concipio, aliorum corporum poros pervadentes, nec tamen se illis agglutinantes, & in quibus solis consistit horumque corporum humor, quemadmodum in meteoris meis dixi; sed etiam reliquas omnes materiæ illorum partes, quæ duræ non sunt & admodum firmæ; unde fit ut cæteræ arctius inter se invicem compingantur, atque ideo lateres fiant argilla duriores, quanquam poros majores habeant, in quos alix postmodum aquæ aut aëris partes subintran, quæ illos præterea graviore efficere possunt.

Quantum ad argenti vivi naturam, nondum feci experimenta omnia; qui-

quibus ad illam penitus cognoscendam egeo; sed credo tamen posse me asseverare, causam fluiditatis, quam in illo cernimus, esse, quod particulae, ex quibus constat, tam laeves sint & lubricae, ut neutiquam possint inter se compingi, & quod cum crassiores sint quam aquae particulae, vix transitum inter se praebent materiae subtili, quam secundum elementum nominavi; sed materiae tantum subtilissimae, quam primum elementum dixi; quod mihi videtur sufficere reddendae rationi eorum omnium illius proprietatum quae mihi haecenus innotuerunt. Quod enim diaphanum non sit, sit vero frigidum, id fit ex absentia materiae istius ex qua secundum elementum constat; primi vero elementi activitas una cum inaequalitate quae inter partes ejus, & aëris, aliorumve corporum partes intercedit, facit ut guttulae ejus mensurae impositae sphaericam magis figuram affectent, quam aquae guttae; atque ex eadem etiam inaequalitate fit, ut manibus nostris non adhæreat, sicut aqua; unde orta est opinio illud non esse humidum, ut aqua; verum plumbo & auro facile adhæret, quare eorum respectu humidum dici potest.

Valde doleo quod Anglicae linguae ignarus nequeam legere librum Domini Digby; curavi ut nonnihil de illo mihi explicaretur; & quia paratus sum obtemperare rationi, & scio ingenium esse illi praestantissimum, auderem sperare opiniones meas cum ipsius haud ægre consensuras, si mihi colloquii ejus copia fieret.

Quod attinet ad intellectum sive cogitationem quam de Montagne, aliique nonnulli brutis tribuunt, non possum illis ad stipulari; non quod hoc morer quod vulgo fertur, esse hominibus imperium in reliquis animantes absolutum; fateor enim quasdam esse nobis robustiores, imo & puto nonnullas esse posse, quae naturalibus astutiis instructae sint, quibus homines etiam astutissimos decipiant: sed adverto quod illae nos non imitantur aut superant, nisi in actionibus iis, quae à cogitatione nostra non proficiuntur; sit enim plerumque ut ambulemus aut comedamus, neutiquam cogitantes de eo quod agimus; quinimo ea quae nobis noxia sunt repellimus, aut etiam ictus quibus petimur declinamus tam inconsulta ratione, ut quamvis dedita opera vellemus manus nostras capiti non praeferre cum cadimus, tamen non esset penes nos id non facere. Credo etiam nos brutorum instar manducaturos sine praevia institutione, si cogitatione nulla essemus praediti; & certe dicunt eos, qui per somnum obambulant, ejusmodi fluxus nonnunquam tranare, ex quibus exporrecti nunquam emerfuri essent.

Quantum ad passionum nostrarum motus, quamvis cogitatio illos in nobis

nobis comitetur, quia cogitandi facultate præditi sumus, tamen clarissimum est illos ab ea non pendere, quandoquidem invitis nobis sæpenu-
mero exoriuntur; & proinde brutis etiam inesse possunt, imo & vehe-
mentiores quam in hominibus, neque tamen inde concludere licet, illa
cogitare. Denique externarum nostrarum actionum nulla est, præter
loquelam, aut alia signa ad objecta significanda instituta, atque ad nul-
lam passionem relationem habentia, qua possit cuipiam illas examinanti
constare corpus nostrum non esse automatatum, sed insuper inesse illi ani-
mam, quæ cogitandi facultate polleat: dico præter loquelam, aut alia
signa, etenim muti signis utuntur eodem pacto, quo nos voce; dico au-
tem signa ad objecta significanda instituta, ut excludam pluitacorum
voces, insanorum sermonibus non exclusis, qui quamvis secundum ra-
tionem non sunt, tamen sunt ad rem de qua agitur, & addo non debere
verba hæc aut signa ad passionem ullam referri, ut excludam non solum
lætitia & tristitia voces & similes, sed etiam quicquid arte doceri pos-
sunt bruta, si enim doceatur pica dicere dominæ suæ advenienti, *zeis*, id
aliter fieri non potest, quam efficiendo ut hæc prolatio vocis fiat motus ex
aliqua passionum ejus proficiscens; erit nempe motus spei quam de esca
habet, si semper assueta fuerit hoc prolato, aliquid delicatioris escæ ac-
cipere; pari ratione ea omnia, quæ docentur canes, equi, & simia, aliud
non sunt, quam illorum spei, metus, aut lætitia motus, ita ut ad hæc
facienda cogitatione neutiquam egeant. Mihi autem videtur observa-
tione perquam dignum, quod loquela ita definita homini soli com-
petit; licet enim de Montagne, & Charon dixerint majorem esse in-
ter quosdam homines differentiam, quam inter hominem & pecudem,
nunquam tamen reperta est pecus ulla tam perfecta, ut signo aliquo ute-
retur ad significandum cæteris animalibus quicquam quod ad passiones
suas non referretur; homo autem nullus est tam imperfectus, quin ali-
quo ejusmodi signo utatur; ita ut vel ipsi surdi & muti signa particularia
excogitent, quibus cogitationes suas exprimant. Quo quidem argu-
mento mihi videtur validissime probari, non fieri ex organorum defe-
ctu, quod bruta non loquantur sicut nos, sed ex defectu cogitationis.
Nec est quod quis dicat, illa inter se colloqui, sed vero à nobis non in-
telligi: nam quemadmodum canes, aliaque animalia nonnulla suas no-
bis passiones exprimunt, certe cogitationes etiam suas, si quas haberent,
nobis exprimerent. Neque vero sum nescius multa à brutis longe me-
lius, quam à nobis fieri; sed ne hoc quidem miror, hoc enim ipsum ju-
rat ad probandum illa naturaliter, & per organa agere, haud secus
quam

quam horologium, quod horam longe melius indicat, quam possimus iudicio assequi. Et sine dubio quando hirundines verno tempore adveniunt, eatenus agunt horologiorum instar. Quicquid etiam agunt apes, ejusdem est naturæ, nec non ordo quem grues volando, aut similes pugnando servant; si quem tamen servant. Denique instinctus quo ad mortuos suos sepeliendos feruntur, nihil habet quod magis miremur, quam canum aut felium instinctus, qui excrementa sua sepulchri terram scalpunt, quanquam illa fere nunquam sepeliant; quod probat illos id ex instinctu tantum, & de eo non cogitantes facere. Hoc ergo solum dici possit, quod licet bruta nihil agant, quod probet illa cogitare, tamen quia corporis illorum organa à nostris valde diversa non sunt, conijcere licet aliquam esse cogitationem hisce organis adjunctam, quemadmodum in nobis experimur; licet illorum cogitatio sit imperfectior nostra; ad quod nihil est quod respondeam, nisi quod si illa cogitarent, ut nos, animam etiam, ut & nos, immortalem haberent; quod non est verisimile, nam nulla est ratio cur de quibusdam brutis potius quam de omnibus id credam, permulta autem, ut ex. gr. ostrea, spongia, &c. nimis imperfecta sunt, quam ut hoc de iis judicari queat. Sed timeo ne tibi hi sermones sunt tædio, nihil autem aliud velim, quam ut testificer me esse, &c.

EPISTOLA LV.


Celeberrimo viro Renato Descartes.

Objectio contra ejus opinionem de productione colorum ex radiorum solarium motu.

Eruditissime Domine:


TRaditus est mihi liber Dominationis vestræ à Clariss. D. Plempio, quem totum subscevis horis evolvi, si pauca demas quæ in Methodo continentur; de quo, quoniam, sicut ex ipso libro tuique perstudioso D. Plempio, intelligo, nihil gratius D. vestræ accidere potest, quam diversorum judicia percipere, non possum non hisce animi mei sensum indicare. Me amare, quod primum est; ingenium illud, quod, notis quasi littoribus relictis, novi orbis periculum facere audeat: proscriptis enim qualitatibus, abstrusissima quæque, per ea quæ oculis manibusque subjiciuntur, explicare, quid aliud est, quam novas terras detegere? Perpulchra certe habet quamplurima D. vestra, inter hæc tamen Geometrica non numero, quæ nullius laudis indiga, satis D. vestræ nomen, si

hoc illis concedat, aternitati consecrata sunt. Librum hæc mercabantur singularem; injuriæ est illis D. vestra, dum hæc ad libri calcem relegat. Mathematica tamen pura potius quam Geometrica dici mallet, quod non magis Geometriæ, quam Arithmeticæ, cæterisque omnibus scientiis Mathematicis communia sint. Cætera vero, quæ disputationibus magis opinionibusque subjacent, talia sunt, ut nulla non ab inventio-



nis amœnitate commendationem mercantur singularem; in multis tamen plus aliquid veritatis desiderari posse puto. Quæ singula hic prosequi longioris otii esset. Unum arripiam ex tractatu de Iride, qui plus cæteris ingenium redolet. Statuit itaque D. vestra tamquam totius istius capitis, seu discursus fundamentum, vitrum trigonum NMP, (fol. 259. meteor.) per quod labuntur radii DF, EH, quorum hic cæruleus, ille ruber est. Assignat autem tanti discriminis rationem, quod isti radii (quos

ex diversis quasi rotundis corpusculis materiæ cælestis componit) diverso motu seu gyratione ad oculum allabantur, atque illud conformiter quam maxime suis Prin-




cipiis, quibus sensationem per horum corpusculorum motum, aut inclinationem ad motum, fieri vult: cum igitur rubri & cærulei diversa sit sensatio, diversum quoque horum corpusculorum motum ibi reperiri necesse est. In hoc itaque merito tota est D. vestra, ut causam hujus tam diversi motus reperiat. Quare assumit globulum 1 2 3 4, (fol. 258. meteor.) qui ab aliis quatuor stipatus, cum illis eadem cele-

ritate


ritate fertur, quosque in aquæ superficiem Y Y impingant. Certum itaque est, quod ibidem contendit, globulum medium rotaturum; idque tum ratio evincit, tum etiam experientia cōmonstrari posset. Ex hoc ego duplex desumo argumentum; cum enim novam Philosophiam faciat, vix nisi à se admissis oppugnari potest; unum, quod contra naturam luminis vestri faciat, *Visionem scilicet non recte dici ab horum corpusculorum motu dependere.* Alterum, *non bene hinc inferri diversos in vitro trigono colores.*

Ad primum quod attinet, si corpusculum unum, eorum ex quibus D. vestra lumen componit, aliud obvium, aut ad latus positum corpusculum impellere, retinere, aut rotare possit; & si in horum corpusculorum rotatione color consistat; dum ergo per unum eundemque aërem, à diversis partibus ad diversos oculos allabuntur diversorum colorum radii, qui sese in medio decussent, necessario mutuum in motu suo impedimentum fortientur. Corpuscula enim A, quæ se gyratione ad ocu-



lum B veniunt (suppono autem A esse radios coloris rubri) impingent in alia D, (quæ etiam suppono esse radios alterius coloris) quando hæc corpuscula tendent ad oculum constitutum in E, seseque ambo reperiunt in puncto F; ideoque oculi E & B, quoniam hos globulos suo in motu perturbatos excipiunt, alios colores etiam percipient, quam si solum color unus hoc in aëre ab oculo uno videndus fuisset; quod manifestissime

festissime experientiz repugnat, nec à D. vestra dici puto. Dicit itaque, quod mihi intelligere visus sum, dum vas uvis plenum proponit




(fol. 6. Diopt.) hæc corpuscula ultro citroque sine offensa commeari, quo illis, cum quasi materiæ cœlestis sint, concedere insolens non est. Sed tum ex horum corpusculorum mutua collisione in vitro trigono colores mutari nequaquam contendere potest, quandoquidem unum alteri injurium esse nequeat, atque hisce argumentum concludo primum.

Quoniam tamen luminis vestri naturam tangere incepti, habeo quod circa hoc inquiram. Quomodo corpuscula hæc à Sole, astrisque, nec non aliis corporibus lucidis profeminentur, an quodam ipsorum corpusculorum profluvio, qualis sudor in animalibus esse solet? Deinde quis hujus tandem profluvii fons? Vereor enim ut omnes hic qualitates aut formas, à quibus D. vestra tantopere abhorreere videtur, prorsus effugere possit. Quomodo post tot annorum spatia, Solis corpus tot à se emissis corpusculis non extenuatum? an forte, ut Philosophorum antiquorum aliqui fabulantur, terræ vaporibus reficitur? Deinde, quomodo, quam innata vi, per tanta itineris spatia, hæc corpuscula, sub certa quadam gyrationis specie, ab ipso summo cœlo ad nos usque rapiuntur? Ut corpuscula, quæ à sinistro humero Orionis, qui subrufus apparet, gyratione, certa ratione ad nos penetrant, (præcipue in sententia Copernici, & ut credo, vestra) per tanta ætheris intervalla; quæ, si motus seu gyrationis, quam ab ipsa stella acceperunt, tam tenacia sint, non est quod vereamur ne illam ad vitrum aut aquæ superficiem immutent.

Ad alterum argumentum venio, & ostendere conabor nihil hisce sphaerulis in aquam impingentibus confici.

Faciamus enim globulos qui lumen repræsentent à Sole proficiscentes A, B, C, &c. qui secundum lineam M O ferantur; hi pari omnes procedent passu, quousque eorum primus A, ultimam vitri superficiem N P prætervectus, liberiores quasi campum nactus celerius rapitur in F; cui cum adjunctus globus B, adhuc vitro implicitus, latere suo 3. resistat, vertetur globus A in gyrum ordine partium 1 2 3 4. Nec hoc tantum, sed etiam ad motum impellet vicinum globum B, secundum ordinem partium 3 4 1 2, ut rotari incipiat. Si hunc jam globum B, vitrum etiam transgressum fingamus; ita ut infima vitri superficies consti-

stat



stat in OR. Similiter globus B à globo C impeditus, tantummodo (jam enim sese à vitro expeditivisse supponitur) in orbem vertetur, majori tamen celeritate quam globus A, cum globus B insuper ad eandem gyrationem jam ante à globo A incitatus fuerit. Atque hoc modo globus C, à vitro liber rotationem, eamque adhuc celeriozem, obtinebit. Ideoque habeo hic radios DF, SG, TV, EH, qui diversa omnes gyratione ad oculum aut parietem HF allabuntur. Huncque discursum me ex mente vestræ D. instituerè puto; illa enim, quæ globulis ad aquæ superficiem allapsis (fol. 258, Meteor.) contingere dixerat, non enucleate vitro trigono applicat; quomodo vero concinnius applicare posset non video, etiamsi radius EH ruber appareret, aut si color cæruleus, qui ibidem apparet, crebriori horum corpusculorum agitatione fieri dicatur; ex hoc enim solo experimento, quod à vitro trigono habet, videtur

detur D. vestra definire colorem rubrum in frequentiori agitatione consistere, cum hoc potius ceruleo colori tribuendum videatur, majorque quies corpusculis quæ colorem rubrum efficiunt; atque hic perpulchre explicatur, cur radio EH aliquis rubeus color adhæreat, quod circa umbræ confinia, corpuscula aliqua à celeriori illa agitatione impediuntur. Verum hoc adhuc posito, non satis ostenditur, horum ad colorum generationem, necessitas umbræ; hæc enim mutua colorum allisio, diversaque agitatio, nequaquam ab umbra descendet. Nec capio quid umbra conferre possit hac in sententia, quacumque tandem ratione horum globorum motus per extremam vitri superficiem alterari dicatur. Non secus enim procul ab umbra, quam circa illam, radii per refractionem alterantur. Deinde, ut demus aliquid, nempe, umbræ limites circa, motum corpusculorum perturbari; cur ad omnes refractiones, umbris terminatas, hos colores non habemus? Sed hæc sufficere arbitror; præcipue cum D. vestra non minus ea quæ à me allata sunt, quam quæ adferri possint, in considerationem advocatura sit. Hisce itaque Vale, novisque indies ingenii tui monumentis mundum illustra, meque ac scientiæ amatores oblecta, Dominationis vestræ studiis devotus, &c.

EPISTOLA LVI.


Responsio Renati Descartes ad præcedentem Epistolam.

Eruditissime Domine:

Non aliter affectus sum legendo literas, quæ mihi à D. vestra per Clariss. D. Plempium transmissæ sunt, quam puto fuisse olim equites illos, qui proavorum temporibus orbem pererrasse dicuntur, quoties ipsis occurrebat alius eques armis reclusus, & nomine non cognitus, ut fere tunc moris erat, in quo fortitudinem non vulgarem ex ipso incessu & primis congressibus deprehendebant. Quippe nihil ipsis optabilius poterat contingere, quam cum tali aliquo vires suas experiri: & quamvis tenuitatis conscientia non permittat, ut me generosis illis Heroibus ausim comparare, non possum tamen non fateri me admodum gaudere quod offeratur occasio cum eo congregiendi, quem talem esse suspicor, ut si vincere mihi arduum est, saltem vinci ab ipso non erit indecorum. Humanitatem profecto singularem, quæ generositatis & ve-

re fortitudinis nota esse solet, in D. vestra deprehendo; non modo ex iis verbis quibus mea qualiacunque inventa extollit; sed in hoc etiam quod ex pauca, quæ de Geometria scripsi, Mathematicæ puræ nomen mereri dicat: nihil enim ibi eorum, quæ ad Arithmeticam propriæ pertinent, explicui, nec ullam solvi ex iis questionibus in quibus ordo simul cum mensura spectatur, quarum exempla habentur in Diophanto: Sed præterea nihil etiam docui de motu, in quo tamen examinando Mathematica pura, ea saltem quam excolui, præcipue versatur.


Cum autem D. vestra ex multis mei scripti locis, in quibus plus aliquid veritatis desiderari posse putat, illum præ cæteris eligit, in quo per rotationem quorundam globulorum colores explicare sum conatus, ostendit profecto se in hoc certandi genere non mediocriter esse exercitatum. Nam si quæ pars sit in eo scripto parum munita, & adversariorum telis exposita, fateor hanc esse quam D. vestra oppugnat. Valde enim difficulter potest intelligi quo pacto ejusmodi globulorum rotationes sibi mutuo non obsint, cum diversos colores à diversis objectis ad diversos oculos per idem medium & eodem tempore decussatim deferre debent: & multa, quæ hanc difficultatem forte minuisent, vel consulto à me omiſsa sunt, vel brevissime tantum perſcripta; quoniam ea prius scripseram in eo tractatu, de quo in libello de Methodo loquutus sum. Ne tamen videar hæc mentiri, ut ab accurata responsione me excusem, ecce ad illam me accingo. Rogoque in primis D. vestram, ut advertat globulos illos, de quibus egi, non esse corpuscula, quæ ab astris proficuntur, vel exudent, sed particulas ejus materiæ, quam D. vestra vocat cælestem, omnia spatia translucida occupantes, & non aliter sibi mutuo incumbentes, quam partes vini in vase illo quod in pagina 6. Dioptr. proposui, & in quo videre licet, vinum quod est ad C, tendere versus B, nec ideo impedire quo minus illud, quod est ad E, tendat versus A, singulasque ejus particulas propendere, ut descendant versus plurimas partes diversas, etsi non nisi unam versus eodem tempore possint moveri. Monui autem variis in locis me per lumen non tam motum ipsum, quam inclinationem sive propensionem ad motum intelligere; atque ea quæ de motu esse dicturus, ut sic facilius caperentur, ad hanc propensionem esse referenda: unde satis liquet per colores nihil etiam aliud



B 2

ex

ex mea sententia, quam propensionis istius varietates quasdam esse concipiendas. His autem diutius non inhæreo, quia D. vestra prævidit me aliquid simile esse dicturum, quod concedere non ei videbatur esse insolens. At urget ex alia parte, siquidem diversi illi motus sibi mutuo non obsint, non igitur etiam ex horum corpusculorum mutua collisione in vitro trigono colores mutari posse. Ad quod respondeo esse distinguendum inter motus, siue potius inter propensiones ad motus, & notandum quasdam ex iis esse disparatas, hoc est, à se mutuo non pendentes, alias vero plane conjunctas. Ut in figura pag. 6. propensio quam habent omnes partes vini, quæ sunt in superficie CDE, ut descendant versus A, non auget nec minuit illam, quam eadem habent, ut descendant versus B. Itemque si fingamus huic vino pisciculos aliquos innatare, qui variis motibus ejus partes exagitent, non ideo antedictæ propensiones mutabuntur. Quæ proinde non male conferri possunt cum propensionibus, quas habent particula materię cœlestis ad eas rotationes per quas diversi colores sentiuntur. Ita enim fingere libet in



locis A & B esse diversos spectatores, & in locis CDE esse objecta diversimode colorata, & insuper loco pisciculorum in spatio intermedio esse ventos, qui totum aërem exagitent. Jam vero si ponamus pilam F impelli versus C, non quidem secundum lineam rectam CB, sed prout exigit ejus refractione, ut cum ad vinum pervenerit recta tendat à C versus B, manifestum est eam vim, qua pila ista pro-

pellet partem vini C, non tantum augere posse propensionem quam habebat ad descendendum versus B, sed etiam modum, siue naturam istius propensionis immutare: pila enim partem vini C pellet versus B directe, vis autem gravitatis oblique tantum, quia nempe suppono lineam CB non recta tendere versus centrum terræ; atque hæc duæ propensiones simul junctæ rotationem illam, ex qua colores oriuntur, optime representant, ut clarius ex sequentibus intelligatur.

Sed prius hic paucis ad quaesita D. vestrae respondebo, & quia jam supra satis monui, corpuscula, de quibus egi, cum nihil aliud sint quam particulae ejus materię, qua spatia omnia translucida replentur, nequa-

quam

quam ab astris profeminari, vel exudare: nullumque esse periculum ne Sol ideo extenuetur, vel ne ad ineptias fabularum confugere debeamus. Superest ut dicam, quantum attinet ad ipsam lucem, hoc est ad vim per quam lucida corpora materiam cœlestem circumquaque à se expellunt, me illam qualis sit nec in Dioptrica nec in Meteoris explicare voluisse, quoniam alium ei locum dedi; neque ob metum quem D. vestra se habere dicit, scilicet ne qualitates omnes, & formas, à quibus abhorreo, non effugiam, ab instituto meo me dimoveri. Et quantum attinet ad colorem stellæ quæ est in sinistro humero Orionis, vel aliarum, respondeo non esse ruborem similem ei, qui per prismâ vitreum apparet, sed tantummodo fulgorem quemdam lucis densiorem quam sit ille qui in cæteris astris reperitur. Colores autem vere tinctos & saturos videmus nonnihil imminui ob longitudinem distantie, sensimque in dilutiores mutari, ut pictores omnes satis observant. Neque tamen ideo percipio rationem, cur particula materię cœlestis D. vestræ non videantur æque tenaces ejus gyrationis ex qua colores oriuntur, quam ipsius motus directi, in quo lumen consistit; æque enim unum atque alterum possumus assequi cogitatione: nihil autem accuratius, sive quod omnes numeros Mathematicæ scrupulositatis melius impleat, à nobis cogitari umquam posse, quam à natura fieri solere, mihi persuadeo. Cur vero per vitri superficiem gyratio hæc mutetur, jam in Meteoris explicui, & adhuc apertius infra dicam.

Venio nunc ad ultimum argumentum, quo probare intendit, me non enucleate vitro trigono applicare illa quæ globulis ad aquæ superficiem allapsis contingere dixeram. Ad quod facillime respondeo ex pag. 23. Dioptrices, in qua perspicie demonstravi contrariam esse rationem corporum terrestrium, quales sunt globi illi de quibus in pag. 258. Meteor. & particularum materię quæ lumen transmittit; quia nempe illa difficilius per aquam transcunt, quam per aërem, hæc contra facilius per aquam, & adhuc facilius per vitrum quam per aquam: inde enim patet, ut enucleate unum alteri applicaretur, globulos aquam subeuntes conferri debuisse cum radiis à vitro in aërem transcuntibus, quod à me factum est, &c.

Nolim autem Dominatio vestra sibi persuadeat, me tam paucis vel tam levibus argumentis ad ea, quæ scripsi, affirmanda fuisse impulsus, ut ex uno solo experimento judicarem colorem rubrum, non dicam in frequentiori agitatione, hoc enim non sentio, sed in majori propensione ad motum circularem quam ad rectum consistere. Licet enim nullum aptius eo

quod attuli esse putem ad istud demonstrandum, sexcenta tamen alia sunt quibus idem confirmatur, quæque possem hic asserere, si partes illas Physicæ, à quibus pendent, exponendas suscepissem; nempe dicerem cur sanguis omnis sit ruber, si de animalibus tractarem, cur argentum vivum aliaque innumera sola ignis vi rubescant, si de igne, istisque aliis, &c. Quinimo si vel unum quid in tota rerum natura invenirem, quod meæ hac de re opinionioni non consentiret, eousque cohiberem assensionem, donec illa in parte mihi satisfecissem. Nunquid vero etiam sunt in ipsis meis Meteoris aliquot alia experimenta quæ illam confirmant, ut in pag. 272. Meteor. & sequentibus, ubi egi de rubeo nubium colore, de cæruleo cæli & maris, &c.

Supereff itaque ut nonnulla hic addam, quæ juvabunt ad intelligendum quid umbra & quid refractione conferre possint ad colorum productionem; licet enim hoc ipsum in Meteoris exponere conatus sim, forte tamen potuissim evidentius, si prolixior esse voluissim.

Primo igitur quamvis in fig. pag. 258. Meteor. majoris perspicuitatis causa quinque tantum vel sex globulos pingi curarim, putandum tamen est omnia illa spatia, per quæ lumen proprie transmittitur, particulis materiæ cælestis sibi mutuo incumbentibus plena esse, ut jam antedictum est, & videre licet in figura hic apposita pag. seg. in qua suppono punctum V, ad Solem, & X, ad oculum pertingere, omnesque globulos in linea VX, constitutos, esse particulas materiæ cælestis, quæ nituntur recedere à centro Solis, eodem modo quo arenulæ vasculis illis contentæ, quibus tanquam clepsydri uti solemus, nituntur accedere ad centrum terræ. Possimulque singulos ordines horum globulorum ab objectis ad oculos protendentes




(saltem si Philosophice loqui libet) radios materiales appellare, ad distinctionem radiorum formalium, qui secundum lineas Mathematicæ rectas atque indivisibiles ferri intelliguntur, licet hi materiales vix unquam lineas plane rectas, & nunquam plane indivisibiles component.

Secundo, cum aliquis ex istis globulis impellitur in unam partem, non sibi persuadendum est illum efficere ut alius globus, cui proxime incumbit, in contrariam se vertat, quemadmodum fit in rotis horologiorum. Sed, tanquam si loco istorum globulorum essent tessellæ, unæ aliis superpositæ, putandum est, cum unus in aliquam partem propendet, illum omnes aliæ sub se positas usque ad oculum in eandem plane partem impellere. Atque hoc ita fieri debere ex Mechanicæ principiis, & ea materiæ cælestis

stis

istis natura, quam rationes innumerae mihi persuadent, evidenter demonstratur. Si autem fingamus tot tessellas unas aliis incumbere, suprema 12, ad sinistram humerum Orionis, & infima 43, ad oculum pertingat, atque hanc supremam recta quidem pelli ab 12, versus 43, sed præterea fortius premi in parte 2, quam in parte 1, facile intelligemus duplicem hanc impulsionem, sive pressionem, omnibus istis tessellis simul ita posse communicari, ut ipsam infimam 43, ad rotationem, quæ fiat in partes 1234, impellat.

Tercio notandum est, globulos istos, vitri, aëris, aliorumve corporum poris contentos, propendere semper, vel certe ut plurimum, ut in unam aliquam partem rotentur, & quidem ut roten- tur eadem celeritate, qua secundum lineam rectam feruntur, quoties nulla peculiaris adest causa, quæ celeritatem istam augeat vel immi- nuat; ut monui in pag. 272. Meteor.



Ac præterea quosdam ex iis in unam partem, alios in aliam propendere, prout hoc vel illo suo latere contingunt parietes pororum quibus insunt. Vim autem qua totus radius materialis oculum premit, ex omnibus istis propensionibus simul sumptis ita componi, ut illæ, quæ sibi mutuo adversantur, pro nihilo sint numerandæ. Sic, exempli causa, globulus B, quia pellitur ab V versus X, tangitque particulam æris D, quæ cum ipso non pellitur, propendet ut gyretur secundum ordinem notarum 1234, globulus autem C, quantum in se est, in contrarias partes inclinat, quia tangit particulam G: sed hæc duæ diversæ propensiones ab oculo in X, sentiri non possunt, quoniam una alteram prorsus elidit. Idemque de pluribus contrariis refractionibus est sentiendum, & de pluribus radiis materialibus alium intermediunt gentibus, &c.

Quarto notandum est, æquilibrîi leges tam accurate observari à natura, ut ejusdem radii materialis omnes partes simul sumptæ, semper tantumdem præterpropter in unam partem, quam in contrariam impellantur, tam a contactu particularum æris aliorumve corporum, quam ab occurso globulorum radios vicinos componentium, & ab aliis causis quibuslibet, quæ in plurimos ex istis globulis simul agunt; unde fit ut totus radius, ob tales causas nunquam multo magis ad rotationem in unam partem quam in aliam inclinet. Quia tamen fieri vix potest, quin semper aliquantulum in unam aliquam magis inclinet, alii omnes vicini radii propendent in diversas, ut ita, quod deest singulis ad æquilibrîi leges implendas, ab omnibus simul compensetur. Nullaque pars sensibilis in corpore diaphano dari potest, in qua non permulti tales radii, nempe ex globulis supra omnem cogitationem minutulis compositi, reperiantur.

Quinto denique notandum est, vitri alteriusve corporis superficiem, in qua tales radii refranguntur, efficere ut illi non, sicut alias fieri solet, uni in unas, alii in contrarias partes ferantur, sed omnes concorditer in eandem inclinent, modo tantum satis oblique in illam superficiem incidant, ut uniuscujusque radii globulum illum, à quo tangitur, magis impellat ad rotationem in eam partem, quam totus idem radius ab aliis causis simul sumptis in ullam aliam impellatur. Nam cum illæ aliæ omnes causæ propter æquilibrîi leges vix quicquam possint, ut mox dictum est, facile ab hac unica superantur: & docet experientia, non quantulamcunque refractionem, sed eam duntaxat, quæ magna est, coloribus gignendis aptam esse.


Neque vero illos refractione sola unquam producit, nam sive globuli,

ex quibus radii constant, in eandem omnes partem propendeant, sive in diversas, eodem plane modo ab oculo sentiuntur: Et sola non potest illos ad motum circula rem fortius vel languidius quam ad rectum impellere. Sed si umbra illi adjuncta sit, hoc est, exempli causa, si radius VX

cujus globuli ob refractionem propendent, ut vertantur secundum ordinem notarum

1 2 3 4, in illa crepera luce, quam pen-umbram appellant, ita versetur, ut fortius quidem pellatur ab V versus X, quam radius L M, ei proximus à parte umbræ, languidius autem quam N P, quia nempe minus lucis habere supponitur, certum est vim, qua globuli, ex quibus constat, gyrare nituntur, augeri debere ab utroque radio L M & N P, quæ contra ab iisdem minueretur, si N P esset à parte umbræ, &c.

Ex quibus patet evidenter quid umbra conferat ad colorum productionem; nam abs-



Q

que

que ea non magis radius LM in unam partem traheret globulos radii VX, quam NP in contrariam, atque ita vis unius à vi alterius elideretur. Nec minus patet quid conferat refractio, nam absque ea globuli radii VX non magis propenderent ad rotationem secundum ordinem notarum 1 2 3 4, quam ad contrariam, ideoque illa propensio nec augeretur nec minueretur à radiis LM & NP; vel certe, si ponamus illam augeri, tunc propter leges æquilibrii est putandum aliam in vicinis radiis tantumdem imminui. Et quia sensus non movetur à singulis radiis separatim, sed tantum à plurimis simul, neutra ideo posset sentiri, &c.

Quæ si D. vestræ utcunque satisfaciant, spero me ab ipsa impetraturum, ut docere non gravetur quænam sint illa alia in quibus plus aliquid veritatis desiderari posse putat, & ad ea etiam respondendo, testabor quantum sim Dominationis vestræ studiis devotus

RENATUS DESCARTES.

EPISTOLA LVII.

Ad Dominum Morinum.

Gratias agit de libro, quem ipsi D. Morinus dono dederat.

Accepi eximium illum librum, quo me dignatus es, eoque majorem causam esse existimo, cur tibi de illo gratias agam, quo illum merui minus; profecto enim nunquam occasionem habui ullum tibi officium præstandi, quod te invitaret ut mei istac ratione memineris. Certum est laborem, quem in longitudinibus inveniendis cepisti, nihil minus mereri, quam publicum præmium; sed quia scientiarum inventiones tanti sunt, ut argento nequeant persolvi, videtur Deus ita constituisse mundum, ut hoc præmii genus non cedat vulgo, nisi Mechanicis & rudibus opificiis, aut vero actionibus humilibus & servilibus. Sic nullus dubito quin artifex quispiam multo pluris venditurus esset perspicilla optima à se confecta, quam ego omnia mea in Dioptricam cogitata, si quidem esset mihi animus illa vendere. Quod tamen non obstat quo minus optem, ut tuis hac in parte votis fiat satis, & si quid ad hoc conferre possem, experiendo scires me esse, &c.

EPI

EPISTOLA LVIII.

Morinus ad Cartesium.

Objectiones contra opinionem Cartesii de lumine.

Cum primum mihi contigit te videre Parisiis, teque ibi notum habere, judicavi esse tibi ingenium, quod posteris exquisitum quid & eximium polliceretur; & magnopere latatus sum, postquam vidi iudicium meum scopum suum attigisse eximio libro, quem in lucem edidisti de Mathematicis & Physicis quaestionibus, quæ duo primaria sunt etiam speculationum mearum naturalium objecta. Sed quemadmodum in iis, quæ ad Mathesin spectant, nemo erit qui ingenii tui sublimitatem non miretur; ita in iis, quæ ad Physicam attinent, puto tibi mirum non fore, si qui reperiantur, qui tibi contradicant. Cum enim tibi reservaveris principiorum tuorum cognitionem, & universalium novæ tuæ Physices notionum, (quarum vulgatio à doctis omnibus vehementer exoptatur) nec ratiocinia tua nisi comparationibus fulcias, aut hypothesebus quarum veritas saltem dubia est; peccaret quis in optimum & mihi familiarissimum primum Methodi tuæ præceptum, si ratiociniis tuis acquiesceret. Et licet per pag. 76. tuæ Methodi, experientia certissime confirmet maximam partem effectuum, de quibus agis: tamen haud ignoras motuum cælestium phænomena æque certo ex hypothese stabilitatis terræ, atque ex hypothese mobilitatis ejus deduci: atque adeo phænomenon horum experientiam non sufficere ad probandum utra duarum supradictarum causarum vera sit. Si autem verum sit, quod effectus probare per causam aliquam positam, deinde vero eandem hanc causam per eandem effectus probare, non sit circulus logicus; rem male intellexerit Aristoteles, & dici potest circulum nullum dari posse. Quantum vero ad Astronomos, quos Dioptrices tuæ pag. 3. imitandos proponis, sententiam meam te non cecido; nempe quod quisquis meliores hypotheses non statuet, quam quas Astronomi hactenus statuerunt, haud illis felicius erit in consequentiis & conclusionibus deducendis: & quidem gravius errare poterit. Illi enim male supponentes parallaxim Solis, aut obliquitatem Eclipticæ, aut eccentricitatem apogæi, medium motum, aut Planetæ periodum, &c. tantum abest, ut verissimas inde & certissimas consequentias deducant, sicut dicis prædicta pag. 3. ut contra in motibus sive locis planetarum deinde errent pro proportionem erroris falsarum suarum

hypothesium; quemadmodum testatur eorundem cum cælo tabularum collatio; & credo me primum tradidisse Astronomis in meo de longitudinibus libro veras rationes vitandi deinceps falsas has omnes hypotheses, circulosque omnes logicos, qui in hoc admitti possunt. Verum Astronomi ut plurimum falsis suis hypothesebus non errant, nisi in excessu aut defectu motuum planetarum; cum è contra Physicus errare possit in re ipsius, de qua tractat, natura. Nihil est facilius quam aliquam causam effectui cuiuspiam accommodare; nec ignoras quam sit id Astronomis familiare, qui ex diversis circulorum aut ellipticum hypothesebus ad eundem omnes scopum collineant; & hoc idem est tibi in Geometria tua notissimum. Sed ad probandum effectus cuiuspiam positi causam, veram esse & unicam ejus causam, probandum est saltem non posse talem effectum ab alia ulla causa produci.

Quo autem polles ingenio, opinor te recte prævidisse juxta Methodi tuæ pag. 69. quicquid tibi objici posset; sed celata adhuc tuorum Physices principiorum, ex quibus cætera deducuntur, cognitione, voluisse te ludere, non solum ut Physices tuæ vulgandæ desiderium apud doctos moveres, sed insuper ut illos iis difficultatibus exerceres, quas in nova tua doctrina reliquisti; quinetiam illos ad hoc invitas Methodi pag. 75. eo usque ut illos roges, ut suas ad te objectiones transmittant, quod quidem me potissimum permovit, ut hæc ad te scriberem.

Verum cum sciam quanti sit tibi ut & mihi tempus, nolui varias ex variis materiis desumptas difficultates tibi proponere; satis habui unam ex præcipuis & ingeniosissimis deligere, nempe de lumine, cujus natura tantopere nunc investigatur ab iis qui putant se esse in Physica perspicacissimos. Habemus hic duos viros qui huic materię nuperrime allaborarunt, suamque de illa opinionem ediderunt. Ego vero qui Marte etiam meo ei operam dedi, nec quicquam tamen adhuc vulgavi, judico illorum sententiam longe facilius profligari posse, quam tuam: siquidem ingenii tui vi, subtilissimis, & altissimis Matheseos speculationibus affueti, & quibus terminis, & loquendi modis, sive enunciationibus ita munis & circumvallas, ut videaris prima fronte inexpugnabilis. Sed cum præter veritatem nihil sit, quod ratiocinii vim ferre possit, illam autem agnoscere nequeam in iis, quæ de lumine nobis tradidisti, credidi tene-ri me, etiam te invitante, ut meas in hanc materiam objectiones tibi proponerem; non quod velim te ad longum sermonem adigere, sed solum ut naturam luminis mihi paucis illustres, quod quidem posse te existimo,

mo,

mo. Habeas autem tibi persuasum, me illud sub modio non absconditum, sed daturum tibi in laudem tuam.

Quid tamen sit mihi à te expectandum, nescio; nonnulli enim mihi suadere voluerunt, quod si terminis scholasticis vel tantillum tecum uterer, me contemptu potius quam responso dignum ilico iudicatus esses. Verumtamen ex discursuum tuorum lectione, haud video te esse scholæ usque adeo, ut dicunt, inimicum, deque tuo ingenio tam bene sentio, ut putem te haud ægre concessurum veritatem omnem recte demonstratam Scholæ terminos omnes ferre posse; omnemque propositionem, quæ talis non est, dubiam saltem esse, nisi omnino falsa sit. Qui enim vellet figmentum pro veritate, accidens pro substantia, motum absque motore, &c. nobis obtrudere, tu ipse cogita quid in ejusmodi hominem statueres. Non mihi videtur errasse schola, nisi quod per speculationem magis incubuerit terminis inveniendis ad res tractandas necessariis, quam per indubitata experimenta ipsius rerum veritatis investigationi; unde fit ut hujus inops, illis abundet. Quocirca tecum sentio, rerumque veritatem non quaero nisi in natura, neque amplius scholæ confido, cui præter terminos nihil debeo.

Incipiam autem à tuis de natura luminis opinionibus, quas pro fundamento assumam ut pateat an ubique sibi consistent, necne, & qua in te inter se pugnent.

1. Igitur, pag. Meteor. 159. ais, *Suppono 1. aquam, terram, aërem, & reliqua similia corpora; quibus cingimur, constare multis exiguis partibus, figura & magnitudine differentibus; quæ nunquam tam accurate nexæ & continuatæ sunt, quin plurima spatia inter illas pateant; non quidem vacua, sed repleta materia illa subtilissima, per quam actio luminis communicatur.*

2. Pag. 4. Dioptrices tuæ ais; *Lumen in corpore luminoso nihil esse præter motum quendam, aut actionem promptam, & vividam; quæ per aërem & alia corpora pellucida interjecta versus oculos pergit; eodem plane modo, quo motus sive resistentiæ corporum, quæ cæcus quispiam offendit, per interpositum scipionem ad manum ejus tendit. Unde sequitur quod quemadmodum motus iste in baculo; ita etiam supradictus motus in aëre recipitur.*

3. Sed pag. 23. aliter dicis, nempe, *Lumen aliud non esse, quam quendam motum, sive actionem; in materia quadam subtilissima reliquorum corporum poros implente receptam. Hancque materiam distinguis ab aëre, & reliquis corporibus pellucidis, quibus pag. 122. poros assignas.*

4. Pag. 122. dicis, *Lumen aliud non esse, quam materie subtilissima actionem, aut propensionem ad motum. Verum id quod non est nisi propensio*

ad motum, non est motus, hæcque duo discrepant ut potentia & actus. Et si actio est à materia, ergo non à lucidis corporibus, quæ hanc materiam movent, ut ais pag. 38. Dioptr. tuæ, qui locus infra asseritur numero 10.

5. Imo & pag. 156. non dicis lumen esse actionem sive motum, sed veluti (comme) actionem aut motum materiae cujusdam subtilissime, &c. Omnis autem comparatio est inter diversa; ergo secundum te, lumen non est actio sive motus. Et quamvis vocabulum *comme* sumeretur pro *tanquam*, nondum tamen exhaustires totam difficultatem, claudicaretque nihilo secius ratiocinatio tua.

6. Pag. 50. Dioptr. tuæ loquendo itidem de luminis natura sive essentia, dicis (*la lumière*) *lumen nihil aliud esse, quam motum sive actionem quandam, quæ ad motum aliquem producendum tendit, &c.* unde concludo quod si lumen esset actio, imo & actio quæ ad motum aliquem producendum tendit, ergo lumen prius erit quam motus; omnis enim causa effectui suo prior est; & proinde lumen non erit motus.

7. Denique ais pag. 5. non esse opus ut supponatur materiale quicquam ab objectis ad oculos nostros transmitti, ut illius ope colores & lumen videamus; quæ quidem secundum te unius ejusdemque sunt naturæ. Sed quoniam juxta id quod dicis pag. 4. lumen aliud non est in corporibus, quæ lucida vocantur, quam quidam motus ad oculos nostros pergens, motus autem nunquam est absque mobili, ergo necesse est ut quemadmodum corporum lucidorum lumen, hoc est, motus, transit à corporibus lucidis ad oculos nostros, ita etiam mobile, quod secundum te aliud non est quam materia subtilis, in qua hic motus recipitur, ad oculos nostros transeat.

8. Exposita hæctenus sententia tua de forma sive essentia luminis, quæ secundum te consistit tantum in actione sive motu, aut propensione ad motum, &c. materiae subtilis, &c. videamus jam quid dicas de materia ejus; hæc nempe materia subtili.

Itaque pag. 256. Meteor. de materia hac subtili loquens, ais partes ejus concipiendas esse tanquam globulos, qui per corporum terrestrium poros agantur.

9. Sed pag. 159. eorundem Meteor. loquens de aëris, aquæ, terræ cæterorumque corporum partibus, & dicens quod eum illorum partes bene unitæ non sint, intervalla, quæ illæ inter se relinquunt, materia hac subtili referta sunt, deinde addis *partes, ex quibus constat aqua, longas esse, leviter, & lubricas parvularum anguillarum instar, quæ licet jungantur, & sibi mu-*

tuos implicentur, nunquam tamen ita nexu coherent, quin possint facile separari, & contra fere omnes tum terre, tum aëris, tum aliorum plerorumque corporum particulas habere figuras admodum irregulares & inequales. Ex quibus verbis clare sequitur quod quoniam spatia sive intervalla inter has particulas, quarum figuræ ita inæquales sunt & irregulares, comprehensa, rotunda esse nequeunt nisi fortuito, sequitur, inquam, quod materia hæc subtilis, quæ hæc intervalla sive poros implet, rotunda non erit ad instar globulorum. Quod si dicas materiam subtilem in horumce pororum sive intervallo- rum aliquo contentam, constare ex partibus globulorum instar rotundis; at vero quia duo globi se non tangunt nisi in puncto Mathematico, sequetur inter hæc materia subtilis in aëris aut terræ poro aliquo contentæ partes, alios iterum fore poros, qui vacui sint; quemadmodum etiam ex globulorum tuorum figura pag. 258. liquet, vacuum autem in rerum natura nullum est.



Veniamus jam ad materiæ tuæ subtilis motorem.

10. Dioptr. tuæ pag. 38. dicis, *lumen, hoc est, motus, sive actio, qua Sol aut aliud quodvis lucidum corpus impellit subtilem quandam materiam, quæ in pellucidis corporibus omnibus reperitur, &c.* His verbis, quæ etiam per pag. 160 & 272. confirmantur, clare innuit materiæ huic subtili nullum esse motum, sed solum à corporibus lucidis, illam agentibus & impellentibus.


11. Verum eadem pag. 160 ais, *materiam hanc subtilem talis naturæ esse, ut nunquam desinat huc illuc celerrime moveri*: ex quibus verbis sequitur neutiquam opus esse lucidis corporibus, quibus subtilis hæc materia moveatur, cum sponte sua moveatur, eaque sit illius natura, ut nunquam desinat moveri.

Transcamus jam ad formam motus materiæ hujus subtilis.

12. Pag.

12. Pag. Meteor. 172. dicis, etiam si luminosorum corporum actio in eo tantum consistat, ut pellant secundum rectas lineas materiam illam subtilem, quæ oculos nostros attingit: particulas tamen materia hujus ut plurimum etiam circulariter moveri, saltem eas, quæ hic sunt in aëre nobis vicino, eodem modo, quo pilæ se circumvolvunt, dum terram tangendo movetur, quamvis non fuerit nisi secundum rectam lineam impulsæ, &c. Ubi notandum est obiter, quod si materia hæc præter motum rectilineum, quem à corpore luminoso accipit, sponte sua tantum rotetur, ergo non movetur huc illuc, ut dicis p. 160. & quemadmodum in articulo superiore observavi; aut certe si huc illuc movetur, ergo in recta lineâ non movetur, ut dicis pag. 272. & sic ut hic notavi.

13. Sed pag. 257: contrarium prorsus eorum, quæ supra dicta sunt, dicis & demonstras, per schema tuum globulorum, qui moti in aëre superficiem, aquæ secundum rectam lineam petunt, & in eam incidunt;



hæc enim sunt & verba tua & figura; quæ ut melius intelligantur supponamus pilam 1 2 3 4, sit impulsam esse ab V ad X, ut recto tantum motu incedat, & duo illius latera 1 & 3, æquali celeritate delabantur (proinde ergo non rotatur) usque ad superficiem aque YY, ubi motus lateris 3, quod prius quam aliud istam superficiem contingit, retardatur, non mutato illo lateris 1: unde fit ut tota pila necessario rotari incipiat secundum ordinem numerorum 1 2 3: Ex quibus verbis clare

sequitur particulas sive globulos in aëre non rotari, ut dicebas supra, nisi quando solidiorem superficiem offendunt.

Jam vero, Domine, ipse tu cogita, juxta primum Methodi tuæ præceptum, an hæc doctrina sit pro vera amplectenda, in qua tam multa dubia & contradictoria apparent. Et cum illorum tantum partem exhibuerim, deberent eorum à te elucidationem expectare, antequam ulterius progrediar. Sed quia puto tibi gratum fore ut doctrinam tuam rationi aliquo impugnem, quod etiam plurimi alii facturi sunt, tu interim in Principiorum tuorum cathedra sedens de argumentorum vi judicabis, omnibus uti spero, satisfactorius.

1. Libenter impugnarem, eam quam lumini tribuis *essentiam* sive naturam, quam dicis esse actionem sive motum, aut propensionem ad motum, aut tanquam actionem & motum, &c. subtilis cujusdam materię, &c. sed hac in re te tibi ipsi tum parum constare video, hacque inconsistentia tam multa tibi effugia parasti, ut frustra te quispiam premere conaretur, donec certa aliqua definitione, ut decet Logicum, iteteris. Nilulomius ex numero 10. supra allato, mihi videtur præcipue innuere lumen esse actionem sive motum, quo Sol aut aliud quodvis lucidum corpus subtilem tuam materiam impellit. Quo posito, quandoquidem Sol prior est hoc motu, cujus nempe ille est causa efficiens, sequitur Soli ex sua natura lucem non inesse; aut certe lucem ejus in tua definitione non comprehendi, eamque esse priorem eo quod tu definis: verum tibi probaret Schola actionem omnem esse essentialiter ens relativum, motumque omnem esse essentia sua ens potentiale: luminis vero essentiam neutrum habere; cum lumen sit natura sua actus, sive forma quædam absoluta.

2. Præterea non sufficit à quacunque alia causa moveatur, alioqui sævientibus per atram noctem ventis, aër & mare ignis instar micarent, nec minus quam de die tum luceceret: sed oportet insuper ut à corporibus lucidis, quatenus lucidis moveatur. Unde sequitur illorum lucem priorem esse eo quod definis, quod non consistit nisi in actione, sive motu, quo lucida corpora luce sua materiam tuam subtilem impellunt? imo & sequitur illud, quod definis, non esse lumen, sive lucem.

3. Sol, scintilla ignea, aut nitedula eodem modo illuminant. Scintilla autem quingentis passibus noctu cerni potest absque perspicillis; ope vero perspicilli juxta tua in Dioptrica inventa fabricati, quinquaginta forsân & pluribus in aëre leucis cerneretur: ergo hæc scintilla secundum te vi pollebit localiter movendi, idque in recta linea, totam materiam subtilem in globo aëris quinquaginta leucarum semidiametri comprehensam; quod certe nemo recto judicio præditus admittet, cum notum sit materiam omnem non habere ex se resistantiam ad motum localem: ergo Sol non illuminat per motum materię subtilis. Neque vero quadrat cæci tui & baculi ejus comparatio, cum motu materię subtilis: baculus enim totus continuus est, imo & durus & solidus: quapropter quo instanti extremorum ejus unum impellitur, pellitur etiam alterum; & manus quæ extremorum ejus unum tenet, sentit eodem instanti cujuslibet corporis illi in altero extremo resistentis occursum. Verum materia

R

subti-

subtilis continua non est, alioqui corporum pori omnes à Sole ad nos continui essent, aëre quantumlibet agitato ventis; & præterea dura non est aut solida, ut baculus: quare mota materia corpori cuiuspiam lucido proxima, non sequitur remotiorem etiam moveri, idque in eodem instanti. Addo præterea, quod cum scintilla nequeat secundum te movere materiam subtilem, nisi quatenus ipsa est lucida, necesse est ut lux ejus sit antemotum, atque ab illo independens; imo & necesse est ut lux illa sit præcipua causa motus: ergo motus materiæ subtilis non est corporum lucidorum lux; neque puto posse hanc rationem everti.


4. Etiam si supponatur materiæ subtilis motus, ejusque partium continuïtas, nihil ultra possis concludere, nisi quod iste motus efficit ut sentiamus & percipiamus corporum lucidorum lumen; quemadmodum scilicet cæcus unum extremum baculi tenens sentit occursum lapidis in altero extremo: atque hoc sensu pag. Meteor. 259. ais, *partes materiæ subtilis, quæ luminis actionem transmittit, &c.* Sed non ideo sequitur hunc motum esse lumen, quemadmodum etiam occursum in cæci baculo, non est ipse lapis, licet ejus actionem transmittat: & si lapis sensu præditus esset, ille etiam motum baculi sentiret; sed tamen motus iste non est cæcus movens, ergo motus materiæ subtilis non est illud ipsum lumen quod illam movet.

5. Verum enim vero quid est materia ista subtilis? nam neque est aër, neque aqua, neque æther, cum omnia hæc sint pellucida, & proinde porosa, atque hac materia referta, ut etiam affirmas pag. Meteor. 122. & quoniam omnium corporum respectu illam subtilem vocas, oportet ut illa sit corpus aliquod simplex etiam ipso æthere subtilius: & quandoquidem videmus in natura tam eximium simplicium corporum ordinem, ut subtiliora quæque se supra crassiora collocent, quemadmodum etiam ex Chymia liquet; cur materiâ hæc, quæ juxta te diinidiam partem loci, in quo sunt simplicia corpora, occupare debet, sphaeram propriam non haberet? siue autem aliquam illi assignes, siue non; tamen diaphana non erit, alioqui per pag. 122. supra laudatam, poros etiam habebit, alia iterum materia referciendos, & sic in infinitum; si autem diaphana non sit, ergo non poterit lumen transmittere, ut supra dicebas pag. 259. sola enim diaphana corpora possunt illud transmittere.


6. Præterea quemnam huic materiæ motum assignas? hic enim iterum difficultatem video & contrarietatem, cum supra ex numeris

ris

fig. 12 & 13, nec non ex tua globulorum ab aëre in aquam pergantium figura pateat globulos hosce descendere per rectam lineam: & quanquam numero 12, præter motum rectum à corporibus lucidis impressum, circularem etiam tanquam iis proprium illis assignes, ita ut etiam per aërem secundum rectam lineam descendant, sed circa centra sua circulariter moti; nihilominus numero 13 contrarium prorsus dicis, nempe globulum tum deum incipere rotari, cum in aquæ aut alius cujuscunque corporis aëre densioris superficiem incidit. Verum primo assignando materię tuæ subtili motum hunc ab aëre in aquam rectum, oportebit etiam ut ex majori in aëre altitudine illum assignes, & sic in infinitum, nisi concedas materiam hanc ab ipsis lucidis corporibus effluere: quod quidem repugnat non solum pag. 5. Dioptrices tuæ, in qua dicis, non esse opus ut supponatur materiale quicquam ab objectis ad oculos usque nostros transmitti, ut colores & lumen videamus, imo & pugnare hoc cum sensu & ratione. Quis enim sana mente præditus dixerit ex nitidula aut scintilla ignea posse satis materię effluere ad implendam totam sphaeram in qua illarum alterutra cerni queat ope optimi cujuscunque perspicilli juxta inventa tua fabricati, absque totali nitidulæ dissipatione, etiamsi millies major esset, & quantumcunque subtilis evaporatio ejus intelligeretur? & tamen haud dissipatur, nec dissiparetur licet singulis horæ minutis transferretur in diversas sphaeras, quas simili modo omnes replet. Secundo, si materię huic subtili, vel his globulis, qui sunt partes ejus, inest motus iste rectilineus; certe igitur non poterunt motu suo actionem luminis à Sole & stellis ad nos uno instanti transmittere, contra id quod asseris pag. 44. Methodi tuæ; nullum enim corpus naturale spatium pertransire potest, nisi successive. Quinimo hoc ipsum deducitur necessario ex pag. tua 259. in qua dicis colorum apparentium & à lumine productorum naturam in eo tantum consistere, quod partes materię illius subtilis, per quam actio luminis transmittitur, tendant majore vi ad rota-



tionem circa centrum suum, quam ad rectilinum motum; ita ut illæ



quæ ad rotationem longe validius tendunt, colorem rubrum efficiant, quæ vero non multo validius, luteum; utrum globuli rotatio fieret in instanti, (quod falsum est, & contra pag. tuam 257. in qua dicis punctum 2 globuli 1234, citius pervenire ad aquæ superficiem Y Y, quam punctum 1.) tamen quoniam secundum te rectilinus globuli motus tardior est rotatione ejus, rectus iste motus, per quem actio luminis transmittitur, non fiet in instanti.

Nimis longus essem, si vellem hic cæteras tibi difficultates proponere, quas in materiæ tuæ subtilis, ejusque in universa natura motuum hypothesi video; quare venio ad aliam tuam hypothesim de poris in aëre, in aqua, cæterisque diaphanis corporibus.


7. Dioptrices pag. 122. dicis corporis cujusque diaphani poros esse adeo continuos & rectos, ut materia subtilis, quæ in illos ingredi potest, facile in illis fluat absque ullo impedimento: quorum vero pellucidorum & diversæ naturæ corporum poros, aëris ex. ca. & vitri aut crySTALLI, nunquam ita exacte sibi mutuo congruere, quin plurimæ materiæ subtilis partes, advenientes ex. ca. ab aëre in vitrum, ab eo reflectantur, propterea quod in solidas superficiæ ejus partes incident, &c. Ad quod dicam quod, si aër & aqua corpora dura essent & solida instar crySTALLI, atque immobilia, ratio sane tua aliquam speciem haberet, sed cum sint naturæ fluidæ, moverique & agitari facile possint, non potest hæc pororum rectitudo consistere, quando ventis agitantur: siquidem sit solidarum aquæ & aëris partium, cum eorum poris, confusio. Et proinde cum materia subtilis, quæ lumen transmittit, inveniatur impedimentum in omnibus poris quos subit, sequitur quod meridiano tempore, cælo admodum sereno, sed ventis agitato, nequaquam luce sceret, aut certe obscure magis & confuse, (quæ duo experientiæ repugnant) aut denique, quod hypothesi tua de poris rectis ad materiæ subtilis transitum & transmissionem,

nem, supervacanea erit. Hoc forsan clarius liquebit hac quaestione quam tibi propono. Supponamus te esse noctu in planitie aliqua, in qua tuorum perspicillorum ope videas ad leucam unam à te nitedulam aut scintillam aliquam, atque ex ea parte in qua es, versus scintillam illam flare vehementissimum ventum, rogo te utrum horum validius impellat materiam subtilem contentam in poris aeris inter te & scintillam interjectis; an ventus, an vero scintillæ hujus lumen? Equidem puto te responsurum nullum fieri materię impulsus à scintilla versus te; sed contra totum aerem supra designatum una cum poris ejus, totamque materiam in illis contentam impelli à te versus scintillam, & quidem tanta vi, ut ipsa sit abripienda à vento, nedum ut queat ventum impellendo superare. Itaque censeo errorem esse si quis credat lucida corpora impellere versus oculos nostros materiam aliquam subtilem in poris aeris contentam, cujus ope illorum ad nos lumen transmittatur.

8. Denique si juxta Dioptrices tuæ pag. 122. pellucidi cujusque corporis pori sint adeo continui & recti, ut materia subtilis, quæ in illos ingredi potest, per illos fluat absque ullo impedimento, id maxime verum esset de vitro & crystallo, quippe quæ sint corpora dura & solida. Hoc autem supposito sequeretur, Solem tantumdem luminis transmissurum per vitrum aliquod decempedalis crassitie; quantum per idem vitrum ad lineæ unius crassitiem redactum: materia enim subtilis ab aëre adveniens, atque à Sole secundum rectam lineam impulsæ, eosdem in utraque crassitie poros offenderet, qui cum recti sint & continui, materia hæc in illos ingrediens pari in utrisque facilitate absque impedimento fluere. Quod autem idem diversæ crassitie vitrum æquale lumen transmittat, experientia adversatur. Adde quod, cum in eodem vitro possint duæ quævis superficies oppositæ & parallelæ centies mille diversis modis secari, sequeretur quod si secundum unum modum lumen per poros superficiei illi oppositæ absque ullo impedimento transcurreret, id secundum alios omnes modos fieri non posset; & proinde lumen non posset penetrare vitrum per parallelas quascunque duas superficies; quod quidem pugnat cum experientia. Idque facile concipies, supponendo in vitro poros ab una superficie in alteram secundum rectam lineam apertos: non enim poterunt à qualibet superficie ad oppositam, secundum rectam lineam aperti esse; alioqui nihil esset in vitro solidum.

9. Si corpora lucida secundum rectam lineam impellant materiam il-

lam subtilem, per quam luminis actio transmittitur, supponamus globum aliquem pellucidum aëris aut aquæ ABCD, cujus centrum sit in E. Ponamus autem in A & B, lucida duo corpora æqualis virtutis, accidet



horum absurdorum alterutrum, nempe quod vel lucida ista corpora ex locis C & D è diametro oppositis non cernentur, quod certe cum experientia pugnaret; aut vero materia subtilis in centro E posita in pluribus simul lociserit, quod quidem naturæ corporum repugnat. Hoc autem clare probatur; nam A non potest cerni ex C, quin materia subtilis & centralis E impellatur versus C secundum lineam rectam; eademque ratione B videri nequit ex D, quin eadem materia E impella-

tur versus D, & sic de infinitis corporibus lucidis in globi istius superficie positus.

Possem alias tibi difficultates in varia Physices tuæ capita proponere; sed in præsens satis habeo si mihi de lumine satisfacias, si quidem me hac gratia dignum judicaveris. R. P. Merfennus testis erit fuisse mesemper è tuis fautoribus unum; & natura mea odi & detestor malignum vulgus eorum, qui, si quando videant sublime aliquod ingenium instar novi cujuspiam sideris exoriens, invidia flagrant, nec aliud satagunt quam ut nomen ejus, gloriam & merita supprimant, nedum ut ipsi pro laboribus ejus & inventis gratias habeant, quanquam tamen pereum liberantur ignorantia eorum rerum, quarum cognitionem ab illo liberaliter accipiunt. Hæc ego expertus loquor. Dolebunt posteri infortunium meum, deque hac ferrea ætate loquentes non immerito dicturi sunt, fortunam non fuisse in illa doctorum amicam. Eam tamen tibi quam mihi feliciorum exopto, ut novam tuam Physicam videre liceat, ex cujus principiis nullus dubito, quin possis difficultates meas omnes facile solvere. Quare responsum tuum expecto dum tibi vacabit; interim credas velim inter literatos omnes quos novi, nullum esse cujus virtutes & generosa consilia majori honore prosequar, meque felicem existimaverim, si mihi concesseris ut sum &c.

Datum Parisiis, 22 Feb. 1638.

EPISTOLA LIX.

Responsio Cartesii ad præcedentes Morini
objectiones.

O Bjectiones, quas ad me misisti, ejusmodi sunt, ut à quocunque missas libentissime acceperim. Sed locus quem inter doctos tenes, & fama quam tua tibi scripta conciliarunt, eas à te quam ab alio quopiam mihi longejucundiores efficiunt. Quod melius testari me non posse arbitror, quam accurata hac responsione.

Incipis ab hypothesebus meis, & dicis motuum cælestium phænomena non minus certo deduci ex stabilitatis terræ, quam ex mobilitatis ejus hypothesi, quod quidem libentissime concedo; atque adeo rogavi ne quod de natura luminis in Dioptrica mea scripsi aliter reciperetur, ne demonstrationum Mathematicarum vis, quas in ea tradere sum conatus, ab opinione ulla Physica penderet, ut satis declaravi p. 3. Et si concipiendi luminis ratio alia aliqua inveniatur, qua omnes illæ ejus proprietates explicentur, quas experientia docet, liquebit id omne quod de refractionibus, de visione & aliis demonstravi, posse ex illa non secus quam ex ea quam proposui deduci.

Dicis etiam quod effectus per causam aliquam, deinde causam hanc per eosdem effectus probare, est circulus logicus, quod fateor; sed tamen non fateor circulum esse, si quis effectus aliquos per causam ipsam explicet, deinde eam per illos probet: magna enim est differentia inter *explicare* & *probare*. Ad quod addo, posse vocem *demonstrare* adhiberi ad utrumque significandum, saltem si juxta usum communem sumatur, non vero in stricta ea significatione, quam illi Philosophi tribuunt. Addo etiam non esse circulum, si quis causam aliquam per plurimos effectus aliunde cognitos probet, dein vicissim alios aliquos effectus per hanc causam probaverit: utrumque autem hunc sensum complexus sum pag. 76; his verbis; quemadmodum ultimæ rationes per primas, quæ earum causæ sunt, demonstrantur, ita etiam vicissim primæ hæ ab ultimis, quæ sunt illarum effectus, demonstrantur. Ubi tamen verba mea ambiguitatis insinulari nequeunt, si quidem statim post mentem meam explicui, & monui quod, cum experientia comprobeat maximam horum effectuum partem, causæ istæ ex quibus illos deduco, non tam illis probandis, quam explicandis inserviant, immo vero quod hæ ipsæ causæ ab istis effectibus potius pro-

probentur. Dixi autem *non tam*, pro *neminquam* inservire illis probandis; ut innuerem horum effectuum singulos, si in dubium revocentur, posse etiam per hanc causam probari, modo ipsa per alios effectus fuerit jam probata; qua in re non video potuisse me aliis ullis terminis uti, quibus mentem meam melius explicarem.

Dicis etiam Astronomos plerumque ponere ejusmodi hypothesen quæ causa sint ut in magnos errores incidant; ut cum parallaxim Solis, obliquitatem Eclipticæ, &c. male supponunt: ad quod respondeo istiusmodi res in hoc hypothesium, de quibus sum locutus, genere nunquam comprehendi; illasque clare designavi, cum dixi posse ex illis verissimas & certissimas conclusiones deduci, licet ipsæ vel falsæ sint vel incertæ. Etenim parallaxis Solis, aut Eclipticæ obliquitas, &c. nequeunt ut falsæ aut incertæ, sed tantum ut veræ supponi, cum è contra Æquator, Zodiacus, Epicycli, alique ejusmodi circuli vulgo supponantur ut falsi, mobilitas autem terræ ut incerta, ex quibus tamen verissima deducuntur.

Denique ais nihil esse facilius, quam causam aliquam effectui enipiam accommodare: verum quamvis revera sint plurimi effectus, quibus varias causas accommodare facile est, singulis singulas, tamen haud ita facile est unam eandemque diversis compluribus accommodare, nisi vera illa sit causa, ex qua effectus illi proficiuntur. Quin imo quidam non raro ejusmodi sunt, ut vera eorum causa satis probetur, si qua assignari queat, ex qua illi clarissime deducantur. Contendo autem illos omnes, de quibus sum locutus, esse in hoc numero. Si quis enim attendat non aliud hactenus in Physica factum fuisse, quam quod conati fuerint nonnullas causas imaginari, ex quibus possent phænomena naturæ explicari, quod tamen haud ita feliciter successit; deinde si aliorum hypothesen cum meis conferantur, hoc est, omnes illorum qualitates reales, formæ substantiales, elementa & similia, quorum numerus est pene infinitus, cum hoc uno, nempe, quod omnia corpora ex quibusdam particulis constent, ut certe in plurimis cernitur, atque in reliquis potest innumeris rationibus probari, (quod enim superaddo, nempe hujus vel illius partes hujus aut illius figuræ esse potius quam alterius, facile demonstrari potest iis, qui concedunt illa constare ex partibus) & denique si conforatur id quod ex hypothesibus meis deduxi de visione, sale, ventis, nubibus, nive, tonitru, iride & similibus, cum eo quod alii de iisdem rebus ex suis deduxerunt: spero id satis fore, ut ii qui non sunt nimium preoccupati, persuasum habeant eorum, quos explico, effectuum causas alias

alias non esse, quam eas ex quibus illos deduco; quanquam tamen id demonstrandum rejiciam in alium locum.

Cæterum dolet mihi te non delegisse aliam quampiam materiam oppugnandam, quam lumen; consulto enim abstinui ab aperienda mea de illo sententia; & quia nolo hic recedere ab eo consilio quo decreveram nullam in responsis meis miscere explicationem earum rerum, quas non fuit animus tractare, haud potero tibi, quantum optarem satisfacere. Quæso tamen credas me non fuisse conatum, ut videris credidisse, obscuris me terminis concludere & circummunire, ut tanto tutius latere possem; & si quo, ut scribis, ad Mathematicas demonstrationes habitu polleam, probabilius esse illas detegendæ veritati, quam adulterandæ inservire mihi debuisse. Sed de lumine haud ita aperte locutus sum, ac de reliquis, quia nolui in hoc specimine exponere id quod jam exposueram in alio quodam tractatu, in quo id accuratissime explicare sum conatus, ut monui Methodi meæ pag. 42. Verum sane est haud teneri quempiam eorum quicquam credere, quæ ibi loci scripsi. Sed quemadmodum cum fructus aliqui non aliunde asciti in regione aliqua cernuntur, proclivius est judicare, esse ibi plantas à quibus fructus illi producantur, quam illos sponte sua ibi nasci; sic credo particulares illas veritates, (si certe veritates sunt) de quibus in speciminibus meis egi, satis magno argumento esse, me generalium, ex quibus illæ pendent, causarum cognitionem habere, potius quam ut illas absque suis causis detexerim; & quia alter iste tractatus agit tantum de causis generalibus, haud puto me quicquam scripsisse quod fidem valde superet, cum scripsi me eas assecutum fuisse.

Quantum ad id quod audivisti, me contemnere Scholasticam Philosophiam, non potuit hoc proficisci nisi ab hominibus, qui neque mores meos, neque ingenium norint: & quanquam in specimine meo raro usus fuerim iis terminis, qui doctis tantum noti sunt, minime tamen sequitur me illos improbare, sed solum curavisse ut etiam ab aliis possem intelligi. Deinde meum non est arma quibus sim impugnandus eligere, sed solum defensioni meæ consulere; quod ut agam, lingulis hic articulis tuis sigillatim respondebo.

Objectio. Primo igitur. pag. 159. &c.

Resp. Illud ipsum quod de lumine scripsi pag. ista 159. clarius adhuc extat pag. 6. lin. 27. nec mihi videtur obscuri quicquam aut ambigui continere.

2. Pag. 4. &c.

Resp. Ubi dixi lumen ad oculos nostros transmitti per intermedium

S

aëris,

aëris, aut aliorum corporum diaphanorum, per hæc corpora intelligendum est id quod paulo post dico, materia nempe subtilis quæ illorum poris inest. quemadmodum cum dicitur quis capillos spongia humectare, aut semantili lavare, innuitur liquor, quo spongia vel mantile illud imbutum est, non vero illorum materia, aut forma, aut substantia. Quia tamen in re obijci nequit me esse improprie locutum; nam præterquam quod pag. 199. dixi, corpus omne invisibile & impalpabile nuncupari aërem, (in latissimo nempe significato) advertendum est locum, quem citas, esse in initio libri pag. 4. ubi necdum fuerat aut occasio nominandæ materiæ subtilis, aut opus illam ab aëre cæterisque corporibus pellucidis, in quibus ipsa continetur, quæque revera diaphana non sunt, nisi quia illam continent, distinguere. Atque in eodem discursu antequam quicquam aliud agam, diserte moneo pag. 6. magnum esse discrimen inter baculum cæci, & aërem, aut alia corpora pellucida, quorum beneficio videmus; & deinde eadem pag. 6. explicui quid per materiam subtilem intelligerem.

3. *Sed pag. 23. aliter dicit, &c.*

Resp. Hic articulus nihil continet, quod cum primo perfecte non congruat, quodque jam satis non explicuerim pag. 6. & passim inculca- verim; quod quidem mihi occasionem præbet observandi te retulisse locum desumptum ex pag. 4. inter duos alios ab ea valde distitos, quamquam nihil contineant, quod etiam non habeatur proxime pag. 6. quasi imponere mihi voluisses, me non fuisse in uno loco memorem ejus, quod in alio scripseram; quod certe non esset bonæ fidei.

4. *Pag. 122. dicit, &c.*

Resp. Hic duo obijcis. Primo quod si lumen sit tantum actio aut propensio ad motum, ergo non est motus; sed rogatum te velim, ut mihi indices locum aliquem in quo dixerim lumen esse motum, quin ibidem addiderim, *sive actionem*. Haud enim credo ullum in scriptis meis reperiri, præsertim quando sermonem feci de lumine eo quod inest pellucidis corporibus, quodque Philosophis dicitur lumen, ut illud ab eo distinguant, quod corporibus lucidis inest, quodque lucem appellant. Quod autem passim, sed generatim dixerim lumen esse motum sive actionem, alibi vero non esse nisi actionem, hæc contradictoria non sunt. Præterquam quod advertendum est, significationem vocabuli *actio* generalem esse, & completi non solum potentiam sive propensionem ad motum, sed etiam motum ipsum; ut cum phrasi Gallica dicimus quempiam esse semper in actione, hoc est, illum semper esse in motu. Hoc au-

tem

tem sensu vocabulum illud ibi fumo, quod tamen nullam homonymiam facit; moneo enim ibidem attendendum esse ad modum, quo lumen antea explicui; atque ita satis ostendo me innuere per vocabula, quibus ibi utor, idem quod per ea quibus alibi usus fueram. Alterum quod mihi hic objicis, nempe quod si actio sit à materia subtili, ergo non à corporibus lucidis, fundatur tantum in homonymia vocabuli, *lumiere* (*lux* vel *lumen*): fateor enim actionem materiæ subtilis, nempe lumen, non esse lucidorum corporum actionem, nempe lucem; sed tamen haud concedo me fuisse ambigue locutum, ubique enim ista sedulo distinxi.

5. *Imo & pag. 256. &c.*

Resp. Mirum in modum coarctas significationem vocabuli *comme*, ut probes claudicare ratiocinationem meam, & contendis illud non adhiberi nisi conjungendis terminis comparationis inter diversa. Sed hoc si verum esset, cum dicitur quispiam aliquid scripsisse *comme* (ut) doctus, sensus esset illum non esse doctum; & cum dicitur aliquis talem in comitiis locum tenere non *comme* (quatenus) istius loci comitem, sed *comme* (quatenus) hujus Baronem, sensus esset illum neque comitem esse, neque Baronem. Nullum autem in lingua nostra aliud vocabulum novi, quo potuissim uti eo quem citas loco, pag. 256. ut significarem identitatem, sive ut copularem prædicatum cum subiecto (terminos Scholæ hic libere adhibeo, ne putes me illos contemnere): sed non citasti totum locum ut se habet, nempe & concipiendo naturam luminis prout illam in *Dioptr. mea* descripsi, nempe *tanquam actionem sive motum*, &c. quod quidem Gallice mihi videtur significare, concipiendum esse quod actio sit lumen sive motus, non vero sicut actio, &c.

6. *Pag. 50. Dioptr. tua, &c.*

Resp. *La lumiere*, hoc est, lux, est motus sive actio in corporibus lucidis, tenditque ad motum aliquem in pellucidis producendum, nempe lumen: ergo lux est ante lumen. Concedo totum. Sed cum addis, & proinde lumen non erit motus, nego consequentiam; potest enim motus unus ab alio produci, nec quicquam est in natura frequentius.

7. *Denique ais pag. 5. &c.*

Resp. Miror quod afferas pag. 4. & 5. quibus probes lucidorum corporum motum non posse usque ad oculos nostros transmitti, quin materiale quid ab illis usque ad nos transeat. Aliud enim non ago in duabus istis paginis, quam ut explicem comparationem cæci, quam adduxi, præsertim ut ostenderem, quæ ratione motus possit absque mobili transmitti; nec credo putare te, cum cæcus iste canem suum baculo tangit, opus

esse ut canis per baculum ascendat ad manum usque cæci, ad hoc ut ille motum istum sentiat. Sed ut tibi in forma respondeam, quod ais motum nunquam esse absque mobili, distinguo; nam revera motus nequit esse absque aliquo corpore, sed potest ab uno corpore in aliud transferri, & sic à lucidis corporibus ad oculos nostros ope tertii cujuspiam corporis transmitti, nempe, ut dico pag. 4. ope aëris, aliorumque pellucidorum corporum, vel ut pag. 6. distinctius explico, ope cujusdam materiæ subtilis corporum horum poros implentis, & ab astris usque ad nos continuatæ. Cæterum hic monitum te velim, te mihi non raro tribuere opiniones, de quibus nunquam cogitavi, ut cum dicis colores & lumen non esse juxta me, nisi unam eandemque naturam, & mobile quod corporibus lucidis inest, non esse secundum me aliud quam materiam subtilem; & passim alibi, quæ quidem silentio prætermitto ne te interpellem.

8. *Exposita hæcenus, &c.*

Resp. Observari hic potest me non fuisse locutum de rotundis materiæ subtilis partibus, nisi sub finem Meteororum ad colores Iridis explicandos; cum enim mihi non fuisset animus subtilis materiæ naturam in istis speciminibus explicare, nihil de illa dixi, nisi quantum necesse habui ad rem, de qua tractabam, declarandam.

9. *Sed pag. 159. &c.*

Resp. Hic optime probas rotundas subtilis materiæ partes non posse terrestrium corporum poros omnes exacte implere, quod certe concedo: sed si hinc inferas spatium illud, quod ab illis non repletur, esse vacuum, pace tua terminis Scholæ dixerim, *nego consequentiam*; possunt enim aliqua alia materia repleri, quam tamen non teneor hic explicare.

10. *Dioptrices tuæ pag. 38. &c.*

Resp. Sic etiam hic ex eo quod dixi corpora lucida movere sive impellere materiam subtilem, concludis me clare innuere, nullum esse materię isti ex se motum; ad quod uno verbo respondeo, *nego consequentiam*; quodlibet enim corpus diversos simul motus accipere potest, atque ab infinitis diversis viribus simul impelli; sumendo tamen infinitum, *syncretogematically*; ne sit quod possit Scholæ carpere.

11. *Verum eadem pag. 160. &c.*

Resp. Fateor quidem posse materiam subtilem huc illuc moveri absque lucidis corporibus. Sed hinc non sequitur inesse illi absque istis corporibus motum cum sive actionem, quæ ad luminis sensum in nobis efficiendum requiritur; etenim ob hoc unum corpus aliquod lucidum est, quod hunc isti materiæ motum sive actionem imprimat.

12. *Pag.*

12. *Pag. Meteor. 272. &c.*

Resp. Dicis quod si materia hæc præter motum rectum, naturæ suæ tantum rotaretur, &c. ubi vocabulum tantum redundat, & à te solo proficiscitur, nuspiam enim illud adhibui; illoque sublato, reliqua plana sunt; nam licet partes materiæ subtilis in gyrum moveantur, & secundum lineam rectam, id non obstat quo minus aliis etiam modis moveri possint.

13. *Sed pag. 257. &c.*

Resp. In eo, quem citas, loco nequaquam loquor de materiæ subtilis partibus, sed de globulis quibusdam ex ligno aut alia quapiam visibili materiæ factis, & versus aquam impulsis; sicut liquet clare ex eo quod illos rotari supponam alio prorsus modo, quam materiæ subtilis partes, eamque rotationem, quam ex aëre egrediendo, atque in aquam ingrediendo acquirunt, comparo cum ea quam subtilis materiæ partes acquirunt ex eundo ex aqua aut vitro, atque in aërem ingrediendo. Neque vero debui hisce globulis alios motus tribuere, quam eos qui ad propositum meum faciebant, neque adeo innui non inesse alios materiæ subtili motus.

Iam vero Domine, ipse tu cogita, &c.

Resp. Miror autem profecto, Domine, quod ullam contradictionis speciem imaginari potueris in iis, quos attulisti locis, & quanquam in respondendo non valde laboraverim, tamen eam quam mihi hic offers, cathedram libenter accipio, *quia forte plus sapio sedens*; atque etiam ut reliquas tuas objectiones possim commodius auscultare.

1. *Libenter impugnarem, &c.*

Resp. Hactenus satis, si fallor, purgavi me de ea, quam mihi objicis, inconstantia. Quantum vero ad argumentum tuum, ejus neque materiam, neque formam intelligo; materiam enim quod spectat, illam fundas in luminis definitione, quam à me traditam fuisse supponis, licet sit verissimum non fuisse mihi animum ullam tradere, ut satis testatus sum pag. 3. idque etiam satis agnovisti. Deinde quod ad formam attinet, initium facis à consequentia, his verbis, *quandoquidem Sol prior est isto motu*, ubi antecedens nullum video; si enim *la lumière*, hoc est, lux, sit actio sive motus, quo Sol impellit materiam subtilem illum ambientem, ut quidem vis mecum supponere, nequaquam inde sequitur illum esse hac actione priorem, aut causam ejus efficientem; dici enim potest illam inesse ei à natura. Aut vero si velis Solem esse actione ista priorem, id eodem tantum modo intelligetur, quo homo ratione sua prior


est, quatenus nimirum debet ipse esse sive existere, priusquam illa uti possit. Atque adeo secunda tua consequentia, nempe Solem ergo naturam suam non fore lucidum, aut certe lucem ejus in definitione mea non comprehendi, illamque esse priorem ea quam definio, mihi videtur ejusdem naturæ esse, ac si ex eo quod aliquis dixisset, hominem ratione sua veritates multas detegere, inferres, hominem ergo naturam suam non esse ratione præditum, aut certe ejus rationem in hac definitione non comprehendendi, &c. Verum ut inter nos conveniat, libenter concedam me neque definivisse, imo neque ullo pacto locutum fuisse de eo quod nomine lucis fortasse appellas, quodque in Sole præter motum sive actionem ejus esse supponis; cum enim possim ex hac una actione omnia naturæ Phænomena de lumine demonstrare, haud opus habeo quicquam hucusque considerare: neque hic velim immorari illi refellendo, quod etiam alii insuper supponunt, juxta id quod sub finem primi discursus de Meteoris dixi. Quod vero adjicis de ente relativo, de ente potenciali, & de ætne sive forma absoluta, scio in Schola mihi dictum iri, lumen esse ens magis reale, quam actionem sive motum, sed merito vapularem, si fateret id probari posse.

2. *Præterea non sufficit, &c.*

Resp. Oportet, inquis, ut materia subtilis à corporibus lucidis quatenus lucidis moveatur, hoc est, juxta me, quatenus in se habent actionem quandam sive motum. *Vnde sequitur, &c.* Nego consequentiam quemadmodum in articulo superiore.

3. *Sol, scintilla, &c.*

Resp. Ut melius evertam ea omnia quæ in hoc articulo argumentaris, initium faciam à fine, ubi dicis, ergo motus materia subtilis, hoc est, lumen quod est in aëre, non est (la lumière) lux corporum lucidorum, sive non est lux quæ est in Sole. Mirum! Et paulo ante dicis quod necessario sequeretur, (la lumière) lucem esse ante motum, &c. nempe lucem ante lumen cujus est causa.



quis vero de hoc dubitat? Quod vero præcedit, nempe materiam subtilem non esse duram, aut baculo similem, idem est cum eo quod dixi p. 6. supra allata, ubi postquam ex comparatione vini in lacte, ostendendo superiores vini hujus partes premere, atque adeo adjuvare motum earum, quæ per foramen in imo positum egrediuntur, quamprimum apertum est, declaravi quæ ratione

ratione materia corpori lucido proxima semel mota possit eodem instanti remotissimam movere; atque addendo uvas, quæ in hoc lacu sunt, posse interea variis modis agitari ab iis qui illas calcant, satisfeci iis quæ de ventis paulo ante objecisti. Denique quia in initio dicis, neminem recto iudicio præditum admissurum unquam quod insit scintillæ vis localiter movendi, & quidem, juxta me, (quod tamen non est omnino secundum me, pag. 8. lin. 2.) per lineam rectam totam materiam subtilem in globo quinquaginta leucarum semidiametri comprehensam; contendo me posse id ipsum apud te vincere, modo materiam hanc subtilem mecum supponas esse instar fluidissimi liquoris. Nam ne longius exempla tonquiram, etiamsi lacus iste de quo modo loquebamur, centum leucas profundus esset, annon quælibet gutta vini ejus quod est in fastigio, augeret celeritatem ejus quod per ima foramina efflueret? Atque ne dicas facilius esse corporis moti celeritatem augere, quam quiescens movere. concipe tubum duplicatum, puta ABC, qui, si velis, extendatur hinc ad terræ centrum, atque inde ad nos similiter replicetur, & qui utrinque sit fere plenus aqua; dum vero hæc aqua quam maxime tranquilla est, & omni agitatione caret, infundatur alia gutta aquæ in partem A; opinor enim te non ægre concessurum guttæ hujus gravitatem satis fore ad totam aquam versus se elevandam, ac proinde etiam ad totam aquam, quæ est in tubo ABC, movendam. Deinde vero negare non poteris quin scintilla ignea possit movere materiam subtilem in maximo aliquo spatio comprehensam, modo attendas actionem ignis longe validiorem esse actione gravitatis, & materiam subtilem in aquæ atque etiam aeris poris diffusam, utroque illorum longe fluidiorem esse debere. Nolles enim Mechanicorum & veræ Physices regulas respuere, ut hic dicere posses materiam omnem habere ex se resistentiam ad motum localem; nam certe axioma hoc solo sensuum nostrorum præjudicio nititur, atque hinc ortum habuit quod, cum à pueritia corpora tantum dura & gravia loco movere conati fuimus, atque in hoc resistentiam sem-



per

per offenderimus, jam tum induxerimus animum resistantiam hanc à materia proficisci, atque adeo corporum omnium communem esse, proclivius nimirum erat id supponere, quam attendere nihil fuisse quod impediret quo minus corpora illa attolleremus, præter illorum gravitatem, nec quicquam, quod obstarèt quo minus illa traheremus, præter partium, ex quibus illa constant, duritiem & inæqualitatem; inde autem non sequi, quod eodem modo se habeant ea quæ neque duritiem habent, neque gravitatem. Pars certe maxima opinionum tum vulgi, tum præter Philosophiæ, ex hoc fonte derivatæ sunt; sed quantumcunque speciosæ sint, & licet plurimi illis plaudant, neutiquam tamen debent sani iudicii homines eas morari.

4. *Supposito materia, &c.*

Resp. Nihil video in toto hoc articulo, nisi quod lumen non sit lux, sive quod actio illa, qua fit ut lumen sentiamus, non sit qualitas illa rellis, quam appellas *La lumière*, lucem, & quam in corporibus lucidis supponis esse diversam à motu, qui hanc actionem efficit; quod certe concedo.

5. *Verum enim quid est materia, &c.*

Resp. Nihil hic invenio præter homonymiam vocabuli; pellucidum, quod tribuitur uno sensu aëri, vitro, atque aliis corporibus id genus, quatenus poros habent, &c. atque etiam materiæ subtili, quatenus poris istis inest. Cum enim a se eximium illum ordinem, qui in rerum natura cernitur, exigere ut materia subtilis sphaeram aliquam supra cætera corpora obtineat, & sic in illorum poris non sit; facile est respondere, hunc ipsum eximium ordinem ostendere, quod cum corpora terrestria poros habeant, necesse est ut illi referantur subtiliori aliqua materia, quemadmodum cernimus quod, quamvis aqua supra terram naturaliter assurgat, subtile tamen illius poros omnes occupet; neque vero uspiam dico materiam subtilem nullam tenere sphaeram aquare sphaera altiore; contra enim illam ab astris usque ad nos extensam pono.

6. *Præterea quemnam, &c.*

Resp. Contradictiones semper fingis ubi nullæ sunt; passim enim facis inculcavi posse materiam subtilem omnibus modis moveri; sed unicum tantum modum esse, qui luminis sensum in nobis efficiat; eum nempe quo materia ista movetur, aut ad motum tendit, & quem à lucidis corporibus acceptum transmittit quoquo versum secundum rectam lineam ad illuminata usque objecta; actionem vero aut propensionem, quæ ad circumgyrationem istis partibus inest, colorum in nobis sensum effice-

re.

re. Quantum vero ad hoc quod numero 13. affers, globulum incipere tantum rotari cum superficiem aquæ offendit; Respondeo, vocabulum *tantum* non posse ad ullum scriptorum meorum locum referri, præter cum qui habetur pag. 257. ubi non fuit mihi animus loquendi de partibus materiæ subtilis. Deinde ad hoc quod dicis, quod nimirum assignando huic materiæ rectum motum ab aëre in aquam, oporteret eidem in aëre eundem motum ex majori etiam altitudine assignare, & sic in infinitum; aut vero concedere illam ex corporibus lucidis effluere; Respondeo ejus actionem non debere provenire ex altitudine in infinitum majori, illamque à corporibus lucidis incipere, ex quibus tamen hæc materia non magis effluit, quam baculus cæci ex objectis, quorum baculus iste ipsi sensum præbet. Id vero omne quod deinceps disseris, pro me facit, nisi quod sub finem videris voluisse dicere, quod si lumen est motus, ergo non potest in instanti transmitti; ad quod respondeo, quod quamvis constet motum non posse fieri in instanti, tamen dici potest quod in instanti transmittitur, quando scil. quolibet partium ejus æque cito reperitur in una parte mobilis, atque in alia, quemadmodum cum duo baculi extrema simul moventur.

Nimis longum esset, &c.

7. Pag. 122. *Dioptr. &c.*

Resp. Id quod hic objicis magnam habet veri speciem apud eos, qui proxima quæque tantum observant, quique cogitationem suam per universum nunquam circumferunt; opinantur enim hujusmodi homines ventos, fulmen, tormenta producere effectus omnium quam maxime impetuosissimos. Quod vero ad te attinet, qui Astronomiæ peritissimus, summamque corporum cælestium rapiditatem considerare assuetus Mechanicarum etiam gnarus, rationes quæ ex his pendent facile intellexeris, certe mihi videris mirari non posse, quod postquam dixi materiam subtilem ab astris usque ad nos sine interruptione extendi (quemadmodum necessario intelligi debet ut luminis actionem transmittat), & præterea fluidissimam esse: & ex partibus tenuissimis constare, addam celeritatem quæ ipsa movetur calor celeritati aliquo modo proportionatam esse, atque adeo ventorum celeritate longe majorem. Præterquam quod ex Meteoris meis satis intelligere potueris agitationem, quam ego tribuo partibus tum aëris, tum aquæ, cæterorumque liquorum, produci præsertim & conservari secundum me ab agitatione materiæ hujus subtilis. Inde enim clarissime sequitur corpora hæc neutiquam liquida esse posse, nisi illorum pori liberum materiæ subtili exitum undiquaque

T

que

que præbeant, nedum ut eorum pori cæterorum corporum poris minus recti sint & continui: quemadmodum etiam experientia videmus omnes, aut certe fere omnes liquores puros esse pellucidos; quinimo corpora dura pauca sunt pellucida, nisi quia cum liquida antea fuerint, illorum partes eundem adhuc situm retinent, quem à materia subtili acceperant. Deinde quod ventos spectat, (præterquam quod illorum motus multo tardior est eo, quo materia subtilis rectos facit & continuos omnes liquidorum corporum poros), illi non fere agitant singulas aëris partes separatim à vicinis, quemadmodum materia subtilis, sed totam ejus molem simul; unde fit ut illos multo magis sentiamus, quam materiae hujus motum, cui tamen venti obesse nequeunt. Quia autem sub finem rogas, annon vis illa qua scintilla ignea, aut nitidula quæpiam debet secundum me materiam subtilem versus oculos nostros noctu impellere, ut luminis sensum in nobis efficiat, possit à venti vehementer ex adverso flantis impetu præpediri; idem est fere ac si in lacu, de quo supra locuti sumus, supponeretur uvarum scapos vino permistos, & filo alligato; aut reti involutos sursum trahi velocissime, & quæreretur annon scaporum istorum motus impediatur motum cum, quo vinum deorsum tendit, cum ille sit huic prorsus contrarius. Ad quod re-



spondeo quod si motus ille, quo scapi sursum trahuntur, tardior sit eo quo vini partes deorsum tendunt, non impediet quo minus vinum istud per foramina quæ sub lacu sunt effluat; & etiam si longecelerior esset & rapidior, si tamen supponatur foramina ista ita obturata esse, ut in locum scaporum succedere nihil possit præter vinum, quemadmodum in locum partium aëris ex quibus ventus constat, succedere nihil potest præter mate-

riam subtilem, demonstrari poterit ex Mechanicorum regulis, vinum istud non minus pressurum fundum lacus, quam si scapi isti essent absque omni agitatione; atque ita certissimum est, saltem secundum me, nullius venti agitationem quamcunque posse materiae subtilis actionem impedire; nisi tamen in quantum agitatio ista tam violenta evadere potest, ut aërem accendat, quo casu lumen ab eo productum offuscasse posset scintillæ igneæ lumen, modo illud sit multo majus quam hoc.

8. Denj-


8. *Denique si juxta Dioptrices tuae, &c.*

Resp. Caula quæ impedit quo minus vitrum crassum sit æque pellucidum, atque idem minus crassum, alia non est quam quod multæ semper sordes, nubeculae, & exiguae bullæ in eo occurrant; quæ cum plures sint in magna crassitie quam in minori, pelluciditatem ejus magis impediunt. Quod ita se habere comprobatur ex eo quod nonnulli sunt lacus & loci in mari, in quibus aqua tam pellucida est, dum tranquilla, ut possit distincte cerni id quod in fundo est, licet quinque aut sex decem pedas alta sit; atque hæc tamen aqua, si exploretur, nonnihil semper impuri habereprehenditur.

Verum objectionum tuarum ea, quæ judicio meo est potissima, & quam fortasse idcirco ad finem servare volueris, in hoc consistit, quod si corporum pellucidorum pori debeant esse recti, non videntur illa secundum omnes superficies præbere posse exitum materiæ subtili, quoniam impossibile est, ut in corpore solido pori undique recti reperiantur. Verumtamen si vox rectum non sumatur magis ex rigore, quam testatus sum à me sumi, ut liquet ex pag. 8. lin. 2. atque etiam ex loco, quem ex pag. 122. citas, ubi nimirum non dico, poros istos debere esse perfecte rectos, sed solum quantum requiritur, ut materia subtilis per illos fluat absque impedimento, rem credo posse vel unica comparatione satis illustrari. Conjice poma vel pilas in rete, atque illa ita comprime, ut se mutuo contingant, & corpus aliquod durum componere videantur, deinde super hoc corpus infunde arcuulas tenuissimas, cujusmodi sunt illæ quibus in elephammidiis conficiendis utuntur, & videbis demum hanc arenam quacunque ex parte injectam, semper pertransitutam totum istud corpus absque impedimento. Fateor equidem durorum omnium corporum partes non esse pomorum instar rotundas; sed innumeris aliis figuris prædictæ concipi possunt, quæ partibus materiæ subtilis liberum æque exitum præbeant, atque hæc poma arcuulis istis.

9. *Si corpora lucida, &c.*

Resp. Causa cur ægre concipiamus liquidorum corporum partes varias eodem tempore actiones recipere posse, variosque motus contrarios transmittere, est quod assueti fuerimus observare, corpus aliquod durum versus aliquam partem motum, non posse eodem tempore versus aliam moveri. Verumtamen id in illis fieri certissimum est; neque est difficile hoc experiri in duobus aut tribus tubis, ex. ca. AC, BD, FG, quorum æqualem esse diametrum suppono, quique ita sunt de-



cussatim positi, ut spatium in medio E, tribus illis commune sit, nec tamen majus, quam si illorum tantum uni inserviret; tum enim si supponatur tres homines tria illorum extrema A B F inflare, aër qui in medio isto E occurrit, impelletur eodem tempore versus C, versus D, & versus G. Non quod idcirco necesse sit, aut etiam possibile, ut partium ejus quolibet moveatur eodem tempore versus tres hasce partes; sed sufficit ut illarum quædam moveantur versus C, aliz versus D,

aliz autem versus F, & quidem ter celerius moveantur, quam illæ quæ aliorum horum partes implent; quod utique credibile est, cum ter validius impellantur. Jam vero hoc ad materiam subtilem applicando, facile intelligitur qua ratione illa diversas diversorum corporum lucidorum actiones versus diversas partes eodem tempore transmittat.

Possent alias, &c.

Resp. Cæterum mihi difficilius est clausulæ tuæ, quam cæteris respondere; nequaquam enim existimo mereri me honorifica illa verba quibus in ea uteris, neque tamen deceret me illa rehellere. Quare hoc unum licet dicere, dolere me tecum errorem fortunæ, quod meritum tuum non satis agnoscat. Quod vero ad me attinet, nunquam Dei gratia quicquam ab illa aut gratiæ aut injuriæ accepi; imo & nescio utrum ejus in futurum favores optare debeam, potius quam timere; cum enim non mihi videatur honestum accipere ab ullo quicquam, quod non possit cum scœnore rependi, esset mihi grave admodum publicæ rei acceptum quicquam habere. Denique quod spectat maligna illa, de quibus loqueris, ingenia, credo æque multa aut forte plura in cæteris sæculis, atque in hoc fuisse; atque illa muscis comparando aut aviculis, quæ meliores tantum fructus petunt, specimina mea mihi tanto magis arrident, quanto ab illis acrius impugnari video. Multas tamen tibi gratias habeo pro ea, quam mihi optas felicitate, atque etiam quod ad me scribere gravatus non fueris.

E P I S T O L A L X.

Ad Dominum Morinum.

Mittit responsiones suas ad D. Morinum.

USus fuisset potestate, quam mihi feceras, meam ad tuas objectiones responsum typis committendi, etiam antequam illam videres, si ejus editionem æque festinasset, ac mihi fuerat propositum, cum illas acciperem; sed mutato jam nonnullis de causis consilio, existimarem me officio meo defuturum, si illam ad te mittere diutius cunctarer; nunc ergo illam accipe, & si quid sit quod tibi minus arrideat, aut quod ampliore explicationem postulet, quæso id mihi indica, & conabor in omnibus testari tibi me esse, &c.

13. Jul. 1638.

E P I S T O L A LXI.

Replicatio Morini ad Cartesii Responsiones.

LEgi quam potui attente responsiones tuas ad meas in novam tuam de lumine doctrinam objectiones, tum ob materię meritum, tum ut ingenii tui ætatis hujus subtilissimi & fecundissimi debitum honorem exhiberem. Sed in primo limine adverto, dolere te quod aliam quampiam materiam non assumpserim, quam lumen, in quam objectiones meas proponerem, cum tibi non fuerit animus de hac adhuc tractare, & sententiam tuam aperire; & cum nolis ab instituto tuo recedere, non posse te tam perfecte, quam optasses, mihi satisfacere. Ad quod respondeo, elegisse me hoc argumentum tribus de causis; primo, quod eadem speculatione occupatus essem propter Astrologiam meam Gallicam, in qua cum veniat tractandum de modis agendi corporum cælestium in hac inferiora, video incumbere mihi ut definiam, quid sit lumen, qua ratione agat, & quos effectus producat. Secundo, quia cum tua de lumine sententia sit admodum nova, atque id quod de eo in libris tuis passim scriptum, sufficiat difficultatibus & objectionibus movendis, optassem hujus, cui & ego allaborabam materię, illustrationem à te accipere. Tertio, quia deprehendi lumen & materiam istam subtilem duo esse ex primæis Physicæ tuæ fundamentis; idcirco volui objectionibus meis eorum

T 3

firmi-

firmitatem explorare. Si autem responsa tua mihi non penitus satisfecerint, credas velim me nihilo minori in pretio habere & doctrinam & ingenium tuum, quæ mihi aliunde satis perspecta sunt, ut illa veneratione prosequar. Apertius loqueris, cum libuerit; inurbanum esset te ad hoc adigere velle; hoc utique est publicis votis, precibus & patientia expectandum. At vero, præterquam quod optaveram doceri à te, perspexi Physicam pluribus longe difficultatibus laborare, quam Mathematicam; quod & tu cum agnoveris doctos invitasti ad objectiones tibi proponendas, hoc nimirum, ni fallor, consilio, ut experiendo melius explorares principiorum tuorum & ratiocinationum vim, atque illa adversus dubia omnia melius munires. Quemadmodum ergo ad laudabile tuum institutum, quantum in me erat, antehac contuli, pergo in eodem etiam nunc proposito, tuisque responsis, ut per literas tuas optare te testatus es, nonnulla repono.

Atque ut paucis agam, misso omni præmio, imo & tuis ad tres meas primi ordinis objectiones responsionibus, initium faciam à responsione tua ad quartam.

Ad artic. 4. *Præterquam quod, &c.*

Repl. Vocabulum *æthio* proprie significare propensionem ad motum, vix quemquam reperias, qui concedat: sed quod propensio ad motum sit motus actualis, (in hoc enim erat argumenti mei robur) certe concessurus est nemo; etenim differunt ut potentia & actus.

Ad art. 5. *Cum dicitur aliquid scripsisse ut doctus, &c.*

Repl. Difficultates Physicæ vix possunt solvi comparisonibus, quibus semper inest aliquid vel dissimilitudinis vel ambiguitatis, vel obscurum per obscurius. Cum dicitur quispiam hunc vel illum locum in comitiis obtinere (*comme*) quatenus Baro hujus vel illius loci, ibi vocabulum (*comme*) significat quatenus, & proinde supponit illum esse Baronem: verum cum de præfecto quopiam dicitur, illum esse in præfectura sua (*comme*) veluti Regem, tum vocabulum *comme* non significat illum esse Regem. pag. autem tua 250. vocabulum istud hoc sensu potius sumetur quam illo.

Ad art. 6. *Lalumiere, hoc est, lux, &c.*

Repl. Esto, sit lux secundum tuum responsum motus in corporibus lucidis, lumen vero motus in corporibus pellucidis, & lux prior quam lumen, quemadmodum causa effectu suo prior est. Sed tamen ne voce motus abutamur, & homonymiam faciamus, admittenda sunt in omni motu, quatuor; nempe mobile, motor, motus, & vis per motum acquisita,

quisita, postrema scilicet omnium, quæque aliud esse nequit, quam lux in corporibus lucidis: unde sequitur illam trium priorum nullam esse; itaque etiam fateris non asserere te absolute quod illa sit ipse motus; adeo ut objectio mea obtineat; qua contendebar essentiam luminis non consistere in motu.

Ad art. 7. *Sed potest transmitti, &c.*

Replie. Hoc concedo, sed non absque locali mobilis alicujus motu; & hoc quidem in responsione tua non negas, & tum pag. 272. Meteorum in tua ad objectiones meas responsione num. 10 & 12. fateris corpora lucida impellere materiam subtilem secundum lineam rectam, quod certe absque locali materię hujus motu per lineam ad oculos nostros rectam fieri nequit, ut ego contendebar. Caterum non video in autographo meo dixisse me, mobile quod est in corporibus lucidis aliud non esse secundum te, quam materiam subtilem; expecto ut hoc nos doceas.

Ad 8 & 9. art.

Replie. Expectabimus ergo patienter duarum harum objectionum solutionem, usquedum publici juris feceris ea quæ tibi etiam nunc reserves.

Ad art. 10. *Quodlibet enim corpus, &c.*

Replie. Per me licet tribuas materię subtili quot libuerit motus, modo probaveris illam esse: postea vero causas & effectus singulorum ejus motuum assigna.

Ad art. 11. *Fateor quidem posse materiam, &c.*

Replie. Hic rem dicis, quam nescio qua ratione sis probaturus, quandoquid id volueris aggredi. Si enim corpus aliquod dicitur lucidum ob hoc unum (quod notandum) quod materię subtili impertiat motum illum sive actionem, quæ ad efficiendum in nobis luminis sensum requiritur; duo hinc sequentur quæ videntur cum ratione è diametro pugnare. Prius quod luminis sensus corporibus lucidis prior erit; alterum, quod nulla forent in mundo lucida corpora, si nullum esset animal, quod lumen videret aut sentiret.


Ad art. 12. *Vbi vocabulum (tantum) redundat, &c.*

Resp. Non sine causa addidi vocem (*tantum*), siquidem non memoras nisi duos materię subtilis motus, alterum in gyrum, alterum per rectam lineam; si quos vero alios illi tribuas, tuum erit illos probare una cum eorum causis & effectibus. Porro assigna illi quot libuerit motus; sed quæritur utrum hos quos simul habeat, nempe unum à natura sua

sua quaquaversum, alterum rectum à corporibus lucidis; hic enim erat objectionis meæ scopus, ad quem non respondes.

Ad art. 13. *In eo quem citus loco, neutiquam loquor, &c.*

Replie. Verba tua te apud quosvis judices damnabunt. Nam Meteor. pag. 256. loquens de materiæ subtilis globulis, dicis, *deprehendi hosce globulos variis modis gyryari posse, &c.* ubi nimirum motum illis tribuis circular-



rem & rectilineum. Atque ut mentem tuam melius declares pag. 257. neutiquam intermisso sermone de materiæ subtilis globulis, ais, *hoc ut melius intelligatur, cogita globulum 1234, impelli, &c.* idque nulla facta mentione aut ibi, aut uspiam alibi, globulorum ligneorum, aut ex alia quavis materia. Adde quod supervacaneum foret supponere, figuræ tuæ globulos ligneos esse ad explicandos materiæ subtilis globulorum motus; cum pos-

sint nihilo secius explicari, supposito quod schematis globi sint ipsius materiæ subtilis globuli.

Post replicationem meam ad prioris ordinis objectiones, in quo continentur difficultates quibus videtur doctrina tua laborare, propter contrarietates quæ illi inesse videntur, venio jam ad secundum ordinem, qui meas objectiones complectitur.

Ad 1. art. *Materiam enim quoad spectat, &c.*

Replie. Cum Dioptrices tuæ pag. 4. dicis, *lucem aliud non esse in corporibus lucidis, quam quandam motum, &c.* pag. vero 122. *lumen aliud non esse in corporibus pellucidis, quam actionem, &c.* debuisti veras lucis & luminis definitiones tradere; aut vero lux & lumen aliud quid erant, quam id quod supradictis pag. dixisti, atque ita tu te contradictione implicares. Jam autem si dicas non fuisse tibi animum, ullam eorum definitionem tradere, ergo non vere dixisti id quod sunt; siquidem hoc sola definitio potest explicare; quare lux & lumen aliud quid sunt, quam quod dixisti.

Deinde quod ad formam, &c.

Antecedens illud, quod tu non vides, valde clarum est in verbis meis,
his

his nempe, *cujus ille est causa efficiens*. Cum enim nequeat motus ullus esse absque motore aliquo, qui sit causa ejus efficiens; & cum motor secundum te sit Sol; ex hoc antecedente concludo Solem esse priorem illo motu; quandoquidem omnis causa efficiens actione sua, sive motione prior est: idque tandem concedere necesse habes. Sed solum ais quod, *quemadmodum homo ratione sua prior est*, &c. Ad quod replico quod, si rationem sumas pro parte hominis essentiali, & quæ essentialiam hominis constituat, certum est hominem non esse ratione sua priorem: sed si rationem sumas pro actione sive usu rationis in homine, utique homo est ratione sua prior; atque hoc sensu ratio non facit hominem rationalem, sed supponit. Atque adeo, ut maneat comparatio tua, si lux aliud non sit quam actio Solis; ergo vel Sol natura sua non habet lucem, vel lux ejus non est formaliter actio Solis.

Sed ut inter nos conveniat, &c. Quanquam hic videaris larvam paululum detrahare velle, fateor tamen me vix posse te adhuc agnoscere. Convenit enim inter nos inesse Soli lucem; nec possumus nisi in ejus definitione dissentire, sive in recte explicanda lucis essentia seu natura; & tamen dicis te neque definivisse, imo nec ullo pacto locutum fuisse de ista, nescis quare, quam ego lucem fortasse appello, & quam Soli inesse suppono præter motum sive actionem ejus. Sed respondeo non supponere me aliam lucem in Sole quam eam quæ illi inest; & opinor te idem facere: Itaque semper recidendum erit in priamam & præcipuam quæstionem, nempe, quid sit lux; & quandoquidem ais te neque illam definivisse, neque definire voluisse; ergo cum dixisti *lucem & lumen in corporibus lucidis & pellucidis aliud non esse quam*, &c. non revera dixisti id quod sunt. Neque vero ego puto posse illa definiri per vocabula actionis sive motus, tam propter rationes supra allatas, quam quia lumen, licet non sit ens magis reale quam actio & motus, tamen est ens magis actuale & absolutum; nam actio & motus dicuntur potentiale quid & relativum, non vero lumen, quemadmodum jam dixi. Denique Sol non agit per essentialiam suam: hoc enim Deo uni competit; ergo per qualitatem aliquam sive facultatem; & proinde cum Sol illuminet, quod quidem est actio; ergo ille hoc præstat per facultatem illuminandi, quæ aliud non est, quam lux ejus: ergo lux non est ipsa actio, sed potentia sive facultas agendi, & proinde actione prior est. Hic autem figo pedem, nec ulterius progredior ut te rogem, qualis sit hæc actio sive motus Solis, quem lucem appellas; sitne rectus an circularis ille motus, &c. item qua ratione à Sole producat, qui porro casus tibi reservati sunt: sed probe vides quasnam difficultates propulsandas sis habiturus.

Ad art. 2. *Nego consequentiam quemadmodum in art. superiore, &c.*

Replie. Probatur consequentia quemadmodum in articulo superiore.

Ad art. 3. *Necessario sequeretur, &c.*

Replie. Admitto divisionem tuam de la lumiere, in lucem pro corporibus lucidis, & lumen pro pellucidis, atque etiam id quod concedis, lucem esse causam luminis. Verum cum ad evertendum id quod de scintilla ignea tibi objicio, comparationibus tantum respondes, jam te monui raro idoneas esse illas difficultati cuiquam solvendæ; & revera quemadmodum tam guttæ vini, quæ in imo lacu sunt, quam illæ quæ in summo, omnes tendunt ad egrediendum per foramen, suæque sponte ad illud gravitate sua eodem instanti feruntur absque ullo motore



externo; ita etiam gutta illa aquæ superad-dita in tubo ABC, æquilibrium tantum prioris aquæ tollit; atque hoc pacto gravitas aggregati aquæ adjuncta à fluiditate totam hanc aquam movet, ut eam in æquilibrium restituat; & proinde motus ab interno principio & propensione mobilis semper proficiscitur, non vero à motore, aut efficiente causa externa. Sed vero tota materia subtilis diffusa per sphaeram quinquaginta leucarum semidiametri nullum habet ex se motum versus oculum, debetque ab externa aliqua causa moveri, nempe à scintillæ lumine. Magnum est ergo in hisce comparationibus discrimen; unde semper concludam, quod cum materia subtilis non sit dura instar baculi, neque proclivis ad se movendum dextrorsum potius quam sinistrorsum, non sequatur quod materia ea, quæ Soli proxima est, per lineam rectam localiter mota, remotissima etiam eodem modo, eodemque instanti moveri debeat. Quod autem dicis

axioma hoc esse sensuum nostrorum præoccupatione tantum innixum, quod nempe omnis materia habeat resistantiam ad motum localem. Respondeo, de aëre & aqua, de quibus erat sermo, haud minus notum esse quod resistantiam aliquam habeant, quam pisces natare & aves volare; hoc enim absque resistantia illa facere non possent. Quod vero attinet

attinet ad materiam tuam subtilem, quam aëre longe fluidiorem ponis, & absque resistentia ad motum localem, postquam probaveris illam esse, & quidem posse illam moveri, aëre qui illam continet immoto manente, in sententiam tum concedam, quicquid possit in contrarium objici; & si mobile nullam habeat resistentiam ad motum, utique vis nulla in motore requiritur.

Ad art. 4. *Nihil video, &c.*

Repl. Neque etiam video quicquam hic inter nos controversi, nisi quod contendam lucem esse qualitatem Solis, tu vero motum; ad quod supra respondi.

Ad art. 5. *Nihil hic invenio præter homonymiam, &c.*

Repl. Revera facis pelluciditatis naturam admodum æquivocam, statuendo illam, nunc in eo quod corpus aliquod poros habeat, nunc vero in eo quod pori isti sint materia aliqua referti. Verum cum dicis aërem esse pellucidum quatenus poros habet; poros autem habere, in aëre est tantum accidens; ergo aër non erit nisi per accidens pellucidus, non vero per se; ergo ex se opacus erit: omne enim corpus ex se est vel lucidum, vel pellucidum, vel opacum; quandoquidem vero aër non est ex se lucidus aut pellucidus, ergo erit opacus. Atque idem præterea ita probatur; quælibet partium aëris substantialium, earum, inquam, quæ poros terminant, non habet alios iterum poros; alioquin aër totus esset ex poris absque substantia; ergo omnium ejus partium (quæ certe totam aëris substantiam componunt) nulla erit natura sua pellucida; itaque opaca. Pari ratione, si materia subtilis ex te est pellucida, quatenus est in poris aëris; quandoquidem hoc est ipsi tantum accidens locale; ergo non erit ex se pellucida; erit ergo opaca, ut supra. Quoniam ergo aër natura sua est opacus, & pori ejus materia etiam opaca referti sunt; totum compositum non potest esse nisi opacum; & proinde incapax transmittendi luminis lucidorum corporum.

Neque vero uspiam dico, &c.

Dixi materiam subtilem debere in universi ordine propriam sphaeram habere, non secus quam aërem aut aquam; quæ licet se in terræ poros insinuent, tamen propriam suam sphaeram supra terram habent. Ad quod certe non respondes, satisque habes materiam hanc in reliquorum corporum poris ponere; ne nimirum illa tibi forte lumen præripiat, si propriam illi sphaeram tribueres, ubi pura esset: etenim, ut supra observavi, illa secundum te non est pellucida, nisi quatenus existit in poris aëris, aquæ, &c.

Ad art. 6. *Contradictiones semper fingis, &c.*

Replie. Respondi supra ad id quod de lignis globulis dicis; neque solus ero qui eam, quam attuli, contradictionem agnoscam. Video autem ex tuo responso materiam subtilem à Sole ad oculum usque nostrum continuari, ejusque actionem sive motum à Sole incipere; & quanquam hic motus nequeat fieri in instanti, posse tamen in instanti transmitti. Ad quod respondeo me id concessurum, si quidem materia ista Soli & oculo interjecta esset instar baculi dura & continua: sed secundum te non est dura, imo neque continua, aut etiam in omnibus suis partibus continua; quanquam enim globuli 123, contigui sint, tamen 425, contigui non sunt: & proinde si radius tendit à 4 in 5, motus erit interruptus, aut saltem non erit rectilineus, sed per contiguos globulos continuatus. Si autem quilibet globulus contiguum sibi globulum moveat, talisque motus ad luminis sensum efficiendum sufficiat, poterit etiam concubia nocte videri Sol: præsertim cum supponas materiam subtilem esse absque omni resistantia ad motum.



Ad art. 7. *Id quod hic objicis, &c.*

Replie. Tam multas hic profers novas difficultates, saltem menti meæ quam fundamenta tua fugiunt, ut frustra iis respondendo essem immoraturus. Quod tamen spectat vinum & uvas in lacu, instabo semper ut supra, inesse vino naturalem propensionem ad descendendum versus foramina, etiamsi ab externa causa nulla moveantur; subtilem vero materiam nullum ex se rectilineum motum habere dextrorsum potius quam sinistrorsum, & necesse esse ut illum accipiat à potiore causa. Tu quidem asseris scintillæ lumen in motu isto recto efficiendo plus pollere magno vento; ego vero contrarium teneo, quandoquidem statuis materię motum realem esse & localem, dum dicis materiam subtilem intrare ab aëre in vitrum, atque ab eo egredi.

Ad art. 8. *Causa que impedit, &c.*

Replie. Pace tua non respondes difficultati meæ, quæ ad vitri impuritatem nequiquam spectat, sed solum ad ejus poros. Dico enim materiam subtilem offendere eosdem poros in superficie vitri linea una crassi, quos in eadem superficie offenderet, si idem istud vitrum esset decem pedes crassum; quandoquidem vero secundum te pori ejus recti sunt & glabri; & materia subtilis absque impedimento in illis fluit; tantundem materię subtilis per vitrum decem pedes crassum transmitti debet, quantum


tum per idem vitrum linea una crassum; ac proinde etiam tantundem luminis, quod tamen est contra experientiam.

Verum objectionum tuarum iudicio meo potissima, &c.

Replie. Non video quod responsum tuum hic satisfaciatur, idque duabus de causis; primo, quia pilæ aut poma in rete coniecta (hæc enim est tua comparatio) spatia relinquunt inter se vacua, eaque maxima: & præterea arena, quam super istis pomis injectam supponis, cum sit tenuissima, & gravis, spatia illa facile pertransit, tenuitate & gravitate sua deorsum labens ex spatio uno in aliud absque impedimento. Sed si arena hæc super modio milii effundatur, vix semisse digiti unius in illud penetraret; quanquam certe una ex istis arenulis non sit una centesima grani unius milii. Secundo, quia etiam si vocabulum *rectus* non sumatur magis ex rigore, quam illud usurpasti pag. 8. lin. 2. nondum tamen res quadrabit: dicis enim paulo infra pagina eadem lin. 17. *Cæterum hi radii semper concipi debent exacte recti, cum transiunt per unum tantum corpus pellucidum, quod ubivis uniforme sit; verum cum radii isti alia qualibet corpora offendunt, non raro fit ut deflectantur.* Ad quod dico posse nos vitrum sive crystallum tam purum, ut sit ubivis uniforme, supponere, aut vero aliquam ætheris partem, aut aëris purissimam. Atque ex hac hypothese, quæ respui nequit, pori erunt secundum te exacte recti; atque adeo conclusio mea valebit, nempe, non posse illos esse undiquaque rectos, aut certe nihil solidi fore in vitro, aëre aut æthere. Itaque mihi videtur hæc unica obiectio subtilis materiæ, ejusque pororum hypothesein penitus evertere; neque porro sequens pro illa magis facit.

Ad art. 9. *Causa cur, &c.*

Replie. Quanquam per variorum tuborum foramina in globo A B C, videaris objectionem meam effugere posse; quia nempe materia, quæ est in centro E, liquida est & in partes divisibilis: nihilominus pars est illius aliqua, quæ respectu trium tuborum A C, B D, F G, & trium intro flantium, quos per foramina A B F, æqua vi flare suppono, in tanta æqualitate constituta est, ut nulla sit ratio cur ulterius dividatur, aut cur per singulos tubos æqualiter impulsa moveatur versus D, potius quam versus G, aut versus C. Sed ut difficultas clarius exponatur, supponamus unum tantum tubum A C, duosque æqualiter flantes, unum in A,



V. 3;

alte-

alterum in C; certum est materiam centralem E, loco suo non iri motum, aut certe illam in diversis simul locis fore. Sed tamen si A & C essent duo corpora lucida, deberet C impellere E versus A; atque idem A eodem etiam instanti deberet eundem E versus C propellere, juxta doctrinam tuam; si enim in A & C ponerentur duo felini oculi, qui quidem lucidi sunt, oculus C videret oculum A, & oculus A oculum C, idque eodem instanti; & proinde eadem materia subtilis in duas oppositas partes eodem instanti moveretur; quod tamen in responso tuo impossibile esse fateris.

Possent alias multas egregias difficultates in hoc argumentum tibi proponere, quæ cum tua materiæ subtilis hypothese vehementer pugnare videntur; sed hæc sufficiant donec lumen tuum mihi clarius appareat: alii forsitan illas tibi proponent; neque hoc ad tui instituti perfectionem & ad novæ tuæ Physices principia recte stabilienda conducere non potest. Cæterum piget me admodum temporis, quod objectionibus meis respondendo impendisti; neque illæ neque illarum auctor digni erant, qui hoc honore à tanti meriti viro honestarentur: quare ne eo amplius abutar, nolim alterum ad objectiones meas responsum exigere; non enim aliud in animo habui, quam ut victus ego tuæ de lumine doctrinæ magis elucidandæ inservirem. Si ergo decrevisti tuum ad objectiones meas responsum typis committere, per me licet, facias ut libuerit. Neque ingenium tibi deest, neque animus, quo validissimas quasque agnoscas, illasque etiam replicationibus meis munitas adoriaris: hinc si illas possis exturbare, gaudebo ante alios; quippe eam tibi victoriam exopto, quæ meæ me ignorantia victorem efficiat, & qua possim devinciri ad id confirmandum, quod in præsens voveo, mansurum me per totam vitam, &c.

Exciderat animo dicere quod putem me fortuito detexisse materiam tuam subtilem, ejusque motum per foramen & rimam fenestræ Soli oppositæ, circa quam luminosus aër veluti ebulliebat, ibique materiam quandam subtilem volitantem cernere erat: sed puto posse me effectus hujus rationem ex meis de lumine hypothesebus optimam reddere, neque hoc in aëre puro factum iri. Vale.

Datum Parisiis 12 Aug. 1638.

EPISTOLA LXII.

Responsio Cartesii ad Morini replicationem.

Consilium tuum videtur tam justum & tua urbanitas tanta, ut existimem officii mei esse ut iis, quæ proposuisti, omnibus coner pro viribus meis satisfacere.

4. Initium facis ad art. 4. responsionum mearum, ubi quidem non nego vocem *actionis* sumi pro motu; sed dico significationem ejus latius patere, atque etiam sumi pro propensione ad motum; nam e.g. si duo cæci eundem baculum tenentes, illum in se invicem tam æqualiter impellant, ut baculus iste neutiquam moveatur; & statim post illum tam æqualiter trahant, ut non magis quam antea moveatur; & sic contrarii illorum & simultanei conatus sint adeo æquales, ut baculus semper maneat immotus; certum est cæcorum horum utrumque sentire posse baculum istum, eo ipso quod sit immotus, ab altero cæco impelli aut trahi pari vi atque à seipso; id autem quod in baculo isto sentit, nempe privatio motus in hoc vel illo casu haberi potest pro diversis actionibus, quæ diversis alterius cæci conatibus illi imprimuntur. Cum enim hic baculum trahit, non eandem actionem sentit ille, ac si baculum impelleret, &c.

5. Licet vocabulum *comme* possit alio quodam sensu sumi, non videtur mihi esse cur quisquam respuat sensum quo illud explicui; neutiquam enim abhorret ab usu.

6. Mobile in corporibus lucidis, est ipsa illorum materia: motor, idem ille qui cælos movet; motus denique est actio per quam materiæ hujus partes locum mutant: quantum vero ad formam ab illo acquisitam (nisi per illam intelligas hanc loci mutationem) illa est ens Philosophicum mihi ignotum.

7. Corpus aliquod quanquam per rectam lineam non moveatur, potest tamen aliud quodpiam corpus secundum rectam lineam movere; quemadmodum videmus lapidem in funda rotatum fundæ hujus medium impellere, eademque opera extendere funiculum secundum lineas rectas, quæ à motus sui centro ad circumferentiam suam undique tendunt. Ut autem me aliquanto magis quam antea aperiā, dicam me ita concipere lucem Solis, ut Sol ipse constet ex materia quadam fluidissima, quæ circa centrum suum summa velocitate gyretur; unde fit ut undique premat materiam illam ex qua constat cælum, subtilem nempe istam

istam materiam, quæ ab astris ad oculos nostros continuata extenditur, atque ita facit ut hanc Solis pressionem, quæ vocatur lumen, sentiamus. Non equidem sum nescius posse te plurimas alias difficultates hinc deducere: sed haberem etiam parata ad eas plurima responsa, nec facturi essemus disputandi finem, donec totam Physicam meam explicassem.


8. 9. & 10. Ad probandam materiæ hujus existentiam, satis est ut ostendam inesse poros corporibus omnibus sensibilibus, aut saltem complurimis, ut cernere est in ligno, corio, charta, &c. atque hos poros, quamquam adeo angusti sint ut nequeat aer illos penetrare, non tamen debere propterea esse vacuos; unde sequitur illos subtiliori quapiam materia, quam ea ex quibus ipsa constant, repletos esse; ea nempe de qua loquor. Quantum vero ad diversos subtilis hujus materiæ motus, satis ex ipsorum corporum, quorum poros illa pervadit, motibus demonstrantur; nam cum sit fluidissima, non posset absque miraculo non moveri secundum diversos omnes illos modos, quibus ab illis impelli potest.

11. Posset pari ratione objicere iis qui dicunt, sonum nihil aliud esse extra nos quam quendam aeris tremorem aures nostras sericatem; hunc ergo soni sensum priorem esse corporibus ipsis quæ sonum edunt; nec talia in mundo corpora fore, si nullum esset animal quod sonos audiret, &c. Itaque satis est ut respondeam, corpora lucida habere in se id omne quod habere illa necesse est, ut luminis sensum in nobis efficiant, etiam antequam illum efficiant; atque hoc ipsum habitura, etiamsi nullum esset in universo animal oculatum.

12. Motus, seu potius propensio ad motum rectum, quem materiæ

fubtili tribuo, satis probatur ex hoc uno, quod luminis radii per lineam rectam extendantur; circularem autem ejus motum demonstro pag. 257. & sequentibus; cæteri denique omnes ex hoc uno sequuntur, quod sit fluidissima.

13. Mihi videntur verba mea clare ostendere pag. 258. per globulos quos aquæ immitti suppono & per aquæ hujus resistantiam rotari secundum ordinem numerorum 1 2 3 4, me in-




innuere globulos ex materia aliqua sensibili factos, non vero materiz subtilis particulas, nam ibidem pag. 258. suppono illas rotari contrario prorsus modo, dum dico *quod cum globuli Q & R, cuius moveantur quam ceteri, hoc explicat actionem radii D F, &c.* Operæ autem fuit sensibiles hosce globulos adhibere ad istam gyrationem explicandam, potius quam materiz subtilis particulas, quæ sub sensum non cadunt; ut nempe rationes meas sensuum examini subjicerem, quemadmodum mihi semper moris est.

Transco hic ad secundi ordinis articulos.

1. & 2. Fieri potest ut varias luminis descriptiones, sive explicationes tradiderim quæ veræ sint, nec tamen ullam exactam definitionem dederim in Scholæ sensu, per genus scil. & differentiam: quod quidem dico mihi non fuisse propositum, ut hac ratione vitarem supervacaneas difficultates quæ inde nasci possent, quales fere sunt sequentes. Cum enim dicis quod si lux aliud non sit quam actio Solis, ergo natura sua Sol non est luminosus; item quod lumen est ens magis actuale & absolutum, quam motus; & quod præter Deum nihil est quod agat per essentiam suam, &c. Hoc utique est difficultates in verbis formare, ubi nulla re vera sunt: non secus quam si dicerem horologium rotulis instructum nobis non indicare horas nisi acus suæ motu, ejusque qualitatem horas indicandi non esse ens actuale magis & absolutum, quam motum ejus, atque hunc motum illi inesse à natura & essentia ejus, quoniam desineret esse horologium, si non esset eo præditum, &c. Scio te dicturum horologii hujus formam esse tantum artificialem, cum contra Solis forma naturalis sit & substantialis. Sed respondeo hanc distinctionem referri tantum ad formarum haram causam, non vero ad earum naturam, aut certe substantialem hanc Solis formam, quatenus differt à qualitatibus, quæ in ejus materia reperiuntur, esse rursus ens aliquod Philosophicum mihi ignotum.

2. Verum est comparationes quibus in Scholâ uti solent; dum intellectualia



lectualia explicant per corporea; substantias per accidentia, aut saltem qualitatem aliquam per aliam alterius speciei, haud multum edocere: at vero quia in iis quibus utor, non comparo nisi motus quosdam cum aliis motibus. aut figuras cum aliis figuris, &c. hoc est, res quæ propter tenuitatem suam sub sensus cadere nequeunt, cum aliis quæ sub illos cadunt, quæque alioquin non magis ab illis discrepant, quam major circulus à parvo; contendo rationem aliam nullam ab humano ingenio excogitari posse, qua quæstionum Physicarum veritas melius declaretur; adeo ut cum de natura asseritur quidpiam, quod nulla ejusmodi comparatione queat explicari, putem me demonstrative scire hoc falsum esse. Quantum vero ad comparationem tubi replicati, qua hic usus sum, contendo illam clarissime demonstrare minimam aliquam vim sufficere ad movendam maximam materiam fluidissimæ quantitatem: etenim aquæ in tubo hoc conclusæ gravitas ad illam movendam neutiquam confert, cum non sit ex una parte gravior quam ex alia. Atque ut hoc nemini du-



bium sit, supponamus tubum istum A B C circa terram D incurvatum esse, ita ut partium ejus nulla sit alia altior, excepta solummodo parte aliqua in extremis, tanta scilicet quanta opus est ad tantulam aquæ capiendum; tum enim infusa in extremorum horum alterutro gutti unica sufficiet omni isti aquæ, quæ in tubo est, movendæ, quanquam hæc aqua non magis propendeat ad movendum se in partem unam quam in aliam, sitque in æque magna quantitate ac materia subtilis, quæ à scintilla qua-

piam movetur. Cæterum quod pisces nateant aut aves volent; id non probat materiam habere ex se resistentiam ad motum localem, sed solum partes aquæ & aeris sibi mutuo aliquo pacto coherere, nec posse illas absque vi aliqua satis notabili citissime separari.

4. & 5. Parum refert utrum quis cogitet, aerem esse natura sua pellucidum, an vero per accidens; atque hic dicam audivisse me à viro fide digno, se vidisse aerem in tubo vitreo adeo compressum & condensatum, ut opacus factus esset. Quantum ad materiam subtilem, cum dico pelluciditatem illi tribui, quatenus in aeris aliorumque ejusmodi corporum

poris

poris existit, haud tamen dico non posse etiam pelluciditatem illi tribui cum pura est: contra enim liquet illam eo pellucidiorē esse debere, quo puriorem; & mihi videris hic argumentari eodem prorsus modo, ac si ex eo quod dixissem, magnos esse Regi census quatenus ille est Armorica Dux, hanc inde consequentiam deduceres; ergo, si non esset Dux Armorica, nullos ipsi census fore. Deinde quia dicis me nullam subtili huic materiei peculiarem sphaeram assignasse, forte ne illa nobis lumen eripiat; rogo te utrum, postquam dixi illam ab astris usque ad nos continuari, possit alius quispiam locus illi assignari, in quo hoc timendum foret, etiamsi illa esset opacum corpus.

6. Satis explicui ab initio Dioptrices meae pag. 6. qua ratione fluidum aliquod corpus possit actionem in instanti transmittere; non minus quam corpus aliquod baculi instar durum. Quantum vero ad tuam de globulis sibi mutuo non contiguis instantiam, dico satis esse ut illi se mutuo contingant aliorum nonnullorum ope, quemadmodum in figura tua globuli 4 & 2 se mutuo contingunt ope globuli 1 alteriusque illi oppositi. Quod ut extra dubium maneat, nempe hoc sufficere actioni alicui transmittendae, & quidem secundum rectam lineam; vide globulos hos tubo conclusos, ubi compresso primo illorum 1 premuntur eadem opera sequentes 2 & 3, ope scilicet collateralium 4, 5, & 6, 7. Quinimo actio illa qua comprimuntur, extenditur per rectam lineam à puncto 1. ad punctum 8. licet globuli hi non sint secundum rectam lineam dispositi. Quando autem in corpore aliquo non sunt hoc pacto contigui, nequit corpus illud esse pellucidum; atque ex hoc uno intelligi potest cur plurima opaca sint. Ceterum globuli hi hoc modo contigui non transmittunt lumen nisi per lineas rectas, aut rectis æquivalentes, unde fit ut Sol nequeat videri noctu.

7. Hic dicis me dare locum multis novis difficultatibus; verum quia illarum nullam attingis, locum mihi non dedisti illis satisfaciendi.

8. Si minus satisfeci difficultati tuæ, dum dixi solam vitri impuritatem impedire quo minus



æque pellucidum sit in magna atque in minori crassitie; verbum tantummodo superaddendum fuerat, nempe, me negare vitrum, si omni omnino impuritate careret, fore minus pellucidum, etiamsi crassities ejus à Sole usque ad nos extenderetur. Miror autem quod dicas id esse contra experientiam; certe enim nunquam vitrum ullum repertum est omni prorsus impuritate carens. Miror etiam quod dicis me non satisfacisse alteri parti hujus articuli; quia, inquis, spatia, quæ inter pilas sive poma relinquuntur, maxima sunt, si cum arenulis comparentur; &c. cur enim nolis æque magnam inæqualitatem esse posse inter corporum terrestrium poros, & materiæ subtilis partes? Quod ad me attinet, censeo longe majorem esse; non video autem cur illud alleges, cum nullam rationem adferas, ut contrarium probabilius efficias. Neque etiam video quicquam à me omissum fuisse cum citarem pag. 8. lin. 2. ubi dixi vini partes exacte moveri non posse per lineam rectam; deque materiæ subtilis partibus idem asserui; & distinxì radium materialiter sumptum, qui nunquam fere exacte rectus esse potest, à radio formaliter sumpto, qui nunquam potest non esse rectus. Sed pro lin. 2. sumpsi lineam 17. eaque verba citas in quibus loquor tantum de radiis formalibus, quos dico concipiendos esse exacte rectos. Cæterum ad hoc ut corpus aliquod pellucidum sit, quantum fieri potest, ubique æqualiter pellucidum, non necesse est ut supponantur partes ejus aliter dispositæ; quam poma illa sive pilæ de quibus sermonem feceram, atque ita mihi videbar objectioni tuæ prorsus satisfacisse.

9. Instantia tua de duobus hominibus in eundem tubum stantibus sibi mutuo in oppositum, aut de duobus oculis se mutuo intuentibus, mihi videtur satis explicata ex eo quod in initio scripti hujus dixi de baculo à duobus cæcis impulsio; debes enim, si placet, meminisse me pluribus in locis inculcasse actionem sive propensionem ad motum absque motu sufficere ad hoc ut lumen sentiamus.

Verum id quod ad epistolæ tuæ calcem video, nempe detexisse te, ut putas, id quod pro materia subtili habeo, cum videres volitantem in aëre conspicuum quendam pulverem per rimam fenestræ Soli oppositæ, ostendit mihi cogitationes tuas à meis in hoc valde diversas esse: quippe partes pulveris hujus vel minimæ longe crassiores sunt aëris puri partibus, aëris vero puri partes vel minimæ, sunt crassiores longè iis quas materiæ subtili tribuo; quam nimirum concipio instar liquoris ejusdem continui spatia illa omnia replentis, quæ à corporibus crassioribus non occupantur, non vero tanquam ex discretis parti-

bus

bis constantem, quemadmodum hunc pulverem. Hæc sunt quæ novissimis tuis reponenda esse existimavi, ut testarer quantum tibi satisfacere cupiam, &c.

EPISTOLA LXIII.

Replicatio Morini ad secundas Cartesii
Responsiones

MInime expectabam ut me altero responso cohonestares, tum quia conatus fueram te ab hoc labore dimovere, tum quia video non posse me lumen tuum perspicere, donec illud fundamentis suis omnibus probe sussultum nobis exposueris. Et quanquam nunc mentem tuam aperias paulo magis quam ante, declarando qua ratione lucem Solis concipias; nihilominus, uti tu ipse dicis, multæ aliæ difficultates ab iis quas hactenus proposui, diversæ ex hoc deduci possunt, ad quas scribis esse tibi expedita responsa, sed quæ dari nequeunt nisi tota tua Physica explicetur. Nolim ergo ante illud tempus ingenium aut meum aut tuum irritis objectionibus fatigare. Faciam tamen adhuc hac vice quasdam in tuum ad superiores meas responsum animadversiones ad maiorem tuam cautelam.

4. Quanquam motus actualis & propensio ad motum differant ut potentia & actus, contendis tamen vocabulum *actio* sumi non solum pro motu actuali, sed etiam sensu latiori significare propensionem ad motum. Certum autem est quod quemadmodum potentia nequit eo usque extendi, ut sit actus, (siquidem desineret esse potentia) ita etiam actus eo usque extendi nequeat, seu potius coarctari, ut sit sui ipsius potentia, unum enim est cum altero *actum*. Quantum vero ad comparationem quam de duobus cæcis, baculum æquali vi trahentibus & impellentibus affers, fateor privationem illam motus in hoc vel illo casu dici posse, ut ais, diversas actiones illi impressas varietatibus eorum horum conatibus; sed tamen inde non concludis motum esse propensionem ad motum, quod quidem erat rei nodus, nec porro video id posse concludi.

6. Si motus in corporibus lucidis sit actio per quam subtilis materia in illis diffusæ partes locum mutant, ut dicis: ergo lux in corporibus lucidis (iste nimirum motus) erit actio per quam subtilis materia in illis diffusæ partes locum mutant, nec quicquam aliud; quod

certe multam disputandi materiam suppeditare poterit, nisi in Physica tua ei provideris.

8. 9. 10. Si ad probandam materię tuę subtilis existentiam aliud nulum argumentum haberes, quam illud quod affers; *nempe ligni, corii, chartę, &c. poros adeo angustos esse ut nequeat aer illos penetrare, nec tamen vacuos esse, unde sequitur poros istos materia aliqua repleri, quę sit subtilior, quàm ea ex qua corpora illa constant, quadam nempe materia subtili*; mihi videor clarissime videre illam esse pessimo fundamento innixam. Etenim si aqua corpora hæc omnia pervadit, quemadmodum liquet de ligno postquam aquę diu innatavit, quodque ex aqua recens eductum, est totum intus humidum, ita ut etiam sal ejus ab aqua, quę illud penetravit, pensus dissolutus sit; unde sit ut defectu salis cineres ejus inepti sint conficiendis lixivii; quanto facilius ab aëre penetrabuntur, qui longe subtilior est aqua, & fluidior? & quam clare pater hinc subtilem tuam materiam ad implendos reliquorum corporum poros esse supervacaneam?

Articuli secundi ordinis.

1. & 2. Cum in priori tuo responso dixisses non fuisse tibi animum tradere ullam definitionem luminis, teque satis habuisse veras quasdam illius descriptiones & explicationes tradidisse, putabam te nolle adhuc tuam luminis definitionem vulgare, teque illam in Physicam tuam rejicere. Sed quando jam dicis non fuisse tibi propositum exactam ejus definitionem per genus & differentiam tradere, ut vitares difficultates supervacaneas quę exinde nasci possunt; id utique erit apud multos mali ominis; ergo neque etiam tradere debueras descriptiones tuas sive explicationes, quę sine dubio plures difficultates creaturę sunt, quàm exacta definitio quę clare dicit id quod est res definita. Id certe ex objectionibus meis colligere potes, quibus præstantiora ingenia multa fortasse adjicient; & revera hoc tuum responsum neutiquam solvit contradictionem quam tibi objeci, quinimo illam confirmat.

3. Miror te tanti facere comparationes ad res Physicas probandas, ut dicas cum aliquid de natura asseritur, quod comparatione nulla explicari potest, putare te demonstrative scire, rem ejusmodi esse falsam. Certe enim tam multi effectus reperiri possunt, quorum nulli sunt similes, ut ex. gr. magnetici; aut si locus hic esset dicendi id quod de influentiis cælestibus scio, utique proferrem res longe majori admiratione dignas, quippe quę in suo agendi modo nullam præter Deum ipsum comparationem admittant. Non equidem nego posse fere semper comparationes repe-


repe-

reperiti; quibus Physicæ res utcunque explicuntur, sed requiritur ut ita bene explicuntur, ut de re quæ tractatur scientia clara efficiatur. At vero quantum ad illas quibus mecum hætenus usus es, haud video eas effectum hunc aut in me aut in quovis alio fortissimo & ea quam hic fumis de tubo aqua pleno, & circa terram circulariter flexo, meam de scintilla ignea difficultatem nequaquam solvit; aut certe non magis quam prior tubus; nam loco extremorum A & C, quæ facis admodum parva, fac eorum unum longe majus, ut res sensibilibus evadat; certum est quod si illud aqua repleveris, obstruato altero, ne aqua effluat, duæ istæ aquæ, non amplius constituent nisi unum corpus, unamque gravitatem; & si extremum illud aperias quod erat obstruatum, corpus hoc non potest in hoc statu amplius manere, nempe partim in tubo, partim in majori extremo, cum non sit in suo circa terræ centrum situ & æquilibrio: quare totum hoc corpus interna sua gravitate & fluiditate movebitur, ut se restituat in æquilibrio ad quod instinctu quodam tendit; incipietque motus in duobus simul aquarum extremis: idem autem plane accidit cum supponuntur tantum duò parva tubi extrema A & C; vides ergo tubum hunc non magis quam priorem solvere difficultatem meam. Ad quod addo scintillam, quæ materiam subtilem ambientem movet, non fieri eum illa unum & idem corpus, & præterea manere immotum dum revera movet extra se subtilem hanc materiam; at vero in comparatione tubi contrarium prorsus cernitur.

4. & 5. Nescio quis sit sententiam tuam amplexurus, parum refert utrum quis cogitet aërem esse natura sua pellucidum, an vero per accidens; sed certissimus sum hoc cum recta luminis naturæ cognitione non bene convenire. Exinde autem quod à te fuerat dictum in superiore tuo responso, materiam subtilem esse pellucidam, quatenus existit in poris aëris; concludebam quod cum hoc esset illi tantum accidens locale, ergo ex se non esset pellucida: qua in re dicis me eodem prorsus modo concludere, ac si ex eo quod dixisses esse Regi magnos census, quatenus ille est Dux Armoricæ, hanc consequentiam ducerem, ergo nullos illum habiturum census, si non esset Dux Armoricæ. At vero respondeo censum Regis esse accidens externum & divisibile, quod ex pluribus regni locis percipitur: pelluciditatem vero esse materiam subtili connatam, quemadmodum hic concedis, ac proinde à nullo loco aut re externa proficisci, quod tamen in priore tuo responso dixeras: quare comparatio admodum claudicat, uno & sophisma continet partem ad totum; unde sequitur consequentiam esse falsam. Verum si dixif-

dixissem Ludovicum XIII, esse Principem Armoricæ, quatenus & ipse est Galliæ Rex, tum sequeretur quod si ille non esset Galliæ Rex, neque etiam Armoricæ Princeps esset: hic enim vox *entant que* (quatenus) infert dependentiam quandam essentialē sive necessariam quæ ipsi propria est cum recte adhibetur. Sed ut redeam ad subtilem nostram materiam, quandoquidem nunc concedis illam natura sua & cum pura est, pellucidam esse; & præterea illam esse ex illorum corporum numero, quæ nos ambiunt, quandoquidem secundum te ab astris usque ad oculos nostros continuatur; concludo ergo esse in illa poros sive intervalla quæ alia quapiam subtiliori materia repleta esse debeant, & sic in infinitum. Conclusio autem fundatur in iis quæ doces pag. 23. 38. & 122. Dioptr. & 159. Meteor. quas si velis consulere, videbis me recte concludere.

6. Hic demonstrandi gratia concipis materiæ tuæ subtilis globulos in tubum ABCD; verum in aëre non ita coarctati sunt & coacti, ut in



tubo: nihilominus sufficere tubus tuus instituto meo. Supponamus BA esse Horizontem, Solemque in E, sub Horizonte pellere globulum 1; deinde per centra globulorum 1 & 4, atque etiam per centra globulorum 5, 2, 6, ducantur rectæ lineæ quæ supra Horizontem porrigantur; certum est globulum 1 moveri non posse velius 8 per lineam rectam, quin moveat globulum 4, atque hic moveri nequit, quin moveat etiam sibi contiguum & proxime sequentem; & sic deinceps per totam lineam quæ supra Horizontem transit, idemque dicitur de globulis 5, 2, 6. Ergo per rectas istas lineas, quæ supra Horizontem transeunt, poterit secundum tuam doctrinam Sol sub Horizonte latens videri etiam concubia nocte; siquidem omnes harumce linearum globuli à Sole ad oculum usque nostrum moventur, atque hoc ad luminis sensum in nobis efficiendum satis est; hic ergo necesse habebis reformare descriptiones, quas de illis tradidisti.

8. Quandoquidem opacitas proficiscitur à materia; certum est quod,

quan-

quantumcunque pura concipiatur, ubi plus materiæ erit, cæteris paribus, ibi etiam major erit densitas & opacitas. Itaque sume aliquid aquæ & aëris perfecte purificati; aqua opacior erit aëre ejusdem crassitie, & duplicata crassitie aquæ, videbitur illa insuper adhuc opacior respectu ejusdem aëris: ergo aqua duplæ crassitie opacior est quam simplæ. Nec fecus erit de vitro; nam dupla crassities sive aquæ sive vitri eundem effectum fortietur, atque eadem illa dupla reducta ad simplam per condensationem; verum densitas esset dupla, ergo etiam opacitas dupla foret. Hujus autem rei experimentum cernitur in essentiis, oleis, & spiritibus per Chymiam purificatis ad eum perfectionis gradum, qui nullas plane fæces aut sordes in illis relinquat. Cæterum non liquet lineas 2. & 17. pag. 8. Dioptrices tuæ loqui de diversis radiis, sed tantum de radio materialiter sumpto; formalis enim cum imaginarius tantum sit, non esset idoneus difficultati nostræ expediendæ, si quidem occurru nullo deflecti potest, cum semper concipiatur rectus, quicquid occurrat impedimenti.


9. Proposueram tibi oculos duos lucidos, felinorum instar, semutuo intuentes per duo extrema tubi, objeceramque materiam subtilem in aëre tubi diffusam mansuram immotam, cum non possit ab illorum oculorum lucidorum uno, potius quam ab altero moveri, ac proinde fore ut oculus unus alium videre nequeat, cum visio non fiat nisi per motum materiæ istius subtilis versus oculum qui videt: hic autem respondes propensionem materiæ subtilis ad motum sufficere absque motu ut lumen sentiamus. At vero per propensionem non puto te intelligere simplicem aptitudinem ad motum: hæc enim aptitudo in materia perpetua est & indeterminata; verum intelligis impressionem factam a motore lucido & in materia subtili acceptam, quæ quidem impressio inclinat materiam, illamque in hanc potius quam in illam partem determinat; acute quidem, cum quilibet oculus determinet materiam subtilem versus oppositum. Sed respondeo primo, vel solam materiæ subtilis propensionem sufficere ad efficiendum luminis sensum, atque ita motum fore supervacaneum; aut vero requiri præterea motum, atque ita propensionem solam non fore satis. Secundo, lumen secundum te non posset videri in vacuo, in quo neque materia subtilis ulla est, nec aliud quicquam; quod quidem vacuum, si non datur in natura, at certe concipi potest, etiam supra primum cælum; hoc autem, si velim, haud ægre probaverim, nempe *dato oculo & corpore luminoso in congrua distantia, non potest non videri lux, etiam in vacuo.* Denique velim credas me non adeo male de ingenio tuo sensisse, ut putarim te sumpsisse pulverem quandam sive atomos per radios Solis in clauso

conclavi conspicuos, pro materia illa subtili de qua agis; & me quoque illam non concipere talem, uti putas: conceptus meus sublimior est; scis Atmosphæram sive inferiorem regionem aëris, quæ ad altitudinem crepusculi definit, densiorem esse superiore, tum propter spiritus & vapores qui ex globo terrestri assurgunt, & in hac regione condensantur, tum quia cujuscunque elementi crassiores partes facis instar semper subsidunt; unde fit ut hæc regio faciat aliorum refractiones, Solisque lumen in crepusculo reflectat; imo & Chymistæ solius tartari calcinati ope, aliisque rationibus hunc aërem corporis instar condensent, sive reddant sensibilem, extrahantque ex eo visibilem liquorem, quem universalem spiritum vocant. Et forsan simile quid acciderit aëri isti opaco, quem dicis visum fuisse in tubo. Scis etiam proprium caloris esse rarefacere aquam, eo usque ut bulliat. Aër autem longe aptior est rarefactioni aut ebullitioni suscipiendæ, quam aqua; unde fit ut aër calore Solis rarefiat & bulliat, hicque motus sive ebullitio cernitur maxime æstate in infima aëris regione, utpote densiore. Quemadmodum etiam super prunis, quæ neque fumum neque flammam emittant, observari potest. Cum vero hoc non conspiciatur nisi coram lumine, cogitavi, nec forsan sine causa, hunc aëris in lumine motum dedisse occasionem tuis de materia subtili conceptibus. Utunque sit, objectionum mearum finem facio usquedum Physica tua in lucem prodeat; atque interea velim manere in perpetuum.


Responsionem hanc relegenti mihi visum est addere sequentia, ut ea adverteres.

13. Primi ordinis.

Dicis globulos tuos pag. 258. Metcor. non esse materiæ tuæ subtilis globulos, sed ligneos aut ex alia quavis materia, quod tamen nisi caveas, nemo non cogitabit: quantum ad rationem quam affers, dicis voluisse te conceptum tuum explicare per sensibilibus quid, quam materiæ tuæ subtilis globulos, atque ita rationes tuas experientia subijcere. Sed primo, nemo est hominum, qui illud quod dicis de ligneis globulis experimentum facere possit; secun-



secundo, cur facis globulum V mobilem in aëre solummodo secundum rectam lineam, ceteros vero etiam in gyrum, cum materię subtilis globuli omnes circulariter simul & per lineam rectam in aëre moveantur, prout dicis pag. 272. Tertio, cur non explicuisti proprios motus globulorum materię tuę subtilis, atque effectus quos illi præstant, cum in solidiorem aliquam superficiem incidunt, omisiss globulis ligneis, quos etiam supponis aliter moveri, quam materiam subtilem? melius certe satisfecisses, cum globulorum horum neutri sub experimentum cadant. Præterea cum pag. 258. dicis *quod explicat actionem radii DF & EH*, nescio quis explicationem tuam poterit intelligere; quod ad me attinet, ignorantiam meam ingenue profiteor.



8. Secundi ordinis.

Contendis eandem proportionem esse posse inter materiam subtilem, & poros per quos transit, ac inter arenulas & intervalla quæ in acervo pilarum seu pomorum occurrunt; esto. Sed objeci tibi arenulas permeare foramina ista gravitate sua sive instinctu quo deorsum feruntur, materiam vero subtilem nullam ex se habere gravitatem aut propensionem in hanc potius quam in illam partem; atque adeo comparisonem nullam esse, quod quidem objectionis meę præcipuus nodus est, ad quem tamen non respondes. Vale.

EPISTOLA LXIV.

Cl. Viro H. Moro Nobili Anglo Claudius Clerfeliier.

Veniam petis publicandi Literas ejus ad Cartesium.

LEgi, vir eximie, & perlegi summa cum voluptate tuas ad D. Cartesium difficultates, quas ei tertio Idus Decembris 1648. tertio nonas Martii, 10. Calendas Augusti, & duodecimo Calendas Novembris

Y 2

bris

bris 1649. proposuisti : miratusque sum ingenium tuum , & summam humanitatem , qua fretus ausus sum hæc ad te confidenter rescribere , ut de iis quæ facere instituo te certiore faciam : & à te impetrem ea quæ mihi necessaria sunt , ut opus quod suscepi ad finem perducam. Scies igitur me habere præ manibus præcipua autographa quæ incomparabilis Philosophus D. Cartesius , D. Chanuto , olim apud Serenissimam Sueciæ Reginam , nunc vero apud Batavos Legato meritissimo , affini meo , apud quem in Suecia vita functus est , reliquit : Inter quæ sunt & illa literarum quas pluribus ex amicis suis rescripsit , ex quibus præcipuas colligo , quæ vel Philosophiam suam tangunt , vel ea quæ perficienda susceperat respiciunt , vel difficultates à plerisque summis viris , inter quos non minimum tenes locum , ipsi propositas solvunt , ut eas omnes publicè juris faciam , quod spero me brevi peracturum. Sed quia literæ illæ quæ difficultatibus respondent vix possunt intelligi , nisi etiam ex quæ occasionem ipsi dederunt tale quid respondendi simul in lucem edantur , nec tamen mihi honestum visum fuerit hoc exequi absque venia & licentia eorum qui ipsi rescripserunt , à quibusdam petii , & impetravi , ut illud mihi concederent , quod etiam spero à te , pro summa tuâ humanitate & incredibili erga Cartesium studio , mihi concessum iri. Sed præterea cuperam ut mihi exemplaria mitteres earum omnium quas à D. Cartesio accepisti Epistolarum ; duas enim tantum præ manibus habeo , quarum prior respondet tuis tertio Idus Decembris datis ; altera iis quæ tertio Nonas Martii scriptæ sunt. Superest igitur tertia , quæ mihi deest , quæque tuis 10. Calendas Augusti & 12. Calendas Novembris datis satisfacere debet : quæ profecto non potest non esse pulcherrima , & continere plura scitu dignissima , cum totius tantisque difficultatibus & quæstionibus , cum ex Principiis Philosophiæ tuæ ex Dioptrice excerptis , respondere debeat , cujus tamen , duas duntaxat paginas inveni ; quæ tantum instantiis tuis satisfacere tentant , nec ullum verbum ad quæsitâ tuâ super Principiis & Dioptrice continent. Quare summopere exopto & enixe precor , ut & mihi licentiam concedas literas tuas simul cum responsis imprimendi , & ut simul ad me mittas quas habes à D. Cartesio , ut & posteritatis utilitati , & amici nostri famæ ac memoriæ consulamus. Præter hæc autem literarum autographa , plura adhuc habeo celeberrimi viri præclara monumenta , quæ singula suo tempore lucem videbunt , & quæ non parum jucunditatis putô tibi fore allatura , utpote qui in evolvendis Cartesianis scriptis tam impiger videris. Si mihi vernacula lingua uti licuisset , aptius atque ornatius

senten-

sententiam meam explicuissim: sed ne in varios errores inciderem, stylum contraxi, & ut potui, non ut volui, mentem meam tibi aperui; quod rogo ut mihi condones, & scias me tuæ semper humanitatis & sapientię laudatorem & cultorem fore,

Parisiis 12 Decemb. 1654.

CLAUD. CÆRSELIER.

EPISTOLA LXV.

Responsio Henrici Mori ad præcedentem Epistolam.

Literæ tuæ, Vir Clarissime, datæ Lutetiæ Parisiorum pridie Idus Decembris, anno 1654. non pervenerunt ad manus meas ante decimum septimum Calendarum Maii. Miror tantum temporis interfluxisse. Granthamæ tunc agebam in agro Lincolnienſi. Rus enim concesseram cum aliis de causis tum ad confirmandam valetudinem. Vehementer equidem gaudebam postquam intellexi præclararum tuarum institutum edendi omnia Cartesii scripta quæ apud te sunt, quo non solum nobilissimi Philosophi famæ ac memoriæ, verum etiam communium omnium literatorum utilitati optime consulēs. In neminem enim aptius quadrat, quam in divinum illum virum, Horatianum illud,

Qui nil molitur inepte.

Quam ob causam si ego tibi à consiliis essem, nihil quicquam eorum supprimeretur quæ vel ille tentavit ullo modo in rebus Philosophicis, vel feliciter ad exitum perduxit; sed lucem viderent omnia, in majus Republicæ literariæ commodum. Ac proinde, ut nullum impedimentum esset tam utili ac generoso proposito, vel ultro tibi concederem copiam edendi primas meas secundasque literas ad Cartesium conscriptas, quippe quod absque eis, ut recte mones, responsa ejus tam commode intelligi non possint: nec multum abs re fore diffiteor, si tertias meas simul edideris, cum per eas responsum sit alteris illis Cartesianis. Sed cum quartarum nullis illius literis respondeant, nec illis ab ipso responsum sit quicquam, utpote inopinata morte prærepto, de iis aliquantum hæſito an publici juris facerem. Cæterum omnem scrupulum eximeret, si quis ex amicis ipsius aut familiaribus, qui frequentius eum inviserunt, & collocti sunt, vel cum eo vixerunt conjunctius, respondendi vices suppleret;

ret; tunc enim parum dubito quin operæ esset pretium illas etiam in lucem dare. Quod si hoc in præsens impetrari non possit, modo probabile esset quod literæ illæ mex tertiæ, quartæque, editæ allicerent aliquem ex peritioribus Philosophiæ Cartesianæ sectatoribus ad respondendum omnibus difficultatibus inibi Cartesio ipsi propositis, ex illa saltem spe facilius animum inducerem ut jus tibi concedam eas in publicum prote-
rendi. Quid autem futurum sit in hac re ipse forsitan opportunius quam ego conjecturam capies. Ne multis igitur te morer, totum hoc negotium judicio tuo ac candori permitto, ut, quod facto opus sit, facias. Incredibile est quanto mœrore sum affectus, audito præmaturo Cartesii fato, quippe qui ingenium virtutesque incomparabilis viri impense ama-
vi & miratus sum. Præterea, accessit ingens desiderium perlegendi respon-
sa ejus, quæ expectavi, ad tertiæ quartæque meas literas, quæ uni-
versam illius Philosophiam percurrunt. Inchoasse integrum responsum
ad meas datas 20 Cal. Aug. ex te intelligo. Quod fragmentum scripsisse
eum conjicio cum Egmondæ esset in Hollandia. Deditit autem, ut per
amicos suos certior me fecit, ab incepto, quod animus occupatissi-
mus paratu ad iter Suecicum non potuit vacare tam subtilibus tantique,
uti ipse dixit, momenti difficultatibus & disquisitionibus, sed constan-
ter pollicitus est suis, se proximo vere reversurum, & tunc mihi copiose
& perspicue omnia explicaturum. Sed cum invida mors cætera nobis
præripuerit, nollem vel illud fragmentum duarum paginarum, quarum
mentionem facis, interire. Quod ad solidiora illa Cartesii monumenta
attinet, quæ prosteris te habere, quæque, ut promittis, lucem visura
sunt suo tempore, gestit profecto animus ad tam lætum gratumque nun-
cium; avideque interim cupio, si tibi non sit molestum, ut argumeta
titulose singulorum librorum recenseas in proximis tuis literis. Revi-
xit in me, ex quo nuperas tuas accepi, pristinus ille ardor erga Philoso-
phiam Cartesianam, qui aliquantulum ab obitu desideratissimi nostri
amici deferbuerat, cum nova legendi materies non suppeteret. Sed, ut
ingenue fatear quod res est, illud solum in causa non fuit, sed peculiaris
quædam studia quæ alio animum avocarant. Est enim illud rerum pon-
dus, veritatis pulchritudo, amplitudo ingenii & acumen, Theorematum
denique omnium admirabilis ille ordo & consensus in scriptis Cartesianis,
ut vel millies lecta non fordescant: non magis quam lux Solis, cujus or-
tum singulis diebus aves, pecudes, ipsique adeo homines gratulabundi
contemplantur.

Nec certe solum lectu jucunda est hæc Cartesiana Philosophia, sed
appri-

apprime utilis, quicquid aut miffitent aut deblaterent alii, ad summum illum omnis Philofophiæ finem, puta Religionem. Cum enim Peripatetici formas quasdam contendunt effe fubftantiales, quæ e potentia materiæ oriuntur, quæque cum materia ita coalefcunt, ut abique illa fubfiftere non poffint, ac proinde neceffario demum redeunt in potentiam materiæ (cui ordini accenfent viventium fere omnium animas, etiam eas quibus fenfum cogitationemque tribuunt,) Epicurei autem, explofis illis fubftantialibus formis, ipfi materiæ vim sentiendi cogitandique inefle ftatuunt; folus, quod fcio, inter Phyfiologos extitit Cartefius, qui fubftantiales illas formas, animæve materia exortas, è Philofophia fuftulit, materiamque ipfam omni sentiendi cogitandique facultate plane fpoliavit. Unde, fi principiis ftaretur Cartefianis, certiffima effet ratio ac Methodus demonftrandi, & quod Deus fit, & quod anima humana mortalis effe non poffit. Quæ funt illa duo folidiffima fundamenta ac fulcra omnis veræ Religionis. Hæc breviter noto, cum poffim & alia bene multa huc adjicere, quæ eodem fpectant. Sed fummam dicam, nullam extare Philofophiam, nifi Platoniam forte exceperis, quæ tam firmiter Atheis viam præcludit ad perversas iftas cavillas & fubterfugia quo fe folent recipere, quam hæc Cartefiana, fi penitus intelligatur. Unde fpero, quod omnes boni clementius ferent ampliffimas illas laudes quibus incomparabilem Virum cumulo, in iis quas ad eum fcripfi literis, credoque, quicquid hæc præfens ætas fenferit de Cartefio (nam ut nunquam vivis, ita raro recenti defunctorum memoriæ parci invidia) quod pofteritas eum omni cum laude & veneratione fit exceptura, optimumque illius Philofophiæ ufum fit agnitura. Quod lubentius prædico, ut majorem in modum tibi animos accendam ad pergendum in nobili illo instituto, edendi omnia quæ habes Cartefii fcripta Philofophica; quo pacto cum alios multos, tum me præter ceteros, devincies, qui in illis evolendis tantam percipere foleo voluptatem.

Si tibi vifum fuerit meas ad Cartefium literas publicare, vehementer hoc abs te efflagito, ut ne fiat juxta illa exemplaria quæ jam habes, quia multo correctiora tibi paro. Deprehendi enim, poftquam attentius legeram, non pauca corrigenda, quæ imprudenti mihi exciderunt præ nimio animi fervore ac feftinatione cum ad Cartefium fcriberem. Expunxi etiam quædam ex quæfitis in tertiis quartisque meis literis; fed primæ secundæque integræ funt.

Quod mensis fere jam elapfus eft ex quo tuas accepi literas, nec tamen ad te refcripsi, id profecto factum eft per nullam negligentiam aut in-

incuriam. Non possum enim non magni te æstimare, tum propter eximium tuum ingenium, ad omnem, quod satis ex literis tuis perspexi, æquitatem & humanitatem compositum ac conformatum, tum propter honorificam Clarissimi fratris tui Chanuti, olim apud Suecos, nunc vero, uti narras, apud Batavos Legati meritisissimi, in Cartesium defunctum pietatem. Sed totum id temporis quod effluxit partim negotiis, quibus eram ruri districtus, partim meis ad Cartesium literis castigandis transcribendisque, postquam ad Academiam rediissem, impentum est; nec putabam fore operæ pretium ad te rescribere, prius quam ista perfecissem. Jam vero in parato sunt omnia, tam mearum quam Cartesianarum literarum exemplaria: neutra tamen ad te mitto hac vice, quippe quod experiundum putavi prius, quam tuto hæ, quas jam scripsi, literæ ad manus tuas pervenerint: postquam id intellexerim, mittam ad te continuo. Perlubenter interim ex te audire vellem; quousque deveneris in nobili illo negotio quod scribis te suscepisse. Recta sane mihi pergratam præstabis, si per proximas tuas literas ea de re certior me feceris. Vale, Vir Clarissime, & generosum illud opus quod moliris feliciter exequere. Sic optat

Cantabrigiæ, è collegio Christi,
pridie Idus Maii, 1655.

Tibi Cartesianisque omnibus adhaerissimus
HENRICUS MORUS.

EPISTOLA LXVI.

Clarissimo Viro Renato Descartes Henricus
Morus Anglus.

Officii ergo. Objectiones de materia & corpore. Differentia inter naturam divinam & corpoream. De vacuo. De indivisibilitate atomorum. De indefinita vel infinita mundi extensione. De sensu brutorum.

QUANTA voluptate perfructus est animus meus, Vir Clarissime, in scriptis tuis legendis, nemo quisquam præter te unum potest conjectare.

Equidem ausim asseverare me haud minus exultasse in recognoscendis intelligendisque præclaris tuis Theorematibus, quam ipse in inveniendis; æqueque charos habere atque deamare pulcherrimos illos ingenii tui secretus, ac si proprius eos enixus esset animus. Quod & certe fecisse aliquo

quo modo mihi videtur, exerendo sese atque expediendo in eosdem sensus ac cogitationes, quos generosa tua mens præconcepit & præmonstravit. Qui sane istiusmodi sunt, ut, cum intellectui iudicioque meo adeo sint congeneres, ut non sperem fore ut incidam in quicquam conjunctum magis ac consanguineum, ita sane à nullius ingenio alieni esse possint, cuius itidem ingenium non sit à recta ratione alienum.

Libere dicam quod sentio: omnes quotquot existerunt, aut etiamnum existunt, Arcanorum Naturæ Antistites, si ad magnificam tuam indolem comparentur, Pumilos plane videri ac Pygmæos: meque, cum vel unica vice evolvissem Lucubrationes tuas Philosophicas, suspicatum esse, illustrissimam tuam discipulam, Serenissimam Principem Elizabetham, universis Europæis, non fœminis solum, sed viris, etiam Philosophis, longe evasisse sapientiore. Quod mox evidentius deprehendi, cum inceperim scripta tua paulo penitus rimari & intelligere.

Tandem enim clare mihi affulsit Cartesiana Lux, (i. e.) libera, distincta, sibi que constans ratio, quæ naturam pariter ac paginas tuas mirifice collustravit; ita ut aut nullæ aut paucissimæ super sint latebræ, & loci quos non patefacit nobilis illa fax, aut saltem vel levissimo negotio, mihi cum libitum fuerit, innox sit patefactura. Omnia profecto tam concinna in tuis Philosophiæ Principiis, Dioptricis & Meteoris, tamque pulchre sibi ipsis naturæque consona sunt, ut mens ratioque humana jucundius vix optaret latiusve spectaculum.

In Methodo tua, luforio quodam, sed elegantia sane, modestiæ genere, talem te exhibes virum ut nihil indole genioque tuo suavius & amabilius, nihil excelsius & generosius vel fingi possit, vel expeti.

Quorsum autem hæc? Non quod putarem, Vir Clarissime, aut tua interesse aut Reipublicæ Literariæ ut hæc conscriberem; sed quod mirabilis illius voluptatis ac fructus quem ex scriptis tuis percepi conscientia extorqueret hoc quaecunque est animi in te grati testimonium. Præterea, ut certum testarerem, etiam apud Anglos esse qui te tuæque magni æstiment, divinasque animi tui dotes vehementer suspiciunt & admirantur: neminem autem hominem meipso impensius te amare posse, eximiamque tuam Philosophiam arctius amplexari.

Sed revera, illustrissime Cartesi, ut nihil dissimulem; quamvis pulcherrimum illud Philosophiæ tuæ corpus ac essentiam valde depeream, fateor tamen paucula excidisse in secunda Principiorum parte, quæ certe animus meus aut paulo hebetior est quam ut capiat, aut ut admittat, averfator.

Sed præclaræ tuæ Philosophiæ summa nihil inde periclitatur, cum hujusmodi ista sint, ut cum aut falsa merito aut incerta judicari possint, ita nihil ad essentiam Philosophiæ tuæ ac fundamenta pertinere, illaque sine istis optime possit constare. Quæ vero ea sint, si tibi non sit tædio, breviter nunc exponam.

Primo, definitionem materiæ seu corporis instituis multo quam par est latiore. Res enim extensa Deus videtur esse, atque Angelus, imo vero res quælibet per se subsistens; ita ut eisdem finibus claudi videatur extensio atque essentia rerum absoluta, quæ tamen variari potest pro essentiarum ipsarum varietate. Atque equidem quod Deus extenditur suo modo, hinc arbitror patere, necne quod sit omnipræsens, & universam mundi machinam singulasque ejus particulas intime occupet. Quomodo enim motum imprimeret materiæ, quod fecisse aliquando, & etiamnum facere, ipse fateris, nisi proxime quasi attingeret materiam universi, aut saltem aliquando attigisset? Quod certe nunquam fecisset nisi adfuisset ubique singulasque plagas occupavisset. Deus igitur suo modo extenditur atque expanditur, ac proinde est res extensa.

Neque tamen ille corpus istud est, siue materia, quam ingeniosa illa artifex, mens scilicet tua, in globulos striatasque particulas tam affabre tornavit. Quamobrem res extensa latior corpore est.

Animumque mihi ulterius addit ut à te hac in re dissentiam, quod ad confirmationem hujusce tuæ definitionis *tam scærum adhibes argumentum, & ferme Sophisticum*. Quod utique corpus possit esse corpus sine mollietate, vel duritie, vel pondere, vel levitate, &c. illis enim aliisque omnibus qualitatibus, quæ in materia corporea sentiuntur, ex ea sublatis, ipsam integram remanere. Quod perinde est ac si dixeris, libram ceræ, cum possit esse libra ceræ, quamvis spoliatur figura spherica, vel cubica, vel pyramidalis, &c. sub nulla figura posse remanere integram ceræ libram. Quod tamen impossibile est. Quamvis enim hæc vel illa figura non tam arcte cohareat cum cera quin illam exuere possit, ut tamen cera semper sit figurata necessitas summa est & arctissima. Ita quamvis materia non sit necessario mollis, nec dura, nec calida, nec frigida, ut tamen sit *sensibilis* est summe necessarium; vel, si malles, *tangibilis*, prout optime definit Lucretius,

Tangere enim, & tangi, nisi corpus nulla potest res.

Quæ certe notio minus debet à tua mente abhorrere, cum Philosophia tua omnem sensum, cum antiquis illis apud Theophrastum *αἰσθητικὸν*, tactum planissime constituat. Quod vero verius esse ipse facillime ad-

admittam. Sed si minus placet *corpus definire ab habitudine ad sensus nostros*, tangibilitas hæc latior sit ac diffusior, & significet mutuum illum contactum tangendique potentiam inter corpora quælibet, siue animata siue inanimata fuerint, estoque superficierum duorum pluriumve corporum immediata juxtapositio. Quod & aliam innuit materiæ siue corporis conditionem, quam appellare poteris *impenetrabilitatem*; nempe quod nec penetrare alia corpora, nec ab illis penetrari possit. Unde manifestissimum est discrimen inter naturam divinam ac corpoream, cum illa hanc penetrare; hæc vero se ipsam penetrare non possit. Unde sane felicius mihi videtur cum Platoniciis suis Virgilius philosophari, quam Cartesius ipse, cum ex illorum sententia sic cecinerit,

—— Totamque infusa per artus

Mens agit molem, & magno se corpore miscet.

Mitto alias insigniores divinæ extensionis conditiones, cum non opus sit hoc loco explicare. Vel hæc pauca suffecerint ad demonstrandum multo tutius fuisse materiam definivisse *substantiam tangibilem*, vel modo supra explicato *impenetrabilem*, quam rem extensam. Dicta enim vel *tangibilitas*, vel *impenetrabilitas*, competit corpori adæquate; tua autem definitio peccat in legem *καθ' ὅλον πρῶτον*, neque enim est reciproca cum definito.

Secundo, Quando innuis *ne virtute quidem divina fieri posse ut proprie dictum existat vacuum*, & si omne corpus ex vase tolleretur, quod latera necessario coirent; ista profecto mihi videntur non solum falsa, sed minus consona antecedentibus. Si enim Deus motum materiæ imprimit, quod supra docuisti, annon ille potest contra obhiti, & inhibere ne coeant vasis latera? Sed contradictio est distare vasis latera, & tamen nihil interjacere. Idem non sensit literata Antiquitas, Epicurus, Democritus, Lucretius, aliique. Sed ut leviusculum illud argumenti genus missum faciam; divinam contendo interjacere extensionem, tuumque hic suppositum esse infirmum, materiam solummodo extendi: latera tamen ut antea coitura non necessitate logica sed naturali; Deumque solum hanc coitionem inhibere posse. Cum enim particulæ, primi præsertim secundique Elementi, tam furibundo motu agitentur, necesse est qua coditur, eo ruant præcipientes, aliasque sibi contiguas secum abripiant.

Infelicitè igitur successit, quod tam bellum Theorema de modo Rarefactionis & Condensationis, quod certe ego aliis de causis verissimum esse censeo, tam lubrico suffulcias fundamento.

Tertio, Singularem illam subtilitatem non capio, qua atomos, id est,

particulas sua natura indivisibiles, non dari evincas. Ut enim, inquis, effecerit Deus eas particulas à nullis creaturis dividi posse, non certe sibi ipsi easdem dividendi facultatem potuit adimere, quia fieri non potest ut propriam suam potentiam imminuat. Eodem argumento probaveris, Deum nunquam fecisse ut hesternus oriretur Sol, quoniam potentia ejus jam efficere non potest ut Sol hesternus non esset ortus; nec vilissimam posse muscam occidere,

Si modo qui periit, non periisse potest,

quod scite de seipso Ovidius; aut materiam non creasse, cum sit divisibilis in semper divisibilia, ac proinde Deus nunquam posset absolvere ac perficere hanc divisionem. Pars enim restat indivisa, quamvis divisibilis, atque ita perpetuo cluditur potentia divina, nec plene se excreare potest, finemque sortiri.

Quarto, Indefinitam tuam mundi extensionem non intelligo. Extensio enim illa indefinita, vel simpliciter infinita est, vel tantum quoad nos. Si intelligis extensionem infinitam simpliciter, cur mentem tuam obscuras vocabulis nimium suppressis ac modestis? Si tantum quoad nos infinitam, revera erit finita extensio; neque enim mens nostra aut rerum aut veritatis mensura est. Ac proinde, cum alia sit simpliciter infinita expansio, divinæ utique essentiae, materia tuorum vorticum à centris suis recedet, totaque mundi machina in dissipatas atomos vagosque abibit pulvisculos.

Atque sane eo magis hic admiror modestiam tuam atque metum, quod adco tibi caves à materiæ infinitudine, cum particulas actu & infinitas & divisas ipse agnoveris Art. 34 & 35. Quod certe si non fecisses, extorqueri tamen posse videtur hoc modo. Nam cum quantum sit in infinitum divisibile, partes actu infinitas habere oportet. Ut enim cultello aliove quovis instrumento corpus in partes palpabiles, quæ non actu sunt tales, mechanicè dissecare prorsus est ἀμύχρον, sive impossibile; ita vel mente quantitatem dividere in partes toti realiter actuque non inexistentes, plane ἀλογον est ac rationi absolum.

Quibus insuper adjungi potest, hypothesin hanc, quod mundus simpliciter ac revera sit infinitus, æqualem vim habere ad explicandam juxta ac confirmandam rationem rarefactionis & condensationis, quam supra proposuisti Art. 6, 7, atque istud principium, *solius corporis esse extensionem, & nihilum non posse extendi*. Quod enim ibi præstat logica seu contradictoria necessitas, idem hic necessitas Physica vel mechanica certissime præstabit.

Cum

Cum enim omnia in infinitum usque materia seu corporibus sint plena ac referta, penetrationis lex impedit ne fiat ulla distantia in rarefactione corporibus nuda, aut accessio partium ad se invicem in condensatione, sine interjacentium particularum expulsionem.

Atque hactenus quæ à me dicta sunt rationi mentique meæ maxime videntur perspicua, tuisque placitis longe longeque certiora.

Cæterum à nulla tuarum opinionum animus meus, pro ea qua est mollitie ac teneritudine, æque abhorret, ac ab internecina illa & jugulatrice sententia, quam in Methodo tulisti, brutis omnibus vitam sensumque eripiens, dicam, an potius præripiens? neque enim vixisse unquam poteris. Hic non tam suspicio rutilantem tui ingenii aciem, quam reformido, utpote de animantium fato sollicitus, acumenque tuum non subtile solum agnosco, sed chalybis instar rigidum ac crudele, quod uno quasi ictu universum ferme animantium genus vita ausit sensuque spoliare, in marmora & machinas vertendo.

Sed videamus obsecro quid in causa est quod in brutas animantes quicquam tam severiter statuas. Loqui utique non possunt, causamque suam apud judicem dicere, & quod crimen aggravat, cum ad loquelam organis satis sint instructæ, uti patet in Picis & Plittacis, hinc vita sensusque mulctandæ sunt.

Verum enimvero, quomodo fieri possit ut aut Plittaci aut Pice voces nostras imitentur, nisi audirent, sensuque perciperent quid loquimur? Sed non intelligunt, inquis, quid sibi volunt istæ voces quas effutiant imitando. Quidni tamen ipsi quid volunt satis intelligant, cibum scilicet quem à Dominis hoc artificio acquirunt? putant se igitur cibum mendicare, quod ista loquacitate toties voti compotes fiunt. Et quorsum, quæso, illa attentio est & auscultatio in avibus cantatoriis, quam præ se ferant, si nullus sit in ipsis sensus nec animadversio? Unde illa vulpium canumque astutia & sagacitas? Qui sit ut mîxæ & verba ferocientes cohibeant belluas? Canis famelicus cum furtim quid abstulit, cur quasi facti conscius clam se surripit, & meticulose ac diffidenter incedens nemini occurrenti gratulatur, sed averso pronoque rostro suam ad distans pergit viam, suspiciose cautus ne ob paratum scelus pœnas luat? Quomodo ista fieri possunt sine interna facti conscientia? Copiosa ista historiolarum congeries, quibus nonnulli conantur demonstrare rationem inesse animalibus brutis, hoc saltem evincet, sensum ipsis memoriamque inesse. Sed infinitum esset tales narratiunculas hic attexere. E quibus scio bene mul-

tas istiusmodi esse, ut earum vim vel subtilissimum acumen haud possit eludere.

Sed video plane quid te huc adegit, ut bruta pro machinis habeas; immortalitatis utique animarum nostrarum demonstranda ratio, quæ cum supponat corpus nullo modo cogitare posse, concludit ubicunque est cogitatio, substantiam à corpore realiter distinctam adesse oportere, adeoque immortalem. Unde sequitur, bruta si cogitent, substantias immortales sibi annexas habere.

Atqui obsecro te, Vir perspicacissime, cum ex ista demonstrandi ratione necesse esset bruta animantia aut sensu spoliare, aut donare immortalitate, cur ipsa malles inanimes machinas statuere quam corpora animabus immortalibus actuata? præsertim cum illud ut naturæ phænomenis minime consonum, ita plane sit inauditum hæctenus; hoc vero apud sapientissimos veterum ratum sit ac comprobatum, Pythagoram puta, Platonem, aliosque. Et certe animos hoc adderet Platonici omnibus persistendi in sua de brutorum immortalitate sententia, cum tam insigne ingenium eo angustiarum redactum sit, ut si animas brutorum immortales esse non concedatur, universa bruta insensatas machinas necessario statuatur.

Hæc sunt paucula illa (magne Cartesi) in quibus mihi fas esse putabam à te dissentire. Cætera mihi adeo arrident atque adblandiuntur; ut nihil illis habeam magis in deliciis; adeoque intimis animi mei sensibus consona sunt atque cognata, ut non solum tardioribus comode explicare, sed etiam contra pugnaculimos quosque feliciter, si opus esset, defendere me posse confidam.

Quod reliquum est, exorandus es, Vir illustrissime; ut hæc nostra boni consulas, nec me ullius levitatis vanæque ambitionis suspectum habeas, quasi affectarem Clarissimorum virorum familiaritates ac amicitias, cum & ipse si possem, haud cuperem inclarescere, rem turbulentam famam iudicans, privatoque otio valde inimicam.

Neque profecto quamvis animo sim in te adinodum prono ac proclivi, id unquam tibi significassem, nisi ab aliis instigatus, sed te tuaque amore latenti tacitaque veneratione prosequi contentus fuissim.

Nec obnixè à te cōflagito ut rescribas, utpote quem contemplationibus summe arduis, vel experimentis faciundis maxime utilibus pariter ac difficilibus, occupatissimum autumo.

Permitto igitur hic tibi tuo jure uti, ne sim in publicum injurius. Quod si tamen hæc nostra, q̃ntalia qualia fuerint, responsione qua-

qualibet cunque cohonestare dignatus fueris, rem sane non ingratam præstabis

Cantabrigiæ, è collegio Christi,
Idus Decembris, anno 1648.

Singulari tuæ sapientiæ cultori devotissimo,

HENRICO MORO.

EPISTOLA LXVII.

Doctissimo & Humanissimo Viro Henrico Moro

Renatus Descartes.

Responsio ad Superiores.

LAudes quas in me congeris, Vir humanissime, non tam ullius mei meriti, utpote quod eas æquare nullum potest, quam tuæ erga me benevolentia testes sunt. Benevolentia autem ex sola scriptorum meorum lectione contracta candorem & generositatem animi tui tam aperte ostendit, ut totum me tibi, quamvis antehac non noto, devinciat. Ideoque perlibenter iis quæ ex me quæris respondebo.

1. Primum est, cur ad corpus definiendum dicam illud esse substantiam extensam potius quam sensibilem, tangibilem, vel impenetrabilem. At res te monet, si dicatur substantia sensibilis, tunc *definiri ab habitudine ad sensus nostros*, qua ratione quædam ejus proprietates duntaxat explicatur, non integra natura, quæ cum possit existeret, *quamvis nulli homines existant*, certe à sensibus nostris non pendet. Nec proinde video cur dicas, esse summe necessarium ut omnis materia sit sensibilis. Nam contra, nulla est quæ non sit plane insensibilis, si tantum in partes *nervorum nostrorum particulis multo minores*, & singulas seorsim satis celeriter agitas, sit divisa.

Meumque illud argumentum quod scævum & ferme Sophisticum appellas adhibui tantum ad eorum opinionem refutandam, qui tecum existimant omne corpus esse sensibile, quam, meo judicio, aperte & demonstrative refutat. Potest enim corpus retinere omnem suam corporis naturam, *quamvis non sit ad sensum molle*, nec durum, nec frigidum, nec calidum, nec denique habeat ullam sensibilem qualitatem.

Ut vero inciderem in eum errorem quem videris mihi velle tribuere, per comparisonem ceræ, quæ quamvis possit non esse quadrata, nec rotunda, non potest tamen non habere aliquam figuram, debuisssem, ex eo quod

quod juxta mea Principia omnes sensibiles qualitates in eo solo consistant
 • quod particulæ corporis certis modis moveantur, vel quiescant, debuisse, inquam, concludere, corpus posse existere, quamvis nullæ ejus particulæ moveantur, nec quiescant; quod mihi nunquam in mentem venit. Corpus itaque non recte definitur substantia sensibilis.

Videamus nunc an forte aptius dici possit substantia impenetrabilis, vel tangibilis, eo sensu quem explicuisti.

Sed rursus ista tangibilitas & impenetrabilitas in corpore, est tantum
ut in homine Risibilitas, proprium quarto modo, juxta vulgares logicæ leges, non vera & essentialis differentia, quam in extensione consistere contendo; atque idcirco, ut homo non definitur animal risibile, sed rationale, ita corpus non definitur per impenetrabilitatem, sed per extensionem. Quod confirmatur ex eo, quod tangibilitas & impenetrabilitas habeant relationem ad partes, & præsupponant conceptum divisionis vel terminationis. Possimus autem concipere corpus continuum indeterminatæ magnitudinis, sive indefinitum, in quo nihil præter extensionem consideretur.

Sed, inquis, Deus etiam & Angelus, resque alia quælibet per se subsistens est extensa, ideoque latius patet definitio tua quam definitum. Ego vero non soleo quidem de nominibus disputare, atque ideo si ex eo quod Deus sit ubique, dicat aliquis cum esse quodammodo extensum, per me licet. *Atqui nego veram extensionem*, qualis ab omnibus vulgo concipitur, vel in Deo, vel in Angelis, vel in mente nostra, vel denique in ulla substantia, quæ non sit corpus, reperiri. Quippe per ens extensum, communiter omnes intelligunt aliquid imaginabile, (sive sit ens rationis, sive reale, hoc enim jam in medium relinquo,) atque in hoc ante varias partes determinatæ magnitudinis & figuræ, quarum una nullo modo alia sit, possunt imaginatione distinguere, unaque in locum aliarum possunt etiam imaginatione transferre, sed non duas simul in uno & eodem loco imaginari: atqui de Deo, ac etiam de mente nostra, nihil tale dicere licet; neque enim est imaginabilis, sed intelligibilis duntaxat, nec etiam in partes distinguibilis, præsertim in partes quæ habeant determinatas magnitudines & figuras. Denique, facile intelligimus & mentem humanam, & Deum, & simul plures Angelos in uno & eodem loco esse posse. Unde manifeste concluditur, nullas substantias incorporeas proprie esse extensas: sed eas intelligo tanquam virtutes aut vires quasdam, quæ quamvis se applicent rebus extensis, non idcirco sunt extensæ; ut quamvis in ferro tudenti sit ignis, non ideo ignis ille est ferrum. Quod vero nonnulli substantiæ notionem cum rei extensæ no-

tione

tione confundant, hoc fit ex falso præjudicio, quia nihil putant existere, vel esse intelligibile, nisi sit etiam imaginabile, ac revera nihil sub imaginationem cadit, quod non sit aliquo modo extensum. Jam vero quemadmodum dicerelicet sanitatem soli homini competere, quamvis per analogiam & medicina, & aer temperatus, & alia multa dicantur etiam sana, ita illud solum quod est imaginabile, ut habens partes extra partes, quæ sint determinatæ magnitudinis & figuræ, dico esse extensum, quamvis alia per analogiam etiam extensa dicantur.

2. Ut autem transeamus ad secundam tuam difficultatem: si examinemus quodnam sit ens extensum à me descriptum, inveniemus plane idem esse cum spatio, quod vulgus aliquando plenum, aliquando vacuum, aliquando reale, aliquando imaginarium esse putat. In spatio enim, quantumvis imaginario & vacuo, facile omnes imaginantur varias partes determinatæ magnitudinis & figuræ, possuntque *unas in locum aliarum imaginatione transferre*; sed nullo modo duas simul se mutuo penetrantes in uno & eodem loco concipere, quoniam implicat contradictionem ut hoc fiat, & spatii pars nulla tollatur. Cum autem ego considerarem tam reales proprietates non nisi in reali corpore esse posse, ausus sum affirmare nullum dari spatium prorsus vacuum, atque omne ens extensum esse verum corpus: nec dubitavi à magnis viris, Epicuro, Democrito, Lucretio hac in re dissentire; vidi enim illos non firmam aliquam rationem esse secutos, sed falsum præjudicium, quo omnes ab ineunte ætate fuimus imbuti. Quippe quamvis sensus nostri non semper nobis exhibeant corpora externa qualia sunt omni ex parte, sed tantum quatenus ad nos referuntur, & prodesse possunt aut nocere, ut in Art. 3. partis 2. præmonui; judicavimus tamen omnes, cum essemus adhuc pueri, nihil aliud in mundo esse, quam quod à sensibus exhibebatur, ac proinde nullum esse corpus nisi sensibile, locaque omnia in quibus nihil sentiebamus vacua esse. Quod præjudicium cum ab Epicuro, Democrito, Lucretio non fuerit unquam rejectum, illorum auctoritatem sequi non debeo.

Miror autem virum cætera perspicacissimum, cum videat se negare non posse quin aliqua in omni spatio substantia sit, quoniam in eo omnes proprietates extensionis revera reperiuntur, malle tamen dicere divinam extensionem implere spatium in quo nullum est corpus, quam fateri nullum omnino spatium sine corpore esse posse. Etenim, ut jam dixi, præter illa Dei extensio nullo modo subjectum esse potest verarum proprietatum, quas in omni spatio distinctissime percipimus. Neque enim

Deus est imaginabilis, nec in partes distinguibilis quæ sint mensurabiles & figuratæ.

Sed facile admittis nullum vacuum naturaliter dari. Sollicitus es de potentia divina, quam putas tollere posse id omne quod est in aliquo vase, simulque impedire ne coeant vasis latera. Ego vero cum sciam meum intellectum esse finitum, & Dei potentiam infinitam, nihil unquam de hac determino; sed considero duntaxat quid possit à me percipi vel non percipi, & caveo diligenter ne iudicium ullum meum à perceptione dissentiat. Quapropter audacter affirmo, Deum posse id omne quod possibile esse percipio; non autem è contra audacter nego, illum posse id quod conceptui meo repugnat; sed dico tantum implicare contradictionem. Sic quia video conceptui meo repugnare ut omne corpus ex aliquo vase tollatur, & in ipso remaneat extensio, non aliter à me concepta quam prius concipiebatur corpus in eo contentum; *dico implicare contradictionem, ut talis extensio* ibi remaneat post sublatum corpus, ideoque debere vasis latera coire: Quod omnino consonum est meis cæteris opinionibus. Dico enim alibi *nullum motum dari nisi quodammodo circularem*; unde sequitur non intelligi distincte, Deum aliquod corpus ex vase tollere, quin simul intelligatur, in ejus locum aliud corpus, vel ipsa vasis latera motu circulari succedere.

3. Eodem modo etiam dico implicare contradictionem, ut aliquæ dentur atomi, *quæ concipiantur extensæ ac simul indivisibiles*; quia quamvis Deus eas tales efficere potuerit ut à nulla creatura dividantur, certe non possumus intelligere ipsum se facultate eas dividendi privare potuisse. Nec valet tua comparatio de iis quæ facta sunt, quod nequeant infecta esse. Neque enim pro nota impotentia sumimus, quod quis non possit facere id quod non intelligimus esse possibile; sed tantum quod non possit aliquid facere ex iis quæ tanquam possibilia distincte percipimus. At sane percipimus esse possibile ut atomus dividatur, quandoquidem eam extensam esse supponimus; atque ideo si iudicemus eam à Deo dividi non posse, iudicabimus Deum aliquid non posse facere, quod tamen possibile esse percipimus. Non autem eodem modo percipimus fieri posse, ut quod factum est sit infectum, sed è contra, percipimus hoc fieri plane non posse; ac proinde non esse ullum potentia defectum in Deo, quod istud non faciat. Quantum autem ad divisibilitatem materiae, non eadem ratio est: etsi enim non possim numerare omnes partes in quas est divisibilis, earumque idcirco numerum dicam esse indefinitum; non tamen possum affirmare illarum divisionem à Deo nunquam absolvi, quia scio Deum

Deum plura posse facere quam ego cogitatione mea complecti; atque istam indefinitam quarundam partium materię divisionem revera fieri solere in Artic. 34. concessi.

4. Neque vero affectata modestię est, sed cautelę, meo iudicio, necessarię, quod quędam dicam esse indefinita potius quam infinita; solus enim Deus est quem positive intelligo esse infinitum: de reliquis, ut de mundi extensione, de numero partium in quas materia est divisibilis, & similibus, *an sint simpliciter infinita necne, me profiteor nescire*; scio tantum me in illis nullum linem agnoscere, atque idcirco respectu mei dico esse indefinita.

Et quamvis mens nostra non sit rerum vel veritatis mensura, certe debet esse mensura eorum quę affirmamus aut negamus. Quid enim est absurdius, quid inconsideratius, quam velle iudicium ferre de iis ad quorum perceptionem mentem nostram attingere non posse consistitur?

Miror autem te non modo id velle facere videri, cum ais, *si tantum quoad nos sis infinita, revera eris finita* extensio, &c. sed præterea etiam divinam quandam extensionem imaginari, quę latius pateat quam corporum extensio, atque ita *supponere Deum partes habere extrapartes*; & esse divisibilem, omnemque prorsus rei corporeę essentiam illi tribuere.

Ne vero quis scrupulus hic superfit; cum dico extensionem materię esse indefinitam, sufficere hoc puto ad impediendum ne quis extra illam locus fingi queat, in quem meorum vorticum particulę abire possint. *Ubi cumque enim locus ille concipiatur, ibi, jam juxta meam opinionem, aliqua materia est*; quia dicendo eam esse indefinite extensam, dico ipsam latius extendi quam omne id quod ab homine concipi potest.

Sed nihilominus existimo maximam esse differentiam inter amplitudinem istius corporeę extensionis, & amplitudinem divinę, non dicam extensionis, utpote quę proprie loquendo nulla est, sed substantię vel essentię; ideoque hanc simpliciter infinitum, illam autem indefinitam appello.

Cæterum non admitto quod pro singulari tua humanitate concedis, nempe reliquas meas opiniones posse constare, quamvis id quod de materię extensione scripsi refutetur: *unum enim est ex præcipuis, meoque iudicio certissimis, Physicę meę fundamentis*, profiteor quę mihi nullas rationes satisfacere in ipsa Physicę, nili quę necessitatem illam, quam vocas logicam sive contradictoriā, involvant; modo tantum ea excipias quę per solam experientiam cognosci possunt, ut quod circa hanc terram unicuique sit Sol vel unica Luna, & similia. Cumque in reliquis à meo sensu non

abhorreas, spero etiam his te facile assensurum, si modo consideres præjudicium esse quod multi existimentens extensum, in quo nihil est quod moveat sensus, non esse veram substantiam corpoream, sed spatium vacuum duntaxat; quodque nullum sit corpus nisi sensibile, atque nulla substantia nisi quæ sub imaginationem cadat, ac proinde sit extensa.

5. *Sed nulli præjudicio magis omnes assuevimus quam ei, quod nobis ab incunte ætate persuasit bruta animantia cogitare.* Quippe nulla ratio nos movit ad hoc credendum, nisi quod videntes pleraque brutorum membra in figura externa & motibus à nostris non multum differre, unicuique in nobis esse credentes istorum motuum principium, animam scilicet, quæ eadem moveret corpus & cogitaret, non dubitavimus quin aliqua talis anima in illis reperiretur.

Postquam autem ego advertissem distinguenda esse duo diversa motuum nostrorum principia, unum scilicet plane mechanicum & corporeum, quod à sola spirituum vi & membrorum conformatione dependet; potestque *anima corporea* appellari; aliud incorporeum, *mentem* scilicet, si ve animam illam quam definis substantiam cogitantem; quæ si diligenter an ab his duobus principiis oriantur animalium motus, an ab uno duntaxat. Cumque clare perspexerim posse omnes oriri ab eo solo quod corporeum est & mechanicum, pro certo ac demonstrato habui, nullo pacto à nobis probari posse, aliquam esse in brutis animam cogitantem. Nec moror astutias & sagacitates canum & vulpium, nec quæcunque alia propter cibum, venerem, vel metum à brutis fiunt. *Profitetur enim me posse perfacile illa omnia ut à sola membrorum conformatione profecta explicare.*

Quamvis autem pro demonstrato habeam, probari non posse aliquam esse in brutis cogitationem; non ideo puta posse demonstrari nullam esse, quia mens humana illorum corda non pervadit. Sed examinando quidnam sit hac de re maxime probabile, nullam video rationem pro brutorum cogitatione militare præter hanc unam, quod cum habeant oculos, aures, linguam, & reliqua sensuum organa sicut nos, verisimile sit illa sentire sicut nos; & quia in nostro sentiendi modo cogitatio includitur, similem etiam illis cogitationem esse tribuendam. Quæ ratio cum sit maxime obvja, mentes omnium hominum à prima ætate occupavit. Sunt autem alia rationes multo plures & fortiores, sed non omnibus ita obvja, quæ contrarium plane persuadent. Inter quas suum quidem locum obtinet, quod non sit tam probabile omnes vermes, culices, cruceæ, & reliqua animalia immortali anima prædita esse, quam machinarum instar se movere.

Primo, quia certum est in corporibus animalium, ut etiam in nostris, esse ossa, nervos, musculos, sanguinem, spiritus animales, & reliqua organa ita disposita, ut se solis absque ulla cogitatione omnes motus quos in brutis observamus ciere possint. Quod patet in convulsionibus, cum mente invita machinamentum corporis vehementius sæpe ac magis diversis modis solum se movet, quam opæ voluntatis soleat moveri.

Deinde, quia rationi consentaneum videtur, cum ars sit naturæ imitatrix, possintque homines varia fabricare automata in quibus sine ulla cogitatione est motus, ut natura etiam sua automata, sed arte factis longe præstantiora, nempe bruta omnia, producat, præsertim cum nullam agnoscamus rationem propter quam, ubi est talis membrorum conformatio qualem in animalibus videmus, cogitatio etiam debeat adesse; atque ideo majori admiratione dignum sit, quod mens aliqua reperiatur in unoquoque humano corpore, quam quod nulla sit in ullis brutis.

Sed rationum omnium quæ bestias cogitatione destitutas esse persuadent meo iudicio præcipua est, quod quamvis inter illas unæ aliis ejusdem speciei sint perfectiores, non secus quam inter homines, ut videre licet in equis & canibus, quorum aliqui cæteris multo felicius quæ docentur addiscunt; & quamvis omnes perfacile nobis impetus suos naturales, ut iras, metus, famem, & similia, vocē vel aliis corporis motibus significant: nunquam tamen hæcenus fuerit observatum, ullum brutum animal eo perfectionis devenisse ut vera loquela uteretur, hoc est, *ut aliquid vel voce vel nutibus indicaret*, quod ad solam cogitationem, non autem ad impetum naturalem, posset referri. Hæc enim loquela unicū est cogitationis in corpore latentis signum certum, atque ipsa utuntur omnes homines, etiam *quam maxime stupidi & mente capti*, & lingua vocisque organis destituti, *non autem ullum brutum*; eamque idcirco pro vera inter homines & bruta differentia sumere licet.

Reliquas rationes cogitationem brutis adimentes brevitaris causa hic omitto. Vclim tamen notari me loqui de cogitatione, non de vita vel sensu: vitam enim nulli animali denego, utpote quam in solo cordis calore consistere statuo; nec denego etiam sensum quatenus ab organo corporeo dependet. Sicque hæc mea opinio non tam crudelis est erga beluas, quam pia erga homines, Pythagoreorum superstitioni non addictos, quos nempe à criminis suspicione absolvit quoties animalia comedunt vel occidunt.

Hæc autem omnia fortasse prolixius scripsi quam acumen ingenii tui requirebat; volui enim hoc pacto testari paucissimorum objectiones mihi hæcenus æque gratas fuisse ac tuas, humanitatemque & candorem tuum maxime tibi devinxisse.

Edmondæ prope Alckmariam
Nonis Februarii 1649.

*Omnium vera sapientiæ studioforum
cultorem observantissimum*

RENATUM DESCARTES.

EPISTOLA LXVIII.

Clarissimo Viro, Nobilissimoque Philosopho, Renato
Descartes Henricus Morus Anglus.

Instantia contra Responsiones Cartesii. Varia quæstiones de mundi extensione, de natura motus, de gyratione terra & luna, de particulis striatis, de anima unione cum corpore, ipsiusque imperio, de conversione globulorum æthereorum in elementum primum, de flexibilitate particularum aquearum, & de materia denique æthereæ.

Opinionis quam de te concepî; nuperisque meis literis apud te testatus sum, quanta quanta sit (Vir illustrissime) me non pœnitet, nec unquam, sat scio, poterit pœnitere. Quin & adauget plurimum tui apud me existimationem, quod ad stupendam illam mentis tuæ amplitudinem divinumque acumen, suavitas tanta morum accesserit & humanitas. Quam certe ut nunquam suspectam habui, ita nunc sane cruditissimas tuas literas habeo pro certissimo illius argumento. Cæterum ne tanti favoris te pœniteat quasi in servum caput collati, neve vilescat meum erga te studium, atque amor, tanquam ab abjecto jacentique animo profectus, quo tandem modo responsa tua mihi satisfecerint, palam, uti hominem liberum decet, aperteque profitebor. Quod tamen ne nimium tibi vel mihi ipsi negotium facessat, fusiores orationis texturas missas faciens, rem totam in Instantias quasdam breves, aut saltem notatiunculas super singulis responsorum tuorum particulis, compingam.

Ad

Ad Responsum circa primam Difficultatem.

Instantia I.

Definiri ab habitudine ad sensus nostros, &c.

Hic regeri potest; cum radix rerum omnium ac essentia in æter nas de-
fossa lateat tenebras, rem quamlibet necessario definiri ab habitudine ali-
qua. Quæ habitudo proprietas dici potest in substantiis; cum non sit sub-
stantia; quamvis agnoscam libenter *proprietas alias aliis esse priores*; hoc au-
tem tantum me voluisse, satius nimirum esse per adæquatam quamlibet
proprieta-tem, quam per formam, quam vocant, definito latiore, rem
definivisse. Porro, cum ipse corpus definis rem extensam, ipsam illam ex-
tensionem insuper adnoto consistere in habitudine quadam partium ad se
invicem, quatenus alix extra alias productæ sunt. Quam habitudinem non
esse rem absolutam manifestum est.

II.

Quamvis nulli homines existant.

Si omnes mortales conniverent, Sol tamen non exueret suam videndi
aptitudinem, quamprimum oculos aperuerint denuo; ut neque securis,
secandi, quamprimum ligna aut lapides oblatis fuerint.

III.

Nervorum nostrorum particulis multo minores.

Deum tamen artificem adaptare posse credo nervos satis exiguos exi-
guis istis materiæ particulis, ac proinde sensibilitatem materiæ hoc modo
comminutæ integram manere. Porro hæ particule à motu cessare pos-
sunt, atque coalescere, nostrisque hoc modo nervis sensibiles denuo eva-
dere; quod de substantia incorporea nullo modo verum est.

IV.

Quamvis non sit ad sensum molle, &c.

Certum est aut ad nervos nostros sensorios durum fore vel mol-
le, &c. aut saltem ad istiusmodi nervos, quales, si vellet, Deus fabri-
care poterit, ut modo monuimus; atque hoc satis est, quamvis Deus
nunquam fabricaturus sit istiusmodi nervos. Ut revera partes terræ
versus centrum sunt ex se visibiles, quamvis nunquam extrahendæ sint
in

in Solis conspectum, nec eo descensurus sit quisquam cum lychno vel lampade.

V.

Est tantum, ut in homine risibilitas, proprium quarto modo.

Quod si ratio etiam aliis competeret animalibus, rectius definiretur homo animal risibile quam rationale. *Nondum autem à quopiam demonstratum est tangibilitatem aut impenetrabilitatem proprias esse substantiæ extensæ affectiones, quamvis corporis esse merito quivis agnoverit.* Equidem possum clare concipere substantiam extensam quæ nullam ullo modo habeat tangibilitatem vel impenetrabilitatem. Igitur tangibilitas vel impenetrabilitas non immediate substantiam extensam consequitur, quatenus extensa est.

VI.

Atqui nego veram extensionem, &c.

Per veram extensionem intelligis quam tangibilitas & impenetrabilitas comitatur. Hanc ipse etiam nego in Deo, nudissime vel mente vel Angelo reperiri. Interea tamen assero aliam esse extensionem aque veram, quamvis non æque vulgarem Scholisque tritam, quæ in Angelis mentesque humana ut terminos, ita & figuram habet, sed pro imperio Angeli mentisque variabilem; mentesque sive animas nostras atque Angelos, eadem prorsus manente substantia, contrahere se posse, & certos denuo ad limites se expandere.

VII.

Nihil esse intelligibile nisi sit etiam imaginabile, &c.

Equidem aliquanto sum pronior in illam Aristotelis sententiam, *ὅτι ἀπὸ τῆς φαντασματικῆς οὐκ ἐστὶ νοῦς*. Sed hic quisque mentis suæ vires experiat.

Ad Responsum circa secundam Difficultatem.

Instantia. I.

Vnas in locum aliarum imaginatione transferre.

Mea quidem imago non potest, nec concipere si transferantur, quin una vacui spatii partes absorbeant alteras, penitusque coincidant & penetrent se invicem.

II. Nec

II.

Nec dubitavi à magnis viris: Epicuro, Democrito, &c.

Nullus dubito quin optimo jure dissentias, cum non solum istis, sed universis naturæ interpretibus longe major sis (mea sententia) longeque augustior.

III.

Quin aliqua in omni spatio substantia sit, &c.

Id sane concessi pacis ergo. Sed clare mihi non constat. Nam si Deus hanc mundi universitatem annihilaret; & multo post aliam crearet de nihilo, *intermundium illud*, seu absentia mundi, *suam haberet durationem*, quam tot dies, anni, vel secula mensurassent. Non-existentis igitur est duratio, quæ extensio quædam est. Ac proinde amplitudo nihili, puta vacui, per ulnas vel orgyâs mensurari potest, ut non-existentis in sua non-existentia duratio per horas, dies, mensesque mensuratur. Sed concedo, quamvis nondum vi coactus, in omni spatio aliquam substantiam inesse; neque tamen sequi eam esse corpoream, cum extensio sive præsentia divina possit esse subjectum mensurabilitatis, v. g. Præsentiam sive extensionem divinam occupare assero unam alteramque orgyâ in hoc vel illo vacuo; nec tamen omnino sequi Deum esse corporeum, ut patet ex supra dictis, Instantia 5. Sed super hac re est agendum alibi.

IV.

Dico implicare contradictionem, ut talis extensio, &c.

Sed hic libenter quærerem, numquid necesse sit ut aut talis extensio sit qualem in corpore concipis, aut nulla. Deinde, cum & alias res præter corpora extendi suo modo concesseris, annon analogica illa extensio, quam vocas, vices obeat extensionis corporeæ, atque ita illam vim contradictoriam retundat. Præferum cum analogica hæc extensio ad proprie dictam tam prope accedat, ut sit mensurabilis certosque pedum ulnarumve numeros occupet.

V.

Nullum motum dari, nisi quodammodo circularem.

Huc necessario consequi concedo, necessitate puta Physica; supponendo duntaxat omnia corporibus plena, nullamque extensionem aliam integram mundi extensionem excedere: qua in parte ego satis sum secu-

Bb

rus:

rus; sed inexpugnabilem hanc contradictionis vim fateor me nondum satis deprehendisse.

Ad Respondum circa tertiam Difficultatem.

Quæ concipiuntur extensa ac simul indivisibiles.

Cum mentem tuam sic explicueris, nulla inter nos est controversia.

Ad Respondum circa quartam Difficultatem.

Instantia I.

An sint simpliciter infinita necne profiteor me nescire.

Haud tamen latere te potest, quin sint vel simpliciter infinita, vel vera finita, quamvis utrum horum sint, tam facile statuere non possis. Quod autem vortices tui non disrumpantur & fatiscant, non obscurum videatur indicium Mundum revera esse infinitum. Ipse tamen interea libere profiteor, quamvis audacter possim assentire huic axiomati, *Mundus finitus est, aut non finitus*, vel, quod idem hic est, *infinitus*, meta-
men non posse plene animo complecti rei cujusvis infinitudinem; sed illud imaginationi meæ hic accidere, quod Julius Scaliger alicubi scribit de dilatatione & contractione Angelorum, non posse scilicet se in infinitum extendere, nec in puncti *indivisibilitate* coangustare. Qui autem *Deum positive infinitum agnoscat* (i. e. *ubique existentem*) quod tu merito facis, non video, si liberæ rationi permittatur, quod hælitet, quin continuo etiam admittat nullibi otiosum sed eodem jure, eademque facilitate qua hanc nostram, ubi nos degimus, vel quousque oculi, animusque noster pervadit, materiam ubique produxisse. Sed fufius acturus eram quam institui; hunc impetum supprimo, ne tibi sum molestior.

II.

Cum ais, si tantum quoad nos sit infinita, revera erit finita.

Aio, addoque insuper consequentiam esse manifestissimam, quoniam particula (*tantum*) plane excludit omnem infinitatem à re quæ tantum quoad nos dicitur infinita, ac proinde revera erit finita extensio, mentem autem meam hic attingere ea de quibus pronuncio, cum planissime mihi constet, mundum aut finitum esse aut infinitum, ut paulo ante insinuavi.

III.

III.

Atque ita supponere Deum habere partes extra partes, & esse divisibilem, omnemque prorsus rei corporea essentiam illi tribuere.

Nullam tribuo. Nego enim extensionem corpori competere quatenus corpus est, sed quatenus ens, aut saltem substantia est. Præterea cum Deus, quantum mens humana Deum capit, sit totus ubique, integraque sua essentia omnibus locis sive spatiis spatiorumque punctis adsit, non sequitur quod partes haberet extra partes, aut, quod consequens est, quod sit divisibilis, quamvis arcte confertimque loca omnia occupet, nullis relictis intervallis. Unde præsentiam, seu amplitudinem, ut ipse vocas, divinam, mensurabilem agnoscam, Deum autem ipsum divisibilem nullo modo.

Quod autem Deus singula mundi puncta occupet, fatentur ad unum omnes tam Idiotæ quam Philosophi, ipseque clare & distincte animo percipio & complector. Jam vero eodem modo se habet essentia divina intra atque extra mundum, ita ut si fingamus mundum claudi cœlo stellato visibili, centrâ divinæ essentiae, totalisque ejus præsentia, eodem modo repeteretur extra cœlum stellatum, quo intra clare concipimus repeti atque reiterari. Hanc autem repetitionem centri divini, quæ mundum occupat, ulterius productam, infinita par est extra cœlum visibile spatia secum expandere; quam nisi comitetur materia tua indefinita, actum erit de tuis vorticibus. Atque ut hæc molliora videantur, experiamur assensus nostros in successiva Dei duratione.

Deus est æternus, h. e. vita divina omnes seculorum evolutiones rerumque rationes, præteritarum, futurarum, præsentium, simul comprehendit. Hæc tamen vita æterna singulis etiam temporis insidet quasi atque inequitat momentis; ita ut recte vereque dicamus Deum per tot dies, menses, horasve sua æternitate fretum. Exempli causa, si supponamus mundum ante centum annos conditum, annon integra illa omniaque complectens Dei æternitas per horas, dies, menses, & annos (puta centum) succedentes ad hunc usque diem duravit? At vero nihilo aliter est Deus à mundo condito ac fuit ante mundum conditum.

Manifestum igitur est, præter æternitatem infinitam, in Deum etiam cadere durationis successionem. Quod si admittimus, cur non extensionem etiam infinita spatia adimplentem pariter ac infinitam durationis successionem illi tribuamus?

Imo vero quoties altius & exquisitius istis de rebus mecum cogi-

to, ea sum in sententia, quod utraque extensio, tam spatii quam temporis, non entibus juxta atque entibus competere possit; suspicor-que æque ex præjudicio fieri posse, cum omnia ea quæ sensu manibus-que usurpamus, utpote crassa & corporea, semper sint extensa, quod è contra omnia extensa protinus concludimus corporea, quam quod ultimum sensus præjudicium facit ut putemus aliqua quæ non sunt corporea extendi.

Quod autem extensio cadat in non-ens, ex eo conjecturam capimus, quod *extendi* nihil aliud innuit nisi *paries extare extra partes*. *Partes* autem & *totum*, *subiectum* & *adjunctum*, *causa* & *effectum*, *adversa* & *relata*, *contradictoria* & *privantia*, & id genus universa, notiones logicæ sunt, easque tam non-entibus quam entibus applicamus. Unde non sequitur, quod quicquid concipimus partes habere extra partes, ens sit reale concipiendum.

Sed quoties hic colluctantur mentes humanæ cum propriis umbris, aut, lascivientium canilorum instar, propriis ludunt cum caudis? Nam istiusmodi profecto pugnx atque lusus sibi instituuntur à mente nostra, dum rationes modosque logicos, juxta quos res externas considerat, non advertit suos duntaxat esse cogitandi modos, sed putans eos esse aliquid in rebus ipsis à se distinctum, suam captando quasi caudam, ad lassitudinem usque luditur misereque illaqueatur. Sed plura quam vellem imprudens hic effutii: Ad reliqua propero.

IV.

Ubique enim locus ille concipiatur, ibi aliqua materia est.

Næ tu hic cautus homo es, & eleganter modestus; admittis tandem mundum esse infinitum, si Aristoteles infinitum recte definivit, *Phys. l. 3. ἡ ἀεί τι ἐξ ἑσῶν, cuius aliquid semper est extra*. Nihil nunc est ulterius quod diffideamus.

V.

Sed nihilominus existimo maximam esse differentiam inter amplitudinem istius corporeæ extensionis, &c.

Et ipse pariter existimo immane quantum differre divinam amplitudinem & corpoream. Primo, quod illa sub sensum cadere non possit, hæc possit sub sensum cadere. Deinde, quod illa sit increata & independens, hæc dependens & creata. Illa porro penetrabilis, per omnia pervadens,

vadens, hæc crassa & impenetrabilis. Denique, quod illa ex totalis & integræ essentiz repetitione ubiquitaria, hæc ab externa, sed immediata, partium applicatione & juxtapositione orta sit; ita ut nemo, nisi plumbeus plane sit atque insigniter hebes, suspicari possit,

Impia nos rationis invire elementa, viamque

Indogredi sceleris (ut & ille loquitur.)

Præsertim cum ex Theologis sint, iisque alias fortasse sat scrupulosis, qui tamen agnoscunt Deum, si voluisset, potuisse mundum ab æterno creare. Et tamen æque absurdum videtur infinitam durationem, ac magnitudinem infinitam mundo tribuere.

VI.

*Vnum enim est ex precipuis, meoque iudicio certissimis, Physica
meæ fundamentis.*

Quod sit materia indefinite saltem extensa, nullumque vacuum, fundamentum esse Physicæ tuæ apprime necessarium sat intelligo, & certe nullus dubito quin verum sit; sed an veram demonstrandi rationem insequutus sis, id equidem ambigo: cum principium illius demonstrationis sit, *omne extensum esse reale ac corporeum*, quod mihi fateor nondum constare, ob rationes à me supra datas. Imo vero, ut ingenue fatear quod mihi jam in mentem venit, si neque nudum spatium, prout postulat tua demonstratio, nec Deus omnino extenditur, ne infinita quidem materia opus est tuæ Philosophiæ, *certus finisque stadiorum numerus suffecerit.* Mundi enim hujus finiti latera non habebunt quo recedant, nec dehiscere poterunt medii vortices, ne intermedium spatium extendatur, novaeque non-ens induat dimensiones. Sed tamen naturalis impetus alio me præcipitat, in hanc utique fidem, fecunditatem nempe divinam, cum nullibi sit otiosa, ubique locorum materiam produxisse, nullis vel angustissimis prætermiſſis intervallis.

Quæ tam facile cum admitto, Philosophia tua apud me non corruet ob defectum dicti fundamenti. Planeque video Physicæ tuæ veritatem non tam aperte & ostensive se excreare in hoc vel illo articulo, quam ex universo omnium filo & textura elucescere, ut ipse rectissime mones Part. 4. artic. 225. Quod si quis integram tuæ Philosophiæ faciem simul contueretur, tam concinna est, sibi que juxta ac rerum phaenomenis consona, ut merito imaginetur, se naturam ipsam opificem vidisse ab hocposito speculo enitentem.

Ad Responsum circa Difficultatem ultimam.

Instantia I.

Sed nulli præjudicio magis omnes assuevimus, &c.

Quod mihi de me ipso constat plus quam satis, ab hujusce enim præjudicii laqueis sentio me expediri non posse ullo modo.

II.

Profiteor enim me posse perfacile illa omnia ut à sola membrorum conformatione profecta explicare.

Læta sane & jucunda Provincia! *Hoc si præstiteris*, (& credo quantum ingenium humanum poterit, te hac in re præstiturum in quinta sextave parte Physices tuæ, quas, ut audio fere à te perfectas jam esse & absolutas, ita avide expecto efflictimque rogo, ut quamprimum possit fieri lucem videant, vel potius ut nos in ipsis ulteriorem naturæ lucem videamus: sed ad rem redeo.) *Hoc, inquam, si præstiteris*, agnosco te demonstrasse, in brutis animantibus inesse animam neminem demonstrare posse: Sed interea loci, quod & ipse submones, quod non sit anima in brutis, te necdum demonstrasse, nec demonstrare posse ullo modo.

III.

Præter hanc unam, quod cum habeant oculos, aures, &c.

Maximum, meo judicio, argumentum est, quod tam subtiliter sibi præcaveant & prospiciant; ut narratiunculis veris pariter ac mirandis, si otium esset, demonstrare possem. Sed credo te in consimiles historias incidisse, meæ autem in nullis extant libris.

IV.

Quo non sit tam probabile omnes vermes, culices, erucas, &c.

Nisi forte imaginemur istiusmodi animas, *vita Mundi*, ut appellat *Ficinus*, arenam quasi esse ac pulverem, & infinita fere ex isto penario animarum agmina fatali quodam impetu in præparatam materiam semper prolabi. Sed concedo hæc citius dici posse quam demonstrari.

V.

Ut aliquid voce vel nutibus indicaret, &c.

Annon canes annuunt caudis, ut nos capitibus? annon brevibus latratibus cibum sæpius ad mensam mendicant? imo vero aliquando Domini cubitum pede, qua possunt cum reverentia, tangentes, quasi sui oblitum, blando hoc cum signo commonefaciunt.

VI.

Quam maxime stupidi ac mente capti, &c. non autem nullum brutum, &c.

Nec infantes ulli per aliquam multa saltem mensium spatia, quamvis plorent, rideant, irascantur, &c. Nec diffidis tamen, opinor, quin infantes sint animati, animamque habeant cogitantem.

Responsa hæc sunt (Vir Illustrissime) quæ tuis præclaris responsis mihi visum est reponere. Quæ an æque grata futura sint ac nuperæ meæ objectiones, sane prælagire non possum.

Humanitas tua quam versus istas perspexi, & diuturnior cum scriptis tuis consuetudo, audentior me fecerunt; vereor ne fuerim prolixus nimium ac molestus.

Equidem serme oblitus eram potissimi mei instituti, quod non fuit æternas tecum altercationes reciprocare; sed cum hanc opportunitatem sim nactus, tanti viri de rebus quæ se obtulerint Philosophicis iudicium placide experiri, & præcipue si qua difficultas emerferit inter legendos tuos libros, te ipsum audire interpretantem. Quam profecto gratiam si lubens facilisque concesseris, summopere me tibi devincies.

Et sane quam lubenter eximæ tuæ artis ac peritiæ mihi copiam feceris, certum est jam nunc in paucis quibusdam periculum facere.

Primo igitur quæro, an à Deo ita statui, aut alio quovis modo fieri potuisset, ut mundus esset finitus, id est, certo aliquo milliario numero circumscriptus. Non leve enim argumentum videtur mundum posse esse finitum, quod plerique omnes impossibile putent esse infinitum.

Secundo, si quis mundi hujus finibus prope assideret, quæro an possit gladium per mundi latera ad capulum usque transmittere, ita ut totus fere gladius extra mundi mœnia emergeret. Quod enim nihil extra mundum sit quod resistat, videtur factum facile; quod autem nihil extensum sit extra mundum quod recipiat, videtur ex ea parte impossibile.


Tertio (ad Artic. 29. Part. 2.) Si A B corpus transferatur à corpore CD, quæro qui constat translationem esse reciprocam. Putemus enim
CD tur-



CD turrim esse, & AB ventum occidentalem per latera turris transeuntem. Turris CD aut quiescit, aut saltem non recedit à vento AB. Si recedit, vel, quod ais, motu transfertur, utique versus occidentem movetur. Sed non fertur versus occidentem, cum & terra & ventus ferantur versus orientem. Videtur igitur respectu venti quiescere, cum nullum motum ab ipso suscipiat. Dicis tamen translationem (quæ quidem translatio motus est) ipsius turris

& venti esse reciprocā. Turris igitur respectu ejusdem venti & moveretur & quiesceret, quod proxime abest à contradictione. Signum autem est, cum ille qui à me sedente recessit ambulando, puta mille passus, rubuerit vel lassus fuerit, ego vero sedens nec ruborem contraxerim nec lassitudinem, illum solum motum fuisse, me vero per id temporis quiesvisse. Notionalem igitur duntaxat variatæ distantie respectum illius motu suscipio, nullum motum realem & Phisicum.

Quarto, Artic. 149. Part. 3. Sicque etiam efficitur ut terra circa suum axem



gret.

gyret, &c. Quomodo efficiet Luna ut terra uno die gyros suos absolvat, cum ipsa 30 fere dies in suas absumat periodos? Quæ vero scribuntur Artic. 151. hanc quæstionem, opinor, non attingunt.

Quinto de particulis istis contortis, quas striatas vocas. Quomodo ita contorqueri potuerunt, & eo ipso in infinita fragmina & atomos non disjungi? Quem lentorem, quam tenacitatem in prima illa materia, sibi ubique simili & homogenea, imaginari possumus? Unde mollescebant istæ particulæ primum, indeque obduruerunt?

Sexto, Artic. 189. Part. 4. *Animam sive mentem intime cerebro conjunctam.* Perlubenter equidem hic audirem sententiam tuam de conjunctione animæ cum corpore: an cum toto corpore conjungatur, an cum cerebro solo, an vero in solum conarium, tanquam in parvulum aliquod ergastulum, compingatur. Id enim sedem sensus communem, animæque ἀνεγκεῖν, à te monitus agnosco. Dubito tamen annon per universum corpus anima pervadat. Deinde quæro ex te, cum anima nullas habeat nec ramosas nec hamatas particulas, quomodo tam arcte unitur cum corpore. Sciscitorque subinde, annon aliquid exierit se in natura, cujus nulla ratio mechanica reddi potest. Illud ἀνέξιστον, cujus in nobis conscii sumus, quo oritur modo? Quæque ratio sit imperii animæ nostræ in spiritus animales, qua potest eos amandare in quamlibet corporis partem? Quomodo sagarum spiritus, quos vocant familiares, materiam tam apte sibi adaptant atque constringunt, ut visibiles & palpabiles se exhibeant execrandis vetulis? Hoc autem fieri non solum vetulæ, sed juvenes sagæ, nulla vi coactæ, sponte mihi fastiæ sunt non paucæ. Porro, annon & ipsi hoc ipsum aliquo modo in animabus nostris experimur, dum pro arbitrio nostro spiritus nostros animales ciere & sistere, exercere & revocare possumus? Quæro igitur, numquid dedecret hominem Philosophum in rerum universitate substantiam aliquam agnoscere incorpoream, quæ tamen possit aut omnes, aut saltem plurimas, affectiones corporeas, non secus ac ipsa corpora in se mutuo, in corpus aliquod imprimere, quales sunt motus, figura, situs partium? &c. Ino vero, cum ferme constet de motu, sine mora superaddere etiam quæ motus consequentia sunt, ut dividere, conjungere, dissipare, vincire, figurare particulas, figuratas disponere, dispositas rotare, vel quovis modo movere, rotatas continere, & id genus alia; unde lumen, colores, & reliqua sensus objecta prodire necesse est, juxta eximiam tuam Philosophiam.

Præterea, cum nihil nec corporeum neque incorporeum potest agere
C c in

in aliud nisi per applicationem suæ essentiz, necesse insuper ducere, ut, siue Angelus sit, siue Dæmon, siue anima, siue Deus, qui agat prædictis modis in materiam, essentia cujuslibet inequitet quasi illis materiæ partibus in quas agit, aut aliquibus aliis, quæ in has ipsas agant per motus transmissionem, imo ut integræ aliquando adsit materiæ quam gubernat & modificat; ut constat in genis, siue bonis, siue malignis, qui se humanis oculis patefecerunt: aliter enim quî poterant constringere materiam, & in hac vel illa figura continere?

Postremo, cum tam stupendam virtutem habeat substantia incorporea, ut per nudam sui applicationem, sine funiculis aut uncis, sine fundis aut cuneis, materiam constringat, explicet, dividat, projiciat, & simul retineat, annon verisimile videatur ut in seipsam se possit colligere, cum nulla obstat impenetrabilitas, & diffundere se denuo, & similia?

Hæc abs te peto, Vir doctissime, quantum per otium licebit, ut digneris exponere; utpote quem scio tam intima quam extima naturæ mysteria rimatum esse, commodeque interpretari posse.

Septimo, de globulis æthereis quæro, si Deus mundum ab æterno condidisset, annon multis abhinc annis comminuti & contracti fuissent isti globuli in partes indefinite subtiles, mutuis collisionibus vel attritionibus, primique elementi faciem jam olim induissent, ita ut universus mundus in unam immensam flammam multa ante secula abiisset?

Octavo, de particulis tuis aqueis, longis, teretibus & flexibilibus, numquid habent poros? Id sane mihi non videtur probabile; cum sint simplicia corpora, particulæque primæ ex nullis aliis particulis complicate, sed fragmina ex integra primaque materia elisa, ac proinde plane homogenea. Hinc dubito, quî poterunt flecti sine penetratione dimensionum. Putemus enim aliquando ad annuli instar incurvari; superficies concava minor erit convexa, &c. Rem probe tenes. Non est quod hic immerer.

Nec tamen si poros habere contenderes, quod nunquam opinor facies, difficultatem tollet. Quippe quod quæstio tunc instituetur de pororum labris vel lateribus: necessario enim aliquid flectetur quod non habet poros.

Atque hæc difficultas pertinet non solum ad oblongas tuas particulas, sed etiam ad ramosas illas, aliasque ferme omnes, quas flecti necesse est, & tamen non disrumpi.

Nono & ultimo, utrum materia, siue æternam fingamus siue hestern-

no

no die creatam, sibi libere permissa, nullumque aliunde impulsus suscipiens, moveretur, an quiesceret. Deinde, an quies sit modus corporis privativus, an vero positivus. Et si ve positivum malles si ve privativum, unde constet utrumlibet. An denique ulla res affectionem ullam habere possit naturaliter & à se, qua penitus potest destitui, vel quam aliunde potest adsciscere.

Hactenus fere circa generalia præclaræ tuæ Physices fundamenta lusi, dicam, an potius laboravi? progressurus posthac ad specialiora, si facilitas tua atque comitas eo me invitaverit, aut saltem permiserit. Et æquiori sane animo feres, cum hic de primis agatur principiis, si superstitiose omnia examinavi, viamque quasi palpendo, singulaque curiosius contrectando, lente me promovi & testudineo gradu. Video enim ingenium humanum ita comparatum esse, ut facilius longe quid consequens sit discipiat, quam quid in natura primo verum; nostramque omnium conditionem non multum ab illa Archimedis, *δὲς πρὸς τὴν γῆν* *κινῆσαι* *ἔστι δυνατόν*. Ubi primum figamus pedem invenire multo magis satagimus, quam ubi invenimus ulterius progredi.

Quod ad mirificas illas structuras attinet, quas ex illis principiis generalibus erexisti, quamvis prima fronte adeo sublimes & ab aspectu nostro remotæ viderentur, ut omnia apparerent nubibus tenebrisque obvoluta, dies tamen difficultates comminuit, paulatimque evanuerunt istæ obscuritates, adeo ut perpaucæ, præ quod tum factum est, in conspectum jam veniant.

Hoc autem necesse duxi ut profiterer, ne æternum à me expectes tibi creatum iri negotium, sed lubentius mihi rescribas, parique humanitate hæc seiscitationes meas accipias qua primas quas mihi objectiones. Quod si feceris (clarissime Cartesi) supra quam dici potest tibi obstrictum dabis

Canabrigiæ, è Christi Collegio,
3. Nonarum Martii, 1649.

*Humanitatis tuæ ac sapientiæ
admiratorem religiosissimum*

REN. MORUM.

EPISTOLA LXIX.

Clarissimo Doctissimoque Viro, Henrico Moro,
Renatus Descartes.

Responsum ad superiores Instantias.

V Ir clarissime, gratissimas tuas literas 3. Non. Mart. datas eo tempore accipio, quo tam multis aliis occupationibus distrahor, ut cogar vel hac ipsa hora festinantissime rescribere, vel responsum in multas hebdomadas differre. Sed vincet ea pars quæ festinationem persuadet; malo enim minus peritus quam minus officiosus videri.

Ad Instantias primas.

Proprietates alias aliis esse priores, &c. Sensibilitas nihil mihi videtur esse in re sensibili, nisi denominatio extrinseca: Nec etiam rei est adæquata: nam si referatur ad sensus nostros, non convenit tenuissimis materiæ particulis; si ad alios imaginarios, quales vis à Deo posse fabricari, forsitan etiam Angelis & Animabus conveniet; non enim facilius intelligo nervos sensorios adeo subtiles, ut à quàm minutissimis materiæ particulis moveri possint, quàm aliquam facultatem ejus ope mens nostra possit alias mentes immediate sentire sive percipere. Quamvis autem in extensione habitudinem partium ad invicem facile comprehendamus, videor tamen extensionem optime percipere, quamvis de habitudine partium ad invicem plane non cogitem: Quod debes etiam potiori jure quam ego admittere, quia extensionem ita concipis ut Deo conveniat, & tamen in eo nullas partes admittis.

Nondum demonstratum tangibilitatem aut impenetrabilitatem proprias esse substantiæ extensæ affectiones. Si concipis extensionem per habitudinem partium ad invicem, non videris negare posse quin unaquæque ejus pars alias vicinas tangat, hæcque tangibilitas est vera proprietas, & rei intrinseca, non autem ea quæ à sensu tactus denominatur.

Non potest etiam intelligi unam partem rei extensæ aliam sibi æqualem penetrare, quin hoc ipso intelligatur mediam partem ejus extensionis tolli vel annihilari; quod autem annihilatur aliud non penetrat: sicque meo judicio demonstratur impenetrabilitatem ad essentiam extensionis, non autem ad ullius alterius rei pertinere.

Affero aliam esse extensionem æquæ veram. Tandem igitur de re convenimus;

mus; superest quaestio de nomine, an hæc posterior extensio æque vera sit dicenda. Quantum autem ad me, nullam intelligo nec in Deo nec in Angelis vel mente nostra extensionem substantiæ, sed potentia duntaxat; ita scilicet ut possit Angelus potentiam suam exerere nunc in maiorem, nunc in minorem substantiæ corporeæ partem; nam si nullum esset corpus, nullum etiam spatium intelligerem cui Angelus vel Deus esset coextensus. Quod autem quis extensionem, quæ solius potentia est, tribuat substantiæ, ejus præjudicii esse puto, quod omnem substantiam, & ipsum Deum, supponit imaginabilem.

Ad secundas Instantias.

Vna vacui spatii partes absorbeant alteras, &c. Hic repeto, si absorbeantur, ergo media pars spatii tollitur & esse desinit: quod autem esse desinit aliud non penetrat; ergo impenetrabilitas in omni spatio est admittenda.

Intermundium illud suam haberet durationem, &c. Puto implicare contradictionem, ut concipiamus aliquam durationem intercedere inter destructionem prioris mundi & novi creationem. Nam si durationem istam ad successionem cogitationum divinarum vel quid simile referamus, erit error intellectus, non vera ullius rei perceptio. Ad sequentia jam respondi, notando extensionem, quæ rebus incorporeis tribuitur, esse potentia duntaxat, non substantiæ; quæ potentia cum sit tantum modus in re ad quam applicatur, sublato extenso cui coexistat, non potest intelligi esse extensa.

Ad penultimas Instantias.

Deum positive infinitum, id est, ubique existentem, &c. Hoc ubique non admitto. Videris enim hic infinitatem Dei in eo ponere, quod ubique existat; cui opinioni non assentior: sed puto Deum ratione suæ potentia ubique esse, ratione autem suæ essentia nullam plane habere relationem ad locum. Cum autem in Deo potentia & essentia non distinguantur, satius esse puto in talibus de mente nostra vel Angelis, tanquam perceptioni nostræ magis adequatis, quam de Deo ratiocinari. Sequentes difficultates ex eo præjudicio mihi videntur omnes ortæ, quod nimis assueverimus qualibet substantias, etiam eas quas corpora esse negamus, tanquam extensas imaginari, & de entibus rationis intemperanter philosophari, *entis* sive *rei* proprietates *non enti* tribuendo. Sed recte meminisse oportet, non-entis nulla esse posse vera attributa, nec de eo posse ullo modo intelligi *partem & totum, subiectum, adjunctum, &c.* Ideoque

optime concludis cum propriis umbris mentem ludere, cum entia logica considerat.

Certus finisque stadiorum numerus suffecerit, &c. Sed repugnat meo conceptui ut mundo aliquem terminum tribuam, nec aliam habeo mensuram eorum quæ affirmare debeo vel negare, quam propriam perceptionem. Dico idcirco mundum esse indeterminatum vel indefinitum, quia nullos in eo terminos agnosco: sed non ausim vocare infinitum, quia percipio Deum esse mundo majorem, non ratione extensionis, quam, ut sæpe dixi, nullam propriam in Deo intelligo, sed ratione perfectionis.

Ad ultimas Instantias.

Hoc si præsiteris, &c. Non certus sum meæ Philosophiæ continuationem unquam in lucem prodituram, quia pender à multis experimentis, quorum faciendorum nescio an copiam sim unquam habiturus; sed spero me hac ætate brevem tractatum de affectibus editurum, ex quo apparebit quo pacto in nobis ipsis omnes motus membrorum, qui affectus nostros comituntur, non ab anima, sed à sola corporis machinatione peragi existimem. Quod autem *canes annuntiant caudis, &c.* Sunt tantum motus qui comitantur affectus, eosque accurate distinguendos puto à loquela, quæ sola cogitationem in corpore latentem demonstrat. *Nec infantes ulli, &c.* Dispar est ratio infantum & brutorum: nec judicarem infantes esse mente præditos, nisi viderem eos esse ejusdem naturæ cum adultis: bruta autem eousque nunquam adolescunt, ut aliqua in iis cogitationis nota certa deprehendatur.

Ad Questiones.


Ad primam, repugnat conceptui meo, sive, quod idem est, puto implicare contradictionem, ut mundus sit finitus vel terminatus, quia non possum non concipere spatium ultra quoslibet præsuppositos mundi fines; tale autem spatium apud me est verum corpus: nec moror quod ab aliis imaginarium vocetur, & ideo mundus finitus existimetur; novi enim ex quibus præjudiciis error iste profectus sit.

Ad secundam. Imaginando gladium trajici ultra mundi fines, ostendis te etiam non concipere mundum finitum, omnem enim locum ad quem gladius pertingit revera concipis ut mundi partem, quamvis illud quod concipis vacuum voces.

Ad tertiam. Non melius possum explicare vim reciprocam in mutua duo-

duorum corporum ab invicem separatione, quam si tibi ponam ob oculos navigiolum aliquod hærens in luto juxta fluminis ripam, & duos homines, quorum unus stans in ripa navigiolum manibus pellat, ut illud à terra removeat, eodemque prorsus modo alius stans in navigio ripam manibus pellat, ut illud idem à terra removeat. Si enim horum hominum vires sint æquales, conatus ejus qui terræ insistit, terræque idcirco conjunctus est, non minus confert ad motum navigii quam conatus alterius qui cum navigio transfertur. Unde patet actionem quæ navigium à terra recedit, non minorem esse in ipsa terra quam in navigio. Nec est difficultas de eo quia te sedente recessit; cum enim de translatione hic loquor, intelligo tantum eam quæ fit per separationem duorum corporum se immediate tangentium.

Ad quartam. Motus lunæ determinat materiam cœlestem, & ex consequenti etiam terram in ea contentam, ut versus unam partem potius quam versus aliam, nempe in figura ibi posita, ut ab A versus B, potius



quam versus D flectatur, non autem dat ei celeritatem motus: & quia hæc celeritas pendet à materia cœlesti, quæ præterpropter eadem est juxta terram ac juxta lunam, deberet terra duplo celerius convolvi quam con-

convolvitur, ut circiter sexagies circulum suum absolveret eo tempore quo Luna semel percurrit suum sexagies majorem, nisi obstaret magnitudo, ut in Artic. 151. p. 3. dictum est.

Ad quintam. Nullum suppono esse lentorem nullamque tenacitatem in minimis materiæ particulis, nisi quemadmodum in sensibilibus & magnis, quæ nempe ex motu & quiete partium dependet. Sed notandum est, ipsas particulas striatas formari ex materia subtilissima, & divisa in minutias innumerabiles vel numero indefinitas, quæ ad ipsas componendas simul junguntur, adeo ut plures diversas minutias in unaquaque particula striata concipiam, quam vulgus hominum in aliis corporibus valde magnis.

Ad sextam. Conatus sum explicare maximam partem eorum quæ hic petis, in tractatu de affectibus. Addo tantum, nihil mihi hæcenus occurrisse circa naturam rerum materialium, cujus ratione mechanicam non facillime possim excogitare. Atque ut non dedecet hominem Philosophum putare Deum posse corpus movere, quamvis non putet Deum esse corpus; ita etiam cum non dedecet aliquid simile de aliis substantiis incorporeis judicare. Et quamvis existimem nullum agendi modum Deo & creaturis univoce convenire; fateor tamen me nullam in mente mea ideam reperire quæ repræsentet modum quo Deus vel Angelus materiam potest movere, diversam ab ea quæ mihi exhibet modum quo ego per meam cogitationem corpus meum movere me posse mihi conscius sum.

Nec vero mens mea potest se modo extendere, modo colligere, in ordine ad locum, ratione substantiæ suæ, sed tantum ratione potentæ quam potest ad majora vel minora corpora applicare.

Ad septimam. Si mundus ab æterno fuisset, proculdubio hæc terra non mansisset ab æterno, sed aliæ alibi productæ fuissent, nec omnis materia abiisset in primum Elementum: ut enim quædam ejus partes uno in loco comminuuntur, ita aliæ in alio loco simul coalescunt; nec plus est motus sive agitationis in tota rerum universitate uno tempore quam alio.

Ad octavam. Particulas aquæ, aliasque omnes quæ sunt in terrâ, poros habere sequitur evidenter ex modo quo terræ productionem descripsi, nempe à particulis materiæ primi elementi simul coalescentibus: cum enim hoc primum Elementum nullis constet particulis nisi indefinite divitis, hinc sequitur concipiendos esse poros usque ad ultimam possibilem divisionem in omnibus corporibus ex eo confatis.

Ad

Ad nonam. Ex iis quæ paulo ante dixi de duobus hominibus, quorum unus movetur una cum navigio, alius in ripa stat immotus, satis ostendi me putare nihil esse in unius motu magis positivum quam in alterius quiete.

Quid sibi velint hæc tua ultima verba, *An ullares affectionem habere potest naturaliter & à se, qua penitus potest destitui, vel quam aliunde potest adsciscere*, non satis percipio.

Cæterum velim ut pro certo existimes mihi semper fore gratissimum ea accipere quæ de scriptis meis vel quæres vel objicies, & pro viribus responsurum esse

Egmondæ, 17 Kalendas
Maii, 1649.

Tibi additissimum

RENATUM DESCARTES.

EPISTOLA LXX.

Illustrissimo Viro, Principique Philosopho, Renato
Descartes Henricus Morus.

*Instantia ad quasdam ex precedentibus difficultatibus. Variæ quæstiones
& objectiones de quatuor partibus Principiorum Philosophiæ.*

Vix me abstinebam (Vir Clarissime) quin ab acceptis tuis literis continuo ad te rescriberem : quamvis profecto id à me factum fuisset incivilius ; quippe quod satis ex iisdem intelligerem te per septimanas bene multas negotiis fore districtissimum. Quin & mihi ipsi tunc temporis à patris obitu acciderunt multa quæ me alio avocarunt, impediveruntque adeo ut quod voluisssem maxime præstare, haud commode potuisssem. Jam vero ad te tuaque reversus, sauisque nactus otii, rescribo, gratiasque ago maximas, quod quærendi de tuis scriptis quod lubet, obijciendique plenum mihi jus tam libere benigneque concesseris.

Cæterum, ne abuti videar hac summa humanitate tua ad prolixiores altercationes (nam hæctenus eo in loco Philosophiæ versati sumus qui *λογικῶς* lubricisque subtilitatibus opportunior exitit, in consiniis utique Physicis, Metaphysicis & Logicis) ad ea propero quæ certum magis firmumque iudicium capiunt.

Obiter tantum notabo, atque primo ad Responsionem ad Instantias primas, Quantum ad Angelos animasque separatas, si immediate

D d

suas

suas invicem deprehendant essentias, *id non dici posse sensum proprie, si ipsas fingat penitus incorporeos*. Me vero lubentem cum Platonicis, antiquis Patribus, Magisque ferme omnibus, & animas & genios omnes, tam bonos quam malos, plane corporeos agnoscere, ac proinde sensum habere proprie dictum, i. e. mediante corpore, quo induuntur, exortum. Et profecto, cum nihil non magnum de tuo ingenio mihi pollicear, perquam gratissimum esset, si conjecturas tuas, quas credo, pro ea qua polles sagacitate ac acumine, fore ingeniosissimas, mecum breviter communices super hac re. Nam quod quidam magnifice se efferunt in non admittendo substantias ullas quas vocant separatas, ut dæmonas, Angelos, animasque post mortem superstites, & maxinopere hic sibi applaudunt, quasi re benè gesta, & tanquam eo ipso longe sapientiores evasisent cæteris mortalibus, id ego nullius æstimo. Nam quod sæpius observavi, mihi sunt, ut plurimum, aut turini sanguinis homines, perditæque melancholici, aut immane quantum sensibus & voluptatibus dediti, Athei denique, saltem si permitteret religio, qua sola superstitiose freti Deum esse agnoscunt. Me vero non pudet palam profiteri, me vel semoto omni religionis imperio, mea sponte agnoscere genios esse atque Deum; nec ullum alium tamen me posse admittere, nisi qualem optimus quisque ac sapientissimus exoptaret, si deesset, existere. Unde semper suspicatus sum, profligatissimæ improbitatis summæque stupiditatis triumphum esse Atheismum; Atheorumque gloriationem perinde esse ac si stultissimus populus de sapientissimi benignissimique Principis cæde ova-
rent inter se & gratularentur. Sed nescio quo impetu huc excursum est. Redeo.

Secundo, quod ad demonstrationem illam tuam attinet, qua concludis omnem substantiam extensam esse tangibilem & impenetrabilem; video mihi hæc posse regerere: in aliqua scilicet substantia extensa partes extra partes esse posse, sine ulla *communione* seu mutua resistantia; atque hinc perit proprie dicta tangibilitas. Deinde, extensionem simul cum substantia in reliquam replicari extensionem & substantiam, nec deperdi magis quam illam substantiæ partem quæ retrahitur in alteram; atque hinc cadit illa impenetrabilitas: quæ profiteor me clare & distincte animo concipere. Quod autem *aliquid reale etandi possit* (sine ulla sui diminutione) *minoribus majoribusque terminis, constat in motu*, extuis ipsius principiis. Nam idem numero motus nunc majus nunc minus subjectum occupat, juxta tuam etiam sententiam. Ego vero pari facilitate & perspicuitate concipio dari posse substantiam quæ sine
ulla

ulla sui imminutione dilatari & contrahi possit, sive per se id fiat, sive aliunde.

Postremo igitur; & demiror equidem quod ne in intellectum tuum cadere possit, quod aut mens humana aut Angelus hoc ferme modo sint extensi, quasi implicaret contradictionem. Cum ego potius putarem implicare contradictionem quod potentia mentis sit extensa, cum mens ipsa non sit extensa ullo modo. Cum enim potentia mentis sit modus mentis intrinsecus, non est extra mentem ipsam, ut patet. Et consimilis ratio est de Deo: unde me consimilis ferit admiratio, quod in responsione ad penultimas instantias *concedis eum ubique esse ratione potentie, non ratione essentie*; quasi potentia Divina, quæ Dei modus est, extra Deum esset sita, cum modus realis quilibet intime semper insit rei cuius est modus: Unde necesse est Deum esse ubique, si potentia ejus ubique sit.

Neque suspicari possum per potentiam Dei intelligere te velle effectum in materiam transmissum. Quod si hoc intelligas, non video tamen quin eodem res recidat. Nam hic effectus non transmittitur nisi per potentiam Divinam, quæ attingit materiam suscipientem, hoc est, modo aliquo reali unitur cum ea, ac proinde extenditur; nec tamen interea separatur ab ipsa Divina essentia. Videtur enim, ut dixi, conspicua contradictio. Sed hisce statui non immorandum.

Ad quaestiones transvolo, postquam monuerim, quam contristat animi continuationis tuæ Philosophiæ desperatio: Sed æque refocillat tamen certa spes Tractatus illius desideratissimi quem hæc ætas parturit; cito & feliciter in lucem prodeat exopto.

Ad respons. ad quaestiones.

Ad primam & secundam respondes sane constanter & convenienter tuis principiis, quod à quolibet, nisi sententia vicerit melior, & expecto, & laudo.

Ad tertiam; ex navigiolo illo tuo has mihi comparavi merces. 1. In motu esse mutuum eorum quæ moveri dicuntur renixum. 2. *Quietem esse actionem, nempe renixum quandam*, sive resistantiam. 3. *Moveri duo corpora, esse immediate separari*. 4. Immediatam illam separationem esse motum illum, sive translationem, præcise sumptum.

Cum vero duo corpora se expediunt à se invicem, nisi vim in utroque expeditricem & avulsoriam adjeceris notioni translationis, seu motus, *motus hic erit extrinsecus tantum respectus, aut aliquid fortasse levius*. Separari

enim vel significat, superficies corporum quæ se modo mutuo tangebant distare à se invicem, (distantia autem corporum extrinsecus tantum est respectus;) vel significat non tangere quæ modo tangebant, quæ privatio duntaxat est, vel negatio. Certe de sententia tua hac in re non satis clare mihi constat.

Ego vero, si mihi ipsi permetteret, judicarem motum esse vim illam vel actionem, qua se à se invicem mutuo expediunt corpora quæ dicis moveri, immediatum autem illam separationem eorundem esse effectum dicti motus, quamvis sit vel nudus duntaxat respectus, vel privatio. Sed aliter tibi visum est Philosophari in explicatione definitionis Motus, Artic. 25. Part. 2. ubi equidem mentem tuam non plene capio.

Ad reliquas quæstiones omnes quas proposui respondisti perspicue & apposite. Sed ad pleniorém intelligentiam eorum quæ ad sextam accumulavi, expecto dum prodeat exoptatissimus tuus libellus de Affectionibus.

Cæterum, quantum ad verba illa mea ultima, *An ullares*, &c. parturibat profecto mihi mens evanidam aliquam subtilitatem, quæ jam effugit, nec mea interest revocare.

Hoc tantum quæram denuo, *utrum materia sibi libere permissa*, i. e. *nulum aliunde impulsus suscipiens, moveretur, an quiesceret*. Si movetur à se naturaliter, cum materia sit homogenea, & capropter motus ubique esset æqualis, sequitur quod tota materia simulac fuerit, disjiceretur in partes tam infinite exiles, ut nihil ullo modo ulterius abradi posset ab ulla particula. Quicquid enim abradendum imaginaris, jam disjectum est ac dissolutum, ob intimam vim motus per universam materiam pervadentis, vel, si malles, insiti. Nec partium aliæ aliis magis mutuo adhærescent, aliæve cursum flectent quam aliæ, cum sint omnes prorsus consimiles juxta quamlibet rationem imaginabilem. Nulla enim figuræ asperitas vel angulositas fingi potest, quæ non jam confusa sit ad ultimum quod motus poterit præstare; nec ulla motus inæqualitas in ullis particulis ponenda est, cum materia supponatur perfecte homogenea. Si naturaliter igitur moveretur materia, nec Sol, nec cælum, nec terra esset, nec vortices ulli, nec heterogeneum quicquam, sive sensibile, sive imaginabile, in rerum natura. Ideoque periret tuum condendi cælos terræque, cæteraque sensibilia, mirificum artificium.

Quod si materiam quiescere dicis ex se nisi aliunde movetur, quodque hæc quies sit positivum quid, vim inde materia æternum pateretur, & affe-

affectio naturalis destrueretur in perpetuum, ut contraria dominaretur: quod videtur dariusculum. Nec tamen tutius forsitan esset quietem statuere motus privationem, sive negationem; eaderet enim omnis resistendi actio in materia quiescente, quam tamen agnosceis: Quamvis & id ipsum intellectui meo nonnihil negotii facessat. Dum enim quietem actionem statuis materiæ, motum etiam eandem esse statuas necesse est; siquidem materia non agit nisi movendo, aut saltem conando motum. Male profecto me habent isti scrupuli, quos quam primum exinere mihi poteris, obsecro ut eximas.

Quinetiam adeo superstitiose hæc prima principia pensito, ut nova jam mihi ingeratur difficultas de natura motus. *Cum scilicet motus corporis modus sit, ut figura, situs partium, &c. qui fieri possit, ut transeat ab uno corpore in aliud, magis quam alii modi corporei?* Et universum imaginatio mea non capit, qui possit fieri ut quicquam quod extra subjectum esse non potest (cujusmodi sunt modi omnes) in aliud migret subjectum. Deinde quæram, cum unum corpus in aliud minus, sed quiescens, impingit, secumque defert, annon quies quiescentis corporis similiter transmigret in deferens, æque ac motus moventis in quiescens? Videtur enim quies res adeo otiosa ac pigra, ut eam tæderet itineris. Cum tamen æque realis sit ac motus, ratio cogit eam transire. Postremo, oblituspeço plane, dum considero quod tam levicula ac vilis res ac motus, solubilis etiam à subjecto & transmigrabilis, adeoque debilis ac evanidæ naturæ ut periret protinus nisi sustentaretur à subjecto, tam potenter tamen contorqueret subjectum, & hac vel illac tam fortiter impelleret. Equidem pronior sum in hanc sententiam, quod nullus prorsum sit motuum transitus, sed quod ex impulsu unius corporis aliud corpus in motum quasi expergiscatur, ut anima in cogitationem ex hac vel illa occasione; quodque corpus non tam suscipiat motum, quam se in motum exerat à corpore alio commonefactum; & quod paulo ante dixi, eodem modo se habere motum ad corpus ac cogitatio se habet ad mentem, nimirum neutrum recipi, sed oriri utrosque ex subjecto in quo inveniuntur; atque omne hoc quod corpus dicitur, *stupidè & remulente esse vivum, utpote quod ultimam infimamque Divina essentia*, quam perfectissimam vitam autumo, *umbram esse statuo* ac idolum, verumtamen sensu ac animadversione destitutum.

Cæterum transitus ille tuus motuum à subjecto in subjectum, idque à majori in minus, & vicissim, ut supra monui, optime repræsentat naturam meorum Spirituum extensorum, qui contrahere se possunt, &

rursus expandere; penetrare facillime materiam, & non implere; agitare quovis modo ac movere, & tamen sine machinis ullis & uncorum nexu. Verum diutius in hoc loco hæsi quam putaram: sed ad institutum propero, hoc est, ad novas quæstiones proponendas, super singulis illis articulis Principiorum tuæ Philosophiæ, quorum vim nōdum satis intelligo.

Ad Partis primæ Artic. 8.

Perspicue videmus, &c. Nec perspicue videmus extensionem, figuram, & motum localem, ad naturam nostram pertinere, nec videmus perspicue non pertinere. Utinam hic breviter demonstres, nullum corpus posse cogitare.

Ad Artic. 37.

Annon major perfectio est id solum velle posse hominem quod sibi optimum esset, quam posse etiam contrarium; cum melius sit semper felicem esse quam vel summis aliquando efferrī laudibus, vel etiam semper?

Ad Artic. 54.

Hic rursus repeto, quod oportebat demonstrare, nihil extensum cogitare, aut, quod videbitur facilius, nullum corpus posse cogitare. Est enim dignum ingenio tuo argumentum.

Ad Artic. 60.

Quamvis mens possit contemplari seipsam ut rem cogitantem, exclusa omni corporea extensione in hoc conceptu, non tamen evincit quicquam aliud nisi quod mens possit esse corporea vel incorporea, non quod sit de facto incorporea. Iterum igitur rogandus es ut demonstres, ex aliquibus operationibus mentis humanæ quæ corporeæ naturæ competere non possunt, hanc mentem nostram esse incorpoream.

Ad partis secundæ Artic. 25.

Non vim vel actionem qua transfert, ut ostendam illum semper esse in mobili, &c. Annon igitur vis ipsa atque actio motus est in re inota?

Ad Artic. 26.

Estne igitur in quiescentibus perpetua quædam vis stativa, vel actio sistendi se, & corroborandi contra impetus omnes, quibus partes eorum divelli possint & disjici, vel totum corpus alio abripi & transferri? Adeo ut quies recte definiri possit, vis quædam vel actio interna corporis, qua corporis partes arte constringuntur ad se invicem & comprimuntur, adeo-

adeoque à divisione vel dimotione per impulsum alieni corporis defenduntur? Hinc enim illud confurgeret, quod à meo intellectu minime alienum est, materiam utique vitam esse quandam obscuram (utpote quam ultimam Dei umbram existimo) nec in sola extensione partium consistere, sed in aliquali semper actione, hoc est, vel in quiete vel in motu, quorum utrumque revera actionem esse ipse concedis.

Ad Artic. 30.

Hic articulus videtur continere demonstrationem evidentissimam, quod translatio sive motus localis (nisi extrinsecus sit corporum respectus duntaxat) non sit reciprocus ullo modo.

Ad Artic. 36.

Quæro, annon mens humana, dum spiritus accendit attentius diutiusque cogitando, corpusque insuper ipsum calefacit, motum auget universi?

Ad Artic. 55.

Numquid igitur cubus perfecte durus, perfecteque planus motus super mensam, puta perfecte dura, perfecteque plana, eo ipso instanti quo à motu sistitur, æque firmiter coalescit cum mensa ac cubi vel mensæ partes cum seipsis; an manet divisus à mensa semper, aut ad tempus saltem, post quietem? Nulla enim est compressura cubi in mensam, cum hunc motum tanquam in vacuo factum imaginemur super mensam extramundi parietes, si fieri posset, sitam, (ac proinde ubi nullus locus est gravitati vel levitati) motumque sibi ex ea parte ad quam tendit cubus. Videntur igitur ex lege naturæ, cum jam divisa sint cubus & mensa, & nulla actio realis detur qua conjungantur, mansura semper actu divisa.

Ad Artic. 56. & 57.

Non video quid sit opus ut tam amplios particularum gyros ac lusus circa corpus B describas, Videtur enim satis, si putemus singulas aquæ particulas simili impetu moveri à materia subtili, & æquales esse particularum magnitudines. Hinc enim, cum B à quolibet latere brevissimis gyris vel semigyris (vel alia quacumque ratione) motus proxime adjacentium particularum contunditur, necessario quiescet, nec in unam partem magis quam in aliam promovebitur.



Ad

Ad Artic. 57. linea 19.

Nec incedent per lineas tam rectas, &c. Quid? quod jam ad circulem magis accedunt, cum antea ovalem magis referebant figuram? Non plene capio.

Ad Artic. 60.

Sed ipsas quatenus celerius aguntur in quaslibet alias partes ferri. Possuntne igitur celeritas motus & ejusdem determinatio divortium pati? Perinde enim videtur ac si fingamus viatorem currentem, cursum quidem dirigere Londinum versus, sed celeritatem cursus nihilominus ferri Cantabrigiam versus, vel Oxonium. Subtilitas quam neutra Universitas capiet, nisi forte intelligas per ferri, motum moliri, vel niti ut aliquorsum fiat motus.

Ad Partis tertia Artic. 16.

Annon juxta Ptolemaicam hypothesein Veneris lumen, ad modum Lunæ, nunc decrederet, nunc cresceret, quamvis non eisdem mensuris & legibus?

Ad Artic. 35.

Qui fit ut Planetæ omnes in eodem non circumgyrentur plano, videlicet in plano Eclipticæ, maculæque adeo Solares, aut saltem in planis Eclipticæ parallelis, ipsæque Luna, aut in Æquatore, aut in plano Æquatori parallelo, cum à nulla interna vi dirigantur, sed externo tantum ferantur impetu?

Ad Artic. 36, 37.

Vellem etiam mihi subindices rationem Apheliorum & Periheliorum planetarum, & quam ob causam locum subinde mutant singula: tum maxime cum in eodem sint vortice omnia, cur non iisdem in locis inveniuntur Planetarum omnium primariorum Aphelia & Perihelia? Præcessio etiam Æquinoctiorum quomodo ex tuis oriatur principiis? Hic enim tu veras & naturales horum Phænomenon causas explicare poteris, cum alii ficticias tantum exponant Hypotheses.


Ad Artic. 55.

Quæ in orbem aguntur. Sed quomodo primum inceperunt tam immensa materiæ spatia in gyros convolvi vorticesque fieri?

Ad

Ad Artic. 57.


Ejus partem quæ à funda impeditur, &c. Videtur perceptu difficilius, quod lapis A impediatur à motu in D, cum nec de facto illuc unquam




feratur, nec si impedimentum tolleretur illuc naturaliter pergeret; pergeret enim omnino versus C.

Ad Artic. 59.

Novam vim motus acquiri, & tamen conatum renovari hic dicis: Nescio quam bene ea cohereant. Nam si nova vis acquiritur, & superadditur, non est renovatio motus, sed augmentatio. Quod si globulus A movendo motum augeat in eodem puncto baculi existens, (nam vorticis globulos hoc exemplum respicit) cur non semper motus seipsum movendo accendit & augeat? Hoc autem modo jam pridem omnia in flammam abiissent.



Hic quæro, cum conatus globulorum, in quo lux & lumen consistit, fiat per integram vorticis amplitudinem, ita ut basis trianguli BFD mul-



to major esse possit quam DB, & ab utrisque productæ diametri DB, decies puta vel centies majoris factæ, extremitatibus globuli obliquo conatu in cuspidem aliquam ad F, oculum cujuslibet intuentis, reprimantur, cur lux, puta Solis, non major videtur quam quæ sit intra circumulum DCB?

Ad Artic. 72.

Non penitus hoc artificium contorquendi materiam primi elementi inspirales sive cochleares formas intelligo; præsertim in locis ab axe paulo remotioribus. Nisi hoc fiat, non tam quod globuli torqueantur circa particulas primi elementi, quam quod ipsum primum elementum, ab ipsis fortasse globulis leviter in gyrationem determinatum, se ipsum inter triangularia illa spatia contorqueat, lineasque spirales in se describat. Oro te, ut hic mentem plenius explices. Sed & alia subinde hic oritur dubitatio. Cum particule hæ contortæ consent ex minutissimis particulis & rapidissime agitatæ, quomodo illæ minutissimæ particule in ullam formam vel magnitudinem majorem coalescant, præsertim cum in formandis hæc particulis striatis distortio illa sit motusque obliquitas.

Ad

Ad Artic. 82.


Tam supremi quam infimi, &c. Prodigii instar mihi videtur rapidus hic globulorum supremorum cursus, (præsertim si cum mediolorum compareretur) & qui causas, quas in subsequenti Articulo profers, longe excedat. Si quid ulterius adinvenire possis, quo mollius hoc dogma reddatur, gratum profecto esset audire.

Ad Artic. 84.

Cum Cometarum cande, &c. Primam quamque impatienter tibi obtrudo occasionem explicandi quodlibet: Rogo ut hanc rem etiam hoc in loco breviter expdias.

Ad Artic. 108.


Per partes vicinas Eclipticæ Q H in calum abire coguntur. Quis fit ut non



omnes fere illuc abeant, potius quam à polo ad polum migrando vorticem, quem vocas, componant?

Ec 2

Ad



Ad Artic. 121. linea ultima.

A variis causis assidue potest mutari, &c. A quibus?

Ad Artic. 129. lin. 15.

Non prius apparere quam, &c. Cur circumfluxus illius materiæ, cum sit adeo transparent, impedit Cometam ne videatur? Circumfluens enim materia Jovem Planetam non abdit ab oculis nostris. Et cur necesse est ut non nisi obvolutus materia relictis vorticis Cometa inde egrediatur?


Ad Artic. 130. linea 21.

Minuitur quidem, &c. Cur non deletur penitus, si vortex A E I O fortius, vel æque fortiter, urget vicinos vortices, quam ille ab ipsis urgetur?

Ad Artic. 149.

Brevi accedet ad A, &c. Cur non ad F usque pergit, impingitque in ipsam terram?

Quia sic à recta linea minus deflectet. Non solum constat lineam NA continuatam cum AB, lineam magis rectam constituere quam eandem NA cum A D continuatam; sed cum Luna à centro S recedat ad mo-



dum globulorum cœlestium, magis naturaliter videtur consurgere versus B, quam versus D descendere.

E e 3

Ad

Ad Partis quartæ Artic. 22.

Nec terra proprio motu cieatur, &c. Non video quid refert unde sit motus ille circularis, modo sit in terra; nec deprehendo quin illi celerissimi gyri telluris impolita omnia rejicerent versus cœlos, quamvis motus non esset proprius, sed ab interna materia cœlesti profectus, nisi agitati circumjacentis ætheris, quam supponis multo celeriores, facum illud præverteret. Nec videtur terra habere rationem corporis quiescentis, quoad conatum partium recedendi à centro; (videtur enim illud necessarium in omni corpore circulariter moto:) sed quod simul circumvolvitur cum ambiente æthere, nec separantur superficies, hac forsân ratione dicatur terra quiescere. Hæc autem dico ut ex te intelligam, annon ratio, quod partes terræ non dissiliant, ad solam celeritatem motus particularum Ætheris referenda sit.

Ad Artic. 25.

Propter suarum particularum motum inest levitas. Quid igitur existimas de frigido & candenti ferro? utrum præponderat? Præterea, quomodo moles aquæ levior sit ob motum partium, cum motus harum partium tandem à globulis determinatur deorsum. Hinc enim videtur magis ac celerari descensus corporis, unde major æstimabitur gravitas. Atque hoc modo aqua auro præponderabit.

Ad Artic. 27.

Nisi forte aliqua exterior causa, &c. Quænam sint illæ causæ, paucis obsecro ut innuas.

Ad Artic. 133. lin. 12.

Axis parallelus. Parallelismi mentio hic me monet de difficultatibus quibusdam fere inextricabilibus. Primo, cur tui vortices non fiant in modum columnæ, seu cylindri, potius quam ellipsis, cum quodlibet punctum axis sit quasi centrum à quo materia cœlestis recedat, &, quantum video, æquali prorsus impetu. Deinde, primum elementum (cum ubique ab axe oporteat globulos æquali vi recedere) cur non æqualiter per axem totum in cylindri formam productum jacet, sed in sphericam figuram congestum ad medium fere axis relegatur? nam occursum hujus elementi primi ab utroque polo vorticis nihil impedit quo minus totus axis producta flamma luceret. Cum enim ubique cujuslibet axis æquali

vi recedant globuli, facilius præterlabentur se invicem, rectaque pergent ad oppositos polos materia subtilissima irrudentia fluente, quam excavabunt vel distudent sibi in aliqua axis parte spatium majus quam præsens & æquabilis vorticis circumvolutio lubens admitteret, vel sponte sua offerret. Tertio denique, cum globuli cœlestes circa axem vorticis ferantur *ἄλλοις* & axi & sibi invicem, nec parallelismum perdant dum locum aliquatenus inter se ipsos mutant, impossibile videtur ut ulla omnino fiat particularum striatarum intortio, nisi ipsæ particulae striatae in triangularibus illis spatiis circa proprios axes circumrotentur; quod quam commode fieri possit non video, quemadmodum supra monui.

Ad Artic. 187.

Nulla sympathia vel antipathia miracula, &c. Utinam igitur hic explices, si breviter fieri possit, qua ratione mechanica evenit ut in duabus chordis, etiam diversorum instrumentorum, vel unisonis, vel ad illud intervallum Musicum quod *Ἀναπρω* dicitur attem peratis, si una percutiatur, altera in altero instrumento subsiliat, cum quæ propiores & laxiores etiam sint, imo & in eodem instrumento in quo chorda percussa tensa, non omnino moveantur. Experimentum vulgare est & notissimum. Nulla vero sympathia mihi videtur magis rationes mechanicas fugere quam hic chordarum consensus.

Ad Artic. 188.

Ac sextam de homine essem, &c. Perge, Divine Vir, in isthoc opere excolendo & perficiendo. Pro certissimo enim habeo, nihil unquam Republicæ literariæ aut gratius aut utilius in lucem proditurum. Nec est quod experimentorum defectum hic causeris. Nam quantum ad corpus nostrum, accepi à dignis fide auctoribus, te, quæ ad humani corporis anatomem spectant, accuratissime universa explorasse. Quod autem ad animam, cum talem ipse nactus sis, quæ in maxime sublimes amplissimasque operationes evigilavit, spiritusque habeas agillimos & subtilissimos, generosa tua mens, innata sua vi cœlestique vigore, tanquam igni Chymicorum aliquo, freta, ita excutiet se, variasque in formas transmutabit, ut ipsa sibi facile esse possit infinitorum experimentorum officina.

Ad Artic. 195.

Et Meteoris explicui, &c. Pulcherrimam sane colorum rationem in Meteoris explicuisti. Est tamen ea de re improba quædam difficultas, quæ magnum imaginationi meæ negotium facessit. Quippe quod cum colorum

rum varietatem statuas ex proportionem quam habet globulorum motus circularis ad rectilinearem oriri, eveniet necessario, ut aliquando etiam in iisdem globulis & motus circularis rectilinearem, & rectilinearis circulearem eodem tempore superet. Verbi gratia, in duobus parietibus oppositis, quorum unus rubro, alter cæruleo colore obductus est, interjacentes globuli ob rubrum parietem celerius movebuntur in circulum quam in lineam rectam, ob parietem tamen cæruleum celerius in lineam rectam movebuntur quam in circulum, & eodem prorursus tempore; quæ sunt plane *contraria*. Vel sic, in eodem pariete, cujus pars, puta dextra, rubet, media nigra est, sinistra cærulea, cum ad oculum semper fiat deussatio, omnes globuli ob radiorum concursum singulorum globulorum motus proportionem, circularis nimirum ad rectum suscipient; adeo ut necesse sit, colores omnes in imo oculi permisceri & confundi. Neque ullam rationem solvendi hunc nodum excogitare possum, nisi forte supponendum sit, motum hunc circularem esse duntaxat breves quosdam & celeres conatus ad circulationem, non plenum motum, ut revera fit in motu recto dictorum globulorum. Et ad plerasque omnes alias difficultates quas tibi jam proposui, aliquales saltem solutiones vel proprio Marte eruere forsan potuero. Sed cum humanitas tua hanc veniam mihi concesserit, cumque singularis tua dexteritas in solvendis hujusmodi nodis, quam in nuperis tuis literis perspexi, me insuper invitaverit, (quamvis enim breviter, pro angustiis temporis in quas conjectus tunc eras, egisse te video; tam plene tamen mihi satisfacis, tamque fortiter animi sensus mihi moves, ac si præsens digitum digito premeres:) cum denique majorem præ se laturæ sint auctoritatem elucidationes tuæ, tum apud me ipsum, tum apud alios, si usus fuerit; è re nostra putavi fore, hæc omnes difficultates tibi ipsi proponere, quas cum solveris, nisi magnopere fallor, penitus tui Philosophiæ Principia intelligam universa. Quod equidem quanti facio vix credibile est. Hocce autem præsentem gryphos mihi cum expediveris (quod quanto citius fit, propter impotentem illum amorem quo in tua rapior, eo gratius futurum est) quæstiones alias è Dioptrice tua petitas mox accipies à

Philosophia tua studiosissimo

HEN. MORO.

E P I S T O L A LXXI.

Clatissimo Viro, summoque Philosopho,* Renato
Descartes, Henricus Morus.

Varia quaestiones & objectiones de Dioptrice & Meteoris.


EQuidem impense doleo, Vir Clarissime, quod tam subito à vicinia nostra abreptus sis, & in tam longinquas abductus oras. Habeo tamen, ut nihil dissimulem, quo hanc animi ægritudinem ac molestiam mitigare possim, meque ipsum consolari. Et certe non minimum est, quod is honor tibi optime merenti habitus sit, etiam apud gentes remotissimas, nominisque tui claritudo ad Septentrionales usque spissitudines crassasque nebulas tam potenter penetraverit; neque (id quod caput rei est) frustra: cum tantus literarum & literatorum amor generosum pectus Illustrissimæ Heroinæ, Serenissimæ Reginae Succorum, incesserit, ut fama librisque tuis non contenta, à scribendo ad te, ut eam inviseres, nunquam destiterit, donec voti facta sit compos. Quod cessurum credo in magnum illius regni commodum & ornamentum. Quas ob causas fateor me minus inclementer tulisse tuum ab hisce regionibus nostris abcessum, jacturamque itidem exoptatissimæ illius Epistolæ, quam, prout promisisti, ante abitum tuum à te expectabam, cujus jam recuperandæ spem omnem tantum abest ut abjiciam, ut è contra fortiter confidam te non solum illis, quas ante scripsi, sed & præsentibus literis, cum ad manus tuas pervenerint, brevi responsurum. Qua fretus confidentia ad Dioptricen tuam pergo, mox ad Meteora, si quid forte ibi occurrerit difficultatis, profecturus; ut tandem animam meam iis omnibus exonerare possim, quæ in rem nostram putabam fore tibi plenius proponere. Spero enim hoc modo me, cum omnia ex mea parte perfecta sint quæ præstare oportebat, molliorem animæ meæ conciliaturum quietem, minusque in posterum me anxie habiturum.

Ad Dioptrices cap. 2. Artic. 4. lin. 21.

Nulla modo illi oppositum. Linteam CE videtur opponi B pilæ, aliquo falcem modo, etiam quatenus pila dextrorsum fertur. Quod sic patebit. Nam GH plene opponitur pilæ B, perfectæque impedit cursum ejus, tam versus HE quam versus CE, seu deorsum. Cum igitur tam prope accedat CE ad posituram GH, ut desit tantum angulus HBE,


Ff

sive



sive GBC, ad perfectam oppositionem tendentiz versus HE; CE etiam suam servans posituram, aliquatenus opponetur pilæ B, etiam quatenus cursum tendit versus HE. Quod insuper manifestius apparebit, si fingamus CE udz argillæ planitiem, & pilam, puta æneam, ab A ferri ad B, ubi aliquousque penetrabit, sed statim suffocabitur vis cursus tam versus HE quam versus CE; quod tamen non fieret, si pila ferretur secundum lineam CBE, sed sine impedimento pergeret versus HE, præsertim si nulla inesset pilæ gravitas: unde patet planitiem CE opponi pilæ B descendenti ab A, etiam quatenus fertur versus HE, quod oportebat demonstrare.

Dimidiam suæ velocitatis partem amittat, lin. 27. Partem hic aliquam velocitatis amissam esse lubens concedam; sed quod & in hoc articulo &




in proxime sequenti supponis hanc partem velocitatis deperdi tantum versus CE, non versus FE, nullus capio. Cum enim unicus realis motus sit pilæ, (quamvis varias imaginari possimus prohibitu tendentias hujus motus, sive metas;) si minuitur hic motus, quacunque pergere fingis pilam, tardius incedet quam ante motum minutum. Causa igitur tendentiz pilæ ad I potius quam ad D, non petenda est à tarditate vel celeritate motus; sed

sed à resistantia magni illius anguli CBD, & à debilitate minoris illius anguli EBD, cujus acies ob exilitatem suam & materię fluiditatem facilius cedit pilę projectę quam obtusus angulus CBD. Alioqui si causa referenda esset ad celeritatem vel tarditatem, pila descendens ab H in B cursum etiam deflecteret. Hic schema tuum consule, si opus est, pag. 84.

Ad Artic. 6. lin. 7.

Tam oblique incumbat, ut linea FE ducta, &c. Perpetua hæc tua demonstrandi ratio, quo pila profectura sit, lepidam profecto in se habet subtilitatem, sed quę causam rei non videtur attingere. Vera enim & realis causa intelligenda est ex amplitudine anguli CBD, & exilitate EBD anguli, & ex magnitudine etiam pilę, quę quo major est, eo minorem




depressionem lineę AB versus CE requirit, ad resiliendum versus ærem L. Major enim pila non tam commode levat atque aperit cuspidem acutioris anguli, quo intret in ipsam puta aquam, sed contundendo potius transvolat reflexa.

Quod vim ejus motus augeat, lin. 22. Augmentum motus nihil efficit ad detorquendum cursum pilę inceptum, nisi sit positura alicujus corporis quod dictum cursum pilę versus partem aliam determinet. Quod ego hoc modo fieri auguror in mediis illis quę tu fingis radium facilius admittere, qualia sunt crystallus, vitrum, &c. Nempe cum acies anguli EBD in istiusmodi substantiis adeo dura sit & pervicax, ut nihil cedat, radius impingens in constipam & inclinantem anguli aciem nonnihil avertitur ab incepto cursu, & introrsum perpendicularum versus abigitur. Utraque igitur refractione reflexio quędam mihi videtur, vel saltem reflexionis quędam inchoatio. Atque quemadmodum in plena & libera reflexione determinatio tollebatur sine ulla retardatione cursus pilę, ita

F f 2

hic



hic ad minuendam vel mutandam determinationem nova tarditas vel celeritas non videtur necessaria. Solâ igitur determinatio minuta vel aucta sufficit ad utramvis refractionem. Neque enim A cum ad CE superficiem pervenerit, quatenus celerior vel tardior cursum flectit, sed quatenus impingit in corpus determinationem mutans. Alioqui, si nuda duntaxat accesserit celeritas vel tarditas, A semper pergeret à B in D.

In priori igitur refractione, videlicet à perpendiculari, determinatio deorsum minuitur necessario, pila autem retardatur per accidens, ob molliorem cursum immutantem. In posteriori determinatio deorsum augetur; pila autem si acceleratur, acceleratur per accidens, ob novi medii faciliorem transitum. Determinationis igitur mutatio ejusque causa ad refractiones juxta ac reflexionem sunt plane necessariae; velocitas & tarditas ipsius motus sunt duntaxat accessoriae, vel potius plane supervacaneae. Imo vero, novam quod pilæ seu globuli accelerationem attinet, in medio faciliori videtur quidem illa perceptu perquam difficilis; propterea quod novum illud medium non suppeditat novos gradus motus, sed tantum permittit pilæ, quos etiamnum habet superstites, sine ulteriori ulla diminutione integros possidere, cum nullos ad se arripiat, vel imbibat. Æqueque absurdum videtur, novos, vel, si mallet, pristinos motus gradus restitui pilæ medium facilius intranti, ac concedere in puncto reflexionis pilam aliquo momento hærec priusquam resiliat, quod merito explodis Art. 2. hujus cap.

Caput 6. ad Artic. 9.

Sed ex solo sinu exiguarum partium cerebri, &c. Suntne igitur istiusmodi in cerebri dissectione particule visibiles, an ratione duntaxat colligis istiusmodi


modi esse oportere in hunc usum destinatas? Mihi vero nihil opus harum esse videtur, sed eadem organa, quæ motum transmittunt, animam etiam commonefacere necessario, unde illa fiat motus transmissio, si nullum interjacet impedimentum.

Ad Artic. 13.

Similem illi, qua Geometra per duas stationes, &c. Duriuscula hæc videtur obscuriorque comparatio, in nihiloque consentiens, nisi quod utrobique binæ sumuntur stationes. Geometra enim, vel, si mallets, Geodæta, stationes sumunt, in linea ab arbore puta vel turri rectè producta; oculus locum mutans in linea transversa, & ferme objecto parallela, si recte rem capio.

Ad Artic. 16.

Ex cognitione seu opinione quam de distantia habemus, &c. Adæquatas fortasse causas apparentis corporum magnitudinis explicare perquam difficile esset. Sed in uno hoc maxime consistere opinor, nimirum in magnitudine & parvitate decussationis anguli. Ille enim quo major est, major apparebit ejusdem corporis magnitudo; quo minor, minor. Deinde, quod observatu dignissimum est, cum objectum aliquod, pollicem puta tuum, intra grani unius distantiam oculo admoveris, hic decussationis angulus quater aut quinquies major erit quam ille qui fit ad oculum à pollice distantem decem ferme grana; & si adhuc amovebitur pollex ab oculo per aliquot dena grana, semper angustior reddetur angulus decussationis, sed minori semper proportionem, per dena quæque grana, & minori; semper tamen aliquanto angustior evadit quam antea, donec tandem fiat tam angustus, ut rationem unius lineæ rectæ habere intelligatur. Hinc nemo mirabitur, si multo majorem pollicem deprehendat unico grano ab oculo distantem, quam cum decem abest ab oculo, & postea per multa dena grana remotum, ad singula grana dena, non multum magnitudinis deperdere; tam longinque tamen removeri posse, ut prorsus desinat ulterius apparere. Distantia enim crurum interni decussationis anguli minor esse poterit quam unius capillamenti nervi optici diameter. Quid autem hic facit opinio de distantia cum imaginis magnitudine comparata, parum intelligo. Neque certo scio quomodo aut oculus aut anima istam comparisonem secum instituat. Deprehensionem autem magnitudinis ex dicto angulo quo modo oriri concipio, sic videor mihi posse explicare. H I & K L sunt fundi duorum oculorum, majoris scilicet &



minoris. CD sit objectum majus & remotius, EF objectum minus, sed propinquius, EGF vel KGL angulus decussationis.

Primum, hic statuo esse nifum quendam, seu transmissionem motus ab C in L & à D in K. Et animadversionem meam recta excurrentem per lineam KGF D offendere unam extremitatem objecti CD, videlicet D, eo revera quo inest loco, & per lineam LGE C offendere alteram extremitatem objecti CD, videlicet C, in suo iidem loco; & sic de cæteris partibus tam extimis quam intermediis objecti CD. Recto igitur excursu hoc animadversionis meæ obversam objecti magnitudinem deprehendo, cujus diametri apparentis mensura est angulus EGF. Servatis igitur eisdem rectis lineis, per quas excurrat mea animadversio, & eadem anguli magnitudine in oculo HI, quæ modo in KL, dico objectum DC æque magnum apparere ac in oculo KL. Unde postea colligo, magnitudinem objecti apparentem ad anguli decussationis magnitudinem, non ad magnitudinem imaginis, referri. Postremo, ut magnitudo apparens objecti non sit ex magnitudine imaginis in oculi fundo (uti porro patet ex eo, quod eadem sit imaginis magnitudo objecti minoris EF quæ majoris CD, tam in HI oculo quam in KL,) ita neque simpliciter ex magnitudine anguli decussationis, alioquin objectum EF æque magnum appareret ac objectum CD, cum idem sit decussationis angulus. Sed amoto EF minore objecto, objectum CD revera multo majus apparebit quam apparebat modo objectum EF, cum tamen utraque cernerentur sub eodem decussationis angulo. Unde merito concludi potest, apparentem cujusque objecti magnitudinem partim ex anguli decussationis; partimque ex reali corporis magnitudine oriri. Neque mirum est animadversionem meam per lineas rectas nifus illius siye motus transmissi pergentem eo usque penetrare, ibique se sistere ubi motus hic primum incipit, videlicet ad C & D; ut

D; ut neque eas (cum revera magis distant quam EF, nec sub minori angulo videntur) apparere etiam magis distantes quam E & F, totumque adeo objectum CD majus simpliciter apparere quam objectum totum EF.

Ad Artic. 19.

Quoniam sumus affueti judicare, &c. Quid igitur censes de cæco illo à nativitate sua quem sanavit Christus, si speculum planum ipsi objectum fuisset antequam consuetudo judicium depravasset? Numquid ille vultum suum citra speculum, non ultra, vel pone speculum; deprehendisset? Mirifice torset & fatigavit imaginationem meam hic imaginis pone speculum lusus, cujus causas nondum me satis percepisse fateor. Neque enim mihi ullo modo satisfacit hæc depravata judicandi consuetudo. Si rationes reales magis magisque mechanicas excogitare poteris, & nobiscum communicare, rem sane gratissimam præstabis.

Ad Artic. 20. lin. ultima.

Inde sequitur diametrum illorum, &c. Cur non diameter Solis vel Lunæ videatur pedalis, vel bipedalis, ob angulum decussatorium ad eam rationem diminutum, quæ apta sit corpora ejusdem realis magnitudinis, cujus sunt Sol & Luna, sub hanc pedalem vel bipedalem magnitudinem apparentem, ad istas distantias, repræsentare?

Ad Artic. 21.


Quia tam versus Horizontem quam versus verticem, &c. Igitur majores Sol & Luna ad Horizontem apparent quam pro distantia oportet apparere. Et ea potius est dicenda vera magnitudo apparens, sive non fallax, quæ certæ legi subjicitur, quam quæ externis aliquibus adjunctis alteratur.

Ad Caput 7. Artic. 22.

Qua arte ob alias causas, &c. Quam invertendi artem hic intelligis? Et quas ob causas ab ipsa abstinēs?

Ad Caput 8. Artic. 20.

Aut diversis partibus parallelos. Quid sibi hic velint radii diversis partibus paralleli, nullo modo intelligo. Nihil enim hujusmodi quicquam exhibetur in schemate hoc, pag. 172. depicto. Ut mentem hic apertius explices oro. Obscurissimum etiam illud est, nisi ego sim tardissimus, quod habetur ad calcem hujus Articuli, de decussatione radiorum duo
vitra



vitra convexa, DBQ & dbq, permeantium. Sed ad marginem huius loci in editione tua Gallica relegas nos ad paginam 108. Ego vero ibi in vitris illis nullam omnino video radiorum decussationem, sed tantum inter vitra, ad communem focum I. Nulli enim ibi radii apparent nisi paralleli, qui parallelismum servant donec ad convexitates vitrorum BD, & bd, pervenerint, ubi demum ita incipiunt inflecti, ut omnium tandem fiat decussatio in foco I non alibi. Hic autem dicis radios etiam in illis vitris DBQ, & dbq, primo decussari in superficie prioris, puta DBQ, deinde in altera posterioris, puta dbq. Quam autem intelligis superficiem? Planam, an convexam? & eandem in utraque? Pergis porro, *si saltem qui ex diversis partibus allabuntur.* Quid est *ex diversis partibus allabi*? Numquid intelligis ex adversis sive oppositis? Nam paralleli etiam, qui ab eodem objecto emanant, recte dici possunt allabi ex diversis partibus. Hic prorsus in luto hæreo.

Ad Caput. 9. Artic. 5. pag. 185. lin. 10.

Quo magis hæc perspicilla objectorum imagines augent, eo pauciora simul representant. Cum perfectiora hæc perspicilla aperturam vitri exterioris maiorem habent, eaque plures proinde parallelos radios ab objecto suscipit quam imperfectiorum minor apertura, omnesque illi radii ad fundum oculi à convexa dicti vitri superficie contorquentur, cur non plura etiam objecta, æque ac maiores imagines in oculo poterunt depingere?

Ad

Ad Caput 10. Artic. 4. lin. 17.

Hyperbole omnino similis & equalis priori deprehendetur. Supponis igitur Hyperbolas omnes, quarum foci æquidistant à verticibus, quamvis hæ per conum, illæ per funem & regulam describantur, per *ἡφαίστιον* coincidere: imo hic ipsam verticum æquidistantiam supponis; quod ut falsum non video, ita puto tamen veritatem illius, cum fundamentum sit totius quam mox expositurus es machinæ, fuisse operæ pretium demonstrasse. Quod quidem si facili negotio mihi efficere poteris, lubens audiam; si res operosior fuerit, tanto auctori mallet credere, quam mihi ipsi multum negotium in intelligendo conflare.

Ad Artic. 6. pag. 203. lin. 27.

Habebit enim & aciem & cuspidem. Aciem habeat, sed quam cuspidem habere poterit non video, præsertim cum acies hujus instrumenti fabricanda sit recta, non concava, sic enim esset spherica; quæ si contingat extremos circulos latitudinis rotæ, ad interiores tamen non adaptabitur; major enim erit quam ut cum illis conveniat. Unde nec tangeat instrumenti hujus cuspis circumductam rotam in mediis latitudinis spatiis.

Ad Artic. 7. lin. 17.

Tantam esse non debere, ut ejus semidiameter, distantia quæ erit inter lineas 12 & 55. &c. Hujusce rei rationem autumo, quod tunc concava vitri superficies spherica fieret, non Hyperbolica.

Ad Artic. 10.

Vi nonnullos ex maxime industriis & curiosis, &c. Lubenter ex te audirem numquis ex peritioribus illis artificibus periculum fecerit adhuc in ingeniosissimo hoc tuo invento, & quo successu. Nam quod quidam hic mulstant, aliquos tentasse, operamque luisse, id aut falsum arbitror, aut opifices illos qui tentarunt ex peritioribus non fuisse.

Quod ad Metecora attinet, difficultates quæ ibi occurrunt pauciores sunt, & levioris, opinor, momenti. Quales autem sint mox audies.

Metecorum Cap. 1. Artic. 4. pag. 210. lin. 7.

Et denique prope terram quam prope nubes. Hoc asseris de radiis tam rectis quam reflexis. Qui autem fieri possit ut recti, nisi quatenus reflectuntur & replicantur iterum in se prope terram, vim caloris augeant, non video.

Gg.

Tum

Tum vero non sunt simpliciter recti, sed recti cum reflexis conjuncti. Sed & altior scrupulus mihi animo hic inhæret, de tua radiorum reflexione. Nam juxta vulgatam Philosophiam, simplicissima hujusce rei ratio est: Quod fili instar radius solaris reducitur & replicatur, adeo ut geminatam vim, aut duplam quasi crassitiem, reflexio necessario conciliet calori. Quod locum non habet in tua Philosophia. Neque enim duplicatur si-



lum, sed pila percutta tuum reflexionis modum rectius explicat. Unde vix videtur possibile ut calor geminetur. Quoniam pila descendens, puta ab A in B, simplicem dumtaxat motus lineam constituit, qui motus prorsus desit, prius quam eadem pila ascenderit à B ad C. Quapropter, cum unica linca motus una vice exultat, nequaquam videtur vis caloris duplo major fieri posse. Immo vero potius minui in aëre terræ vicino, cum nonnihil motus sui globulus seu pila communicet cum particulis terrestribus, unde in BC tardior motus erit & languentior, quam fuit in AB. Non igitur abs re esset, si hic explices, cur caleseat aër prope terram, magis quam prope nubes. Et annon fieri possit, ut quamvis motus minor sit prope terram quam in altioribus aëris regionibus, major tamen calor sentiatur, ob inæqualitatem hujusce motus.

Caput 7. Artic. 6. pag. 283. lin. 4.

Sed etiam inferiores adeo raras atque extensus, &c. At cum tam raræ sint, qui possunt alias in se cadentes nubes excipere, ibique sistere? Videntur potius præ sua tenuitate ad terram transmissuræ, si eo alias profecturæ essent.

Ad Artic. 7. lin. 2.

Ob aëris circumquaque positi resonantiam, &c. Ita sane fingit Paracelsus tonitru tam immaniter boare & mugire, ob arcuata cæli templa, non absimili ratione atque si quis æneam machinam nitrato pulvere onustam disploderet sub tecto testudineato. Tu vero, sat scio, nullis laquearibus ætherem claudi sustineas, ac proinde videatur verisimilius, quod quo magis ictus

ictus distat à terra, eo debiliior futurus sit sonitus. Cum nec tam commode fiat resonantia, quod quo reverberetur sonus, tam longe absit ab aliis corporibus.

Caput 9. Artic. 2. lin. 19.

Pauci quippe tantummodò radii, &c. Numquid igitur radorum paucitas cæruleum colorem generat? Videtur hoc haud ita consonum præcedentibus. Quippe quod cum supra statueris, colores oriri ex varia proportionè rotationis sphaerularum ad motum earundem rectum, & particulatim cæruleum ex rotatione minore quam progressu proficisci, quasi in eo ipso constaret ipsa cærulei coloris ratio; nunc tamen causam refert non tam ad rotationis defectum, quam paucitatem radorum resiliensium à superficie maris. Hic igitur quæro utrum sentias nullam aliam esse colorum rationem præter eam quam ipse tam subtiliter & ingeniose exposuisti; an & aliis modis colores oriri possint, nulla habita ratione rotationis globulorum motusque rectilinei: præsertim cum & ipse innuis aquam marinam cæruleam videri ob paucitatem duntaxat radorum. Et certe explicatu haud facile est, cum globuli in æquoris superficiem impingunt, cur non aut albescat mare aut rubescat, cum fortius impingunt, aut illis resistitur fortius in superficie maris, quam in cælo præ vaporibus albescente.

Proposui jam omnia quæ in scriptis tuis Physicis mihi visa sunt aut intellectu difficilia, aut intellectu difficulter vera. In quibus legendis mirari non immerito tibi subeat ingenii mei conditionem & fatum; qui cum profiteri ausim me cætera omnia in tuis scriptis satis intime intelligere, (ubi plurima tamen reperiuntur, quæ multo difficiliora videri possint quam de quibus sæpius hæsito) ista tamen quæ tibi proposui explicanda aut munienda, non æque ac illa cætera intelligerem. Ego vero hanc naturam meam atque indolem, quam à puero usque in me observavi, (qua nempe maxima sæpenumero feliciter vinco, victus interim à minimis) ad hunc usque diem emendare non potui. Humanitatis tuæ erit ignoscere quod nefas est corrigere, nulloque pacto aut affectatè ignorantia aut disputandi prurigini imputare, quod tam multa congesterim. Feci enim non ex effreni aliquo disputandi desiderio, sed potius ex religioso quodam erga tua studio,

Non tam certandi cupidus, quam propter amorem,

Quod te imitari avelo:

Quod scite quidem ille; ego vero hac in causa verissime. Quod reliquum

quum est, Clarissime Cartesi, exorandus es, ut ista omnia quæ scripsi æqui bonique consulas, & cum primo tuo otio rescribas. Quod si dignatus fueris, peritissimum illum tandem efficies, qui semper fuit hæcenus

Cantabrigiæ, à Collegio Christi,
11. Calend. Novem. 1649.

Philosophia tua studiosissimus,

HEN. MORUS.

EPISTOLA LXXII.

Fragmentum responsi ad superiores, inter Cartesii Manuscripta post mortem ejus inventum.

CUM tuam Epistolam decimo Calendas Augusti datam accepi, parabam me ad navigandum Sueciam versus, &c.

1. *An sensus Angelorum sit proprie dictus, & an sint corporei, necne.*

Resp. Mentis humanas à corpore separatas sensum proprie dictum non habere; de Angelis autem non constare ex sola ratione naturali an creati sint instar mentium à corpore distinctarum, an vero instar earumdem corpori unitarum; nec me unquam de iis, de quibus nullam habeo certam rationem, quicquam determinare, & conjecturis locum dare. Quod Deum dicas non esse considerandum nisi qualem omnes boni esse cuperent, si deesset, probro.

Ingeniosa instantia est de acceleratione motus, ad probandum eandem substantiam nunc majorem nunc minorem locum posse occupare; sed tamen est magna disparitas, in eo quod motus non sit substantia, sed modus, & quidem talis modus, ut intime concipiamus quo pacto minui vel augeri possit in eodem loco. Singulorum autem entium quædam sunt propriæ notiones, de quibus ex iis ipsis tantum, non autem ex comparatione aliorum est judicandum: Ita figuræ non competit quod motui, nec utrique quod rei extensæ. Qui autem semel bene perspexit nihil nullas esse proprietates, atque ideo illud quod vulgo vocatur spatium vacuum non esse nihil, sed verum corpus, omnibus suis accidentibus (sive iis quæ possunt adesse & abesse sine subjecti corruptione) exutum; notaveritque quomodo unaquæque pars istius sive spatii sive corporis, sit ab omnibus aliis diversa, & impenetrabilis, facile percipiet nulli alteri rei eandem divisibilitatem, & tangibilitatem posse competere. Dixi Deum extensum ratione potentiz, quod scilicet illa potentia se exerat, vel.

vel exerere possit, in re extensa; certumque est Dei essentiam debere ubique esse presentem, ut ejus potentia ibi possit se exerere, sed nego illam ibi esse per modum rei extensæ, hoc est, eo modo quo paulo ante rem extensam descripsi.

Inter merces quas ais te ex navigiolo meo tibi comparasse, duæ mihi videntur adulteratæ; una est, quod quies sit actio sive renixus quidam; cæsi enim res quiescens, ex hoc ipso quod quiescat, habeat illum renixum, non ideo ille renixus est quies. Altera est, quod moveri duo corpora sit immediate separari; sæpe enim ex iis quæ ita separantur unum dicitur moveri, & aliud quiescere, ut in art. 25. & 30. partis 2. explicui.

Translatio illa, quam motum voco, non est res minoris entitatis quam sit figura, nempe est modus in corpore. Vis autem movens potest esse ipse Deus conservantis tantumdem translationis in materia, quantum à primo creationis momento in ea posuit; vel etiam substantiæ creatæ, ut mentis nostræ, vel cujusvis alterius rei, cui vim dederit corpus movendi; & quidem illa vis in substantia creata est ejus modus, non autem in Deo: quod, quia non ita facile ab omnibus potest intelligi, nolui de ista re in scriptis meis agere ne viderer favere eorum sententiæ, qui Deum, tanquam animam mundi materiæ unitam, considerant.

Considero materiam sibi libere permissam, & nullum aliunde impulsu suscipientem, ut plane quiescentem, illa autem impellitur à Deo, tantumdem motus sive translationis in ea conservante, quantum ab initio posuit; neque ista translatio magis violenta est materiæ, quam quies: Quippe nomen violenti non refertur nisi ad nostram voluntatem, quæ vim pati dicitur, cum aliquid sit quod ei repugnat. In natura autem nihil est violentum, sed æque naturale est corporibus, quod se mutuo impellant, vel elidant, quando ita contingit, quam quod quiescant. Tibi autem puto ea in re parare difficultatem, quod concipias vim quandam in corpore quiescente per quam motui resistit, tanquam si vis illa esset positivum quid, nempe actio quædam, ab ipsa quiete distinctum, cum tamen nihil plane sit à modali entitate diversum.

Recte advertis motum, quatenus est modus corporis, non posse transire ex uno in aliud; sed neque etiam hoc scripsi; quinimo puto motum, quatenus est talis modus, assidue mutari. Alius est enim modus in primo puncto corporis A, quod à primo puncto corporis B separatur, & alius quod separatur à secundo puncto, & alius quod à tertio, &c. Cum autem dixi tantumdem motus in materia semper manere, hoc intellexi:

de vicijus partes impellente, quæ vis nunc ad unas partes materiæ, nunc ad alias se applicat, juxta leges in artic. 45. & sequentibus partis secundæ propositas. Non itaque opus est ut sis sollicitus de transmigratione quietis ex uno subjecto in aliud, cum ne quidem motus, quatenus est inodus quieti oppositus, ita transmigret.

Quæ addis, nempe tibi videri corpus stupide & temulente esse vivum, &c. tanquam suavia considero; & pro libertate quam mihi concedis, hic semel dicam, nihil magis nos à veritate inveniendâ revocare, quam si quædam vera esse statuamus, quæ nulla positiva ratio, sed sola voluntas nostra nobis persuadet; quando scilicet aliquid commentati sive imaginati sumus, & postea nobis commentum placet, ut tibi, de Angelis corporeis, de umbra divinæ essentia, & similibus; quale nihil quisquam debet amplecti; quia hoc ipso viam ad veritatem sibi præcludat.

EPISTOLA LXXIII.

Ad R. P. Mersennum.

De questione quadam, nempe utrum corpus aliquod magis aut minus gravitet prope centrum terræ, quam longe ab illo.

UT exolvam promissum quo me tibi per superiores obstrinxi, me misurum ad te quamprimum meam de questione proposita sententiam; adverto distinguenda esse hic duo gravitatis genera, unam, quæ dici potest vera sive absoluta, alteram, quæ vocari potest apparens sive relativa; ut cum dicitur hasta longe gravior esse si ab extremorum uno, quam si per medium prehendatur; hoc enim intelligitur de gravitate ejus apparente sive relativa; & perinde est ac si quis diceret hastam illam videri nobis hoc modo graviores, aut respectu nostri graviores esse, non vero in se. Antequam autem de relativa hac gravitate loquamur, definiendum est quid per absolutam veniat intelligendum. Plurimi opinantur illam esse vim quandam sive qualitatem internam in eorum corporum singulis, quæ dicuntur gravia, qua fit ut versus terræ centrum tendant; putantque nonnulli qualitatem hanc à corporis cujusque forma pendere, ita ut eadem materia quæ gravis est, cum aquæ formam obtinet, qualitatem hanc perdat, fiatque levis, cum accedit ut aëris formam sumat. Alii vero contra existimant non pendere illam nisi à materia, ita ut nullum sit corpus

pus quod non sit grave, quia nullum est quod ex materia non sit constatum, atque absolute loquendo quodlibet corpus gravius esse aut levius, propterea solum, quia magis aut minus materiae ejus compositionem ingreditur; quanquam prout hæc materia magis aut minus comprimitur, & majus aut minus spatium occupat, corpora quæ ex ea constant, graviora aut leviora videantur cæteris comparata, quod quidem gravitati relativæ assignant; atque ita imaginantur quod si posset in vacuo ponderari moles ex. gr. aëris cum plumbea, essetque in una exacte tantundem materiae, quantum in altera, essent in æquilibrio mansuræ.

Porro juxta duas hæc opinioniones, quarum prior est in scholis receptissima, altera vero apud eos, qui se supra vulgus aliquid sapere existimant, patet absolutam corporum gravitatem semper eandem esse, nec ratione diversæ à terræ centro distantia ullo pacto mutari.

Est & tertia quædam sententia, eorum nempe qui putant nullam esse gravitatem quæ non sit relativa, atque vim illam qua fit ut corpora, quæ gravia dicuntur, descendant, non esse in illis, sed in centro terræ, aut vero in tota mole ejus, illa ad se attrahente, quemadmodum magnes ferrum trahit, aut alio quovis modo. Et secundum hos quemadmodum magnes aliaque omnia agentia naturalia, quæ activitatis sphaeram aliquam habent, validius semper agunt cominus quam eminus, necesse habent fateri idem corpus eo gravius esse, quo magis ad terræ centrum accedit.

Quod ad me attinet, concipio naturam gravitatis modo à tribus illis valde diverso, sed quia illam explicare nequeo, nisi multa alia exponendo, de quibus non est animus hic loqui; hoc unum dicere possum, me ex ea nihil addiscere quod ad quæstionem propositam pertineat, nisi quod res sit plane de facto, hoc est, quod nequeat ab hominibus determinari, nisi quatenus possunt aliquod de illa experimentum facere: quinimo ex experimentis quæ hic in aëre nostro fiunt, colligi non potest quid versus centrum terræ longe inferius, aut longe supra nos futurum sit, quia si qua sit gravitatis aut imminutio aut augmentum, verisimile non est id ubique proportionem eandem observare.

Hujusmodi autem experimentum fieri potest; nempe aliquis è turris alicujus fastigio, ad cuius basin sit puteus profundissimus, potest ponderare aliquid plumbi funiculo longissimo alligati, illud primo cum toto funiculo alteri bilancis lanci imponendo, & deinde extremum tantum funiculi hujus ei alligando, pondusque ad putei usque fundum demittendo: hac enim ratione facile dēprehendetur utrum propius terræ centro

notabiliter magis aut minus gravitet quam remotius ab illo. Sed quia putei & turris altitudo parva est admodum si conferatur cum terræ semidiametro, atque etiam aliis de causis quas omitto, hoc experimentum utile esse non poterit nisi differentia gravitatis in eodem pondere sit admodum notabilis.

Aliud experimentum quod jam factum est, quodque videtur mihi validissime probare corpora à terræ centro remota, minus gravitare quam propinqua, est quod Planetæ, qui nullum ex se lumen habent, ut Luna, Venus, Mercurius, &c. cum sint, ut est probabile, corpora ejusdem cum terra materiæ, & cum cœli sint fluidi, quemadmodum omnes pene ætatis hujus Astronomi judicant, viderentur graves esse debere, & versus terram cadere, nisi maxima illorum ab ea elongatio hanc illis propensionem prorsus adimeret. Præterea videmus majores aves ut grues, ciconias, &c. multo facilius volare in altiore aëre, quam inferius; quod cum nequeat in totum assignari efficacix venti, siquidem cœlo etiam tranquillo idem illis accidit, locus est judicandi illas sua à terra elongatione leviores reddi. Quod nobis etiam confirmant dracones isti à pueris ex charta confecti, & nix omnis quæ in nubibus existit. Denique si experimentum illud quod à te ipso factum fuisse mihi significasti, & de quo alii etiam nonnulli scripserunt, verum sit, nempe globos majorum tormentorum versus Zenith recta explosorum, non recidere; colligere licet ictus eos in tantam altitudinem ferri, atque à terræ centro adeo elongari, ut omnem suam gravitatem inde deperdant.

Habes id totum quod in hanc materiam mihi Physica suppeditat. Transeo jam ad rationes Mathematicas, quæ ad relativam tantum gravitatem extendi possunt; ut vero illas declaremus determinanda est gravitas absoluta per hypothesin, quandoquidem aliter nequimus. Nimirum sumemus, si placet, pro absoluta cujusvis corporis gravitate vim eam, qua in aëre nostro, in certa à centro terræ distantia positum, neque ab alio ullo corpore impulsus aut sustentatus, tendit ad descendendum per rectam lineam, idque cum nondum incepit moveri. Dico in aëre nostro, quia in aëre subtiliori aut crassiori certum est illud fore aliquanto aut gravius, aut levius; illud autem pono in certa à terra distantia, ut scilicet ea sit cæterarum mensura; denique dico non debere illud impelli, aut sustentari, aut incepisse moveri, quia hæc omnia immutare possunt vim qua ad descendendum tendit.

Præterea supponemus singulas ejusdem corporis gravis partes semper retinere eandem vim sive propensionem ad descendendum, quam

quam à terræ centro elongetur, aut illi appropinquetur, aut in quacunque libuerit positione sumatur. Id enim, quanquam, ut jam dixi, non sit fortasse verum, tamen supponere debemus, ut calculum nostrum commodius subducamus: quemadmodum Astronomi supponunt medios in Astris motus, qui sint æquales, ut veros, qui inæquales sunt, eo facilius computent.

Posita autem æqualitate hac in gravitate absoluta, demonstrari potest relativam durorum omnium corporum in aëre libero consideratorum, nec ab ulla re sustentatorum gravitatem aliquanto minorem esse, cum centro terræ propinqua sunt, quam cum ab eo dissita; quanquam aliter se habeat de corporibus liquidis: atque è contra si corpora duo perfecte æqualia in bilance perfecte accurata invicem opponantur, cum bilancis istius brachia non fuerint horizonti parallela, duorum istorum corporum illud magis gravitaturum, quod terræ centro propius erit, & quidem tanto exacte magis, quanto erit centro propius. Unde etiam sequitur extra bilancem inter æquales ejusdem corporis partes, tanto minus gravitare superiores quam inferiores, quanto magis à centro terræ remotæ sunt; ita ut gravitatis centrum nequeat in ullo corpore, nec sphaerico quidem, esse centrum quoddam immotum.

Hujus autem rei demonstratio pendet ab unico tantum principio, quod quidem est totius staticæ generale fundamentum. Nempè quod.

Principium generale.

Neque major, neque minor vis requiritur ad aliquod corpus grave certam ad altitudinem elevandum, quam ad elevandum alterum minus grave ad altitudinem tanto majorem, quanto ipsum minus grave est; vel ad elevandum aliud gravius ad altitudinem tanto minorem.

Ut exempli gr. eadem vis quæ potest pondus aliquod centum librarum ad duorum pedum altitudinem elevare, potest etiam ducentarum librarum pondus ad pedis unius altitudinem elevare, aut vero quinquaginta librarum ad quatuor pedum altitudinem, & sic de cæteris: si quidem illis legitime applicetur.

Quod facile quilibet concefferit, modo attendat debere semper effectum esse proportionatum actioni quæ ad illum producendum est necessaria; atque ita si necesse sit eam vim adhibere, per quam centum librarum pondus potest ad duorum pedum altitudinem attolli, ad aliud aliquod attollendum ad unius tantum pedis altitudinem, id testatur hoc esse ducentas libras grave; idem enim est centum libras ad pedis unius alti-

tudine, n. iterumque centum libras ad pedis unius altitudinem attollere, ac si ducentæ libræ attollantur ad pedis unius altitudinem; idemque etiam ac si centum libræ ad duorum pedum altitudinem attollantur. Atque hinc clare sequitur relativam cujusque corporis gravitatem, sive quod idem est, vim eam, quæ requiritur ad illud sustinendum & impediendum quo minus descendat, quando certam positionem habet, debere mensurari per principium motus quem conficere debuisset ipsum sustinens potentia, tum ad illud attollendum, tum ad illud sequendum, si descenderet; ita ut quæ est proportio inter lineam rectam, quam motus iste describeret, atque eam quæ notaret quantum corpus hoc ad terræ centrum interea accederet, eadem sit quæ inter absolutam & relativam gravitatem intercedit: sed hoc exemplis quibusdam melius explicabitur.


Primum exemplum de trochlea.



Pondere E alligato ad trochleam D, circum quam ductus est funis ABC, si supponatur duos homines sustinere, aut æqualiter attollere singulos unum funis hujus extremum, liquet si pondus illud ducentas libras grave sit, quemlibet horum hominum non adhibiturum ad illud sustinendum aut attollendum, nisi vim eam quæ ad centum libras sustinendas aut attollendas requiritur: eorum enim quisque semissem tantum feret. Deinde vero si supponatur funis hujus extremum unum A, clavo alicui firmiter alligatum esse, aliudque extremum C, itidem ab homine sustineri, liquet huic homini in C non opus esse majore vi quam antea, ad hoc pondus E sustinendum; eam scil. quæ ad centum libras sustinendas requiritur: clavus enim ad A idem ibi præstabit, atque homo ille quem ibi antea supponebamus. Denique supponendo quod homo

homo hic ad C trahat funem ut pondus E attollat, liquet eum si vim cam adhibet, quæ centum libris ad duorum pedum altitudinem attollendis est proportionata, pondus hoc, quod ducentas grave est, ad pedis unius altitudinem elevaturum: funis enim ABC, cum sit duplicatus, duos pedes trahi debet in extremo C, ad faciendum ut æque attollatur pondus E, ac si duo homines, unus in extremo A, alter in extremo C, illum traherent uterque solum ad unius pedis longitudinem.

Porro advertendum est hanc unam rationem esse, non vero trochleæ figuram aut magnitudinem, quæ vim istam efficiat: trochlea enim sive magna sit, sive parva, eundem semper effectum sortietur. Et si alia itidem trochlea alligetur ad A, per quam ducatur funis ABCH, non minor vis requiretur ad H versus K attrahendum, atque ita pondus E attollendum, quam antea requirebatur ad C versus G trahendum; quia nempe hunc funem ad duos pedes trahendo, pondus hoc pede uno, ut antea attolletur. Verum si duabus hisce trochleis adjiciatur adhuc alia versus D, cui pondus alligetur, & per quam ducatur iterum funis eodem modo quo per primam, non requiretur major vis ad pondus hoc ducentarum librarum attollendum, quam ad aliud quinquaginta librarum absque trochlea attollendum; etenim funem duos pedes attrahendo, non attolletur pondus illud nisi semisse pedis. Et sic multiplicatis trochleis possunt vel maxima pondera quam minimis viribus attolli, adeo ut ex hoc calculo nihil subducendum




Hh 2

sic;

fit, præter trochleæ gravitatem & difficultatem portandi funem & efficiendi ut allabatur; & præterea semper requiritur vis aliquanto major ad attollendum quam ad sustinendum pondus aliquod. Sed hæc in calculum non veniunt, quando propositum est cætera rationibus Mathematicis examinare.

Exemplum secundum de plano inclinato.

Sit AC planum inclinatam supra horizontem BC , & tendat AB perpendiculariter versus centrum terræ. Mechanici omnes asserunt gravitatem relativam ponderis F , quatenus plano AC innititur, eandem habere proportionem ad gravitatem suam absolutam, atque lineam AB ad lineam



AC ; ita ut si AC dupla sit lineæ AB , & pondus F liberum in aëre, sit ducentas libras grave, sit futurum tantum centum libras grave respectu potentiz H , quæ illud in plano AC aut trahit aut sustinet; & hujus quidem rei ratio ex principio proposito plana est, hæc enim potentia H eandem actionem faciet in pondere hoc attollendo ad altitudinem BA , quam in aëre libero faceret, attollendo illud ad altitudinem æqualem lineæ CA . Quod tamen non est exacte verum, nisi cum supponuntur corpora gravia deorsum tendere secundum lineas parallelas, ut quidem vulgo supponitur, quando non alio consilio considerantur mechanicæ, quam ut ad usum referantur; siquidem non est sensibilis differentia, quam harum linearum, quatenus versus terræ centrum tendentium,

inclinatio efficere potest. Verum ut calculus iste omnino exacte subducatur, oporteret lineam CB partem esse circuli alicujus, CA vero lineæ spiralis; quæ pro centro haberent centrum terræ. Quando enim supponitur superficies AC esse omnino plana, tum gravitas relativa ponderis F non habet eandem proportionem ad absolutam, atque linea AB
ad

ad lineam $A C$, nisi quando pondus illud est in vertice A , cum enim aliquanto depressius est, ut versus D , aut versus C , proportio ista aliquanto minor est. Quemadmodum clare liquebit si concipiatur planum hoc produci usque ad punctum illud in quo incidere potest ad angulos rectos cum linea recta à terræ centro ducta. Ut si M sit centrum terræ, sitque $M K$ perpendicularis ad $A C$. Liqueat enim pondus F , positum in puncto K , nullam plane gravitatem ibi habiturum respectu potentia H . Ut vero innotescat quanta sit ejus gravitas respectu hujus potentia in singulis aliis plani hujus punctis, ducenda est recta quædam linea, ex. gr. $D N$, versus centrum terræ, atque in puncto N , sumpto prohibitu in ista linea, ducenda est $N P$ perpendicularis ad $D N$, & incidens in lineam $A C$ in puncto P . Nam ut $D N$ est ad $D P$, sic gravitas relativa ponderis F in D se habet ad gravitatem suam absolutam. Cujus rei ratio liquet, quia pondus istud quandiu est in puncto D , deorsum tendit secundum lineam $D N$, & tamen nequit incipere descendere nisi secundum lineam $D P$. Nota quod dico incipere descendere, non vero simpliciter descendere, quia nimirum ratio tantum habenda est initii descensus hujus; ita ut si ex. gr. pondus F insisteret in puncto D , non planæ superficiei, qualis supponitur $A D C$, sed sphaericæ aut quocunque alio modo curvæ, ex. gr. $E D G$, modo superficies illa plana, quæ curvam hanc in puncto D tangere supponeretur, eadem esset cum $A D C$, pondus hoc neque magis neque minus grave esset respectu potentia H , quam si plano $A C$ insisteret. Nam licet motus, quo pondus istud à puncto D , versus E aut G ascendens aut descendens super superficie curva $E D G$, sit prorsus diversus ab eo quo super plana superficie $A D C$ moveretur; nihilominus quando est in puncto D super $E D G$, determinaretur ad se versus eandem partem movendum, ac si superficiei $A D C$ insisteret, nempe versus A aut versus C . Et liquet mutationem quæ fit in isto motu, statim atque desinit tangere punctum D , nihil immutare posse in gravitate illa quam habet dum illud tangit. Nota etiam proportionem quæ est inter lineas $D P$, $D N$, eandem esse, atque inter lineas $D M$ & $D K$ quia rectangula triangula $D K M$ & $D N P$, sunt similia, ac proinde gravitas relativa ponderis F in D est ad gravitatem suam absolutam, ut linea $D K$ ad lineam $D M$; hoc est generatim loquendo, omne corpus quod à plano aliquo inclinatum sustentatur, tanto exacte minus gravitat, quam si non sustentaretur; quanto distantia, quæ est inter punctum in quo planum illud tangit, atque illud in quo perpendicularis à terræ centro cadit in idem planum, minor est ea quæ inter pondus & terræ centrum intercedit.

terea multum abesse ut vis tanta requiratur ad vectem hunc, cum est in A aut in E, movendum, quanta cum est in B aut in D; aut tanta cum est in B aut in D, quanta cum est in C. Cujus quidem rei ratio est, quod pondus ibi minus ascendat: quemadmodum liquet, si supposito quod linea COH sit horizonti parallela, & quod AOF illam ad angulos rectos secet, sumatur punctum G æqualiter distans à punctis F & H; & punctum B, æqualiter distans à punctis A & C; & ducta GShorizonti parallela, attendatur lineam FS, quæ indicat quantum ascendat pondus, dum vis agit per lineam AB, longe minorem esse lineam SO, indicante quantum ascendat pondus illud, dum vis agit per lineam BC.


Porro ad mensurandum accurate, quanta debeat esse hæc vis in singulis curvæ ABCDE punctis, cogitandum est illam eodem plane modo agere, ac si illa traheret pondus hoc super plano circulariter inclinato; singulorum autem plani hujus circulariter sive spherice inclinati punctorum inclinatio mensurari debet ex inclinatione lineæ rectæ circum in hoc puncto tangentis. Sic ex. gr. quando vis est in puncto B, ad inveniendam proportionem, quam illa habere debet cum gravitate ponderis, quod tum est in puncto G, ducenda est tangens GM, atque alia lineæ à puncto G, ex. gr. GR, quæ versus terræ centrum recta tendat, deinde à puncto M, sumpto ad libitum in lineæ GM, ducenda est MR ad angulos rectos ad GR; & cogitandum est ponderis hujus gravitatem in puncto G esse ad vim, quæ illi ibi sustinendo, aut juxta circum FGH movendo requireretur, sicut lineæ GM, se habet ad GR, ita ut si lineæ BO supponatur dupla lineæ OG; sufficit ut vis, quæ est in puncto B, sit ad pondus illud quod est in puncto G, ut semissis lineæ GR ad totam GM; si vero BO & GO sint æquales, debet hæc vis se habere ad hoc pondus, ut tota GR ad totam GM, &c.

Nec secus quando vis est in puncto D, ut innotescat quantum gravitet pondus, quod tum est in puncto I, ducenda est tangens IP, & recta IN versus centrum terræ, atque à puncto P, sumpto ad libitum in tangente ducenda est PN perpendicularis ad IN, ut habeatur proportio quæ est inter lineam IP & semissim lineæ IN, (si quidem DO ponatur dupla lineæ OI) ea nempe quæ est inter ponderis gravitatem & vim requisitam in D, ad pondus illud movendum, &c. Mihi autem videntur tria hæc exempla sufficere ad veritatem principii à me propositi asserendam, & ad demonstrandum illud omne, de quo in statica agere solent,

solent, ab eo pendere. Nam cuneus & cochlea non sunt nisi plana inclinata; rotæ vero ex quibus variz machinæ fabricantur, aliud non sunt quam vectes multiplicati. Denique bilanx nihil aliud est quam vectis in medio sustentatus. Itaque superest tantum ut explicem qua ratione duæ illæ, quas proposui conclusiones possint ex iis deduci.

Demonstratio qua explicatur, quo sensu dici possit, corpus aliquod minus gravitare prope terra centrum, quam longe ab eo.


Sit terræ centrum A, & B C D corpus aliquod grave, quod in aëre ita situm esse suppono, ut si nihil illud sustentet, descensurum sit ab H versus A, juxta lineam H F A, manentibus semper duabus ejus partibus



B & D, inæquali ab isto puncto A, atque etiam ab ista linea H F distantia. Attendamus autem quod dum corpus istud hoc modo descendit, pars ejus B moveri nequeat nisi juxta lineam B E, atque ita duas
istas


istas lineas DG & BE, repræsentare duo plana inclinata, super quibus moventur duo illa puncta B & D. Cum enim corpus hoc BCD sit durum, pars ejus D, quandiu illud movetur à BD usque ad EG, sustinetur ab omnibus aliis partibus, quæ sunt inter D & C, non minus quam si sustineretur à plano aliquo durissimo, quod esset in loco lineæ DG. (vide secundum exemplum quod est de plano inclinato.) At vero demonstratum jam fuit, omne corpus grave à plano inclinato sustentatum gravitare minus prope punctum in quo perpendicularis à centro terræ in planum hoc incidit, quam longe ab eo; unde clarescitur quod quando corpus BCD est versus H, pars ejus gravitat magis, quam cum est versus F. Atque idem etiam sequitur de parte ejus B aliisque omnibus, si modo excipiantur illæ quæ existunt in linea HF, quinimo si linea HF pro Mathematica tantum habeatur, non opus erit ut ejus partium habeatur ratio, ita ut totum hoc corpus minus gravitet prope centrum terræ, quam longe ab eo: quod erat demonstrandum.

Porro verum est, non posse hoc nisi de corporibus duris intelligi, liquida enim quod spectat, patet illorum, imò & mollium & flexilium partes non posse sic ab invicem sustineri. Ut ex. gr. si supponatur BD esse chorda, (intelligo chordam Mathematicam) cujus partes omnes



possint absque ulla resistantia æquabiliter flecti, sitque recta cum illa est in H; si illi permittatur descensus ad A, partes ejus paulatim inflectentur, prout ad punctum A accedent: ita ut cum pars ejus media erit in puncto F, extrema duo sint futura in punctis I & K, quæ talia fore suppono, ut distantia quæ est inter lineas IA & BA, sive KA & DA, sit æqualis lineæ CF. At

At vero si liquida corpora considerentur tanquam in vasis quibusdam posita, alia est iterum ratio quæ ostendit illa aliquanto minus gravitare prope centrum terræ, quam longissime ab eo. Nam advertendum est superficiem liquoris positi ex. gr. in vase B C, quam quidem nemo non



novit esse sphericam, longe magis gibbam esse quando vas illud est prope centrum terræ, quam cum magis ab eo remotum est; prout autem magis gibba est, centrum gravitatis istius liquoris à fundo vasis longius distat. Ita ut si ex. gr. A sit terræ centrum, N fundus vasis, & M centrum gravitatis molis aquæ in illo posite; sit autem linea N M exacte pedalis, quan-

quando fundus istius vasis est ad centrum terræ, potest idem illud vas concipi tantæ magnitudinis, & tantam aquæ quantitatem continere, ut cum fuerit à centro terræ sex pedibus elongatum, linea NM futura sit exacte tantum semipedalis: At vero hoc polito, si iterum ad sex pedes attollatur, non poterit quidem linea NM semisse pedis iterum decurrari, sic enim nihil illius remaneret; cum jam sit tantum semipedalis, sed minuetur tantummodo puta digito uno: deinde si idem illud vas ad sex iterum pedes attollatur, tum linea hæc NM, minus longe quam digito uno minuetur, &c.

Ad mensurandum autem quantum assurgat moles ista aquæ, dum vas attollitur, observandum est solum quantum ejus centrum gravitatis assurgat; punctum enim in quo centrum gravitatis gravium corporum occurrit, illud est quod semper determinat locum, in quo corpora illa sunt quatenus gravia; & quia vis illa quæ hoc vas ad sex primos pedes attollit, elevat hoc centrum quinque tantum pedibus & semisse; illud vero ad sex alteros pedes attollendo centrum elevat sex pedibus minus digito uno, liquet hanc vim tauto majorem requiri elevando illud ad alteram sexpedam, quam ad primam, quanto major est distantia sex pedum minus digito uno, quam distantia quinque pedum cum semisse. Parique ratione attollendo vas illud ad tres sexpedas, centrum gravitatis aquæ aliquanto magis assurgit quam antea, & sic consequenter; ita ut hæc aqua sit tanto levior prope centrum terræ, quam longe ab eo. Quod erat demonstrandum.


Alia demonstratio qua explicatur, quo sensu dici possit, corpus aliquod gravitare magis prope centrum terræ, quam longe ab illo.

Sit terræ centrum A, & BD bilanx cujus centrum sit C, ita ut duo ejus brachia BC & CD æqualia sint; sintque duo pondera unum in puncto B, alterum in puncto D, perfecte æqualia: jam vero quando linea BD non est parallela horizonti, pondus quod inferius est, ut in D, gravius est altero quod est in B, tanto exacte magis, quanto linea BA longior est quam linea DA. Si enim ducatur linea DE, tangens in puncto D circumulum BSD; & à puncto E linea EF, perpendicularis ad AD; gravitas ponderis politi in D erit ad absolutam suam gravitatem, ut linea DF ad lineam DE. (quemadmodum supra probatum fuit in exemplo 3 de vècte.) Deinde si ex centro bilancis ducatur linea CG perpendicularis ad ADG; duo triangula DFE & DGC erunt similia; quare ut DE est ad DF, ita CD ad CG,

punctis B & D, ductæ BL & DK, perpendiculares ad AC, sunt æquales; & rectang. sub CI, BA, est etiam æquale rectang. sub BL, CA; nam sumendo CA pro base trianguli ABC, erit BL ejus altitudo; deinde sumendo BA pro ejusdem trianguli base, erit CI ejus altitudo. Atque paritione rectangulum sub GC, DA, æquale est rectangulo sub KD, CA. Et quia BL & KD sunt æquales, rectangulum sub CI, BA, æquale est rectangulo sub CG, DA. Unde sequitur quod, ut DA est ad BA, ita CI ad CG. Pondus autem quod est in B, se habet ad pondus quod est in D, ut CI, ad CG ergo etiam ut DA ad AB.

Unde liquet centrum gravitatis duorum ponderum B & D, simul junctorum per lineam BD, non esse in puncto C, sed inter C & D, ex. gr. in puncto R, in quod suppono cadere lineam illam quæ dividit angulum BAD, in duas æquales partes. Hoc enim posito notum est in Geometria lineam BR esse ad RD, ut AB ad DA, ita ut debeant pondera B & D sustineri à puncto R, ut in æquilibrio maneant in eo in quo sunt loco. Verum si supponatur linea BD aliquanto magis aut minus inclinata super horizontem, aut si supponantur pondera hæc in alia à terra distantia; oportebit illa ab alio puncto sustineri, ut sint in æquilibrio; & sic illorum centrum gravitatis non est semper in eodem puncto.

Cæterum notandum est partes omnes ejusdem corporis æquales, si binæ inter se conferantur, eodem modo ad invicem referri, quantum ad illarum gravitatem & commune centrum gravitatis, ac si in bilance sibi mutuo opponerentur; ita ut ex. ca. in sphaera BEG, cujus centrum est C, si illa concipiatur divisa in plures æquales partes ut B, E, G, &c. centrum gravitatis binarum partium B & D, simul consideratarum in eodem loco sit, ac esset, si linea BCD esset bilanz habens centrum in C, nempe inter C & D; siquidem D ponitur terræ centro propior, quam B. Et centrum gravitatis duarum partium G & F, est etiam inter C & G, & centrum duarum E & H, est inter C & E, & sic de reliquis. Unde clare sequitur gravitatis centrum



totius istius sphaeræ non esse in puncto C, quod figuræ ejus cætrum est, sed paulo inferius in recta illa linea quæ à figuræ ultius centro versus terræ centrum tendit. Quod quidem paradoxum admodum videbitur iis qui ad rei rationem non attendent, sed ea considerata liquet veritatem hanc esse Mathematicam & certissimam.

Imo & demonstrari potest centrum hoc gravitatis, quod locum mutat prout sphaera hæc positionem suam mutat, esse semper in superficie alterius exiguæ sphaeræ ab eodem cum illa centro descriptæ, & cujus radius est ad tres quartas radii majoris sphaeræ, ut totus radius majoris ad distantiam centri illarum figuræ à centro terræ. Quod quidem hic explicandum non moror, siquidem ii qui sciunt qua ratione figurarum Geometricarum centra gravitatis inveniantur id satis per se intelligere poterunt, aliis vero delectationis forte nihil allaturum esset. Præterquam quod scriptum hoc jam prolixius est, quam destinaveram.

Dominus Descartes ab eo tempore rogavit R. P. Mersemmum ut hæc ultimas lineas deleret, quia nempe hæc scribendo obrutus somno hallucinatus fuerat.

EPISTOLA LXXIV.

Epistola Cartesii ad R. P. Mersemmum,

Data 12 Septemb. 1638.


Ad demonstrationem principii supra positi.

NON erat mihi animus scribere ad te ante unam aut alteram hebdomadam, ne te crebrioribus literis fatigarem. Sed mihi modo redduntur novissimæ tuæ primo Septembris datæ, ex quibus intelligo principium meum quod in Geostaticæ quæstionis examine supposui, revocari in dubium; & quia si illud minus verum sit, cætera quæ ex eo deduxi, longe minus vera erunt, ne unum quidem diem differre velim, quo accuratorem illius ad te explicationem mittam.

Ante omnia advertendum est me sermonem fecisse de vi ea quæ ponderi ad aliquam altitudinem attollendo sufficit, *quæ quidem vis duas semper dimensiones habet*; non vero de ea quæ illi sustinendo in unoquoque puncto sufficit, *quæ quidem nunquam plures dimensiones habet, quam unam*; ita ut hæc duæ vires non minus à se invicem differant, quam *superficies a linea*. Eadem enim illa vis, quæ clavo alicui inesse debet ad centum librarum pondus uno momento sustinendum, sufficit etiam ad illud anno integro susti-

sustinendum. Sed una eademque virtutis hujus quantitas, quæ ponderi huic ad pedis unius altitudinem attollendo sufficit, non sufficit eadem numero ad illud attollendum ad duorum pedum altitudinem; neque clarius est binarium additum binario facere quaternarium, quam duplum istius esse adhibendum. Quia autem hoc unicum pro principio supposui, divinare nequeo quid sit in causa cur illud admittere dubitent. Itaque loquar de iis quæ dubitationem fecisse suspicabor, quæ maxima ex parte non oriuntur nisi ex nimia in mechanicis peritia, hoc est, exinde quod aliquis fuerit præoccupatus principiis iis; quæ in hac materia ab aliis assumuntur, quæque cum non sint penitus vera, eo facilius decipiunt, quo majorem habent veri speciem.

Primum illud quo possit quis in hoc præoccupari, est, quod plurimi soleant spatii considerationem cum temporis aut celeritatis consideratione confundere; ita e. g. in vecte, sive quod idem est in balance *B C D A*,



supposito quod radius *A B* sit duplus alterius *B C*, & pondus in *C* duplum sit ponderis in *A*, ita ut sint in æquilibrio: ubi dicendum esset æquilibrii hujus causam esse, quod si pondus *C* attolleret pondus *A*, aut ab eo attolleretur, tum *C* non pertransiret nisi subduplum spatium ejus quod *A* pertransit; illi dicunt quod duplo tardius moveretur; qui quidem
error


error eo deterior est, quo agnitu difficilior. Quod enim ponderum horum alterum debeat esse alterius duplum, ut illa in æquilibrio maneant, id non fit ex differentia celeritatis, sed ex differentia spatii; ut liquet exinde quod ad attollendum manu e.g. pondus F usque ad G, non requiritur



vis exacte dupla ejus quæ prima vice adhibita fuerat, ad hoc ut duplo citius attollatur; sed adhibenda est vis major aut minor dupla, pro diversa proportionem, quam celeritas ista habere potest cum causis quæ illi resistunt. Cum è contra, vis requiratur exacte dupla ad illud eadem celeritate duplo altius attollendum, nempe usque ad H. Dico exacte dupla, ut in numeris unitas addita unitati facit exacte binarium: requiritur enim certa virtutis hujus quantitas ad pondus hoc ab F usque ad G attollendum, atque iterum eadem ejusdem quantitas ad illud à G usque ad H attollendum. Quod si celeritatis consi-

derationem cum spatii consideratione jungere voluissim; habuissim necesse tres dimensiones virtuti isti tribuere, ut vero illam excluderem duas tantum illi tribui. Et si quid artis in ulla exigui hujus de statica scripti parte ostendi, velim sciant me nusquam plus quam in hoc ostendisse. Nihil enim de celeritate bene & solide dici potest, nisi prius recte explicata gravitate, totoque simul mundi systemate. Quia autem id aggredi nolueram, inveneram rationem omittendi hanc considerationem, atque ab aliis ita abstrahendi, ut possim illas absque ea explicare. Quanquam enim nullus motus aliquam celeritatem non habeat, nihilominus sola celeritatis hujus incrementa aut decrementa in considerationem veniunt; & cum de corporis alicujus motu agendo, supponitur motus iste fieri secundum celeritatem eam quæ isti corpori maxime naturalis est, idem est ac si non omnino consideraretur.


Alia ratio quæ forsan obstitit quo minus principium meum fuerit probe intellectum, est quod existimaverint posse absque illo demonstrari eorum nonnulla quæ ex illo tantum demonstravi, ut ex. gr. de trochlea ABC, putarunt satis esse ut quis sciret clavum in A, sustinere semisem ponderis B, ut concludat manum in C non egere ad sustinendum aut attollendum pondus hoc trochleæ ita applicatum, nisi vi subdupla ejus quæ requireretur ad illud absque trochlea sustinendum aut attollendum. Sed quanquam hoc optime explicet qua ratione applicatio virtutis illius, quæ est in C fiat ad pondus duplum ejus quod absque trochleâ eadem



eadem illa vis posset attollere, idque & ipse ego in ratiocinatione mea adhibuerim; nego tamen ex eo, quod clavus A partem ponderis B sustineat, simpliciter sequi vim attollentem in C ideo minorem esse posse, quam si non sustineretur: si enim hoc verum esset, tum fune CE, ducto per trochleam D, vis in E pari ratione minor requireretur, quam in C; siquidem clavus A sustinet non minus quam antea pondus hoc, quod ab alio præterea clavo (eo nempe cui trochlea D est alligata) sustinetur. Itaque ut vitetur error, exinde quod clavus A sustinet semissem ponderis B, aliud concludi non debet, nisi quod per istam applicationem una ex dimensionibus virtutis requisitæ in C, ad pondus hoc attollendum, minuitur dimidia sui parte, & quod alia postmodum fit dupla: ita ut si linea FG repræsentet vim requisitam sustinendo ponderi B in puncto

K k

ali-




aliquo absque ullius machinæ ope; & rectangulum GH repræsentet vim requisitam ad illud idem pondus attollendum ad pedis unius altitudinem; clavus A sustentando minuit semisse dimensionem eam quæ per lineam FG repræsentatur; & duplicatio chordæ ABC duplicat alteram dimensionem, illam nempe quæ repræsentatur per lineam FH ; atque ita vis, quæ requiritur in C ponderi B attollendo ad unius pedis altitudinem, repræsentatur per rectangulum IK . Et quemadmodum in Geometria notum est lineam additam superficiei, aut ab ea ablatam, neque augere illam, neque minuire; ita hic notandum est vim, quæ clavus A sustinet pondus B , cum unam tantum dimensionem habeat, efficere non posse ut vis illa, quæ est in C , secundum duas suas dimensiones considerata, minor esse debeat ad pondus B hoc pacto attollendum, quam ad illud absque trochlea illa attollendum.

Tertia ratio quamobrem aliquod obscuritatis in principio meo imaginati fuerint, est quod verba singula, quibus illud explico, minus forte attenderint; non enim simpliciter dico vim eam, quæ sufficit attollendo ponderi quinquaginta librarum ad quatuor pedum altitudinem, posse aliud ducentarum librarum pondus ad unius pedis altitudinem attollere; sed dico illam id posse, modo applicetur; applicari autem nequit, nisi machinæ alicujus ope, aut alterius cuiuspiam inventi, quæ efficiat ut pondus hoc ad pedem tantum unum attollatur, quandiu tota hæc vis per totam quatuor pedum longitudinem agit; atque ita transformet rectangulum illud, per quod repræsentatur vis requisita ad attollendum pondus hoc ducentarum librarum ad pedis unius altitudinem, in aliud quod æquale sit & simile ei, per quod repræsentatur vis requisita ponderi 50 librarum ad quatuor pedum altitudinem attollendo.

Denique eo sensu sequius de principio hoc senserint, quod putarint me attulisse exempla trochleæ, plani inclinati & vectis, quibus veritatem ejus, tanquam si dubia foret, melius suaderem; aut vero quasi tam male ratiocinatus fuero, ut studuerim probare principium, quod ex se debet esse tam clarum, ut non egeat probari per alia ista, quæ tam difficilia sunt,


sunt, ut à nemine fortasse antehac recte probata fuerint. At vero ista non adduxinifi ut ostenderem principium hoc ad omnes illas quæstiones extendi; de quibus in statica agitur; aut potius ut hoc prætextu illa infererem scripto meo, quod mihi jejunum nimis & sterile visum fuisset, si diseruissem tantum de hac nullius usus quæstione, quam mihi propositum erat examinare.

Ex iis autem quæ hætenus dicta sunt satis liquet quæ ratione vectis & trochleæ vires ex principio meo demonstrantur; ita ut supersit tantum planum inclinatum, cujus demonstratio ex hoc schemate clare liquebit, in quo FG repræsentat primam dimensionem virtutis illius quæ describit rectangulum FH, trahendo pondus D super plano BA, ope chordæ huic plano parallelæ, & circa trochleam juxta A ductæ; ita ut GH altitudo



nempe hujus rectanguli, æqualis sit lineæ BA, per quam moveri debet pondus D, ut ad altitudinem lineæ CA ascendat. NO autem repræsentat primam dimensionem virtutis alterius similis, rectangulum NP describentis, dum ea pondus L usque ad M attollit. Suppono autem lineam ML æqualem esse lineæ BA, & duplam lineæ CA; NO vero æqualem esse FG; atque etiam OP æqualem GH. Præterea adverto quod dum pondus D movetur à B versus A, concipi potest motus iste


esse ex duobus aliis compositus, quorum unus illud promovet à BR versus CA, ad quem efficiendum vis nulla requiritur, sicut omnes ii supponunt qui de mechanicis tractant, alter vero illud attollit à BC versus RA, ad quem solum efficiendum vis requiritur; ita ut neque major vis requiratur neque minor ad illud movendum juxta planum inclinatum



BA, quam juxta perpendicularem CA: suppono enim plani inæqualitates, &c. nequaquam impedire; quemadmodum supponi solet in ejusmodi materia. Sic ergo tota vis FH adhibetur tantum ponderi D attollendo ad altitudinem lineæ CA; quia autem vis ista prorsus æqualis est vi NP, quæ requiritur attollendo ponderi L ad altitudinem lineæ LM, quæ quidem dupla est lineæ CA; ex principio meo concludo pondus D esse duplum ponderis L. Cum enim æqualis vis utrique attollendo sit adhibenda, tantum est in uno quod attollatur, quantum in alio; & satis est ut quis sciat ab unitate ad binarium numerare, ut intelligat perinde esse si ducentæ libræ à C usque ad A, aut vero centum libræ ab L usque ad M attollantur; cum ML sit dupla lineæ CA, &c.

Scribis etiam debuisse me accuratius explicare naturam spiralis planum æqualiter inclinatum representantis; & modum quo flectitur chorda,

da, quæ postquam recta fuit & horizonti parallela, versus terræ centrum libera in aëre descendit; atque etiam magnitudinem exigua illius sphaeræ in qua reperitur centrum gravitatis majoris alterius sphaeræ. Verum, quod ad spiralem illam attinet, illa habet plurimas proprietates, ex quibus satis dignosci possit: si enim A sit centrum terræ, & $ANBCD$ spiralis illa; ductis lineis rectis AB , AC , AD , & similibus, eadem erit proportio inter curvam ANB & rectam AB , atque inter curvam



ANB , & rectam AC , aut inter $ANBCD$ & AD , & sic de reliquis. Et si ducantur tangentes DE , CF , GB , &c. anguli ADE , ACF , ABN , &c. æquales erunt. Quantum ad modum quo flectitur chorda cadendo, mihi videor illum satis determinasse ex iis quæ de hoc scripsi, quemadmodum etiam centrum gravitatis sphaeræ; verum autem est me omisisse eorum probationem; sed dicam tibi mihi non esse moris Geometricis demonstratiunculis immorari, quæ ab aliis inveniri facile possint, & quas ignorare me non suspicabuntur ii qui me noverint.

Hic oportet lectorem esse memorem eorum quæ D. Descartes deleri optavit.

EPISTOLA LXXV.

Renato Descartes Johannes Beveroyicius S. D.

Rogat Cartesium de quibusdam ad circulationem sanguinis pertinentibus.

Nobilissime, & eruditissime vir,

Immenso desiderio videre optem mechanicas demonstrationes, quibus audio te plane stabilire circulationem sanguinis, omnemque in ista doctrina omnibus ansum dubitandi præcidere: quas ut commodò tuo communicare mecum digneris, vehementer abs te peto. Editurus epistolicas quæstiones cum magnorum virorum responsis, inter illa & tuum

de circulatione lectum iri voveo, simulque ut diu, vir integerrime, feliciter apud nos vivas honorificus Batavix civis, ac disciplinarum instaurator. Vale.

Dordrechtii 10 Jun. 1643.

EPISTOLA LXXVI.

Responsio ad præcedentem epistolam, de
circulatione sanguinis.

Clarissime, & præstantissime vir,

Per honorificum mihi esse puto, quod, cum varia magnorum virorum responsa velis colligere, à me, in quo nihil magis est, symbolam petas: & vereor ne non sum satis multæ æris ad eam conferendam, quicquid enim habui de quæstione quam proponis, ante aliquot annos in dissertatione de Methodo Gallice edita jam dedi, atque ibi omnem motum sanguinis ex solo cordis calore ac vasorum conformatione deduxi. Quippe quamvis circa sanguinis circulationem cum Hervæo plane consentiam, ipsumque & præstantissimi illius inveni, quo nullum majus & utilius in medicina esse puto, primum auctorem suspiciam, tamen circa motum cordis omnino ab eo dissentio. Vult enim, si bene memini, cor in diastole se extendendo sanguinem in se admittere, ac in systole se comprimendo illum emittere; ego autem rem omnem ita explico. Cum cor sanguine vacuum est, necessario novus sanguis in ejus dextrum ventriculum per venam cavam, & in sinistrum per arteriam venosam delabitur, necessario inquam, cum enim sit fluidus, & orificia istorum vasorum, quæ corrugata auriculas cordis componunt, sint latissima, & valvulæ quibus muniuntur sint tunc apertæ, nisi miraculo sistatur, debet in cor incidere. Deinde postquam aliquid sanguinis hoc pacto in utrumque cordis ventriculum incidit, ibi plus caloris inveniens quam in venis ex quibus delapsus est, necessario dilatatur, & multo plus loci quam prius desiderat; necessario inquam, quia talis est ejus natura, ut facile est experiri in eo quod dum frigemus omnes venæ nostri corporis contrahantur, & vix appareant, cum autem postea incallescimus adeo turgescant, ut sanguis in iis contentus decuplo plus spatii quam prius occupare videatur. Cum autem sanguis in corde sic dilatatur, subito & cum impetu omnes ejus ventriculorum parietes circumquaque propellit, quo fit ut clau-

claudantur valvulae quibus orificia venarum cavae & arteriarum venosae muniantur, atque aperiantur illae quae sunt in orificiis venarum arteriosarum & arteriarum magnarum, ea enim est fabrica istarum valvularum, ut necessario juxta leges mechanicae ex hoc solo sanguinis impetu haec aperiantur & illae claudantur: atque haec sanguinis dilatio facit cordis diastolen. Sed & idem sanguis illo ipso momento quo in corde dilatatus aperit valvulas venarum arteriosarum & arteriarum magnarum, omnem alium sanguinem in arteriis contentum etiam propellit, quo fit earum diastole. Postea ille idem sanguis eodem impetu quo se dilatavit, arterias ingreditur, sicque cor vacuatur, & in hoc consistit ejus systole. Sanguisque in corde dilatatus cum ad arterias pervenit rursus condensatur, quia non tantus ibi est calor, & in hoc consistit arteriarum systole, quae tempore vix differt à systole cordis. In fine autem hujus systoles sanguis in arteriis contentus (venam arteriosam pro arteria, & arteriam venosam pro vena semper sumo) relabitur verus cor, sed ejus ventriculos non ingreditur, quia talis est fabrica valvularum in earum orificiis existentium, ut hoc sanguinis relapsu necessario claudantur. Contra autem valvulae, quae sunt in orificiis venarum, sponte aperiantur corde detumescente, sicque novus sanguis ex venis in cor labitur, & nova incipit diastole. Quae omnia revera sunt mechanica, ut etiam mechanica sunt experimenta quibus probatur esse varias anastomoses venarum & arteriarum per quas sanguis ex his in illas fluit: qualia sunt de situ valvularum in venis de ligatura brachii ad venae sectionem, de egressu totius sanguinis ex corpore per unicum venam vel arteriam apertam, &c. Nec mihi de hac re plura occurrunt relatu digna: tam manifesta enim & tam certa mihi videtur, ut eam pluribus argumentis probare supervacuum putem. Sed nonnullae objectiones ad ipsam pertinentes mihi missae sunt Lovanio ante sex annos, ad quas tunc temporis respondi, & quia earum auctor meas responsiones mala fide distortas & mutilatas in lucem edidit, ipsas, ut à me revera scriptae sunt, libenter mittam, si vel nutu significes tibi gratas fore; omnique alia in re quantum in me erit voluntati tuae ac perhonestis studiis obsequar. Vale.

Ermondæ op de Hoef, 5 Julii 1643.

EPISTOLA LXXVII.

Cl. Viro Renato Descartès.

Objectiones Medici cujusdam Lovaniensis de motu cordis & circulatione sanguinis.

QUIA tam frequentibus iisque semper avidis efflagitationibus meas contra tuam de motu cordis sententiam objectiones postulas; sepono tantisper alias opellas meas & tibi obtemperatum eo.

Imprimis, ut nunc video, sententia illa tua nova non est, sed vetus, & quidem Aristotelica, prodita lib. de respirat. cap. 20. verba ejus sunt. *Pulsatio cordis fervori similis est, fit enim servor, cum humor caloris opera conflatur, nam humor propterea se attollit, quod in molem adsurgat ampliorem. In ipso autem corde tumefactio humorum, qui semper è cibo accedit ultimam cordis tunicam elevantis pulsum facit: atque hoc semper sine ulla intermissione fit, nam semper humor, ex quo natura sanguinis oritur, continue influit. Pulsatio igitur est humoris concalescentis inflatio.* Hæc Aristoteles, quæ à te ingeniosius & pulchrius explicantur. Galenus noster contra à facultate aliqua cor moveri docuit, & omnes hæcenus id docemus Medici, à quibus quod adhuc stem hæ faciunt ratiunculæ.

1. Cor è corpore exemptum pulsatur adhuc aliquandiu, imo eo in partes minutas dissecto, singulæ particulæ diutule pulsant, atque ibi nullus sanguis influit vel effluit.

2. Si quis arteriæ incisæ calamum vel æneam fistulam indat, ut sanguis permeare possit, & deinde arteriam vinculo constringat super fistulam, arteria non pulsabit infra ligaturam. Ergo pulsatio non fit ab impetu influentis sanguinis, sed ab alio aliquo, quod per tunicas arteriæ influit. Est illud experimentum Galeni proditum lib. *an sanguis in arteriis continueatur*, cap. 1. Neque dicendum id esse impossibile factum propter sanguinis arteriosi exsiliionem, quia potest hæc caveri hoc pacto. Injice arteriæ duas ligaturas palmo vel amplius à sese distantes, tum acuto scalpello incide eandem arteriam inter dictas duas ligaturas, nullus effluet sanguis nisi qui continetur inter vincula; dein foramini factò inde fistulam, & ligâ iterum arteriam super fistulam impositam; solve vero duo priora vincula, sanguis libere per canalem profluet ad extremas usque arterias, neque tamen, quæ sunt infra ligaturam, pulsabunt; solve ligaturam, rursus pulsabunt. Aliquid quidem sanguinis effluet

effluet per vulnus, sed quid tum? equidem videre licebit, quod intenditur.

3. Si cordis dilatatio fieret à rarefacto sanguine, multo longior & durabilior esset cordis diastole, quam nunc in animalibus est. Nam notabilis portio sanguinis in cor influit, quæ ut tota in vapores convertatur tempore opus est, neque tam cito aut subito potest rarefieri, quam cito ac subito fit diastole; etsi videamus oleum & picem igni incidentes confestim maxime rarefieri, illud difficultatem non tollit; tantus enim calor non est in corde, quantus in igne, quapropter non id efficere valet quod efficit ignis. Imo in piscibus pusillus calor est, & potius frigus, eorum tamen corda peræque celeriter ac nostra pulsant.

4. Si arteriæ distenduntur à sanguine, quem cor in illas effundit, pars vicina cordi, quæ proxime sanguinem illum recipit, tantum pulsabit, reliqua eodem tempore non pulsabunt. Quod enim è corde excutitur, non spargitur in omnes arterias subito, quia hoc repugnat motui corporis tam crassi. Atqui omnes totius corporis arteriæ pulsant simul. Hæc de causa motus cordis.

Contra, sanguinis circulationem, quam cum Hervæo adstruis hæc habeo.

1. Sanguis arteriosus & venosus sic plane similis esset, imo idem, quod repugnat autopsiæ. Ille flavior & floridior, hic nigricantior & tritior est.

2. Materia febrilis consistens alibi in venulis à corde remotis, quique adeo febrem intermittentem tantum efficit, deberet plures de die accessiones facere, toties scilicet, quoties fit sanguinis illius & simul humoris febrilis reductus in cor, ponis autem reductum istum fieri centies, imo ducentes per diem.

3. In vivo animali ligatis venis plerisque ad crus tendentibus liberis relictis arteriis, deberet crus illud brevi temporis spatio mirum in modum tumescere, eo quia sanguis continenter per arterias influeret per venas. Atqui tantum abest ut hoc fiat, ut potius, si diu sinas ligatas venas, pars extenuetur defectu nutrimenti.

Ad isthæc mea dubiola responsiones tuas tam avidè expectabo, quam illa ipsa à me exposulasti.

EPISTOLA LXXVIII.

Responsio ad præcedentem epistolam, de motu
cordis & circulatione sanguinis.


NON immerito tuas in meam de motu cordis sententiam objectiones percipide expectavi; nam cum respicerem ad doctrinam, ingenium & mores tuos, nec non ad benevolentiam qua me prosequeris, illas valde eruditas, ingeniosas, & nullo malignitatis præjudicio inquinatas fore sciebam: meque judicium non fefellit: Sed est quod gratias tibi agam, tum quia illas misisti, tum etiam quia monuisti quo pacto meam opinionem pollum Aristotelis auctoritate fulcire. Quippe cum ille homo tam felix extiterit, ut, quæcunque olim sive cogitans sive incogitans scriptitavit, hodie à plerisque pro oraculis habeantur, nihil magis optarem quam, ut à veritate non recedendo ejus vestigia in omnibus sequi possem. Sed ne quidem in hac re, de qua est sermo, illud me fecisse ausim gloriari, licet enim ut ille pulsationem cordis ab inflatione humoris in eo concalescentis esse dicam, per humorem tamen istum nihil à sanguine diversum intelligo, neque loquor ut ille *de tumefactione humoris, qui semper à cibo accedit, ultimam cordis tunicam elevantis*: Etenim si talia asserrem multis evidentissimis rationibus possem refutari; & merito crederem ad nullorum animalium cordis fabricam unquam attendisse. Si tacendo de ventriculis, vasis, & valvulis, ultimam tantum ejus tunicam elevari affirmarem. Qui autem ex falsis præmissis (ut Logici loquuntur) verum casu concludit, non melius ratiocinari mihi videtur, quam si falsum quid ex iisdem deduceret; nec si duo, unus errando, alter recta via incedendo, ad eundem locum pervenerint, unum alterius vestigiis instituisse esse putandum.

Ad primum quod objicis, nempe cordis è corpore exempti atque dissecti singulas particulas aliquamdiu pulsare, licet ibi nullus sanguis influat vel effluat, respondeo me fecisse olim hoc experimentum satis accurate, præsertim in piscibus, quorum cor excisum multo diutius pulsavit, quam cor animalium terrestrium, sed semper vel judicasse, vel, ut sæpe fit, ipsis oculis vidisse nonnullas sanguinis reliquias in partem, in qua pulsatio fiebat, ex aliis superioribus fuisse delapsas; & facile mihi persuasisse paucillum sanguinis ex una cordis parte in alium paulo calidiorem illapsi huic pulsationi efficiendæ sufficere. Notandum enim quo minor est quantitas alicujus humoris, tanto facilius illum posse rarefcere: & quem-

admo-

admodum manus nostræ quo frequentius aliquem motum exercent, tanto paratiores ad eundem repetendum evadunt, sic etiam cor, qui à primo formationis suæ momento indefinenter reciprocatione intumuit & detumuit, minima vi ad hoc ipsum continuandum posse impelli; & denique ut videmus quosdam liquores quibusdam aliis admistos hoc ipso incalescere, atque inflari, sic forte etiam in recessibus cordis nonnihil humoris instar fermenti residere, cujus permissione alius humor adveniens intumescit. Cæterum hæc eadem obiectio multo plus virium habere mihi videtur in vulgarem aliorum opinionem, existimantium motum cordis ab aliqua animæ facultate procedere: nam quo pacto quæso ab humana anima ille pendebit: ille, inquam, qui etiam in cordis partibus divisus reperitur, cum animam rationalem indivisibilem esse, & nullam aliam sensitivam vel vegetantem sibi adjunctam habere sit de fide?

Objicis secundo illud quod Galenus prodidit in fine libri, *an sang. in art. cont.* cujus quidem experimentum nunquam feci, nec jam tacere est commodum; sed neque operæ præteritum esse existimo; posita enim illa pulsationis arteriarum causa quam pono, mechanicae meæ, hoc est Physicæ, leges docent, intruso in arteriam calamo, & illa super ipsum calammum ligata, eandem ultra vinculum pulsare non debere, soluta autem ligatura debere, plane ut Galenus expertus est; modo tamen calamus paulo angustior sit quam arteria, ut proculdubio supposuit, & te ipsum idem supponere ex hoc concludo, quod dicas soluta ligatura nonnihil sanguinis per vulnus effluxurum, nam si calamus totam arteriæ capacitatem impleret, quoniam accurate vulnus obturaret, ne minimum quidem sanguinis per illud elaberetur. Calamo autem in capacitate arteriæ simul cum sanguine natante non mirum est illum ejus motui non obstare. Notandum enim hunc motum non fieri ex eo quod sanguis è corde egressus per omnes arterias subito spargatur, ut in quarta tua objectione supponis, sed ex eo quod partem arteriæ magnæ cordi proximam occupans totum alium sanguinem in ea ejusque ramis contentum expellat & concutiat, quod fit absque mora, hoc est, ut philosophi loquuntur, in instanti. Ponamus exempli causa B C F esse arteriam sanguine plenam, ut ex sunt semper, & in quam recenter ex corde A nonnihil novi sanguinis ingreditur: sic enim facile intelligemus hunc novum sanguinem non posse implere spatium B, quod est in orificio hujus arteriæ, quin alia pars sanguinis, quæ prius implebat hoc idem spatium B, recedat versus C, indeque alias partes sanguinis trudet versus D, & sic consequenter usque ad E; adeo ut eodem ipso instanti



quo sanguis ascendit ab A ad B, debeat arteria pulsare ad E. Nec obstabit si iungamus in ea contineri calamum D, vel quodvis aliud corpus sive cavum sive solidum, modo libere natet in sanguine, quia æque facile pelletur tale corpus versus E ac ipse sanguis. Superficies enim interna arteriarum est admodum lævis, & quoniam illæ constant tunicis satis duris non se contrahunt ut intestina vel venæ ad mensuram corporis quod in iis continetur, sed etiam vacuæ, & in mortuo animali, patulæ atque hiantes esse solent. Si vero sit alius calamus in E huic arteriæ inditus, & super quem sit ligata, ut vult Galenus, licet sanguis per hunc calamum possit transire ad F, non tamen ibi concutiet latera arteriæ, saltem notabiliter, quoniam ex angusto loco in latiore transcundo magnam partem suarum virium amittet, reliquasque potius secundum longitudinem arteriæ, quam secundum ejus latitudinem exercebit, ac proinde illam quidem poterit continuo affluxu implere, tumidioremque reddere, non autem distinctis subsultibus agitare. Nec alia ratio est cur venæ per varias anastomoses arteriis conjunctæ non etiam pulsant, quam quia ipsarum extremitates, per quas sanguis ingreditur, angustiores sunt earum alveis in quos fluit.

Possumus autem hoc experimentum Galeni duobus aliis modis tentare. Nempe vel in arteriam intrudendo calamum, sive tubulum alium quempiam, qui sit tam crassus ut totam arteriæ capacitatem replens ejus superficiem internæ adhæreat, nec natare possit in sanguine, ut ille qui hic ad G appictus est, intus autem habeat cavitatem tam angustam, ut non liberiores transitum sanguini præbeat, quam ille qui hic videtur ad E, quo casu etiam non ligatus arteriæ motum sistet. Vel rursus in arte-
riam

riam intrudendo calamus, qui cavitatem habeat tam latam, ut non minus liberam transitum præbeat sanguini quam vacua arteria: quo casu siue ligetur, siue non ligetur, ejus pulsationi proculdubio non obstat. Nec est quod nos moveat auctoritas Galeni variis in locis affirmantis, *arterias non distendi ut utres, quia implentur, sed impleri ut folles, fauces, pulmones & pectus universum, quia extenduntur, illasque extensas extremis partibus & foraminibus ex quocunque loco sibi vicino attrahere quidquid ipsarum sinus implere idoneum est.* Refellitur enim certissimo experimento, quod & antehac aliquoties, & hodie adhuc inter scribendum videre non piguit. Nempe vivi cuniculi thorace aperto, costisque ita diductis ut cor & aortæ truncus apparerent, aortam satis longe à corde filo constrinxi, separatam ab his omnibus quibus adhærebat, ne qua suspicio esse posset aliquid sanguinis vel spiritus aliunde in ipsam quam ex corde influxurum: deinde scalpello eandem incidi inter cor & vinculum, vidique manifestissime eo tempore quo extendebatur sanguinem per incituram saliendo exilire, eo autem quo contrahabatur non effluere. At contra si Galeni opinio vera esset, arteria ista singulis diastoles momentis aërem per incisuram attrahere, nunquamque nisi tempore systoles sanguinem emittere debuisset; ut nemini dubium esse posse mihi videtur. Pergens autem in hac animalis vivi dissectione, mediam partem cordis, illam scilicet, quæ ejus mucro appellatur, abscidi, sed ab eo momento quo fuit à basi separata ne semel quidem ipsam pulsare animadverti, quod occasione præcedentis objectionis hic moneo, ut observes partes quidem cordis, quæ sunt versus ejus basim, aliquandiu pulsare, quoniam in illas aliquid novi sanguinis ex vasis & auriculis ipsis adhærentibus influit, partes autem quæ sunt ad cuspidem non ita. Cæterum postquam cordis mucro fuit abscissus, ejus basis manens adhuc vasis appensa pulsavit satis diu; atque in ea commodissime aspexi duas illas cavitates, quæ ventriculi cordis appellantur, in diastole fieri ampliores, & in systole arctiores; quo experimento Hervæi sententia de motu cordis jugulatur, ait enim ille plane contrarium, nempe ventriculos in systole dilatari ut sanguinem recipiant, & in diastole coarctari, ut illum in arterias extrudant. Quæ hic obiter adjunxi ut videas nullam sententiam à mea diversam fingi posse in quam certissima aliqua experimenta non pugnent. Nota, ut hoc experimentum recte fiat, non solum mucronis extremitatem, sed mediam partem totius cordis esse abscindendam, vel etiam amplius: idque in cuniculo, timido animali, non in cane esse tentandum. In canibus enim ventriculi cordis varios habent anfractus, quo-

rum singulæ cavitates dilatatione sanguinis ita extenduntur, ut interim generalis cujusque ventriculi cavitas angustior reddi videatur. Quod forte illis imposuit qui cor in diastole constringi judicabant. Atqui tunc illud dilatari vel ipso tactu probari potest, manu enim prehensum multo durius in diastole quam in systole sentitur.

Objicis tertio: Si cordis dilatatio fieret à rarefacto sanguine, multo longiorem & durabiliorem fore ejus diastolen quam nunc est. Quod forte ita tibi persuades, quoniam imaginaris istam rarefactionem esse similem illi, quæ fit in Æolipilis, cum in iis aqua vertitur in vaporem: sed varia ejus genera distinguenda sunt, aliter enim fit cum liquor plane in fumum sive ærem abit & formam mutat, quemadmodum in Æolipilis, aliter cum liquor formam retinet & mole tantum augetur. At primum modum sanguini in corde nulla ratione convenire manifestum est, tum quia non fit totius liquoris simul, sed earum tantum partium quæ ex ejus superficie surgentes in ære finitimo se extendunt, ut fusc in Meteoris cap. 2 & 4. explicui: etenim nullus est in corde talis ær, nullaque superficies aëri finitima, sed ejus cavitates in vivis animalibus quantæ quantæ sunt totæ sanguine implentur; tum quia si hoc esset, non sanguis in arteriis, sed tantummodo vapidus ær contineretur ex sanguinis vaporibus formatus. Nunc autem dubitat nemo quin sanguine sint plene, atque hic obiter mirari licet quam steriles veri fuerint antiqui, apud quos eousque de hac re dubitabatur, ut Galenus integrum librum, ad probandum sanguinem in arteriis natura contineri, conscribere dignatus sit. Alter modus rarefactionis, quo liquor mole augetur, rursus est distinguendus, vel enim fit sensim, vel in momento, sensim scilicet cum partes liquoris per gradus acquirunt novum aliquem motum, aut figuram aut situm, ratione cujus plura vel majora quam prius circa se relinquunt intervalla. Et in meteoris explicui quo pacto talis rarefactio non tantum à calore, sed etiam intenso frigore aliisque causis possit oriri. Fit denique rarefactio in momento, juxta Philosophiæ meæ fundamenta, quoties liquoris particulæ vel omnes vel certe plurimæ hinc inde per ejus molem dispersæ simul tempore mutationem aliquam acquirunt, ratione cujus locum notabiliter ampliorem desiderant. Ultimum autem hunc modum eum esse quo sanguis rarefit in corde, res ipsa indicat, ejus enim diastole fit in momento. Atque si attendamus ad ea omnia quæ scripsi in quinta parte libelli de methodo, non magis ea de re dubitare nobis licebit, quam dubitamus an oleum & alii liquores ita rarefiant cum videmus illos in olla subitis subsultibus assurgere. Ad hoc enim tota cordis fabrica, ejus calor atque ipsa san-

fanguinis natura ita conspirant, ut nullam rem sensibus usurpemus, quæ certior esse mihi videatur. Nam quod ad calorem attinet; etiam si in pitibus non magnus sentiatur, est tamen in eorum corde multo major quam in ullis aliis membris. At negas eam esse sanguinis naturam ut subito rarefiat, quia scilicet non est similis oleo vel pici, sed magis aqueus humor & terreus. Tanquam si solis pinguibus hoc competeret. Nunquid ipsa aqua, si tantum in ea vel pisces vel aliud quid coquatur, ita solet intumescere? nec tamen sanguis ea magis aqueus dici potest. Nunquid farina subacta & fermentata etiam absque magno calore sic surgit? Nec tamen sanguis ea magis terreus videtur. Quid autem illi magis affine quam lac, tum quoad aqueam tum quoad terrestrem naturam; non credo quippiam similis inveniri posse; interim illud igni appositum, cum ad certum gradum caloris pervenit, etiam ita inflatur. At quid opus est alienis exemplis, quorum magnam multitudinem Chymia posset suppeditare, cum ipse sanguis, si recens è venis eductus in locum aliquanto calidiorem, quam ipse est, incidat, etiam momento dilatetur, ut aliquoties expertus sum. Verum tamen quia novi eam esse ejus naturam ut statim atque est extra vasa corrumpatur, & calorem ignis à calore cordis in quibusdam differre, non ideo affirmo sanguinis rarefactionem, quæ fit in corde, similem esse in omnibus illi quæ sic arte procuratur. Sed ut nihil hic te celem, eam ita fieri existimo. Cum sanguis in corde intumescit maxima quidem ejus pars per aortam & venam arteriosam foras erumpit, sed alia etiam intus manet, quæ intimos ejus ventriculorum recessus replens novum ibi caloris gradum & quamdam veluti fermenti naturam adipiscitur; statimque postea, dum cor detumuit, novo sanguini per venam cavam & arteriam venosam illabenti celerrime se admiscens efficit, ut celerrime turgescat, in arteriasque discedat; sed relicta rursus aliqua sui parte, quæ fermenti vice fungatur. Ut panis fermentum fieri solet ex parte farinæ jam fermentatæ, vini fermentum ex uvarum reliquiis, & cerevisiæ fermentum ex quadam ejus sæce. Neque hic valde intensus caloris gradus requiritur, sed varius pro varia sanguinis singulorum animalium natura. Ut neque cerevisia, nec vinum, nec panis, ex quibus magna pars nostri sanguinis exurgit, intenso egent calore ut fermententur; sed sua etiam sponte intepefcunt. Ad quartam tuam objectionem puto me jam supra satis respondisse, quoniam ostendi, quo pacto arteriæ omnes simul pulsent. Itaque superest ut ad ea quæ contra sanguinis circulationem attulisti respondeam.

Primum est differentia inter sanguinem arteriosum & venosum, quam quidem ipsemet, in p. § 2. libelli de Methodo, Heryæo objici posse judicavi,

cavi, quia per ejus sententiam nulla sanguinis mutatio in corde fieri intelligitur: at mihi, qui subitam ejus inflationem & quasi ebullitionem describo, ne eadem objiceretur non verebar. Nam, quæso, quæ res majoris & magis subitæ mutationis causa in corpore aliquo esse potest, quam ebullitio ista & simul fermentatio? Sed dices sanguinem ex arteriis per earum extremitates in venas influentem nullam ibi pati mutationem, ideoque illum in venis non diversum esse debere, ab eo qui est in arteriis. Ad quam objectionem ut accurate respondeam, velim primo ut advertas nullam contineri guttam sanguinis in arteriis, quæ per cor paulo ante non transiverit, in venis autem semper esse aliquas quæ ex arteriis non fluxerunt, quia nempe ab intestinis in illas semper aliquid humoris illabitur; itemque venas omnes una cum hepate instar unius vasis esse spectandas. Quibus positis facile intelligitur sanguinem debere easdem qualitates, quas acquirit in corde, in omnibus arteriis retinere: adeo ut si fingeremus illum per cor transendo album fieri, ut in hepate fit ruber, nullus plane in arteriis nisi albus contineretur, nullusque in venis nisi ruber, albus enim, qui continuo in illas ex arteriis influeret, alteri jam rubenti permixtus, non aliter quam aqua vino infusa, statim colorem ejus induceret. Præterea est advertendum, multa esse quæ, postquam intaluerunt, ex hoc solo quod vel lente vel celeriter refrigerentur, qualitates acquirunt valde diversas. Ita vitrum, nisi lente refrigescat, fit tam fragile ut nequidem aëri resistat, & eadem materia nunc in ferrum potest abire, nunc in chalybem pro diverso modo fusionis. Sanguis enim qui ex arteria effluit cum vitro quod candens è fornaceeductum est, ille autem qui ex vena cum vitro, quod lento igne recoctum est, potest conferri: & intensissimus ignis fornacum non tantum posse videtur in chalybem vel vitrum, quam moderatus cordis calor in sanguinem, qui nempe est humor ad mutationem tam paratus; ut solus aër statim atque è veniseductus est illum corrumpat.

Ad id quod addis de materia februm intermittentium nihil aliud dicendum habeo, quam me ne minimum quidem suspicari illam in venis residere, atque mirari opinionem istam nulla probabiliratione fuisse tam multos habuisse sectatores, in quos tam fuscè disputat Fernelius Path. l. 4. c. 9. ut auctoritatem etiam auctoritate refellam. Sed præterea ille rationibus vincit, & inter cæteras unam habet quæ sufficere mihi videtur. Nempe si materia februm intermittentium procederet ex venis, vel nulla unquam esset duplex tertiana, vel omnis valde vehemens tertiana esset duplex, & idem est de quartana. Nullas autem rationes quæ me sint

sint

sint hic addo, nec de febribus dico quod sentiam, nec me ex unis difficultatibus in alias pertrahi sinam.

Superest experimentum de ligatis venis plerisque ad crus tendentibus liberis relictis arteriis, quo facto dicis crus illud non intumescere, sed potius paulatim extenuari defectu nutrimenti. Ubi sane est distinguendum, nam simul ac venæ ita erunt ligatæ, proculdubio nonnihil intumescunt; atque si quam ex iis aperias intra ligaturam, totus aut fere totus corporis sanguis per illam poterit effluere, ut quotidie chirurgi experiuntur. Hocque, ni fallor, sanguinis circulationem, non dicam probabiliter persuadet; sed evidenter demonstrat. Si vero diu sic ligatæ venæ relinquuntur, ea quæ scribis vera fore mihi facile persuadeo, licet nunquam sim expertus, quia sanguis in venis ligatis stagnans brevi tempore valde crassus & alendo corpori parum idoneus evadet. Non autem novus continenter per arterias ad eam partem fluit, quia ramulis, meatibusque aliis omnibus tum arteriarum tum venarum crasso sanguine obstructis, nullus ei locus patebit. Quinimo etiam forte ipsæ venæ aliquantum detumescunt, nempe sero sanguinis in iis contenti per insensibilem transpirationem abeunte. Sed nihil plane hoc facit in assertam circulationem.

EPISTOLA LXXIX.

Instantiæ ejusdem Medici Lovaniensis, ad quasdam
ex præcedentibus responsionibus.

QUOD ad responsiones tuas ad mea objecta attinet, petis tibi significari quo pacto ex mihi satisfecerint, libere dicam me iis ita non posse acquiescere, quin restent quædam quæ adhuc enucleatius à te dici postulem.

Ad primum ais, in cordibus exemptis nonnullas sanguinis reliquias in partem in qua pulsatio fit ex aliis superioribus delabi: sed observo etiam illas partes superiores, in quas ex aliis nihil delabi potest, pulsare. Subjungis hanc eandem objectionem multo plus virium habere in vulgarem aliorum opinionem existimantiam, motum cordis ab aliqua animæ facultate procedere, quam in tuam. Sed hoc te non excusat; quia fortassis neque hæc, neque illa tua vera est motus illius causa. Nihilominus ego vulgarem opinionem salvam facere mihi posse videor, nam etsi in corde humano exempto animæ non sit, neque consequenter etiam facultas, instrumentum tamen animæ illi aliquantisper inest, spiritus scilicet in virtute

animæ agens. Sic existimo in cadavere hominis subito decollati fieri attritiones & coctiones & assimilationes alimenti perinde uti in vivente, quandiu calor & spiritus virificus cadaveri inest.

Ad secundum dicis: motum arteriatum fieri ex eo quod partem arteriæ magnæ cordi proximam sanguis occupans totum alium sanguinem impellat, &c. Non ita fieri docent casus chirurgici. Nam vulnerata arteria, maximum opus & labor chirurgis est, ut sanguinem sistant: intrudunt pulveres astringentes & lineæ, & nescio quæ in ipsum vulnus arteriæ: adeo ut per ista aliena corpora arteriæ impacta discontinuent sanguinem, qui est in arteria infra vulnus, ab eo qui est supra: attamen motus arteriæ infra vulnus non sistitur, neque illa corpora libere fluitant cum sanguine in arteriis, sed fixa & impacta sunt: alioquin enim non sisteretur sanguis.

Postea addis, si in arteriam intrudatur calamus tam crassus ut totam capacitatem ejus repleat, intus autem cavitate habeat angustam, ita ut non præbeat liberum transitum sanguini, eo casu non ligatus etiam motum sistet, atque ideo putas venas non pulsare, &c. sive intus à tubulo liber sanguinis transitus impediatur, sive foris à circumjecto aliquo corpore arteriam comprehendente id ipsum fiat, perinde est, uti puto. Atqui quantumcumque à corpore extrinseco angustentur arteriæ & comprimantur, modo non penitus collidantur & constringantur tunicæ, motus non aufertur. Est hoc certissimum, ergo, &c. Quæ de viva cuniculi sectione adfers vera sunt, & Gal. quoque in lib. de administrat. anat. idem prodidit, admirans quomodo basis cordis ultimo pulset.

Ad tertium inquis, etsi in cordibus piscium non magnus calor sentiatur, est tamen illic major quam in aliis eorum membris. Sit ita: non tamen est tantus, ut possit sanguinem piscium rarefacere, & quidem tam celeriter. Manus nostræ multo sunt cordibus piscium calidiores, at hæc sanguinem piscium continentes id non faciunt.

Confugis deinde ad fermentum cordiale, quod rarefaciet sanguinem, quod fermentum vereor ne figmentum sit. Et ut non sit: quomodo, inquam, tam celeriter rarefaciet: hoc enim vero contra naturam geniumque fermenti est. Hæc igitur explicari adhuc desidero, si lubet: si operæ pretium non videatur, & satis explicata putes, superfede, & conabor per me tua concoquere. Cætera quæ dicis pro circulatione sanguinis, satis bene se habent, neque ea sententia valde displicet.

EPISTOLA LXXX.

Responsio Cartesii ad præcedentes instantias, maximam partem ad pulsationem arteriarum & cordis pertinentes.

Diligentiæ tuæ tum in respondendo, tum in aliorum ad me literis mittendis multum debeo. Et ea quæ rursus objicis nequaquam contemnenda, sed si quid aliud, responsione accurata digna esse mihi videntur. Ad primum enim optime rationes cordis exempti superiores partes præcipue pulsare, unde concludis hanc pulsationem à sanguinis il-lapsu non pendere. Sed duo hic sunt advertenda, quibus puto hanc difficultatem radicatus extirpari. Unum est illas cordis partes, quæ superiores vocantur, nempe quæ ad basim, duplices esse, alias scilicet quibus inferuntur vena cava & arteria venosa, quæ quidem non moventur ob rarefactionem novi sanguinis in eas delabentis, postquam auriculæ & vasa omnia illis adhærentia sunt abscissa, nisi forte quatenus aliquid ex coronaria, vasisque aliis per cordis substantiam sparsis, quæ tunc omnia circa basim aperta sunt, in ipsarum cavitates fluit; alias vero, quibus inferuntur vena arteriosa & arteria magna, quæ omnium ultimæ debent pulsare, etiam mucrone cordis abscisso, quia nempe cum sanguis per illas egredi sit assuetus, tam faciles ibi vias invenit, ut omnes ejus reliquæ quæ in disseci cordis partibus reperiuntur, eo tendant. Alterum hic notandum est, auricularum cordis partiumque illis adjacentium motum valde diversum esse à motu reliquæ ejus molis; non enim in iis ideo percipitur quod sanguis rarefiat, sed ideo tantum quod ex illis affatim delabatur, saltem corde jam lacero & languenti. Nam in vegeto adhuc & integro aliis auricularum motus etiam apparet, qui fit ex eo quod sanguine repleantur. Partes autem cordis superiores usque ad ea ventriculorum loca quibus extremitates valvularum tricuspidum inferuntur, interdum reliqui cordis, interdum auricularum motum imitantur. Quibus notatis, si non graveris ultimos cordis alicuius moribundi motus attente considerare, non dubito quin facillime propriis oculis sis percepturus partes ejus supremas, hoc est illas ex quibus sanguis in alias delabi debet, nunquam tunc moveri nisi eo motu quo vacuantur, atque ventriculis secundum longitudinem scissis videbis interdum auriculas ter aut quater agitari; & singulis vicibus aliquid sanguinis in ipsos mittere, priusquam cor semel pulset, aliaque multa quæ sententiam meam omnia

confirmabunt. Petes autem fortasse quomodo per illum solum sanguinis ex auriculis cordis delapsus tantus motus in iis fieri possit quantus tibi tunc apparebit, cujus rei duas causas hic exponam. Prima est, quia vivo animali cum sanguis non continuo & æquali motu, sed per interrupta momenta ex auriculis in cor affatim decidat, fibræ omnes partium per quas transit ita conformantur à natura, ut si vel minimum quid per eas delabatur, tantundem fere & tam cito debeant aperiri, quam consueverunt cum magis sanguinis copiarum transitum præbent. Altera est, sanguinis rorem exiguum ex vulneratis partibus cordis exundantem cogi debere in guttulam satis insignis magnitudinis, priusquam in medios ventriculos fluat, eodem modo quo sudor è cute sensim emergens aliquamdiu ibi hæret, donec guttæ ex eo formentur, quæ subito postea in terram cadunt. Cum vero ad hoc quod subiunxi, nempe tuam objectionem plus virium habere in vulgrem aliorum opinionem, quam in meam, respondes hoc me non excusare, verum dicis; & ideo etiam mei moris non est in aliis refutandis tempus terere. Sed ut te ad meas partes pertraherem, non inutile fore putabam, si nullas alias esse, quas potiori iure sequi posses, ostenderem. Verum imitari vis egregios illos belli duces, qui cum arcem aliquam, quæ male munita est, servandam susceperunt, licet obsidentibus resistere se non posse agnosceant, non tamen ideo protinus iis se dedunt, sed malunt omnia prius tela consumere & extrema quæque experiri: unde fit ut sæpe dum vincuntur plus gloriæ quam ipsi victores reportent. Nam cum, ut explices quo pacto cor in hominis cadavere ab anima absente moveri possit, confugis ad calorem & spiritum vivificum, tanquam animæ instrumenta quæ in virtute ejus hoc agant, quid quæso aliud est quam extrema velle experiri: etenim si hæc instrumenta interdum ad hoc sola sufficiant, cur non semper? Et cur potius imaginari illa in virtute animæ agere, cum ipsa abest, quam ista animæ virtute non indigere, ne quidem cum adest. Ad secundum quod ais, de modo quo chirurgi læsæ arteriæ sanguinem sistunt, respondeo, quoties pulsatio ultra vulnus non cessat, alveum ipsum arteriæ per quem sanguis fluere consuevit non obturari, sed tantummodo foramen in cute & carnibus per quod è corpore egredi posset. Ad id autem quod subjungis, respondeo magnum esse discrimen inter arteriam in qua sanguinis transitus à tubulo immisso impeditur, & illam quæ vinculo foris circumjecto redditur angustior: nam licet sententia Galeni dicentis motum arteriarum pendere à vi quadam per earum tunicas fluente, nullo modo probabilis mihi videatur, valde tamen rationi consentaneum esse puto

puto partibus arteriæ ante vinculum concussis ultiores etiam ex consequenti moveri, saltem quando vinculum non est tale ut motum tunicarum arteriæ plane sustat, quale vix in casu proposito esse potest. Atqui si quæ pars arteriæ multo angustior aliis reddatur, & simul ejus tunica eo in loco motu omni priventur, à quacunque demum causa id fiat, partium sequentium pulsationem cessantem etiam esse firmiter credo.

Ad tertium causaris frigus piscium, ut neges sanguinem in eorum corde rarefieri; sed si mihi nunc hic adesces, non posses non fateri etiam in frigidissimis animalibus motum istum à calore procedere; videres enim anguillæ corculum perexiguum, quod hodie mane ante horas 7. vel 8. excidi, dudum plane mortuum atque in superficie jam siccum, mediocri calore foris ei admoto reviviscere, & rursus satis celeriter pulsare. Ut autem scias non solum calorem, sed etiam sanguinis allapsum ad hoc requiri, ecce illud immitto ejusdem anguillæ sanguini, quem in hunc usum servaveram, & deinde calefaciendo efficio ut non minus celeriter & insigniter pulset quam in vivo animali. In hoc autem corde perspicuo etiam vidi hodie mane, quod de motu partium cordis superiorum, dum sanguis ex iis effluit, supra scripsi: etenim tota ejus pars amputata cui vena cava inferebatur, & quæ proprie suprema omnium dici debet, observavi sequentem partem, quæ tunc suprema erat non amplius cum reliquo corde pulsare, sed tantum sanguinem ex vulnere rotantem in se interdum recipere cum quodam motu ab illo pulsationis prorsus diverso. Verum quia si quando forte incidas in simile experimentum, videre poteris eor ejusmodi frigidorum animalium sæpe pulsare, licet nulla sanguinis aliunde in illud illabentis suspicio esse possit. Ibo hic obviâ objectioni quam inde merito desumeres, & dicam quo pacto pulsationem istam fieri intelligam. Primum observo hunc sanguinem multum differre ab eo calidiorum animalium, cujus scilicet, cum è corpore eductus est, partes subtilissimæ momento temporis in auras evolant, & quod superest partim in aquam, partim in grumos facessit: hic enim anguillæ sanguis tota die, non dicam incorruptus, sed saltem, quantum visu possum percipere, non mutatus mansit, semperque multi vapores ex eo egrediuntur, adeo ut ii, si vel minimum calefiat, instar fumi densissimi assurgant. Præterea memini me alias vidisse cum ligna viridia urerentur, vel poma coquerentur, vapores vi caloris ex eorum partibus interioribus emergentes non modo per angustas corticis rimas exeundo ventum imitari, quod nemo non advenit, sed etiam interdum

ita dispositam esse partem corticis in qua tales rimæ sunt, ut aliquantum intumescat priusquam rima aperiat, quæ deinde rima aperta confestim detumescit, quia nempe omnis vapor illo tumore inclusus affatim tunc egreditur, nec novus tam cito succedit. Sed paulo post, vapore alio succedente, pars eadem corticis rursus intumescit, & rima aperitur, & vapor exit ut prius. Atque hic motus sæpius repetitus pulsationem cordis, non quidem vivi, sed ejus quod hic habeo ex anguilla excisum perbelle imitatur. His autem animadversis nihil magis obvium est, quam ut judicemus fibras, ex quibus cordis caro componitur, ita esse dispositas, ut vapor inclusi sanguinis iis attollendis sufficiat, atque ut ex eo quod ita attollantur magni meatus aperiantur in corde, per quos omnis ille vapor statim evolat, & cor detumescit, &c. Quod confirmare libet alio casu hodie etiam à me observato, nempe absconditi corculi anguillæ partem supremam (hoc est illam cui vena cava inferebatur, & quæ eodem ibi officioungebatur quo dextra auricula in terrestrium animalium cordibus,) ipsamque, cujus confusa lineamenta nihil aliud quam guttulam crassi sanguinis referebant, in ligneo vase separatim servavi, ut experirer an aliqua in ea pulsatio appareret, sed nullam plane initio deprehendi, quia nempe, ut paulo post agnovi, cum multi meatus ibi essent aperti & patentes, vapor omnis è sanguine emergens continuo & non impedito motu evolabat. Sed post horæ quadrantem vel amplius, cum ista sanguinis guttula, cui nempe cordis particula innatabat, in superficie siccare, & quadam veluti cute obduci cœpisset, manifestam in ea pulsationem aspexi, quæ calore admoto incresebat, & non destitit donec omnis humor sanguinis fuerit exhaustus.

Cæterum valde miror id quod attuli de fermento tibi videri figmentum, & me ad illud confugisse, tanquam si valde urgerer, & aliter me tueri minime possem; nam certe absque ea mea sententia facillime & explicatur & demonstratur: sed ea admissa necessarium est etiam tateri aliquid sanguinis in corde rarefacti ex una ejus diastole in aliam remanere, atque ibi se permiscendo sanguini de novo advenienti rarefactionem ejus adjuvare, qua in re fermenti naturam & genium plane refert.

EPISTOLA LXXXI.

*De formatione ideæ Dei, & de veritate axiomatum. De precipitantia
judicii. Emendatio variorum locorum in thesibus H. Regii
ad Physicam pertinentibus.*

Vir Clarissime,

Multum me vobis devinxistis tu, & Clar. D. Æmilius scriptum quod ad vos miseram examinando, & emendando; video enim vos etiam interunctiones & orthographiæ vitia corrigere non fuisse designatos; sed magis me adhuc devinxissetis, si quid etiam in verbis sententiisque ipsis mutare voluissetis: nam quantulumcunque illud fuisset, spem ex eo concepissem ea quæ reliquissetis minus esse vitiosa; nunc vereor ne istud non sitis aggressi, quia nimis multa, vel forte omnia fuissent delenda.

Quantum ad objectiones; in prima dicitis, ex eo quod in nobis sit aliquid sapientiæ, potentia, bonitatis, quantitatis, &c. nos formare ideam infinitæ, vel saltem indefinitæ sapientiæ, potentia, bonitatis, & aliarum perfectionum quæ Deo tribuuntur, ut etiam ideam infinitæ quantitatis, quod totum libens concedo; & plane mihi persuadeo non esse aliam in nobis ideam Dei, quam quæ hoc pacto formatur. Sed tota vis mei argumenti est, quod contendam me non posse esse talis naturæ, ut illas perfectiones, quæ minutæ in me sunt, possim cogitando in infinitum extendere, nisi originem nostram haberemus ab ente, in quo actu reperiantur infinitæ; ut neque ex inspectione exiguæ quantitatis, sive corporis finiti, possem concipere quantitatem indefinitam, nisi mundi etiam magnitudo esset, vel saltem esse posset indefinita.

In secunda dicitis, axiomatum clare & distincte intellectuum veritatem per se esse manifestam; quod etiam concedo, quandiu clare & distincte intelliguntur; quia mens nostra est talis naturæ, ut non possit clare intellectus non assentiri; sed quia sæpe recordamur conclusionum ex talibus præmissis deductarum, etiam si ad ipsas præmissas non attendamus, dico tunc, si Deum ignoremus, fingere nos posse illas esse incertas, quantumvis recordemur ex claris principiis esse deductas; quia nempe talis fortessumus naturæ, ut fallamur etiam in evidentissimis; ac proinde, ne tunc quidem, cum illas ex istis principiis deduximus, scientiam, sed tantum persuasionem de illis nos habuisse; quæ duo ita distinguo,

quo, ut persuasio sit, cum superest aliqua ratio quæ nos possit ad dubitandum impellere; scientia vero, sit persuasio à ratione tam forti, ut nulla unquam fortiore concuti possit; qualem nullam habent qui Deum ignorant. Qui autem semel clare intellexit rationes quæ persuadent Deum existere, illumque non esse fallacem, etiamsi non amplius ad illas attendat, modo tantum recordetur hujus conclusionis, Deus non est fallax, remanebit in eo non tantum persuasio, sed vera scientia tum hujus, tum etiam aliarum omnium conclusionum, quarum se rationes clare aliquando percepisse recordabitur.

Dicis etiam in tuis ultimis (quæ heri receptæ, me, ut simul ad præcedentes responderem, monuerunt) omnem præcipitantiam intempestivi judicii pendere ab ipso corporis temperamento, tum acquisito, tum innato, quod nullo modo possum admittere; quia sic tolleretur libertas, & amplitudo nostræ voluntatis, quæ potest istam præcipitantiam emendare; vel si non faciat, error inde ortus, privatio quidem est respectu nostri, sed respectu Dei mera negatio.

Venio nunc ad theses quas misisti; & quia scio te velle, ut libere scribam meam mentem, tibi hic obtemperabo. Ubi habes, *vicinus aër cujus particula, &c. mallet; vicinus aër qui, &c. potest*; neque enim singulæ particule condensantur, sed totus aër, per hoc quod ejus particule magis ad invicem accedant. Neque video cur velis perceptionem universalium, magis ad imaginationem quam ad intellectum pertinere. Ego enim illam solo intellectui tribuo, qui, ideam ex se ipsa singularem, ad multa refert. Mallet etiam non dixisses affectum esse tantum duplicem, *letitiam & tristitiam*, quia plane aliter afficimur ab ira, quam à *metu*, quamvis in utroque sit *tristitia*, & sic de cæteris. Quantum ad auriculas cordis, addidissem, id quod res est, nos de ipsis curiosius non egisse, quia tantum illas ut extremitates venæ cavæ, & arteriæ venosæ, reliquo ipsarum corpore, &c. Omiseram dubium tuum de cordis ebullitione, quod mihi videris jam ipse satis solvisse; cum enim partes cordis sponte subsident, vasis per quæ sanguis egreditur adhuc patentibus, non desistit egredi nec clauduntur vasa ista, donec cor subledeat.

In titulo non ponerem, *de triplici collisione*, sed tantum *de collisione*; item etiam lineam nonam pro N. & C. rôgo ut totam deleas; neque enim hic valet Harvæi exemplum, qui longius hinc abest quam ego, nec, ut puto, Valæo tam conjunctus est, quam ego tibi; & quamvis esset res similis, non tam exemplo moveor, quam causâ. In thesium lineâ primâ, tollorem hæc verba, *caloris vivifici, &c.* In fine pro his verbis *in recta conforma-*
tione;

tionem, &c. mallem, in præparatione particularum insensibilium ex quibus alimenta constant, ut ex conformationem humano corpori componendo aptam acquirant. Hæc præparatio alia est communis, & minus præcipua, quæ fit in omnibus viis per quas particule transeunt; alia particularis & præcipua, quæ est triplex, 1. in ventriculo & intestinis, 2. in hepate, 3. in corde. 1. In ventriculo & intestinis fit, cum cibis ore masticatus & deglutitus, sicut & potus, vi caloris à corde communicati, & humoris ab arteriis eo impulsæ, dissolvitur & in chylum convertitur. 2. In hepate, cum chylus in illud, non per aliquam vim attracticem, sed sola sua fluiditate, & pressione vicinarum partium delatus, sanguinique reliquo mixtus, ibi fermentatur, digeritur, & in chymum abit. 3. In corde, cum chymus, sanguini à reliquo corpore ad cor redeunti, permixtus, & simul cum eo in hepate præparatus, in verum & perfectum sanguinem per ebullitionem pulificam commutatur. Atque hæc tertia coctio, &c. Vides facile cur ponam coctionem generalem quæ fit in omnibus viis, & ex consequenti etiam in omni parte corporis, quia ubicumque est motus, fieri potest ibi aliqua alteratio particularum quæ moventur; & non video quid aliud coctio sit quam talis alteratio; nec cur potius illam in venis gastricis & mesaraicis, quam in reliquis omnibus fieri concedas. Non pono succum spirituosum, quia non video distincte quid ista verba significent. Non pono chyli partes meliores, sed chylum, quia omnes ejus partes alendo corpori inserviunt; & si bene calculum ponamus, ipsa etiam excrementa, præsertim quæ ex venis excernuntur, quandiu sunt in corpore, inter ejus partes sunt recensenda, munere enim ibi suo funguntur, & nulla est pars quæ tandem non abeat in excrementum; modo id quod egreditur per insensilem transpirationem, excrementum etiam appellemus. Chymum autem fermentari puto in hepate, & digeri, hoc est, prout hoc verbum à Chymicis usurpatur, propter aliquam moram alterari.

Pagina 5. deletem *quæ à copiosis ejus spiritibus, & oleoginositate moderata oritur*; necque enim hoc satis clare rem explicat. In fine paginæ 8. nomen meum rursus invenio, quod forte honestius quam in titulo possum dissimulare, modo, si placet, epithetis magis temperes; & malim etiam vero nomine *Descartes*, quam ficto *Cartesius* vocari. Ubi dicis cur Pl. meas responsiones mutilasset, posset forte addi probatio, quod biennio ante ejus librum, à multis fuerint visa & exscripta: videnturque etiam delenda hæc verba, *vel callido vel ignoranti*, & verba quam mitissima veritatem causæ melius confirmabunt. Et finem paginæ non sic mutarem;

secundo, quod foetus in utero existens, ubi isto respirationis usu privatur, duos habet meatus, qui sponte clauduntur in adultis; unum qui canaliculi iustar est, per quem pars sanguinis in dextro cordis sinu rarefacti, in aortam transmittitur, parte altera in pulmones abeunte; & alium, per quem pars sanguinis in sinistro cordis sinu rarefaciendi, è vena cava defluit, & alteri parti ex pulmonibus venienti permiscetur. Neque enim negari potest, quin sanguinis pars in foetu transeat per pulmones; sed præterea usus respirationis explicatio, quæ habetur pagina 10. præcedere debet ejus causas, quæ dantur pag. 8. Quantum ad venas lacteas nihil definitio, quia nondum illas vidi; sed novi hic quos juvenes medicinar doctores, (Silvius & Schægæa nominantur) qui videntur non indocti, & se illas sæpius observasse affirmant, earumque valvulas humoris regressum versus intestina impedire, adeo ut plane à te dissentiant, & ego in eorum sententiam valde propendeo; ita ut suspicer venas lacteas ab illis mescariæis in eo tantum differre, quod nulli arteriæ sint conjunctæ, ideoque succus ciborum in iis albus est, in aliis vero statim fit ruber, quia sanguini per arterias circulato permiscetur. Prima occasione illas in cane vivo simul quæremus: interim, si mihi credis, totum illud corollarium omittes.

Quod ad difficultatem, quomodo corpus possit detumescere, si pars sanguinis rarefacti in eo remaneat, facile solvitur; quia minima tantum ejus pars manet, ventriculis implendis non sufficiens; impetus enim quo ille egreditur, sufficeret ad omnem educendum, nisi prius valvulæ arteriæ magnæ, & venæ arteriosæ clauderentur, quam totus esset elapsus; & quantumvis parva portio in ventriculis manens sufficit ad fermentationem.

Tandem hodie accepimus sententiam pro I. A. W. Cujus exemplar postquam erit exscriptum, hoc est, post unam aut alteram diem, ad ipsum mittam. Ita facta est, ut si magnus aliquis fuisset condemnandus, non potuissent judices mitioribus verbis ejus errores significare; sed nihilominus, nullum verbum ex iis quæ à W. scripta sunt, non approbant, & nullum verbum, ex iis quæ ab ejus adversario, non condemnant.

Si quid sit de quo ampliorem explicationem desideres, paratum me semper invenies, ut seu scriptis seu verbis tibi serviam; imo etiam cum istæ theses disputabuntur, si velis, Ultrajectum excurrat, sed modo nullus sciat, & in specula illa, ex qua D^r à Schuermans solet audire lectiones, possim latere. Vale.

EPISTOLA LXXXII.

Mutationes quædam in Theſibus H. Régii, de
internis partibus corporis.

Vir Clarissime,

CUM tuæ litteræ allatæ sunt, hic non eram, jamque primum domum
reversus ipsas accipio. Non magni momenti Silvii objectiones mihi
videntur, nihilque aliud quam ipsum mechanicæ parum intelligentem
esse testantur; sed tamen vellem ut paulo blandius ei responderes; trans-
versa linea in margine notavi ea loca quæ duriuscula mihi videntur. Ad
primum punctum vellem adderes, *et si paucus sit sanguis in corpore, venas ni-*
hilominus ipso esse plenas, quia se contrahunt ad ejus mensuram: imo hoc ip-
sum posuisti, sed obiter tantum, & puto esse præcipuum ad ejus difficul-
tatem dissolvendam. Ad secundum, puto sanguinem moribundi æsticci
refriguisse in ejus venulis minoribus, & à corde remotioribus, ibique
coagulatum impediisse ne novus ex arteriis in venas per circulationem
influeret, dum interim sanguis adhuc calens in cava juxta cor, in dextrum
ejus ventriculum incidebat, atque ita cavam fuisse vacuatam. Ad ter-
tium, gravitas est quidem plerumque causa concomitans & adjuvans, sed
non est causa primaria; nam contra situ corporis inverso, & gravitate re-
pugnante, sanguis tamen in cor, non quidem incideret, sed fluere, vel in-
siliret, ob circulationem, & spontaneam vasorum contractionem. Ad
quartum, ubi loqueris de effervescencia sanguinis, mallem ageres de ejus
rarefactione, quædam enim magis fervent, quæ tamen non adeo ra-
rescunt. Ad quintum, ubi te accusat quod affinxeris ipsi objectionem
quam non agnoscit pro sua, responderem me nihil ipsi affinxisse; nam cum
dixisti, *neque his adversatur quod ventriculi in systole non sint omni corpore*
vacui, idem sensus fuit, ac si dixisses, *sufficere quod maximam partem sal-*
tem vacui sint, quæ ratione vero maxima ex parte vacuentur, te postea fuse
explicuisse, multumque ejus argumenti vim declinasse. Denique, circa au-
riculas cordis, male videris ipsas distinguere ab ostiis venæ cavæ & arte-
riæ venosæ, nihil enim aliud sunt quam ista lata ostia; & male etiam ali-
quam ipsis tribuis sanguinis coctionem per ebullitionem specificam, &c.
Vale.

EPISTOLA LXXXIII.

Hortatur H. Regium, ut ad quæstiones Silvii
amplius non respondeat.

Vir Clarissime,

LEgi omnia quæ ad me misisti, cursim quidem, sed ita tamen ut non puteim quicquam in iis contineri quod impugnem. Sed sane multa sunt in thesibus tuis, quæ fateor me ignorare, ac multa etiam, de quibus si forte quid sciam, longe aliter explicarem quam ibi explicueris. Quod tamen non miror; longe enim difficilius est, de omnibus quæ ad rem medicam pertinent suam sententiam exponere, quod docentis officium est, quam cognim faciliora seligere, ac de reliquis prorsus tacere, quod ego in omnibus scientiis facere consuevi. Valde probo tuum consilium, de non amplius respondendo Silvii quæstionibus, nisi forte, ut paucissimis verbis illi significes, tibi quidem ejus literas esse pergratas, ejusque studium investigandæ veritatis, & gratias agere quod te potissimum elegerit cum quo conferret; sed quia putas, te abunde in tuis præcedentibus ad omnia, quæ circa motum cordis pertinebant, respondisse, nuncque videtur tantum disputationem ducere velle, atque ex una quæstione ad alias transire, quæ res esse posset infinita, rogare ut te excuset, si aliis negotiis occupatus, ipsi non amplius respondeas. Initio enim cum disputat, an venæ contractæ ad mensuram sanguinis quem continent, dicendæ sint plenæ vel non plenæ, movet tantum quæstionem de nomine. Ac postea, dum petit sibi ostendi alligatum ferro sanguinem, & quænam sit vera gravitatis natura, novas quæstiones movet, quales imperitissimus quisque plures posset proponere, quam omnium doctissimus in tota vita dissolvere. Cum ex eo quod sanguis ex venis in cor possit insilire, infert venas ergo debere pulsare, facit æquivocationem in verbo *insilire*, tanquam si dixeris sanguinem salire in venis. Cum in comparatione inflationis vesicæ notat aliquam dissimilitudinem, quod sit violenta, & puer à patente fistula os auferat, nihil agit, quia nulla comparatio in omnibus potest convenire; ut neque cum alia ratione quam per spontaneam venarum contractionem vult explicare sanguinis propulsationem, affert enim fibras transversas vasa coarctantes, quod non est diversum à venarum contractione, idem enim significat fibras vasa coarctare, ac venas contrahere. Cætera persequeretur, sed omnia per te melius

lius potes, & jam ex parte solvisti in thesibus. In his autem adjungis corollarium de maris æstu, quod non probo, non enim rem satis explicas, ut intelligatur, nec quidem ut aliquo modo probabilis fiat, quod jam in multis aliis, quæ eodem modo proposuisti, à plerisque reprehensum est. Qui motum cordis aiunt esse animale, non plus dicunt, quam si fateantur se nescire causam motus cordis; quia nesciunt quid sit motus animalis. Cum autem partes anguium dissectæ moventur, non alia in re causa est, quam cum cordis mucro etiam dissectus pulsatur, nec alia quam cum nervi testudinis in particulas dissecti, atque in loco calido & humido existentes, vermium instar se contrahunt, quamvis hic motus dicatur artificialis, & prior animalis, in omnibus enim istis causa est dispositio partium solidarum & motus spirituum, sive partium fluidarum, solidas permeantium. Meditationum mearum impressio ante tres menses Parisiis absoluta est, necdum tamen ullum exemplar accepi, & ideo secundam editionem hic fieri consensi. Causam, cur in vorticibus injecta corpora ad centrum ferantur, puto esse, quia aqua ipsa dum circulariter movetur in vortice, tendit versus exteriora, ideo enim alia corpora, quæ nondum habent istum motum circularem tam celerem, in centrum protrudit. Gratulor D. vander H. iterum consuli, & dictatura perpetua dignum existimo, tibi quoque gratulor quod in eo fidum & potentem habeas defensorem. Vale.

EPISTOLA LXXXIV.

Varie antitheses & mutationes variarum rerum in The-
sibus H. Regii, si nomen recte divinator.

Vir Clarissime,

Q Ueri sane non possum de tua & Domini de Raey humanitate, quod meum nomen vestris thesibus præmittere volueritis; sed neque etiam scio qua ratione à me gratiæ vobis agendæ sint; & tantum video novum opus mihi imponi, quod nempe homines inde sint credituri meas opiniones à vestris non dissentire, atque adeo ab iis quæ asseruistis, pro viribus defendendis, me imposterum excusare non debeam; & tanto diligentius ea quæ legenda misisti debeam examinare, ne quid in iis prætermittam, quod tueri recusem.

Primum itaque quod ibi minus probo, est, quod dicas animam ho-
mini

mini esse triplicem, hoc enim verbum in mea religione est hæresis; & reuera, seposita religione, contra logicam etiam est, animam concipere tanquam genus, cujus species sunt *mens*, *vis vegetativa*, & *vis motrix animalium*; per *animam* enim *sensitivam* non aliud debes intelligere præter vium motricem, nisi illam cum rationali confundas. Hæc autem vis motrix, à vi vegetativa, ne specie quidem differt; utraque autem toto genere à mente distat: sed quia in re non dissentimus ego rem ita explicarem.

Anima in homine unica est, nempe *rationalis*; neque enim actiones ullæ humanæ censendæ sunt, nisi quæ à ratione dependent. Vis autem vegetandi, & corporis movendi, quæ in plantis & brutis *anima vegetativa* & *sensitiva* appellantur, sunt quidem etiam in homine, sed non debent in eo *anima* appellari, quia non sunt primum ejus actionum principium, & toto genere differunt ab *animarationali*.

Vis autem vegetativa in homine, nihil aliud est, quam certa partium corporis constitutio, quæ, &c. Et paulo post,

Vis autem sensitiva est, &c. & postea,

Hæ duæ itaque nihil aliud sunt quam corporis humani, &c. & postea: Cumque *mens*, sive *anima rationalis* à corpore sit distincta, &c. non immerito *sola* à nobis *anima* appellatur.

Denique, ubi ais, volitio vero & intellectio differunt tantum, ut diversi circa diversa objecta agendi modi; mallem, differunt tantum ut actio & passio ejusdem substantiæ; intellectio enim proprie mentis passio est, & volitio ejus actio; sed quia nihil unquam volumus, quin simul intelligamus, & vix etiam quicquam intelligamus, quin simul aliquid velimus, ideo non facile in iis passionem ab actione distingui-mus.

Quod autem tuus Voetius hic annotavit, nullo modo tibi adversatur; cum enim dicunt Theologi nullam substantiam creatam esse immediatum suæ operationis principium, hoc ita intelligunt, ut nulla creatura possit absque concursu Dei operari, non autem quod debeat habere facultatem aliquam creatam, à se distinctam, per quam operetur; absurdum enim esset dicere istam facultatem creatam esse posse immediatum alicujus operationis principium, & ipsam substantiam non posse. Alia vero quæ annotavit, in iis quæ misisti non reperio, ideoque nihil possum de ipsis judicare.

Ubi agis de coloribus, non video cur nigredinem ex illorum numero eximas, cum alii etiam colores sint tantum modi; sed dicerem tantum, ni-

nigredo etiam inter colores censerī solet, sed tamen nihil aliud est quam certa dispositio, &c.

De iudicio, ubi ais; *hac nisi accurata & exacta fuerit, necessario in decidendo*, &c. pro *necessario* ponerem *facile*; & paulo post, pro *itaque* *hac potest suspendi*, &c. ponerem *atque* *hac*, &c. neque enim quæ subjungis ex precedentibus deducuntur, ut verbum *itaque* videtur significare.

Quod dicis de affectibus, illorum sedem esse in cerebro, est valde paradoxum, atque etiam ut puto contra tuam opinionem; etsi enim spiritus moventes musculos veniant à cerebro, sedes tamen affectuum sumenda est pro parte corporis quæ maxime ab illis alteratur, quæ proculdubio est cor; & ideo dicerem, affectuum, quatenus ad corpus pertinent, sedes præcipua est in corde, quoniam illud præcipue ab illis alteratur; sed quatenus etiam mentem afficiunt, est tantum in cerebro, quoniam ab illo solo mens immediate pati potest.

Paradoxum etiam est dicere, *receptionem esse actionem*, cum revera tantum sit passio actioni contraria; sed eadem tamen quæ posuisti, videntur sic posse retineri. *Receptio* est actio (vel potius passio) animalis automatica, qua motus rerum recipimus; hic enim, ad omnia quæ in homine peraguntur sub uno genere comprehendenda, passionēs cum actionibus conjunximus.

Quæ denique habes in fine de temperie ad calidum aut frigidum, &c. desiccante, non examinavi; quia nullis talibus, *tanquam Evangelio*, credendum puto. Gaudéo tuum respondentem recte functum fuisse officio, nec puto quicquam tibi esse metuendum ab iis qui contra te stilum exercebunt. Quæcumque mittes libenter legam, & cum solita mea libertate quicquid sensero referibam. Nihil scripsi de centro gravitatis, sed de vario pondere gravium, secundum varia à centro terre intervalla, quod non habeo nisi in libro, in quo multa alia simul compacta sunt; sed tamen si legere vis, prima occasione qua D. van S. Ultrajectum ibit, illum ad te per ipsum transmittam.

Non probo quod nolis squamas piscium, &c. vocari corpora lucida, quia non impellunt ipsæmet globulos æthereos; id enim etiam non facit carbo ignitus, sed sola materia subtilissima, quæ tunc carbonis partes terrestres, tunc globulos illos æthereos impellit. Quod etiam venæ mesaraica chylum in pancreate à venis lacteis accipiant mihi non constat, nec sane affirmare debes nisi certissima experientia cognoveris, nec etiam ea de re scribere, *tanquam* si nullæ venæ lacteæ ad hepar usque chylum deferant, quoniam sunt qui affirmant se id expertos, & admodum

verri-

verisimile mihi videtur. Vellem etiam ut ea deleres quæ habes contra Waleum de motu cordis, quia vir ille est pacificus, & tibi nihil gloriæ potest accedere, ex eo quod ipsi contradicas. Non etiam tibi assentior, cum definis actiones esse operationes ab homine, vi animæ & corporis factas, sum enim unus ex illis qui negant hominem corpore intelligere; nec moveor argumento quo contrarium probare contendis, etsi enim mens impediatur à corpore, ab illo tamen ad intellectionem rerum immaterialium juvari plane non potest, sed tantummodo impediri. De anima hominis triplici jam respondi in præcedentibus quas nisi nudius tertius, & idcirco hic tantum addo, me tibi addictissimum semper futurum.

EPISTOLA LXXXV.

Contra H. Regii Thesin de triplici anima.

Tota nostra controversia de anima triplici magis est de nomine quam de re. Sed primo quia Romano-Catholico non licet dicere animam in homine esse triplicem, vereorque ne mihi homines imputent, quod in tuis thesibus ponis; mallem ab isto loquendi modo abstinere. 2. Etsi vis vegetandi & sentiendi in brutis sint actus primi, non tamen idem sunt in homine, quia mens prior est, saltem dignitate. 3. Etsi ea quæ sub aliqua generali ratione conveniunt possint à logicis tanquam ejusdem generis partes poni, omnis tamen ejusmodi generalis ratio non est verum genus; nec bona est divisio nisi veri generis in veras species; & quamvis partes debeant esse oppositæ, ac diversæ, ut tamen bona sit divisio, non debent partes à se mutuo nimium distare; nam si quis, exempli causa, totum humanum corpus in duas partes distingueret, in quarum una solum nasum, & in alia cætera omnia membra poneret, peccaret ista divisio, ut tua, quod partes essent nimis inæquales. 4. Non admitto vim vegetandi & sentiendi in brutis mereri *animæ* appellationem, ut mens illam meretur in homine; sed vulgus ita voluisse, quia ignoravit bruta mente carere, atque idcirco animæ nomen esse æquivocum, respectu hominis & brutorum. 5. Denique, *deest reliquum.*

EPISTOLA LXXXVI.

De actione & passione, quomodo hic intelligi debeat,
Notæ in quasdam schedas ipsi ab H. Regio missas.

Vir Clarissime,

A Ccepi tuas theses, & gratias ago; nihil in ipsis invenio quod non arideat. Quæ ais de actione & passione nullam mihi videntur habere difficultatem, modo illa nomina recte intelligantur: nempe in rebus corporeis omnis actio & passio in solo motu locali consistunt, & quidem actio vocatur, cum motus ille consideratur in movente, passio vero cum consideratur in moto. Unde sequitur etiam, cum illa nomina ad res immateriales extenduntur, aliquid etiam motui analogum in illis esse considerandum; & actionem dicendam esse, quæ se habet ex parte motoris, qualis est volitio in mente; passionem vero ex parte moti, ut intellectio & visio in eadem mente. Qui vero putant perceptionem dicendam esse actionem, videntur sumere nomen actionis pro omni reali potentia, & passionem pro sola negatione potentia; ut enim perceptionem putant esse actionem, ita etiam haud dubie dicerent in corpore duro receptionem motus, vel vim per quam admittit motus aliorum corporum, esse actionem; quod recte dici non potest, quia passio isti actioni correlativa esset in movente, & actio in moto. Qui autem dicunt actionem omnem ab agente auferri posse, recte dicunt, si per actionem motum solum intelligant, non autem si omnem vim sub nomine actionis velint comprehendere; ut longitudo, latitudo, profunditas, & vis recipiendi omnes figuras, & motus, à materia sive quantitate tolli non possunt, nec etiam cogitatio à mente. In chartulis quas misisti pag. 2. linea 7. *ac præcipue cordis*, videtur ibi esse aliquis error calami, non enim præmuntur partes à corde, sed sanguis ad hepatis ex aliis partibus missus, ac præcipue ex corde, juvat coctionem. Non intelligo etiam quæ ibi sequuntur de ligatura geminata & alternatim dissoluta. Pagina 4. experimentum de corde solibus inflando, nisi feceris, non auctor sum ut apponas; vercor enim ne corde exciso & frigido, tam rigidum evadat, ut ita inflari non possit; sed facile est experiri, & si succedat, pones ut certum, non autem cum verbis *judico*, & *videntur*. Pagina 5. quæ habes de magnetæ malleum omitti; neque enim adhuc plane sunt certa; ut neque illa quæ habes pag. 6. de gemellis, & similitudine sexus. Vale & me ama, & communes amicos meo nomine plurimum saluta.

EPISTOLA LXXXVII.

Notæ in quoddam scriptum H. Regii.

Vir Clarissime,

LEgi raptissime illa omnia quæ jusseras ut perlegerem, nempe partem primum, & partem secundi quaternionis; & quinque alios integros. Quæ in primo de adstringentibus, incrassantibus, & narcoticis de tuo habes, mihi non placent; peculiarem enim aliquem modum, quo forte potest aliquando contingere ut res fiat, tanquam universalem proponis, cum tamen plures alii possint excogitari ex quibus probabile est eisdem effectus sæpius sequi. In secundo, ais idiopathiam esse morbum per se subsistentem; malletm dicere, esse ab alio non pendentem, ne quis Philosophus inde concludat te fingere morbos esse substantias. De febribus autem breviter hic dicam quid sentiam, ne nihil in hac epistola contineatur; de reliquis enim vix quicquam dicam. Itaque febris est. *Deest reliquum. Et si candide & generose D. Regius velit agere, illud supplebit.*

EPISTOLA LXXXVIII.

Clarissimo Virò Henrico Regio.

Solutio duarum difficultatum de feбри. De causa gangrana, de palpitatione cordis, & de corde.

Vir Clarissime,

ACcepi tuas litteras in quibus duas proponis difficultates, circa ea quæ de febribus ad te scripseram: ad quarum primam, *cur scilicet causam regularium recursuum in febribus, sere semper oriri dixerim, à materia, quæ maturatione quadam indiget, antequam sanguini misceri possit; irregularium vero ab ea quæ cavitatem aliquam implendo, sola distensione poros aperit, facile intelliges, si advertas non dari ratione cur istæ cavitates tantæ sint magnitudinis, & tantus fiat in illis materiæ affluxus, ut semper in omnibus hominibus, vel singulis diebus, vel alternis, vel quarto quoque die, vacuentur; dari autem rationem cur aliquis humor una tantum die, alius duobus, alius tribus indigeat ad maturescendum. Alteram etiam, cur nempe poros aper-*

tis tota aut fere tota materia expurgetur: facile solves, advertendo multo difficilius esse poros plane clausos aperire, quam postquam semel aperti sunt impedire ne rursus claudantur; adeo ut satis magna copia materię debeat effluere antequam claudantur; imo fere tota debet effluere, cum nulla est cavitas, nisi quę ex affluxu istius materię, partes vi distendentis, efficitur; quia partes distentę ad situm naturalem redire debent, antequam pori claudantur. Si autem sit cavitas per excisionem partium facta, concedo quidem illam materia corrupta plenam manere post expurgationem; adeo ut cum pori aperti sunt, non nisi pars exuperans, & latera cavitatis impellens, expurgetur, quę potest esse decima vel vigesima tantum pars inatery in illa cavitate contentę: sed quia sola est hęc pars exuperans, quę febris paroxysmum accendit, ideo sola videtur esse numeranda, & ita semper verum est, totam materiam febris expurgari in singulis paroxysmis. Quantum autem ad gangręnam, etsi sanguinis circulatio, in aliqua parte impedita, possit aliquando esse remota ejus causa, proxima tantum est corruptio sive putrefactio ipsius partis, quę ab aliis causis, quam ab impedita circulatione potest oriri, atque, ipsa jam facta, circulationem impedire.

Quę de palpitatione habes, non mihi satisfaciunt, & tam varias judico esse posse ejus causas, ut non ausim etiam aggredi ipsas hic enumerare. Non etiam existimo excrementa difficilius egredi per pilos amputatos, quam per integros, sed plane ē contra facilius, nisi forte cum radicibus extirpantur, & pori per quos egressi fuerant occluduntur; multi- que capitis dolores experiuntur, cum longos alunt pilos, iisque postea liberantur, capillis amputatis. Causam autem cur capilli amputati crescant, puto esse quod excrementa copiosius per amputatos egrediantur: Hocque etiam confirmat experientia, quia majores recrescunt, quam si nunquam fuissent amputati; quia nempe ob majorem copiam excrementorum per ipsorum radices transeuntium, ex ampliores evadunt. Denique convulsionem non puto fieri propter tunicarum densitatem, sed tantum quia valvulę quędam in nervorum tubulis existentes, præter ordinem aperiantur, aut claudantur; quod & spirituum crassities, & organi læsio, ut punctura in tendine vel nervo, causare potest. Vale.

EPISTOLA LXXXIX.

Instructio ad H. Regium, de negotio Voetii contra
ipsum, & quomodo ad scriptum contra suas
theses respondere debeat.

Vir Clarissime,

HAbui hic toto pomeridiano tempore præstantissimum virum D. AL
qui multa mecum de rebus Ultrajectinis amicissime ac prudentissi-
me disseruit. Plane cum ipso sentio, tibi ad aliquod tempus à publicis
disputationibus esse abstinendum, & summopere cavendum, ne ullos in
te verbis asperioribus irrites. Vellem etiam quam maxime, ut nullas un-
quam novas opiniones proponeres, sed antiquis omnibus nomine tenus
retentis, novas tantum rationes afferres; quod nemo posset reprehē-
dere; & qui tuas rationes recte caperent, sponte ex iis ea quæ velles in-
telligi concluderent; ut de ipsis formis substantialibus, & qualitibus
realibus, quid opus tibi fuit eas palam rejicere? nunquid meministi me
in Meteoris pag. 164. editionis gallicæ expressissimis verbis monuisse
ipfas nullo modo à me rejici, aut negari, sed tantummodo non requiri
ad rationes meas explicandas? Quod idem si fuisses secutus, nemo tamen
ex tuis auditoribus non illas rejecisset, cum nullum earum usum esse
perspexisset, nec interim in tantam collegarum tuorum invidiam inci-
disses. Sed quod factum est infectum fieri nequit. Nunc curandum est,
ut quæcumque vera proposuisti, quam modestissime defendas, & si
quæ minus vera, vel tantum minus apte dicta, elapsa sint, absque ulla
pertinacia omendes, putēsque nihil esse in Philosopho magis laudandum,
quam liberam errorum suorum confessionem. Ut in hoc, *quod homo sit
ens per accidens*, scio te nihil aliud intellexisse, quam quod alii omnes ad-
mittunt, nempe illum esse compositum ex duabus rebus realiter distin-
ctis; sed quia verbum, *ens per accidens*, eo sensu non usurpatur in scholis,
idcirco longe melius est (si forte uti non possis explicatione, quam præ-
cedentibus meis litteris suggereram, video enim te ab illa nonnihil de-
flectere, necdum scopulos satis vitare in tuo ultimo scripto) ut aperte
fatearis te illum scholæ terminum non recte intellexisse, quam ut male
distingules; ideoque, cum de re plane idem quod alii sentires, in verbis
tantum discrepasse; atque omnino ubicumque occurrer occasio, tam
privatim quam publice debes profiteri, te credere hominem esse *verum*

ens

*ens per se, non autem per accidens, & mentem corpori realiter & substantia-
liter esse unitam, non per situm aut dispositionem, ut habes in tuo ulti-
mo scripto, (hoc enim rursus reprehensioni obnoxium est, & meo judi-
cio non verum) sed per verum modum unionis, qualem vulgo omnes
admittunt, etsi nulli, qualis sit, explicent, nec ideo etiam teneris expli-
care; sed tamen potes, ut ego in Metaphysicis, per hoc, quod percipia-
mus sensus doloris, aliosque omnes, non esse puras cogitationes men-
tis à corpore distinctæ, sed confusas illius realiter unitæ perceptiones;
si enim Angelus corpori humano inesset, non sentiret ut nos, sed tantum
perciperet motus qui causarentur ab objectis externis, & per hoc à vero
homine distingueretur.*

Quantum ad tuum scriptum, etsi non videam quid eo facere velis,
mihi videtur, ut ingenue & candide fatear quod sentio, nec ad rem pro-
positam, nec ad fortunam hujus temporis satis esse accommodatum; mul-
ta enim in eo nimis dura, & non satis aperte rationes explicas, quibus
bona causa defenditur, adeo ut in eo scribendo, ex tadio forsân atque
indignatione, ingenium tuum languisse videatur. Excusabis ut confido
libertatem meam; & quia mihi esset difficilius, de singulis quæ scripsisti
monere quid sentiam, quam aliquod tale scriptum delineare, hoc po-
tius agam, & quamvis multa me alia negotia urgeant, unam tamen aut
alteram huic rei diem impendam. Existimo itaque operæpretium esse,
ut ad Appendicem Voetii publico scripto respondeas; quia si plane ta-
ceres, tibi forte tanquam victo magis insultarent inimici; sed tam blan-
de ac modeste respondeas, ut neminem irrites, simulque tam solide, ut
rationibus tuis se vinci Voetius animadvertat, & ideo, ne sæpius vincat-
tur, tibi contradicendi animum deponat, seque à te demulceri patiatur.
Cursim hic ponam argumentum illius responsionis, qualem ego ipsam
faciendam putarem, si tuo in loco essem; & partim gallice, partim latine
scribam, pro ut verba celerius occurrent, ne forte, si latine tantum scribe-
rem, verba mea mutare negligeres, & stilus nimis incultus pro tuo non
agnosceretur.

*Henrici Regii, &c. Responso, ad Appendicem; vel nota in
Appendicem, ac corollaria Theologico-Philosophica
Domini Giub. Voetii, &c.*

Tum exordium facerem ab amica epistola ad D. Voetium, in qua di-
cerem me visis doctissimis, excellentissimis, & subtilissimis thesibus,

quas de formis substantialibus, aliisque rebus Physicam spectantibus in lucem emisit, quasque specialiter Medicinæ & Philosophiæ in hac Academia Professoribus, inter quos & ego partem aliquam facio, dedicavit, maximo fuisse gaudio perfunctum, tum quod vir tantus voluerit tractare istas materias, utpote non dubitans, quin omnium quæ haberi possunt validissimis, ad sententiam quam defendendam suscepit, situs rationibus; adeo ut post eas non sint expectandæ aliæ; tum etiam quod, cum maxima opinionum pars, quas in thesibus suis defendere voluit, è diametro pugnet cum iis quæ ego docui, videatur sua præfatione me potissimum spectare, atque ea ratione ad respondendum invitare, & ad honestam quandam veritatis curiosius inquirendæ æmulationem incitare. Ipsum summopere me beasse istoc facto; assultum istum mihi non posse non esse gloriosum, quia etiam à tanto adversario vinci gloriosum est: me ingentes ipsi propterea agere gratias, addereque hoc cumulo maximorum beneficiorum, quo me sibi obstrinxit. Hic fusc commemorarem quomodo me jüverit in professione acquirenda, quomodo mihi patronus, mihi fautor, mihi adjutor semper fuerit, &c. Denique quod constituissem ipsius thesibus per alias theses respondere, easque publice ventilandas proponere, si sperare potuissem auditorium adeo favorabile & tranquillum; sed quod hac in parte maximam ipsa habeat prærogativam, quia respectus & veneratio, quæ ipsi exhibetur, non tantum propter Academiæ Rectoratum, & Ministerium Ecclesiæ, sed præcipue propter maximam ejus pietatem, incomparabilem eruditionem, omniaque alia excellentia dona sufficiens est ad insolentium impetum sistendum, & impediendum ne quid contra ordinem fiat in auditorio in quo ipse præsidem agit; cum, quia tanta mihi non tribuitur reverentia, duo tresve nebulones ab inimico quopiam ad id missi in auditorium sufficere possint ad turbendam totam disputationem; & quia expertus istam fortunam in ultima mea disputatione credebam me minus, quam par est consulerum fuisse honori meo, & dignitati muneris ad quod Magistراتus me evchere dignatus est in hac Academia, si iterum me exposuissem isti infortunio. Non quod propterea sim animo commotus, aut quod me pndeat ullo modo eorum quæ acta sunt; contra enim cum turbones isti assiduo interruperint mea responsa, antequam quid opposuerint potuerim intelligere, facile judicari potest me mea culpa non dedisse occasionem eorum insolentiæ, sed istos destinato consilio ad auditorium accessisse ut disputationem turbarent, & impedirent ne rationes meæ satis bene possent proponi ut intelligerentur. Atque ex eo aliud nihil judi-

cari

carari potest, quam quod inimici mei, medio adeo seditioso & injusto usi, significant se non querere veritatem, neque credere quod suæ rationes sint adeo validæ ac meæ, quia nolunt ut eæ intelligantur. Atque si nesciretur illas turbas mihi factas esse artificio inimici cujusdam, sed à solo juvenum aliquorum petulantia, novimus etiam optima publico exposita talis sæpe casui non minus subjecta esse, quam pessima ac ineptissima. Sic alias contigit alicubi ut ineptiæ funambulorum cum summa attentione auscultarentur, & tamen ibidem illi qui repræsentarent bellissimam & elegantissimam Comediam Terentii per tales manuum plausus expulsi sunt à theatro, sic, &c. Hæ igitur rationes me moverunt ad hunc potius respondendi modum, quam ad scribendum theses; cui accedit quod veritas multo facilius inveniri possit, dum per otium & defæcato animo duo adversa ejusdem materiæ scripta examinantur, quam in disputationis fervore, ubi sæpe temporis angustia exactam utriusque partis argumentorum pensilationem impedit, & ignominia quæ contrahitur cum videmur victi, si nostræ rationes debiliores fuerint, veritatis agnoscendæ voluntatem adimit. Rogarem itaque ut hoc responsum æqui bonique consuleret, utpote ab animo benevolo profectum, & quo testarer me non esse adeo negligentem, ut nollem honestæ invitationi per theses ejus mihi factæ satisfacere, publice exponendo quibus argumentis meas opiniones sustineam, quas ipse impugnavit; idque propter bonum commune totius rei literariæ, & peculiariter propter bonum & decus hujus Academiæ. Me ipsum veneraturum & æstimaturum semper ut patronum, fautorem amicissimum, &c. Vale.

Post talis argumenti epistolam curarem imprimi, *Domini Gisberti Voetii præfatiuncula, ad doctiss. expertiss. Medic. &c.* usque ad thesin primam.

RESPONSIO ad PRÆFATIONEM.

Dicerem me hic summopere laudare ipsius civilitatem & humanitatem in eo, quod nulla habita ratione potestatis, quam ipsi suppeditant cum Theologia suâ in omnes alias scientias, quas dignitate superat, tum specialiter Academiæ Rectoratus in hanc Academiam, nolnerit tamen de rebus Physicis agere sine prævia ad Philosophiæ & Medicinæ Professores excusatione. Mihi placere reprehensionem qua perstringit adolecentes, qui vix elementis Philosophiæ imbuti, absque evidenti & valida de-

men-

monstrationum eviſione, omnem ſcholarum Philoſophiam exhibant, antequam terminos ejus intellexerint, eorumque noſione deſtint, auctores ſuperiorum ſaculatum ſine fructu legunt, lectioneſque & diſputationes, tanquam muta perſone aut ſtutia Dedulea, audire coguntur. Sed quia valde diligenter ipſos hoc in exordio admonet, ne tam facile id agant, ac ſi hoc peccatum quam frequentiffimum eſſet, cum tamen illud haecenus ſit incognitum, non immerito ſuſpicor hoc de ſolis auditoribus meis intelligi; antehac enim novi quosdam eſſe, (quia magnos progreſſus, quos breviffimo tempore auditores mei faciunt, ferre non poſſunt) qui modum docendi quo utor obſectare conati ſunt, clamando me terminos Philoſophiæ ipſi non explicare, atque ideo me ipſos facere ineptos ad libros vel alios Profeſſores intelligendos, meque ipſos non niſi ſubilitates quaſdam docere, quarum cognitio ipſos mox adeo inflatos reddat, ut vulgares opiniones irridere audeant. Ac propterea mihi perſuadeo Dom. Voetium (aut Rectorem Magnificum, &c. Eſto prodigus in honorificis titulis ipſi tribuendis) hujus calumniæ certiorẽ factum voluiſſe obiter ejus hic meminiffe, ut mihi occaſionem ab ea me purgandi largiretur; quod facile effectum dabo, oſtendendo me nunquam terminorum, quæ profeſſionem meam concernunt, explicationem negligere, cum occaſio id exigat, licet majore ſolicitudine coner rerum cognitionem tradere; & libentiſſime fateor, cum non utar niſi evidentiffimis rationibus, & quæ à quolibet intelligi poſſunt, cui tantum ſenſus communis eſt integer, me ad mentem meam explicandam magna terminorum, à communi loquendi modo alienorum, multitudine non indigere; atque ita fieri poſſe, ut citius ipſarum rerum veritas, quam trado, addiſcatur, & animo circa præcipuas Philoſophiæ difficultates ſatiſſiat, quam omnes termini memoriam mandari potuerint, quibus alii utuntur in ſuis opinionibus circa eaſdem difficultates explicandis, & quorum omnium adminiculo nunquam ſatiſſaciunt iis, qui rationis lumen ſequuntur, ſed ſolummodo dubitationum nebulis mentem replent; & denique me non omittere doctrinam etiam terminorum mihi inutilium, eoſque ſecundum verum ſuum ſenſum explicatos, celerius ex me quam vulgo ex aliis diſci. Quod experientia comprobare poſſum, quam multi auditorum meorum exhibuerunt etiam in publicis diſputationibus, poſtquam tantum tot menſes, &c. Nullus autem dubito, quin nemo futurus ſit, cui tantum eſt ſanum ſinciput, qui hic quippiam culpæ auſit, quin imo non potius ſit ſummopere hæc laudaturus; etſi enim hinc ſæpe contingat, ut qui mea audiverunt, ea quæ ab aliis in contrarium docentur, ut minus rationi

tioni consentanea, contemnant, vel etiam si placet exhibent, nullo modo hujus rei culpa mea, sed potius aliorum institutioni est tribuenda; atque hoc ipsos potius ad meam, quantum fieri potest, imitandum, quam ad eam traducendum, & calumnia sua obruendum, deberet invitare.

T H E S I S P R I M A, &c.

Responsio ad primam Thesim.

PLane hic assentior sententiæ Domini Rectoris Mag. nempe quod innoxia illa entia, quæ formas substantiales & qualitates reales vocant, non sint temere de antiqua sua possessione deturbanda; quin & ipsa nondum hæcenus absolute rejecimus, sed tantummodo profiteamur nos ipsis non indigere, ad causas rerum naturalium reddendas, putamusque rationes nostras eo præcipue nomine esse commendandas, quod ab ejusmodi assumptis incertis & obscuris nullo modo dependeant. Quoniam in talibus idem fere est dicere, se iis nolle uti, ac dicere, se non admittere: quia nempe ab aliis non aliam ob causam admittuntur, quam quia necesse est esse putantur ad effectuum naturalium causas explicandas; non difficiles erimus in confitendo nos illa plane rejicere: neque id, ut spero, Mag. Rector vitio nobis vertet, quia dudum scholarum Philosophiam, nominatim Logicam, Metaphysicam, Physicam, si non accuratissime, saltem mediocriter perdidicimus, & misera illa entia nullius usus esse percepimus, nisi ad excæcanda studiosorum ingenia, & ipsis, in locum doctræ illius ignorantia, quam Rect. Mag. tantopere commendat, superbam quandam aliam ignorantiam obrudendum. Sed ne parum liberales videamur, laudo etiam quod Mag. Rect. adolescentes à feroce contemptu, & fuga studii Philosophici, atque insuper ab idiotica, rustica, & superba ignorantia velit revocare, nec ullo modo possum suspicari cum hic respexisset ad illam in meos auditores querelam, de qua paulo ante, quod scilicet vulgarem Philosophiam mea intellecta contemnant. Neque enim fas puto, existimare tam pium virum, ab omni maledicendi studio tam alienum, & mihi privatim summe amicis, tam alienis nominibus uti voluisse, ut cognitionem Philosophiæ quam doceo, quæque tam vera & aperta est, ut qui semel ipsam didicit, alias facile contemnat, rusticam, idioticam, & superbam ignorantiam appelleret, contemptumque istum opinionum quæ falsa existimantur, ortum ex cognitione

tione Philosophiæ verioris, vocet ferocem, & fugam studii Philosophici, tanquam si per studium Philosophicum, nil nisi studium earum controversiarum, in quibus nulla unquam certa veritas habetur, non autem studium ipsius veritatis, sit intelligendum.

· T H E S I S S E C U N D A, &c.

Responsio ad Thesim secundam, &c.

DUODECIM hic puncta proponuntur, quæ optime paulo ante ab ipso Mag. Rectore præjudicia & dubia fuerunt appellata; quia nihil affirmandi, sed dubitandi tantum occasionem dare possunt, iis qui magis præjudiciis quam rationibus moventur, & pertacile solvuntur ab iis qui rationum momenta examinant.

In primo quaerit an conciliari possit opinio negans formas substantiales cum sacra scriptura. Qua de re nemo potest dubitare, qui tantum sciet, Prophetas & Apostolos, aliosque, qui dictante Spiritu Sancto sacras scripturas composuerunt, de entibus istis Philosophicis, & extra scholas plane ignotis, nunquam cogitasse. Ne enim aliqua sit ambiguitas in verbo, hic est notandum, nomine formæ substantialis, cum illam negamus, intelligi substantiam quandam materiæ adjunctam, & cum ipsa totum aliquod mere corporeum componentem, quæque non minus, aut etiam magis quam materia, sit vera substantia, sive res per se subsistens, quia nempe dicitur esse actus, illa vero tantum potentia. Hujus autem substantiæ, seu formæ substantialis, in rebus mere corporalibus, à materia diversæ, nullibi plane in sacra scriptura mentionem fieri putamus. Atque inter cætera, ut agnoscatur quam parum urgeant ea loca scripturæ, quæ à Mag. Rect. hic citantur, puto sufficere si omnia referamus: nempe Gen. 1. vers. 11. habetur. *Et ait, Germinet terra herbam viventem & facientem semen, & lignum pomiferum faciens fructum juxta genus suum.* Et 21. *Creavit Deus cete grandia, & omnem animam viventem atque motabilem, quam produxerunt aqua in species suas, & omne volatile secundum genus suum, &c.* Rogo ut omnes textus hoc loco adferas, omnes enim perlegi, nec quidquam video quod ipsi faveat. Neque enim potest dici verba generis aut speciei designare differentias substantiales, cum sint etiam genera & species accidentium ac modorum, ut figura est genus, respectu circulorum & quadratorum, quæ tamen nemo suspicatur habere formas substantiales, &c.

2. Veretur, ne si formas substantiales in rebus pure materialibus negemus, dubitare etiam possimus, an deus aliqua in homine; illorumque errores qui animam mundi universalem, aut quid simile imaginantur, non tam feliciter & intus reuindere, quam assertores formarum.

Ad secundum. Addi potest, è contra ex opinione affirmante formas substantiales, facillimum esse prolapsum in opinionem eorum qui dicunt animam humanam esse corpoream & mortalem; quæ cum agnoscitur sola esse forma substantialis, alias autem ex partium configuratione & motu constare, maxima hæc ejus supra alias prærogativa ostendit ipsam ab iis natura differre, & naturæ differentia viam aperit facillimam ad ejus immaterialitatem immortalitatemque demonstrandam, ut in Meditationibus de prima Philosophia nuper editis videri potest; adeo ut nulla ex cogitari possit hac de re opinio Theologiæ magis favens.

Ad quintum. Absurdum sane sit pro iis qui ponunt formas substantiales, si dicant ipsas esse immediatum suarum actionum principium; non autem absurdum esse potest pro iis qui formas istas à qualitatibus activis non distinguunt; nos autem qualitates activas non negamus, sed negamus tantum ipsis entitatem aliquam majorem quam modalem esse tribuendam; hoc enim fieri non potest nisi tanquam substantiæ concipiantur. Nec etiam negamus habitus, sed duplicis generis illos intelligimus; nempe alii sunt pure materiales, qui à sola partium configuratione, aut alia dispositione, dependent; alii vero immateriales, sive spirituales, ut habitus fidei, gratiæ, &c. apud Theologos, qui ab ea non pendent, sed sunt modi spirituales menti inexistentes, ut motus, aut figura, est modus corporeus corpori inexistens.

Ad octavum. Vellem explicare, quomodo etiam automata sint opera naturæ, & homines in iis fabricandis nihil aliud faciant, quam applicare activa passivis; ut etiam faciunt dum triticum seminant, vel mulum generari curant; quod nullam differentiam essentialem, sed tantum à natura inductam affert; valde tamen facit differre secundum magis & minus, ut ais, quia paucæ illæ rotæ in horologio, cum innumeris ossibus, nervis, venis, arteriis, &c. vilissimi animalculi nullomodo sunt comparandæ. Loca autem scripturæ quæ citat essent hic rursus omnia afferenda, ut calumnia appareat, nihil enim urgent.

Ad decimum. Eodem titulo Geometria & Mechanicæ omnes essent rejiciendæ; quod quam ridiculum & à ratione alienum nemo non videt. Nec hoc sine risu possem prætermittere, sed non suadeo.

Ad undecimum. Non dicimus terram à situ, positura, & figura moveri,

sed tantum disponi ad motum; nec vero est circulus unam rem ab una moveri, & ab alia disponi ad motum. Nec etiam vitiosus est circulus, quod unum corpus moveat aliud, & hoc moveat tertium, & hoc tertium moveat rursus primum, si prius moveri desierit; ut neque est circulus, quod unus homo pocuniam tradat alteri, quam hic alter tradat tertio, qui tertius primo rursus tradere potest.

Ad duodecimum. Qui dicunt per hæc principia nihil explicari, legant nostra meteora, & conferant cum Aristotelis meteoris; item Dioptricam cum aliorum scriptis, qui de eadem materia scripserunt, & agnoscent opprobrium omne opinionibus à natura diversis remanere.

AD TERTIAM THESIM. Rationes omnes, ad probandas formas substantiales, applicari possunt formæ horologii, quam tamen nemo dicit substantialem.

AD QUARTAM THESIM. Rationes, sive demonstrationes Physicæ contra formas substantiales, quas intellectum veritatis avidum plane cogere arbitramur, sunt in primis hæc à priori Metaphysica, sive Theologica; quod plane repugnet ut substantia aliqua de novo existat, nisi de novo à Deo creetur: Videmus autem quotidie multas ex illis formis, quæ substantiales dicuntur, de novo incipere esse, quamvis à Deo creari non putentur ab iis qui putant ipsas esse substantias; ergoonale hoc putant. Quod confirmatur exemplo animæ, quæ est vera forma substantialis hominis; hæc enim non aliam ob causam à Deo immediate creari putatur, quam quia est substantia; ac proinde, cum aliæ non putentur eodem modo creari, sed tantum educi è potentia materiæ, non putandum etiam est eas esse substantias. Atque hinc patet non eos qui formas substantiales negant, sed potius eos qui affirmant, eo tandem per solidas consequentias adigi posse, ut fiant aut bestię, aut Athei. Nolle itaque ut rejiceret argumentum ab ortu formarum petitum, nec Theristicum appellares, quia videtur ad hoc referri; sed ponerem tantum, ea quæ ab aliis ea de re dicta sunt nos non tangere, quoniam ipsos non sequimur. Altera demonstratio petitur à fine, sive usu formarum substantialium; non enim aliam ob causam introductæ sunt à Philosophis, quam ut per illas reddi posset ratio actionum propriarum rerum naturalium, quarum hæc forma esset principium & radix, ut habetur in Thesi præcedenti; sed nullius plane actionis naturalis ratio reddi potest per illas formas substantiales, cum earum assertores fateantur ipsas esse occultas, & à se non intellectas; nam si dicant aliquam actionem procedere à forma substantiali, idem est ac si dicerent, illam procedere à re à se non

non intellecta, quod nihil explicat. Ergo formæ illæ ad causas actionum naturalium reddendas nullo modo sunt inducendæ. Contra autem à formis illis essentialibus, quas nos explicamus, manifestæ ac Mathematicæ rationes redduntur actionum naturalium, ut videre est de forma salis communis in meis meteoris; & hic subjungi potest quæ habes de motu cordis.

AD QUINTAM THESIM. Quod tam sæpe jactat de docta ignorantia dignum est explicatione. Nempe cum scientia humana sit admodum limitata, & totum id quod scitur, fere nihil sit, comparatum cum iis quæ ignorantur, doctrinæ signum est, quod quis libere fateatur se ignorare illa quæ revera ignorat, & in hoc proprie docta ignorantia consistit, quia scilicet est peculiaris eorum qui vere docti sunt; nam alii qui vulgo doctrinam profitentur, nec tamen vere docti sunt, non valentes ea dignoscere, quæ nemo eruditius ignorat, ab iis quæ sine dedecore vir doctus tateri potest se ignorare, omnia ex æquo se scire profitentur; atque ad facile reddendas omnium rerum rationes (si tamen ratio ullius rei reddatur, cum explicatur obscurum per obscurius) formas substantiales & qualitates reales excogitarunt; quæ in re ipsorum ignorantia nequaquam docta, sed tantum superba & pædagogica dici debet; in hoc enim manifesta superbia est, quod ex eo solo quod naturam alicujus qualitatis ignorent concludunt ipsam esse occultam, hoc est omnibus hominibus impercrutabilem, tanquam si ipsorum cognitio esset mensura omnis humanæ cognitionis.

AD SEXTAM. Non video hominis ratiocinium in iis quæ de me inferit; ait me in dissertatione de Methodo non satis evidenter demonstrasse esse Deum, quod ipse etiam ibi professus sum; quid autem ad hoc spectans inferri potest ex his verbis *cogito ergo sum*; & quam male hic citat, & mihi opponit, tractatum patris Merlenni, & suum; cum suus adhuc in herba sit, & Merlennus nullum plane præter meas Meditationes de prima Philosophia edi curaverit.

AD SEPTIMAM. Pro his verbis, *ipsa tamen, ut verum fatear, &c.*, ponerem, de ipsa tamen nihil simile opinionibus Taurelli aut Gorlæi sustinimus, nihilque omnino quod in re à vulgari & orthodoxa Philosophorum omnium sententia dissideat; asserimus enim hominem ex corpore & anima componi, non per solam præsentiam sive appropinquationem unius ad alterum, sed per veram unionem substantialem; ad quam quidem ex parte corporis requiritur naturaliter situs & partium conformatio; sed quæ tamen sit diversa à suis & figura modisque aliis pure corporeis, non enim solum corpus, sed etiam animam, quæ incorporea est, attingit. Quantum autem ad modum

loquendi etsi forte sit minus usitatus, ad id tamen quod significare volumus satis aptum fuisse existimamus; non enim diximus hominem esse *ens per accidens*, nisi ratione partium, animæ scilicet & corporis: ut nempe significarem, unicuique ex his partibus esse quodammodo accidentarium, quod alteri juncta sit, quia leorsim potest subsistere, & id vocatur *accidens*, quod adest vel abest sine subjecti corruptione: sed quatenus homo in se totus consideratur, omnino dicimus ipsum esse unum *ens per se*, & non per accidens; quia unio, qua corpus humanum & anima inter se conjunguntur, non est ipsi accidentaria, sed essentialis, cum homo sine ipsa non sit homo. Sed quoniam multo plures in eo errant, quod putent animam à corpore non distingui realiter, quam in eo quod admittit ejus distinctione unionem substantialem negent; majorisque est momenti ad refutandos illos qui animas mortales putant, docere istam distinctionem partium in homine, quam docere unionem; majorem me gratiam initutum esse sperabam à Theologis, dicendo hominem esse *ens per accidens*, ad designandam istam distinctionem, quam si respiciendo ad partium unionem, dixissem illum esse *ens per se*. Atque ita non meum est respondere ad ea quæ in opiniones Taurilli & Gorlæi fuisse obijciuntur, sed tantummodo conqueri, quod tam immerito, ac tam severe, mihi aliorum errores affingantur.

Cæterum in his fui prolixior quam putaram, & quia non certus sum de hoc in eo scripto esse usurum, nolo jam plura scribere; sed si uti velis, rogo ut moneas quam primum, & reliqua protinus usque ad finem absolvam, scribasque qua me lingua uti malis. Ubiposui, &c. Intellèxi aliquid deesse quod de tuo sit addendum, omnia autem si placet cum Achille ac Nestore nostro Domino V. L. communicabis, & nihil plane nisi ex ejus consilio suscipies; vel sane si quid sit quod ipse nolit scire, Domini Æmilii viri prudentissimi nobisque amicissimi consilio uteris; & ipsis multo magis quam mihi credes, quia prævalent ingenio, & ibi præsentibus de omnibus facilius possunt judicare, quam ego absens divinare. Non puto te nimis honorifice de Voetio loqui posse, velimque etiam ut caveas ne quam ea in re ironiæ desuspicionem, nisi quatenus ex bonitate tuæ causæ nascetur; ut postea si nos cogat mutare stylum, tanto meliori jure id possimus, & ipse tanto magis ridiculus evadat. Expedit etiam ut tua responsio quam primum edatur, & ante finem feriatarum, si fieri potest.

Miratus sum admodum quod scribas te de tua professione periclitari, si Voetio respondeas; nesciebam enim illum in vestra civitate regnare,

re, magisque liberam putabam; & miseret me ejus, quod pædagogotam vili ac tam misero tyranno servire sustineat. Te quoniam in ea vivis ad patientiam hortor, atque ut ea tantum facias quæ Dominis tuis magis placitura esse existimabis: idcirco non modo non per te, sed ne quidem etiam per alium, Voetio respondendum censeo, quia hoc illum non minus offendet. Notulas tamen extemporaneas, quæ mihi tuum scriptum cum omnibus thesibus conferendo occurrerunt, mitto, ut ipsis utaris ut lubet. Injuriam autem facis nostræ Philosophiæ, si eam nolentibus obtrudas, imo si communices aliis quam enixe rogantibus. Memini te olim mihi gratias egisse, quod ejus causa professionem fuisses adeptus, atque ideo putabam illam Dominis tuis non esse ingratam. Nam si aliter se res habet, & malint te id quod placet Voetio, quam quod verius putas docere, censeo ut morcem geras, & vel fabulas Æsopi potius legas, quam ut ipsis ea in re displiceas.

Quæ habes in fine tuæ epistolæ de globulis æthereis, non intelligo; quia non censeo illos à materia subtilissima moveri, sed à se ipsis cum motum habeant ab exordio mundi sibi inditum; nec etiam majores vehementius moveri quam minores, sed absolute contrarium puto: dixi quidem in meteoris, majores cum magis sunt agitati majorem calorem efficere, sed non ideo facilius moveri. Vale.

EPISTOLA XC.

De Thesi H. Regii, in qua dicit hominem
esse ens per accidens.

Vir Clarissime,

Vix quicquam durius, & quod majorem offensæ ac criminationis occasionem daret, in thesibus tuis ponere potuisses, quam hoc, *quod homo sit ens per accidens*: nec video qua ratione melius possit emendari quam si dicas te in nona thesi considerasse totum hominem in ordine ad partes ex quibus componitur, contra vero in decima considerasse partes in ordine ad totum. Et quidem in nona te dixisse hominem ex corpore & anima fieri per accidens, ut significares dici posse *quodammodo* accidentarium corpori, quod animæ jungatur, & animæ quod corpori, cum & corpus sine anima, & anima sine corpore esse possint; vocamus enim accidens, omne id quod adest vel abest sine subjecti corruptione, quamvis forte

forte in se spectatum sit substantia, ut vestis est accidens homini; sed te non idcirco dixisse *hominem esse ens per accidens*, & satis ostendisse in decima thesi, te intelligere illum esse ens per se; ibi enim dixisti animam & corpus, ratione iplius, esse substantias incompletas, & ex hoc quod sint incompletæ, sequitur illud quod componunt esse ens per se. Utque appareat, id quod est ens per se fieri posse per accidens, nunquid mures generantur, live fiunt per accidens, ex sordibus, & tamen sunt entia per se? Objici tantum potest, non esse accidentarium humano corpori, quod animæ conjungatur, sed ipsissimam ejus naturam; quia corpore habente omnes dispositiones requisitas ad animam recipiendam, & sine quibus non est proprie humanum corpus, fieri non potest sine miraculo, ut anima illi non uniatur; atque etiam non esse accidentarium animæ, quod juncta sit corpori, sed tantum accidentarium esse illi post mortem, quod à corpore sit sejuncta; quæ omnia non sunt prorsus neganda, ne Theologi rursus offendantur; sed respondendum nihilominus, ista ideo dici posse accidentaria, quod considerantes corpus solum, nihil plane in eo percipiamus, propter quod animæ uniri desideret; ut nihil in anima, propter quod corpori debeat uniri; & ideo paulo ante dixi, esse *quodammodo* accidentarium, non autem *absolute* esse accidentarium. Alteratio simplex est illa quæ non mutat formam subjecti, ut calefactio in ligno; generatio vero, quæ mutat formam, ut ignitio; & sane, quamvis unum alio modo non fiat quam aliud, est tamen magna differentia in modo concipiendi, ac etiam in rei veritate; nam formæ, saltem perfectiores, sunt congeries quædam plurimarum qualitatum, quæ vim habent se mutuo simul conservandi: at in ligno est tantum moderatus calor ad quem sponte redit postquam incaluit; in igne vero est vehemens calor, quem semper conservat, quamdiu est ignis. Non debes irasci collegæ illi qui consilium dabat de addendo corollario ad interpretandam tuam thesim; amici enim consilium fuisse mihi videtur. Omisisti aliquod verbum in tuis thesibus manu scriptis, thesi decima, *omnes alie*, non dicis quæ sint illæ alie, nempe *qualitates*; in cæteris nihil habeo quod dicam, video enim vix quicquam in iis contineri, quod non jam ante alibi posueris, & laudo: esset enim laboriosum nova semper velle invenire. Si hac advenis semper mihi tuus adventus erit pergratus. Vale.

EPISTOLA XCI.

Occasione interdictæ H. Regii doctrinæ.

Vir Clarissime,

Hic te ab aliquot diebus expectavi, jam autem aliquid audio quod etsi non videatur esse ullius momenti, vereor tamen neforte tuum iter tardaverit; & ego è contra tanto magis tecum loqui exopto, ut quid super hac re agendum sit communibus consiliis videamus. Neque audio tuos adversarios tandem vicisse, atque effecisse, ut tibi interdicere-
tur, ne nostra amplius doceres; quo animo istud feras nescio, sed si mihi credis plane irridebis, & contemnes, tamque apertam invidiam tibi magis gloriosam esse existimabis, quam imperitorum applausus. Neque profecto mirandum est, quod in re, in qua vocum pluralitas locum habet, tu solus, cum veritate paucisque fautoribus, adversariorum multitudinem resistere non potueris. Si hoc solo risu & silentio ulcisci velis, atque otium sequi, non dehortabor, sin minus, quantum in me erit tibi non decro. Interim rogo ut, vel voce vel litteris tui mei instituti quamprimum facias certiores. Vale & me ama. Si huc venias rogo, ut quamplurimas ex adversarii tui thesibus, tecum afferas. Vale.

EPISTOLA XCII.

Instructio ad H. Regium,

Vir Clarissime,

Quam audio ab amicis, nemo legit responsum tuum in Voetium, qui non eam valde laudet; legerunt autem quamplurimi: nemo qui Voetium non irrideat, & dicat ipsum de causa sua desperasse, quandoquidem ope vestri Magistratus indiguit ad ipsam defendendam. Formas autem substantiales omnes explodunt, & palam dicunt, si reliqua omnis nostra Philosophia ita esset explicata, neminem non eam amplexurum. Dolere non debes quod tibi Physicorum problematum explicatio interdicta sit, quin & vellem etiam ut privata institutio interdicta fuisset, talia enim omnia in honorem tuum cedent, & in dedecus adversariorum. Ego certe, si tuorum Consulium loco essem, & Voetium vellem evertere, non aliter tecum agerem ejus causa, quam faciunt; &

Q9

quis

quis scit quid in animo habent? certe non dubito quin Dominus V. H. tibi faveat, debesque accurate ejus consiliis mandatisque obtemperare; gaudeo quod noluerit, ut literas quas ad te nuper scripseram, cuiquam ostenderes, etsi enim à me ipso impetrassem, antequam mitterem, ut ea, si opus esset, præstarem, quæ Voetio per ipsas promittebam, longe tamen malo ut ne sit opus; nimis multa me quotidie avocant à Philosophia mea, quam tamen hoc anno absolvere decrevi. Cæterum obsequere accurate ac lato animo iis omnibus, quæ tibi à Dominis tuis præscribentur, ut certus ea tibi dedecori nullo esse possent. Disputationes autem quæ in te fient contemne, ac dicas tantum, si quid in illis boni afferant, ipsos etiam posse illud idem scriptis mandare, te vero non posse nisi editis scriptis respondere. Vale.

E P I S T O L A X C I I I.

Instructio ad H. Regium occasione controversiæ inter
Voetium & ipsum.

Vir Clarissime,

GRatulor tibi, quod persecutionem patiaris propter veritatem; gratulor inquam, & ex animo; non enim video tibi quicquam mali ex istis turbis posse contingere, sed contra gloriæ tuæ multum accedet. Lætari debes quod Deus inimicis tuis contilium ac bonam mentem ademerit; vides enim jam prohibitione libri tui nihil aliud effectum esse, nisi tantum ut cupidius ematur, accuratius examinetur, ejus iniquitas & causæ tuæ bonitas à pluribus agnoscatur. Plures jam advertent quam acerbe, quam injuriose, ac quam sine causa, sola invidentia sua permotus, te ille prior laceggerit, & contra tu quam modeste, quam leniter, quam etiam (quod sane indignissimum est) reverenter responderis, & quam justæ ac graves causæ te ad respondendum coegerint. Plures agnoscent quam infirmæ sint rationes omnes quibus tuas opiniones impugnare conatus est, & contra quam validæ sint ex quibus ipsum refutas. Plures concludent nullas amplius ei superesse ad tibi respondendum, atque omnino plures indignabuntur, quod tantum possit contra jus & fas in vestra civitate, ut ei licuerit publico scripto te atheum, bestiam, & aliis ejusmodi nominibus vocare, falsasque adhibere rationes ad falsis te criminibus onerandum: tibi vero nequidem liceat verissimis uti rationibus,

nibus, verbisque modestissimis ad te purgandum. Egregium vero est quod audio ab ipso proponi, ut nempe verbis sibi liceat in te disputare apud delegatos, qui iudicent uter superior sit futurus; haud dubie quia ejus rationes, dum adhuc calent, ut quædam juscula, sunt sorbendæ, & cum frigescunt, corrumpuntur. Hac in te, ut & in aliis multis, est S'nostro simillimus; & sane non iudico tibi quicquam à tali adversario esse metuendum. Quid enim deinceps moliri potest? forte ut tibi prohibeatur à Magistratu, ne amplius doceas ea quæ soles docere; forte etiam ut tapquam falsa & hæretica condemnentur; forte denique, quod extremum est ut tu ipsemet tuo docendi munere priveris. Sed nec puto Consules vestros tam illi fore obsequentes, ut quicquid ei placuerit decernant; quinimo neminem ex iis esse existimo, cui non facile subleat, quàm ob causam tum à Voetio, tum ab aliis plerisque ex tuis collegis Philosophia tua tam acriter impugnetur; nempe quia verior est quam vellent, rationesque habet tam manifestas, ut erroneas ipsorum opiniones etiam non impugnando evertat, & ridiculas esse ostendat. Nam sane illi vitio vertere non possunt, quod sit non, quoniam illi etiam Philosophi quotidie novas excogitant opiniones, & inde maxime gloriam quærunt, nullusque unquam hoc prohibuit; sed nempe illas sibi mutuo non invident, quia veras non putant; neque etiam tibi tuas inviderent, si falsas esse arbitrarentur. At certe Magistratus, qui hactenus non prohibuerunt ne docerent novas & falsas, non vetabunt etiam ne doceas novas & veras. Et quamvis forte nonnulli, qui tricas istas Scholaram, utpote ad bene regendam rempublicam minime utiles, nunquam didicerunt, æquitatem causæ tuæ non videant; confido tamen ipsos tam æquos & prudentes fore, ut non magis testimonio tuorum adversariorum sint credituri, quam tuo; & vel unicum D. V. qui veritatem totius controversiæ proculdubio recte intelligit, satis auctoritatis apud collegis suos esse habiturum, ut te ab omni injuria defendat. Sed, etiamsi aliter contingeret, ac vel professio, quod esset mirabiliter absurdum, ac sine ullo exemplo, tibi auferretur, non tamen ideo tibi vel minimum dolendum esse arbitrarer, nec ullum in te dedecus, sed immortale in alios redundaret; atque tunc profecto, vel crassa ignorantia, vel veritatis odium, vel ridenda in vestra civitate potentia toti mundo innotesceret. Quin etiam profecto, si tuo essem loco, vellem scire à Consulibus, quo ego haberem Dominos, & me potius sponte munere meo abdicare, quàm Voetio servire. Nec dubito quin brevi, si velles, perfacile alibi professio nem & magis honorificam, & magis utilem esses habiturus; citiusque

mille alii è vestris invenirentur, qui eadem quæ tui adversarii docerent, quam unus qui eadem quæ tu; & tamen forte ille unus magis à studiosis desideraretur. Quantum ad me, credidi hæcenus me beneficio affectum esse à Dominis tuis, quod cum scirent te à meis in Philosophia opinionibus non esse alienum, non ideo minus libenter te in Professore elegerunt; ac forte etiam, ut mihi persuadere voluisti, ob hanc præcipue causam elegerunt. Hoc me peculiariter illis devinxit; atque ideo valde exopto, ut jactari possit apud posteros, vestram civitatem omnium primam fuisse, in qua Philosophia nostra publice fuerit recepta, quod spero ipsi dedecori non futurum, ut è contrario non esset laudi, si te nunc tutum ab adversariorum injuriis non præstaret. Debuit enim sciri ab iis qui te primum in Professore receperunt, fieri non posse ut ea nova quæ habebas, aliquid eximii continerent, quin statim plures eorum ex tuis collegis, qui satis ingenii non haberent ad eadem amplectenda, magnam invidiam in te contraherent, atque ideo parati esse debuerunt ad te contra hos protegendum. Nec sane ipsis erit difficile; nam quid in te vel per calumniam objici potest? te scilicet nova docere? quasi vero in Philosophia hoc non sit commune, ut quicumque non plane ingenio sunt destituti novas excogitent opiniones, atque inde maxime gloriam quærant; sed nempe illas sibi mutuo non invident, quia veras non putant; ut neque etiam tibi tuas inviderent, si falsas esse arbitrarentur; an vero æquum esset, cum ex aliorum permittantur opiniones, quæ novæ sunt & falsæ, ut tuæ prohiberentur, quia novæ sunt & veræ? Magnum aliqd crimen objicitur, quod in Voetium scripseris. Quasi vero sit aliquis sanæ mentis, qui legendo utriusque libellum, ac monitus eorum quæ prius ab illo facta fuerunt, non clare videat illum ipsum fuisse qui acerbissime in te scripsit, calumniisque evertere conatus est; te vero tantum nimis humaniter, ac nimis moderate respondisse, eodem modo ac si, cum quis te ad occidendum stricto ense fuisset persecutus, tu vero manu ictum à corpore avertisses, nihilque præterea egisses, nisi quod verbis quam humanissimis ejus iram mollire conatus fuisses, ille furore ardens accusaret te, quod te à se occidi non permisisses. At forte Voetius ipse te non accusat, sed alii collegæ? tanquam si obscurum esset illos ejus voluntate id facere, eademque in te invidia flagrare; ac tanquam si ideo justa esset accusatio, quod impetum in te facientem repuleris, nec ille potius ut aggressor & calumniator sit puniendus. Calumniatorem ob id præcipue appello, quod sciam ipsum te iniquissime accusare voluisse, quod aliquas opiniones, Theologiæ vestræ contrarias docuisses, cum tamen omnes tuæ, me-

lius

lius quam vulgares, cum Theologia consentiant, & facile esset, vel ex solis ejus thesibus de atheismo, quas vidi, per certas & evidentes consequentias ostendere, illum potius esse quod de nobis falso voluit credi. Quin, & si esset operæ pretium ipsum qualis est describere, artesque omnes ejus detegere, talis forte appareret, ut civitati vestræ foret indecorum, ipsum diutius in concionatorem aut Professorem retinere; magna enim est vis veritatis. Ultimum & præcipuum quod objicitur est Academix vestræ detrimentum, quod ex professorum inimiciis, ut inquirunt, oriretur. At primo, non video quid privatæ istæ inimicitix universitati nocere possint; nam è contra hoc efficiet, ut singuli reprehensionem aliorum metuentes, tanto diligentius officio suo fungantur; ac deinde, si vel maxime hoc noceret, certe alii potius, qui sunt inimiciorum auctores, quam tu, qui illas fugis, eo nomine essent deponendi. Nec dicent, opinor, tua dogmata talia esse ut studiosos avertant ab Academia vestra frequentanda, nam audio te & satis multos auditores, & maxime insignes habere; eaque videtur esse fortuna nostrarum opinionum, non solum apud vos, sed & aliis omnibus in locis, ut à præstantioribus ingeniis amentur & æstimentur, nec nisi à vilioribus ludimagistris, qui sciunt se falsis artibus ad aliquam eruditionis famam pervenisse, ideoque timent ne cognita veritate illam amittant, odio haberi. Et nisi me augurium fallit, spero fore, ut aliquando, propter te unum plures Academiam vestram sint adituri, quam propter omnes eos qui tibi adversantur; nec forte ad hoc nocebit editio Philosophiæ quam paro; adeo ut si Domini vestræ civitatis ad utilitatem & decus Academix suæ respiciant, omnes potius tuos inimicos quam te unum ejicient; nam etiam facilius mille alios invenient, qui eadem doceant, quæ illi, quam unum qui eadem, quæ tu. Nec vereor ne forte aliqui ex vestris Consulibus, non imbuti scholasticis studiis, utpote ad recte regendam rempublicam non necessariis, magis credant adversariis tuis quam tibi, neque enim illos puto tam obesse naris, ut horum invidiam non advertant; & vel unicus D. V. R. qui statum totius controversiæ, atque æquitatem tuæ causæ proculdubio recte perspexit, estque rerum istarum plane intelligens, satis auctoritatis apud collegas suos est habiturus, ut te ab omni injuria defendat; tantamque in eo esse scio integritatem ac prudentiam, ut non verear ne magis faveat adversariis tuis quam veritati. Ac denique ob hoc præcipue debes lætari, quod tua causa sit talis, ut postquam judicata fuerit à tuis, judicari etiam debeat ab incolis totius orbis terrarum, & cum in ea de honore tantum

agatur, si quid tibi priores contra jus ademerint, cum fœnore ab aliis restituitur. Vale.

EPISTOLA XCIV.

Instructio ad H. Regium, quomodo se gerere debeat circa decretum Magistratus Ultrajectensis.

Vir Clarissime,

LEgi, & risi, tum theses Voetii pueri, sive infantis, filii volui dicere, tum etiam iudicium Academiæ vestræ, quæ forte etiam non immerito infans dici potest. Laudo Æmilium & Cyprianum quod tot ineptiarum rei esse noluerint; in te vero subirascor, quod talia tibi cordi esse videantur. Lætari enim deberes quam maxime, quod videas adversarios tuos suis se propriis armis jugulare; nam certe nemo mediocriter intelligens scripta ista perleget, quin facile animadvertat, adversariis tuis & rationes deesse quibus tuas refutent, & prudentiam qua imperitiam suam tegant. Audiavi hodie rursus Monachum tui Voetii responsionem parare; & quidem certum est, auditum enim à Bibliopola qui habet edendam; continebit circiter decem folia, nempe Appendix Voetii cum notis tuis adhuc semel ibi edentur. Faveo sic scribentibus; & velim etiam ut gaudeas. Quantum ad decretum tuorum Dominorum nihil mitius, nihil prudentius mihi videtur ab iis fieri potuisse, ut scilicet se collegarum tuorum querelis liberarent. Tu si mihi credis, ipsis quam accuratissime, atque etiam ambiciose, obtemperabis, docebisque tuam Medicinam Hypocraticæ & Galenicæ, & nihil amplius. Si qui studiosi aliud à te petant, excusabis te perhumaniter, quod tibi non liceat; cavebis etiam ne quam rem particularem explices; & dices, ut res est, ista ita inter se cohærere ut unum sine alio satis intelligi non possit. Dum ita te geres, si quæ antehac docuisti digna sint quæ discantur, & habeas auditores dignos qui ea discant, non dubito quin brevi denuo vel Ultrajecti vel alibi copiam & auctoritatem illa docendi cum honore duplicato sis habiturus. Interim vero nihil mali mihi videtur tibi contigisse, sed è contra multum boni, omnes enim te multo plus laudant, & pluris faciunt, quam fecissent, si adversarii tui tacuissent; ac præterea accessit otium, cum docendi onere ex parte sis liberatus, nec ideo de stipendio decessit. Quid deest, nisi animus, qui modeste hæc ferat? Quiesce, quæso, & ride; nec vereare

re

re ne adversarii tui satis mature non puniantur; denique vicisti, si tantum files; si malis redintegrare prælium fortunæ rursus te committes. Vale.

EPISTOLA XCV.

Quædam mutationes in thesibus H. Regii. Observatio de
Idea Dei. Differentia inter substantiam cogitantem
& substantiam extensam.

Vir Clarissime,

GAudeo nostram de Voetio historiam vestris non displicuisse; neminem adhuc vidi ne ex Theologis quidem, qui non illi vapulanti favere videretur. Nec sane nimis acris mea narratio dici potest, cum nihil nisi rem gestam commemorem, multoque etiam plura scripserim in quendam ex Patribus Societatis Jesu. Legi cursum ea quæ ad me misisti, nihilque in iis non optimum, & valde ad rem, notavi, præter hæc pauca. Primo, stylus multis in locis non est satis emendatus; præterea fol. 46. ubi ais materiam non esse corpus naturale, adderem, juxta illos qui corpus naturale definiunt hoc modo, &c. nam quantum ad nos, qui eam veram & completam substantiam esse putamus, non video cur corpus naturale esse negaremus; & folio 66. differentiam inter res vivas & vitæ expertes videris majorem statuere, quam inter horologium aliudve autotatum, & clavem, gladium, aliudve instrumentum quod sponte non movetur, quod non probos; sed ut *sponte moveri* est genus respectu machinarum omnium quæ sponte moventur, ad exclusionem aliarum quæ sponte non moventur, ita *vita* sumi potest pro genere formas omnium viventium complectente; & folio 96. ubi ais, *certe multo majorem efficaciam, &c. mallem, certe non minorem efficaciam, &c.* non enim est major in uno quam in altero. Denique fol. 106. locum Ecclesiastæ dicis à Salomone proferri ex persona impiorum. Ego autem in pagina 572. editionis Parisiensis eundem locum explicui, ex persona ipsius Ecclesiastæ, ut peccatoris. Sed non video cui usui hæc tua responsio esse possit, quia Cappadox ea est indignus, nisi rursus quid novi agat, & tunc una cum responsione ad istud novum sub nomine alicujus ex tuis discipulis edi possit; nunc existimo esse quiescendum; nec etiam debes nostra in tuis lectionibus cum Galenicis & Aristotelicis miscere, nisi certus sis id tuo Magistratui esse gratum; mal-

malem nullos haberes auditores, neque hoc tibi dedecori esset. Ad id quod objicis de idea Dei solvendum, notare oportet non agi de essentia idee, secundum quam ipsa est tantum modus quidam in mente humana existens, qui modus homine non est perfectior, sed de ejus perfectione objectiva, quam principia Metaphysica docent debere contineri formaliter vel eminenter in ejus causa; eodem modo ac si dicenti unumquemque hominem posse pingere tabellas æque bene ac Apelles, quia illæ constant tantum ex pigmentis diversimode permixtis, potestque illa quilibet modis omnibus permiscere, esset respondendum, cum agimus de Apellis picturis, nos non tantum in iis considerare permissionem colorum qualemcunque, sed illam quæ sit certa arte, ad rerum similitudines representandas, quæque idcirco non nisi ab istius artis peritissimis fieri potest. Ad secundum respondeo, ex eo quod fateris cogitationem esse attributum substantiæ nullam extensionem includentis, & vice versa extensionem esse attributum substantiæ nullam cogitationem includentis, tibi etiam fatendum esse substantiam cogitantem ab extensa distingui; non enim habemus aliud signum quo unam substantiam ab alia differre cognoscamus, quam quod unam absque alia intelligamus. Et sane potest Deus efficere quidquid possumus clare intelligere; nec alia sunt quæ à Deo fieri non possent dicuntur, quam quod repugnantiam involvunt in conceptu, hoc est quæ non sunt intelligibilia; possumus autem clare intelligere substantiam cogitantem non extensam, & extensam non cogitantem, ut fateris; jam jungat & uniat illas Deus quantum potest, non ideo potest se omnipotentia sua exuere, nec ideo sibi facultatem adimere ipsas sejungendi, ac proinde manent distinctæ.

Non potui notare ex tuo scripto an Monachum an Voetium per Cappadocem intelligas, quod non displicuit, sibi sumat qui volet; sed audio ignorari cujus sit Voetius, adeo ut erga ipsum sis bencheus, si Cappadociam ei in patriam assignes: multum autem debes Monacho quod auditorum tuorum numerum augeat. Cæterum audi vi à D. P. tibi animum esse huc nos invifendi: ego vero te etiam atque etiam invito neque te solum, sed & uxorem & filiam; mihi eritis gratissimi, jam virent arbores, ac brevi etiam cerasa & pyra maturefcent; Vale, & me ama.

EPISTOLA XCVI.

Ad H. Regium, occasione libri cujusdam
ad Cartesium missi.

Vir Clarissime,

Nescio quid obstitit, cur non prius ad tuas responderim, nisi quod ut verum fatear, non libenter à te dissentiam; & quia non videbar in eo quod scribebas debere assentiri, idcirco cunctantius calamum assumebam. Mirabar enim te illa quæ horariæ disputationis examini committere non auderes, indelebilibus typis credere velle, magisque vereri extemporaneas & inconsideratas adversariorum tuorum criminationes, quam attentas & longo studio excogitatas. Cumque meminerim me multa legisse in tuo compendio Physico à vulgari opinione plane aliena, quæ nuda ibi proponuntur, nullis additis rationibus, quibus lectori probabiles reddi possint; toleranda quidem illa esse putavi in thesibus, ubi sæpe paradoxa colliguntur, ad ampliorem disputandi materiam adversariis dandam; sed in libro quem tanquam novæ Philosophiæ prodromum videbaris velle proponere, plane contrarium judico esse faciendum, nempe rationes esse asserendas, quibus lectori persuadeas ea quæ vis concludere vera esse, priusquam ipsa exponas, ne novitate sua illum offendant. Sed jam audio à D. van. S. te consilium mutasse, multoque magis probo id quod nunc suscipis, nempe theses de Physiologia in ordine ad Medicinam; has enim & firmitus stabilire, & commodius defendere te posse confido, & minus facile de ipsis male loquendi occasionem adversarii tui reperient. Vale.

EPISTOLA XCVII.

Ad H. Regium, occasione editionis cujusdam libri.

Vir Clarissime,

Cum superiores litteras ad te misi, paucas tantum libri tui paginas pervolveram, & in iis satis causæ putabam me invenisse ad judicandum modum scribendi, quo usus es, nullibi, nisi forte in thesibus, posse probari, in quibus scilicet moris est opiniones suas modo quam maxime paradoxo proponere, ut tanto magis alii alliciantur ad eas oppugnandas.

R r

das.

das. Sed quantum ad me, nihil mihi magis vitandum puto, quam ne opiniones meæ paradoxæ videantur, atque ipsas nunquam in disputationibus agitari velim; sed tam certas evidentesque esse confido, ut illis à quibus recte intelligantur, omnem disputandi occasionem sint sublaturæ. Fateor quidem eis per definitiones & divisiones, à generalibus ad particularia procedendo, recte tradi posse, atqui nego probationes debere tunc omitti; scio tamen illas vobis adultioribus, & in mea doctrina satis versatis non esse necessarias. Sed considera, quæso, quam pauci sint illi adultiores, cum ex multis philosophantium millibus vix unus reperiatur qui eas intelligat; & sane qui probationes intelligunt, assertiones etiam non ignorant, ideoque scripto tuo non indigent: alii autem legentes assertiones sine probationibus, variasque definitiones plane paradoxas, in quibus globulorum æthereorum, aliarumque similium rerum, nullibi à te explicatarum, mentionem facis, eas irridebunt, & contemnent, sicque tuum scriptum nocere sæpius poterit, prodesse nunquam. Hæc sunt quæ lectis prioribus scripti tui paginis judicavi; sed cum ad caput de homine perveni, atque ibi vidi quæ de mente humana, & de Deo habes, non modo in priore sententia fui confirmatus, sed insuper plane obstupui & indolui, tum quod talia credere videris, tum quod non possis abstinere quin ipsa scribas, & doceas, quamvis nullam tibi laudem, sed summa pericula & vituperium creare possint. Ignosce, quæso, quod libere tibi tanquam fratri sensum meum aperiā. Si scripta ista in malevolorum manus incidant (ut facile incident cum ab aliquot discipulis tuis habeantur) ex illis probare poterunt, & vel me iudice convincere, quod Voetio paria facias, &c. Quod, ne in me etiam redundet, cogar deinceps ubique profiteri, me circa res Metaphysicas quam maxime à te dissentire, atque etiam scripto aliquo typis edito id publice testari, si liber tuus prodeat in lucem. Gratias quidem habeo quod illum mihi ostenderis, priusquam vulgares; sed non gratum scisti, quod ea quæ in eo continentur privatim me inscio docueris. Nuncque omnino subscribo illorum sententiæ, qui voluerunt, ut te intra Medicinæ terminos contineres. Quid enim tanti opus est, ut ea quæ ad Metaphysicam vel Theologiam spectant scriptis tuis immisceas, cum ea non possis attingere, quin statim in alterutram partem aberres. Prius, mentem, ut substantiam à corpore distinctam considerando, scripseras hominem esse ens per accidens; nunc autem contra considerando mentem & corpus in eodem homine arte uniri, vis illam tantum esse modum corporis; qui error multo pejor est priore. Rogo iterum ut ignoscas, & scias me tam libere

libere ad te scripturum non fuisse, nisi serio amarem, & essem ex affectu
REN. DESCARTES.

Librum tuum simul cum hac epistola remissem; sed veritus sum,
ne si forte in alienas manus incideret, severitas censuræ meæ tibi pos-
set nocere; servabo itaque, donec rescivero te hanc epistolam rece-
pisse.

EPISTOLA XCVIII.

Ad H. Regium. Defendit se contra quorundam accusationes.
Suadet ipsi ne librum suum in lucem edat.

Vir Clarissime,

Maxima mihi injuria fit ab illis, qui me aliqua de re aliter scripsisse
quam sensisse suspicantur, ipsosque si qui sint sciram, non possem
non habere pro inimicis; tacere quidem in tempore, ac non omnia quæ
sentimus ultro proferre prudentis est; aliquid autem à sententia sua alic-
num nemine urgente scribere, lectoribusque persuadere conari, abjecti
& improbi hominis esse puto. Assentibus, non magni opus Philoso-
phi esse, refellere rationes quæ pro animæ essentia substantiali allatæ sunt,
illasque interim nullo modo refellentibus, nec refellere valentibus, non
possum non reponere tua hæc verba, *quilibet enthusiastæ & cacodoxus, &
nugacissimus nugator idem de ineptissimis suis nugis pertinacissime asserere potest.*
Cæterum non vereor ne cujusquam à me dissentientis auctoritas mihi no-
ceat, modo ne illi videar assentiri; nec volo ut mea causa ullo modo ab-
stineas à quibuscumque scribendis & vulgandis; modo ne etiam ægre feras,
si palam profitear me à te quam maxime dissentire. Sed ne desim amici
officio, cum mihi librum tuum eo fine reliqueris, ut quid de eo senti-
rem à me intelligeres, non possum non aperte tibi significare, me omni-
no existimare tibi non expedire, ut quicquam de Philosophia in lucem
edas: nec quidem de ejus parte Physica; primo, quia cum tibi à tuo Ma-
gistratu prohibitum sit, ne novam Philosophiam vel privatim vel publi-
ce doceres, satis causæ dabis inimicis, si quid tale evulges, ut ob id ipsum
de professione tua te deturbent, ac etiam alias irrogent pœnas; valent e-
nim adhuc illi, & vigent, & fortasse cum tempore majores vires fument
quam verearis: Deinde, quia non video te quicquam laudis habere posse
ex iis in quibus tecum sentis, quia ibi nihil de tuo addis, præter ordinem

& brevitatem, quæ duo, ni fallor, ab omnibus bene sentientibus culpabuntur; neminem enim adhuc vidi, qui mecum ordinem improbaret, quique non potius me nimis brevitatis quam prolixitatis accusaret; reliqua in quibus à me dissentis, meo quidem iudicio reprehensione & dedecore, non autem laude ulla digna sunt, atque ideo iterum dico expressis verbis, me tibi quantum possum dissuadere istius libri editionem; saltem expecta tantisper, & ex Horatii consilio, *decimum premat in annum*; forsan enim cum tempore ipsemet videbis, quam parum tibi expediat eum edere; atque interim esse non desinam ex asse tuus

RENATUS DESCARTES.

EPISTOLA XCIX.

Ad Dominum * * *.

Consultissimum de editione notarum suarum in Programma quoddam de mente humana.

SEposita tantisper tua apud me auctoritate, quæ (si iuberet) posset me adigere ad ea etiam supprimenda quæ iustissima & æquissima mihi viderentur; quaeso rationem tuam tantum adhibe ad ferendum iudicium de responsione mea ad programma quoddam de animâ rationali, viginti assertionibus aut circiter comprehensum. Videbis ex scripto quod ad te mitto quibus rationibus fuerim ad respondendum permotus; & licet earum auctor nomen suum reticuerit, nullus tamen dubito quin illum ex stylo sis agniturus, aut etiam ex rumore publico, ut & illum egomet agnovi; sed quia latere voluit, illum tibi non indicabo. Peto tantum à te aliquantulum patientiæ, & multam attentionem in scripti hujus lectione; iudicium enim tuum expecto ut statuam an illud publici juris facturus sim; atque ideo tale illud ad te mitto, quale decrevi in lucem edere, si tibi non improbetur, &c.

R E

RENATI DESCARTES

N O T A E

In Programma quoddam, sub finem anni 1647. in Belgio editum, cum hoc titulo:

Explicatio mentis humane, sive animæ rationalis, ubi explicatur quid sit, & quid esse possit.

A Ccepi à paucis diebus duos libellos, in quorum uno aperte & directe impugnor, in altero recte & oblique duntaxat. Et quidem priorem nihil moror: imo habeo gratias ejus auctori, quod, cum nihil nisi futes cavillationes, & nulli credibiles calumnias, improbo labore collegerit, hoc ipso testatus sit, se nihil invenire potuisse in meis scriptis, quod merito reprehenderet, sicque ipsorum veritatem, melius quam si ea laudasset, confirmarit, idque cum dispendio suæ famæ. Alius autem libellus magis me movet: quanvis enim nihil in eo aperte de me habeatur, prodeatque sine nomine auctoris & typographi, quia tamen continet opiniones quas judico perniciosas & falsas, editusque est forma Programmatæ, quod vel templorum valvis affigi, & quibuslibet legendum obtrudi possit, dicitur autem jam antea typis mandatus fuisse sub alia forma cum adjuncto nomine cujusdam, tanquam auctoris, quem multi putant non alias quam meas opiniones docere, cogor detegere ejus errores, ne mihi forte imputentur ab illis, qui casu incident in obvias istas chartas, & mea scripta non legerunt.

Sequitur Programma quale ultima vice prodit in lucem.

E X P L I C A T I O

Mentis humane, sive animæ rationalis, ubi explicatur quid sit, & quid esse possit.

1. **M**ens humana est, qua actiones cogitivæ ab homine primo peraguntur; eaque in sola cogitandi facultate, ac interno principio, consistit.

2. Quantum ad naturam rerum attinet, ea videtur pati, ut mens possit

esse vel substantia, vel quidam substantiæ corporeæ modus; vel, si non-
nullos alios philosophantes sequamur, qui statuunt extensionem & co-
gitationem esse attributa, quæ certis substantiis, tanquam subjectis, insunt
cum ea attributa non sint opposita, sed diversa, nihil obstat, quo minus
mens possit esse attributum quoddam, eidem subjecto cum extensione
conveniens, quamvis unum in alterius conceptu non comprehendatur,
Quicquid enim possumus concipere, id potest esse: atqui, ut mens ali-
quid horum sit, concipi potest: nam nullum horum implicat contradi-
ctionem: ergo ea aliquid horum esse potest.

3. Errant itaque; qui asserunt, nos humanam mentem clare & distin-
cte, tanquam necessario à corpore realiter distinctam, concipere.

4. Quod autem mens revera nihil aliud sit quam substantia, sive ens
realiter à corpore distinctum, & actu, ab eo separabile, & quod seorsim
per se subsistere potest, id in sacris literis, plurimis in locis, nobis est re-
velatum. Atque ita, quod per naturam dubium quibusdam esse potest,
per divinam in sacris revelationem nobis jam est indubitatum.

5. Nec obstat, quod de corpore dubitare, de mente vero dubi-
tare nequaquam, possimus. Hoc enim illud tantum probat, quod,
quandiu de corpore dubitamus, illam ejus modum dicere non possi-
mus.

6. Mens humana, quamvis sit substantia à corpore realiter distin-
cta, in omnibus tamen actionibus, quandiu est in corpore, est orga-
nica. Atque ideo, pro varia corporis dispositione, cogitationes mentis
sunt varix.

7. Cum hæc sit naturæ, à corpore, & corporis dispositione, diversæ;
nec ab hac oriri queat: ea est incorruptibilis.

8. Cumque ea nullas partes, nec ullam extensionem in conceptu
suo habeat; frustra quæritur, an sit tota in toto, & in singulis parti-
bus tota.

9. Cum mens æque ab imaginariis, atque à veris affici queat, hinc
per naturam dubium est, an ulla corpora à nobis revera percipiantur. Ve-
rum, etiam hoc dubium tollit divina in sacris revelatio, qua indubitatum
est, Deum cælum & terram & omnia, quæ iis continentur, creasse, &
etiamnum conservare.

10. Vinculum, quo anima cum corpore conjuncta manet, est lex im-
mutabilitatis naturæ, qua unumquodque manet in eo statu, in quo est,
donec inde ab alio deturbetur.

11. Cum sit substantia, & in generatione nova producat; rectissime
sen-

sentire videntur ii, qui animam rationalem, per immediatam creationem, à Deo, in generatione, produci volunt.

12. Mens non indiget ideis, vel notionibus, vel axiomatis innatis: sed sola ejus facultas cogitandi, ipsi, ad actiones suas peragendas, sufficit.

13. Atque ideo omnes communes notiones, menti insculptæ, ex rerum observatione vel traditione originem ducunt.

14. Imo ipsa idea Dei, menti insita, est, vel ex divina revelatione, vel traditione, vel rerum observatione.

15. Conceptus noster de Deo, sive idea Dei, in mente nostra existens, non est satis validum argumentum ad existentiam Dei probandam. Cum non omnia existant, quorum conceptus in nobis observantur; atque hæc idea, utpote à nobis concepta, idque imperfecte, non magis quam cujusvis alius rei conceptus, vires nostras cogitandi proprias superet.

16. Cogitatio mentis est duplex: intellectus & voluntas.

17. Intellectus est perceptio & judicium.

18. Perceptio est sensus, reminiscentiæ, & imaginatio.

19. Omnis sensus est perceptio alicujus motus corporei; quæ nullas species intentionales desiderat: isque fit, non in externis sensoriis; sed solo cerebro.

20. Voluntas est libera, & ad opposita, in naturalibus, indifferens: ut ipsa nobis testatur conscientia.

21. Hæc se ipsam determinat; nec cæca est dicenda, ut visus non dicendus surdus.

*Nullis facilius ad magnam pietatis famam perveniunt quam
superstitiosi & hypocritæ.*

Sequitur examen Programmatiss.

Ad titulum notæ.

Adverto in titulo, non nudas assertiones de anima rationali, sed ejus explicationem promitti; adeo ut credere debeamus, omnes rationes, vel saltem præcipuas, quas auctor habuit, ad ea, quæ proposuit, non tantum probanda, sed etiam explicanda, in hoc programme contineri: nullasque alias ab ipso esse expectandas. Quod autem animam rationalem nomine mentis humana appellet, laudo: sic enim vitat æquivocationem, quæ est in voce animæ, atque me hac in re imitatur.

Ad

Ad singulos articulos nota.

In articulo primo, videtur velle istam animam rationalem *definire*, sed imperfecte: genus enim omittit, quod nempe sit substantia, vel modus; vel quid aliud; solamque exponit differentiam, quam à me mutuatus est: nemo enim ante me, quod sciam, illam in sola cogitatione, sive cogitandi facultate, ac interno principio (supple ad cogitandum) consistere asseruit.

In articulo secundo, incipit inquirere in ejus genus; dicitque, *vidererum naturam pati ut mens humana possit esse vel substantia, vel quidam substantia corporea modus*.

Quæ assertio contradictionem involvit, non minorem, quam si dixisset, rerum naturam pati, ut mons possit esse vel sine valle vel cum valle. Quippe distinguendum est inter illa; quæ ex natura sua possunt mutari, ut quod jam scribam vel non scribam, quod aliquis sit prudens, alius imprudens; & illa, quæ nunquam mutantur, qualia sunt omnia quæ ad alicujus rei essentiam pertinent, ut apud Philosophos est in confesso. Et quidem non dubium est, quin de contingentibus dici possit rerum naturam pati, ut illa vel uno, vel alio modo se habeant, exempli causa, ut jam scribam, vel non scribam; sed cum agitur de alicujus rei essentia, plane ineptum est & contradictorium, dicere, rerum naturam pati ut se habeat aliquo alio modo quam revera se habet; atque non magis pertinet ad naturam montis ut non sit sine valle, quam ad naturam mentis humanæ ut sit id quod est, nempe ut sit substantia, si est substantia, vel certe ut sit rei corporeæ modus, si quidem est talis modus; quod hic *noster* conatur persuadere, atque ad istud probandum subjungit hæc verba, *vel si nonnullos alios philosophantes sequamur*, &c. ubi per *alios philosophantes me* aperte designat; primus enim sum, qui cogitationem tanquam præcipuum attributum substantiæ incorporeæ, & extensionem tanquam præcipuum corporeæ, consideravi. Sed non dixi, attributa illa iis inesse tanquam subjectis à se diversis: cavendumque est, ne per *attributum* nihil hic aliud intelligamus quam modum: nam quicquid alicui rei à natura tributum esse cognoscimus, sive sit modus qui possit mutari, sive ipsamet istius rei plane immutabilis essentia, id vocamus ejus *attributum*. Sic multa in Deo sunt attributa, non autem modi. Sic unum ex attributis cujuscunque substantiæ est, quod per se subsistat. Sic extensio alicujus corporis modos quidem in se varios potest admittere, nam alius est ejus modus si corpus

pus istud sit sphericum, alius si sit quadratum: verum ipsa extensio, quæ est modorum illorum subjectum, in se spectata, non est substantiæ corporeæ modus, sed attributum, quod ejus essentiam naturamque constituit. Sic denique cogitationis modi varii sunt; nam affirmare alius est cogitandi modus quam negare, & sic de cæteris; verum ipsa cogitatio, ut est internum principium, ex quo modi isti exurgunt, & cui insunt, non concipitur ut modus, sed ut attributum, quod constituit naturam alicujus substantiæ, quæ an sit corporea an vero incorporea, hic quaeritur.

Addit, *ista attributa non esse opposita sed diversa*, quibus in verbis rursus contradictio est: cum enim agitur de attributis aliquarum substantiarum essentiam constituentibus, nulla major inter illa oppositio esse potest, quam, quod sint diversa; & cum fatetur, hoc esse diversum ab illo, idem est ac si diceret, hoc non esse illud; esse autem & non esse contraria sunt. Cum, inquit, *non sint opposita, sed diversa, nihil obstat quo minus mens possit esse attributum quoddam eidem subjecto cum extensione conveniens, quamvis unum in alterius conceptu non comprehendatur*. Quibus in verbis, manifestus est paralogismus: concludit enim de quibuscumque attributis, id, quod non nisi de modis proprie dictis verum esse potest, & tamen nullibi probat, inentem sive cogitationis internum principium esse talem modum; sed è contra, non esse, ex ipsismet ejus verbis in articulo 5. positis, mox ostendam. De aliis autem attributis, quæ rerum naturas constituunt, dici non potest ea, quæ sunt diversa, & quorum neutrum in alterius conceptu continetur, tñi & eidem subjecto convenire; idem enim est, ac si diceretur, unum & idem subjectum duas habere diversas naturas, quod implicat contradictionem, saltem cum de simplici & non composito subjecto quaestio est, quemadmodum hoc in loco.

Sed *irria* hic advertenda sunt, quæ si bene intellecta essent ab hoc scriptore, nunquam in tam manifestos errores incidisset.

Primum est; ad rationem modi pertinere, ut quamvis substantiam sine illo facile intelligamus, non possimus tamen vice versa modum clare intelligere, nisi simul concipiamus substantiam cujus est modus, ut in 1. parte principiorum art. 61. explicui, atque in hoc omnes Philosophi consentiunt: nostrum autem non attendisse ad hanc regulam, ex ejus articulo quinto sit manifestum; ibi enim fatetur, nos posse de corporis existentia dubitare, cum interim de mentis existentia non dubitamus: unde sequitur, mentem posse à nobis sine corpore intelligi, ac proinde non esse ejus modum.

Alterum, quod hic notari velim, est differentia inter entia simplicia & composita; quippe compositum illud est, in quo reperiuntur duo vel plura attributa, quorum utrumque sine alio potest distincte intelligi: ex hoc enim, quod unum sine alio sic intelligatur, cognoscitur non esse ejus modus, sed res vel attributum rei, quæ potest absque illo subsistere: ens autem simplex illud est, in quo talia attributa non inveniuntur. Unde patet, illud subjectum, in quo solam extensionem cum variis extensionis modis intelligimus, esse ens simplex: ut etiam subjectum, in quo solam cogitationem cum variis cogitationum modis agnoscimus; illud autem, in quo extensionem & cogitationem simul consideramus, esse compositum, hominem scilicet, constantem anima & corpore, quem videtur *auctor noster* pro solo corpore, cujus mens sit modus, hic sumplisse.

Denique hic notandum, in subjectis, ex pluribus substantiis compositis, sæpe unam esse præcipuam, quæ à nobis ita consideratur, ut quod ei ex reliquis adjungimus nihil aliud sit quam modus: sic homo vestitus considerari potest, ut quid compositum ex homine & vestibus; sed vestitum esse, respectu hominis est tantum modus quamvis vestimenta sint substantiæ. Eodemque modo, potuit *auctor noster* in homine, qui ex anima & corpore est compositus, considerare corpus tanquam præcipuum quid, ratione cujus, animatum esse vel cogitationem habere, nihil aliud est quam modus: sed ineptum est inde inferre, ipsam animam, siue id per quod corpus cogitat, non esse substantiam à corpore diversam.

Conatur autem, quæ dixit, confirmare hoc Syllogismo: *Quicquid possumus concipere, id potest esse: atqui ut mens aliquid horum sit* (nempe substantia, vel modus corporeæ substantiæ) *concipi potest: nam nullum horum implicat contradictionem. Ergo. &c.* Ubi notandum est, hanc regulam, *quicquid possumus concipere, id potest esse*, quamvis mea sit, & vera, quoties agitur de claro, & distincto conceptu, in quo rei possibilitas continetur, quia Deus potest omnia efficere, quæ nos possibile esse clare percipimus; non esse tamen temere usurpandam, quia facile fit, ut quis putet se aliquam rem recte intelligere, quam tamen præjudicio aliquo excæcatus non intelligit. Atque hoc contingit *huic auctori*, cum negat implicare contradictionem, ut una & eadem res habeat alterutram e duabus naturis plane diversis, nempe, ut sit substantia, vel modus. Si tantum dixisset, nullas se percipere rationes, propter quas mens humana credi debeat substantia incorporea potius quam substantiæ corporeæ modus, posset ejus ignorantia excusari; si vero dixisset, nulla ab humano ingenio

genio posse inveniri rationes, quibus unum potius quam aliud probetur, arrogantia quidem esset culpanda, sed non apparet contradictio in ejus verbis; cum autem dicit, rerum naturam pati, ut idem sit substantia, vel modus, omnino pugnantia loquitur, & absurditatem ingenii sui ostendit.

In articulo tertio, suum de *me* judicium profert. *Ego* enim sum, qui scripsi mentem humanam clare & distincte posse percipi ut substantiam à substantia corpore diversam, *nos*ter autem, quamvis non aliis nitatur rationibus quam istis contradictionem involventibus, quas in articulo præcedenti explicuit, me errare pronunciat. Sed hoc non moror. Nec examino verba, *necessario, sive actu*, quæ non nihil ambiguitatis continent; non enim sunt magni momenti.

Nolo etiam examinare, quæ in *articulo quarto* de sacris literis habentur, ne videar mihi jus arrogare de *alio* religione inquirendi. Sed dicam tantum, tria genera quæstionum esse hic distinguenda; quædam enim sola fide creduntur, quales sunt de mysterio Incarnationis, de Trinitate, & similibus; aliz vero, quamvis ad fidem pertineant, ratione tamen naturali quæri etiam possunt, inter quas Dei existentia & humanæ animæ à corpore distinctio solent ab Orthodoxis Theologis recenser; ac denique aliz sunt, quæ nullo modo ad fidem, sed ad solum ratiocinium humanum spectant, ut de quadratura circuli, de auro arte Chymica faciendo, & similibus. Atque ut illi sacræ scripturæ verbis abutuntur, qui ex iis male explicatis has ultimas elicere se putant: ita etiam ejus auctoritati derogant, qui priores argumentis à sola Philosophia petitis demonstrandas suscipiunt: sed tamen omnes Theologi contendunt esse ostendendum, ipsas lumini naturali non adversari, atque in hoc præcipuum suum studium ponunt; medias autem non modo lumini naturali non adversari arbitrantur, sed etiam hortantur Philosophos, ut ipsas rationibus humanis pro viribus demonstrarent. Neminem autem unquam vidi, qui affirmaret, rerum naturam pati, ut res aliqua aliter se habeat quam docet sacra scriptura, nisi vellet indirecte ostendere, se scripturæ illi fidem non habere. Cum enim prius nati simus homines quam facti Christiani, non credibile est alique non amplecti serio eas opiniones, quas rectæ rationi, quæ hominem constituit, contrarias putat, ut fidei per quam est Christianus adhæreat. Sed forte etiam *auctor noster* hoc non dicit: verba enim ejus sunt *per naturam dubium quibusdam esse posse, quod per divinam in sacris revelationem nobis jam est indubitatum*, in quibus duplicem contradictionem invenio: primam in eo, quod unius & ejusdem rei essentiam, quam repugnat non

eandem semper manere, (quia si supponatur alia fieri, hoc ipso erit alia res, & alio nomine indigitanda) supponat esse, per naturam, dubiam, ac proinde mutabilem: aliam in verbo *quibusdam*; quia, cum omnium eadem sit natura, quod non nisi quibusdam dubium esse potest, non est per naturam dubium.

Articulus quintus referendus est ad secundum potius quam ad quartum: neque enim in eo agit *auctor* de revelatione divina, sed de natura mentis, an sit substantia vel modus: atque ut probet, defendi posse, illam nihil aliud esse quam modum, conatur solvere objectionem ex meis scriptis desumptam. Quippe scripsi nos non posse dubitare, quin mens nostra existat, quia, ex hoc ipso quod dubitemus, sequitur illam existere; sed interim nos posse dubitare, an ulla corpora existant; unde collegi & demonstravi, illam à nobis clare percipi, ut rem existentem, sive, ut substantiam, quamvis nullum plane corpus concipiamus, ac etiam negemus, ulla corpora existere, ac proinde mentis conceptum non involvere in se ullum conceptum corporis: quod argumentum putat se diffilare, cum ait, *illud tantum probare, quod quamdiu de corpore dubitamus, mentem ejus modum dicere non possumus*. Ubi ostendit, se plane ignorare, quid sit quod à Philosophis vocatur *modus*: in eo enim consistit natura modi, quod nullo pacto possit intelligi, quin conceptum rei cujus est modus in conceptu suo involvat, ut jam supra explicui; *nos*ter autem fatetur, mentem posse aliquando intelligi sine corpore, quando scilicet de corpore dubitatur, unde sequitur illam tunc saltem dici non posse ejus modum; atque, quod aliquando verum est de alicujus rei essentia vel natura, semper est verum; sed nihilominus affirmat, *rerum naturam pati, ut mens sit tantum corporis modus*: quæ duo manifeste contradictoria sunt.

In articulo sexto, quid sibi velit, non capio: memini quidem audivisse in scholis, *animam esse actum corporis organici*; sed ipsam dici *organicam*, nunquam ante hanc diem audivi. Atque ideo ab *autore nostro* veniam peto, ut, quia nihil hic certi habeo quod scribam, meas conjecturas, non tanquam rem veram, sed tanquam conjecturas duntaxat, exponam. Duo inter se pugnantia mihi videor advertere; quorum unum est, quod mens humana sit substantia realiter à corpore distincta, hocque aperte quidem dicit *auctor*, sed rationibus, quantum potest, dissuadet, soliusque sacræ scripturæ auctoritate probari posse, contendit; aliud est, eandem illam mentem humanam in omnibus suis actionibus esse *organicam* sive instrumentalem, quæ scilicet per se nihil agat, sed qua corpus utatur, tanquam membrorum suorum conformatione, aliisque corporeis modis; atque ita, non qui-

quidem expressis verbis, sed re ipsa affirmat, *mentem nihil aliud esse quam corporis modum*, ut etiam ad hoc unum probandum omnium rationum suarum aciem instruxit. Quæ duo tam manifeste contraria sunt, ut non putem *auctorem* velle utrumque simul à lectoribus credi, sed ea de industria sic inter se miscuisse, ut simplicioribus quidem suisque Theologis scripturæ auctoritate aliquo modo satisfaciat, sed interim nasutiores agnoscant, illum, cum ait, *mentem esse à corpore distinctam*, ironia uti, atque omnino in ea esse opinionem, quod nihil sit quam modus.

In septimo etiam & octavo articulo videtur tantum ironia uti. Atque retinet idem Socraticum *schema in posteriore parte articuli noni*. Sed in priorum rationem assertioni suæ adjungit, ideoque illum ibi serio agere credendum esse videtur. Nempe, docet per naturam dubium esse, an ulla corpora à nobis revera percipiuntur, rationemque affert, *quia mens aque ab imaginariis atque à veris affici potest*. Quæ ratio, ut vera sit, supponendum est, nos nullo intellectu proprie dicto posse uti, sed ea tantum facultate, quæ sensus communis vocari solet: in qua scilicet rerum tam verarum quam imaginariarum species recipiuntur ut mentem afficiant, & quam ipsis brutis Philosophi vulgo concedunt. Sed sane, qui habent intellectum, nec facti sunt tanquam equus & mulus, etiam si non à solis rerum verarum imaginibus afficiantur, sed etiam ab iis, quæ in eorum cerebro aliis ex causis occurrunt, ut contingit in somnis, unas tamen ab aliis rationis lumine clarissime dignoscunt. Et, qua via id recte ac tuto fiat, tam accurate in *meis scriptis* explicui, ut neminem, qui ea perlegit, & intelligendi est capax, scepticum esse posse confidam.

In decimo & undecimo articulo, licet etiam ironiam suspicari: atque, si anima credatur esse substantia, ridiculum est & ineptum dicere; *vinculum, quo ipsa manet cum corpore conjuncta, esse legem immutabilitatis nature, qua nunquam quodque manet in eo statu, in quo est*: æque enim, quæ disjuncta sunt, ac conjuncta, manent in eodem statu, quamdiu nihil eorum statum mutat, quod hic non quaeritur; sed, quomodo fiat, ut mens sit corpori conjuncta, non autem ab eo disjuncta? Si autem anima supponatur esse modus corporis, recte dicitur, non aliud quærendum esse vinculum, quo ei jungatur, quam quod maneat in eo statu in quo est, quia nullus alius est modorum status, quam quod insint rebus quorum sunt modi.

In articulo 12. non videtur nisi solis verbis à me dissentire: cum enim ait, mentem non indigere ideis, vel notionibus, vel axiomatis innatis, & interim, ei facultatem cogitandi concedit (puta naturalem sive innatam) re affirmat plane idem, quod ego, sed verbo negat. Non enim unquam

scripsi vel judicavi mentem indigere ideis innatis, quæ sint aliquid diversum ab ejus facultate cogitandi; sed cum adverterem, quasdam in me esse cogitationes, quæ non objectis externis, nec à voluntatis meæ determinatione procedebant, sed à sola cogitandi facultate, quæ in me est, ut ideas sive notiones, quæ sunt istarum cogitationum formæ, ab aliis adventitiis aut factis distinguere, illas innatas vocavi: eodem sensu, quo dicimus, generositatem esse quibusdam familiis innatam, aliis vero quosdam morbos, ut podagram, vel calculum, non quod ideo istarum familiarum infantes morbis istis in utero matris laborent, sed quod nascantur cum quadam dispositione sive facultate ad illos contrahendos.

Egregiam vero consequentiam in articulo 13. ex præcedenti deducit. *Ideo*, inquit (quod mens, scilicet, non indigeat ideis innatis, sed sola facultas cogitandi ei sufficiat), *omnes communes notiones menti insculpta, ex rerum observatione, vel traditione originem ducunt*: tanquam, si facultas cogitandi nihil possit per se præstare, nihilque unquam percipiat vel cogitet, nisi quod accipit à rerum observatione vel traditione, hoc est, à sensibus. Quod adeo falsum est, ut è contra, quisquis recte advertit, quo usque sensus nostri se extendant, & quidnam sit præcise, quod ab illis ad nostram cogitandi facultatem potest pervenire, debeat fateri, nullarum rerum ideas, quales eas cogitatione formamus, nobis ab illis exhiberi: adeo ut nihil sit in nostris ideis, quod menti, sive cogitandi facultati, non fuerit innatum, solis iis circumstantiis exceptis, quæ ad experientiam spectant, quod nempe judicemus, has vel illas ideas, quas nunc habemus cogitationi nostræ præsentis, ad res quasdam extra nos positas referri, non, quia istæ res illas ipsas nostræ menti per organa sensuum immiserunt; sed quia tamen aliquid immiserunt, quod ei dedit occasionem ad ipsas, per innatam sibi facultatem, hoc tempore potius quam alio, efformandas. Quippe nihil ab objectis externis ad mentem nostram per organa sensuum accedit, præter motus quosdam corporeos, ut ipsemet auctor noster in art. 19. ex meis principiis affirmat; sed ne quidem ipsi motus, nec figuræ ex iis ortæ, à nobis concipiuntur, quales in organis sensuum sunt, ut fuscæ in *Dioptrica* explicui; unde sequitur, ipsas motuum & figurarum ideas nobis esse innatas: ac tanto magis innatæ esse debent ideæ doloris, colorum, sonorum, & similibus, ut mens nostra possit occasione quorundam motuum corporeorum, sibi eas exhibere: nullam enim similitudinem cum motibus corporeis habent. Quid autem magis absurdum fingi potest, quam quod omnes communes notiones quæ menti nostræ insunt, ab istis motibus oriantur, & sine illis esse non possint. Vellem, *noster* me doceret,

ceret, quisnam ille sit corporeus motus, qui potest in mente nostra formare aliquam communem notionem, exempli causa, *quod quæ eadem sunt uni tertio, sint eadem inter se*, vel quamvis aliam: omnes enim isti motus sunt particulares, notiones vero illæ universales, & nullam cum motibus affinitatem, nullamve ad ipsos relationem habentes.

Pergit tamen in *articulo 14.* affirmare ipsam ideam Dei, quæ in nobis est, non à nostra cogitandi facultate, cui sit innata, *sed ex divina revelatione, vel traditione, vel rerum observatione esse*: cujus assertionis errorem facilius agnosceremus, si consideremus aliquid dici posse ex alio esse, vel quia hoc aliud est causa ejus proxima & primaria, sine qua esse non potest, vel quia est remota & accidentaria duntaxat, quæ nempe dat occasionem primariæ, producendi suum effectum uno tempore potius quam alio. Sic artifices omnes sunt operum suorum causæ primariæ & proximæ; qui vero jubent, vel mercedem promittunt, ut illa faciant, sunt causæ accidentariæ & remotæ, quia fortasse nisi jussi non facerent. Non autem dubium est, quin traditio vel rerum observatio sæpe sit causa remota, nos invitans, ut ad ideam, quam habere possumus de Deo, attendamus, illamque cogitationi nostræ præsentem exhibeamus. Quod autem sit causa proxima istius idæ effectrix, à nemine dici potest, nisi ab eo qui putat nihil à nobis de Deo unquam intelligi, nisi quale sit hoc nomen, *Deus*, vel qualis sit figura corporea quæ nobis ad repræsentandum Deum à pictoribus exhibetur. Quippe observatio, si fiat per visum, nihil propria sua vi menti exhibet præter picturas, & quidem picturas ex sola motuum quorundam corporeorum varietate constantes, ut ipse *auctor noster* docet: si per auditum, nihil præter verba & voces: si vero per alios sensus, nihil in ea habetur quod referri possit ad Deum. Et sane, quod visus nihil præter picturas, nec auditus præter voces vel sonos, proprie, ac per se exhibeat, unicuique est manifestum: adeo ut illa omnia quæ præter istas voces vel picturas cogitamus tanquam earum significata, nobis repræsententur per ideas non aliunde advenientes quam à nostra cogitandi facultate, ac proinde cum illa nobis innatas, hoc est, potentia nobis semper inexistentes: esse enim in aliqua facultate, non est esse actu, sed potentia duntaxat, quia ipsum nomen facultatis nihil aliud quam potentiam designat. Quod vero de Deo nihil præter nomen vel effigiem corpoream possumus cognoscere, nemo potest affirmare, nisi qui se aperte atheum, atque etiam omni intellectu destitutum, fateatur.

Postquam *auctor noster* istam suam de Deo opinionem exposuit, refutat in *articulo 15.* argumenta omnia, quibus Dei existentiam demonstra-

vi. Ubi sane mirari subit hominis confidentiam, quod tam facile, tam paucis verbis, putet se omnia posse evertere, quæ ego longa & attenta meditatione composui, libroque integro explicui. Sed nempe omnes rationes, quas ad hoc attuli, ad duas referuntur: *Prima* est, quod ostenderim nos habere Dei noticiam, sive ideam, quæ talis est, ut, cum ad eam satis attendimus, &, eo modo quo explicui, rem perpendimus, ex sola ejus consideratione cognoscamus, fieri non posse, quin Deus existat, quoniam existentia, non possibilis duntaxat vel contingens, quemadmodum in aliarum omnium rerum ideis, sed omnino necessaria & actualis, in ejus conceptu continetur. Hanc autem rationem, quam pro certa & evidenti demonstratione non ego solus habeo, sed habent etiam alii plures, iique doctrina & ingenio supra ceteros eminentes, qui eam cum cura examinarunt, hanc inquam auctor *Programmatis* sic refutat. *Conceptus noster de Deo, sive idea Dei in mente nostra existens, non est satis validum argumentum ad existentiam Dei probandam, cum non omnia existant, quorum conceptus in nobis observatur.* Quibus verbis ostendit, se mea quidem scripta legisse, sed ea nullo modo intelligere, vel potuisse, vel voluisse: non enim vis mei argumenti desumitur ab idea in genere sumpta, sed à peculiari ejus proprietate, quæ in idea, quam habemus de Deo, evidentissima est, atque in nullis aliarum rerum conceptibus potest reperiri: nempe ab existentia necessitate, quæ requiritur ad cumulum perfectionum, sine quo Deum intelligere non possumus. *Aliud* argumentum, quo demonstravi Deum esse, ex eo desumpsi, quod evidenter probaverim, nos non habituros fuisse facultatem, ad omnes eas perfectiones, quas in Deo cognoscimus, intelligendas, nisi verum esset, Deum existere, nosque ab illo esse creatos. Quod putat *noster* se abunde dissolvere, dicendo *ideam, quam habemus de Deo, non magis quam cujusvis alterius rei conceptum vires nostras cogitandi proprias superare*: quibus verbis, si tantum intelligit, eum, quem de Deo conceptum, sine gratiæ supernaturalis auxilio, habemus, non minus esse naturalem, quam sint reliqui omnes quos habemus de aliis rebus, mecum sentit, sed nihil inde contra me colligi potest; si vero existimat, in illo conceptu non plures perfectiones objectivas involvi quam in omnibus aliis simul sumptis, aperte errat; ego autem ab hoc solo perfectionum excessu, quo noster de Deo conceptus alios superat, argumentum meum desumpsi.

In sex reliquis articulis, nihil habet notatu dignum, nisi quod, cum velit animæ proprietates distinguere, confuse admodum & improprie de his loquatur. Quippe ego dixi, eas omnes referri ad duas præcipuas, quarum

rum

rum una est perceptio intellectus, alia vero determinatio voluntatis, quas *noster* vocat, *intellectum & voluntatem*; ac deinde illud quod vocavit *intellectum*, dividit in *perceptionem & iudicium*; qua in re à me dissentit: ego enim cum viderem, præter perceptionem, quæ prærequiritur ut iudicemus, opus esse affirmatione vel negatione ad formam iudicii constituentem, nobisque sæpe esse liberum ut cohibeamus assensionem, etiamsi rem percipiamus, ipsum actum iudicandi, qui non nisi in assensu, hoc est, in affirmatione vel negatione consistit, non retuli ad perceptionem intellectus, sed ad determinationem voluntatis. Postea inter species perceptionis non enumerat nisi *sensum, reminisceniam, & imaginationem*: unde colligi potest, eum nullam intellectionem puram, hoc est, intellectionem quæ circa nullas imagines corporeas versetur, admittere; ac proinde ipsum sentire, nullam de Deo, nec de mente humana, vel aliis incorporeis rebus cognitionem haberi: cuius rei non aliam causam possum suspicari, quam quod eæ, quas habet de illis rebus cogitationes, sint tam confusæ, ut nullam unquam puram, & ab omni corporea imagine diversam, in se animadvertat.

In fine denique addidit hæc verba ex meo aliquo scripto desumpta, *nulli facilius ad magnam pietatis famam perveniunt quam superstitiosi & hypocritæ*. Quibus quid significare velit non video; nisi forte referat ad hypocrisim, quod usus sit ironia multis in locis: sed non puto illum ista via posse ad magnam pietatis famam pervenire.

Cæterum cogor hic fateri, me pudore suffundi, quod antehac istum auctorem, tanquam perspicacissimi ingenii virum laudarim, atque alicubi scripserim, me non putare ullas ab ipso doceri opiniones, quas nollem pro meis agnoscere. Sed nempe quando ista scribebam, nullum adhuc videram ejus specimen, in quo fides exscriptor non fuisset, nisi tantum semel in verbulo uno, quod illi tam male cesserat, ut sperarem nihil tale amplius esse ausurum; & quia videbam ipsum in reliquis magno cum affectu opiniones amplecti, quas verissimas arbitrabar, id ejus ingenio & perspicacitati tribuebam. Nunc autem multiplex experientia cogit me, ut existimem, non tam amore veritatis eum teneri, quam novitatis; atque quoniam omnia, quæ ab aliis didicit pro antiquis & obsoletis habet, nihilque satis novum ei videtur, nisi quod ex proprio cerebro extundit; est autem adeo infelix in suis inventis, ut nullum unquam verbum in ejus scriptis notaverim (quod ex aliis non exscripsisset) in quo non aliquem errorem contineri judicarem. Monere debeo illos omnes, qui meas opiniones ab eo defendi sibi persuadent, nullas esse non modo in *Metaphysicis*,

T t

in

in quibus aperte mihi adversatur, sed etiam in *Physicis*, de quibus alicubi in suis scriptis agit, quas non male proponat & corrumpat. Adeo ut magis indigner, quod talis *doctor* scripta mea pertrahet, atque interpretanda sive interpolanda suscipiat, quam quod alii nonnulli summa cum acerbitate ipsa impugnent.

Quippe neminem ex acerbis istis adhuc vidi, qui non mihi tribueret opinionones à meis toto cælo diversas, atquo adeo absurdas & ineptas, ut non verear, ne ullis cordatis viris possit persuaderi meas esse. Sic eo ipso tempore, quo hæc scribo, mihi adhuc afferuntur duo novi libelli ab aliquo hujus generis adversario conscripti, in quorum priore habetur, *esse Neotericos nonnullos, qui certam omnem fidem sensibus abrogant, & Philosophos Deum negare, & de ejus existentia dubitare posse contendunt, qui insistas interim à natura humana menti de Deo notitias actuales, species & ideas admittunt*. Dicitur autem in altero, *Neotericos istos audaciter pronuntiare, Deum non modo negative, sed & positive sui causam efficientem dici debere*. Atque in utroque libello nihil aliud agitur, quam quod argumenta multa congerantur, ad probandum, primo nos nullam Dei cognitionem *actualement* in utero matris habuisse, ac proinde nullam de Deo *actualement* speciem & ideam menti nostra ingenitam: secundo, non oportere Deum negare, atque illos *atheos & legibus puniendos qui eum negant*: tertio denique Deum non esse causam efficientem sui ipsius. Quæ omnia possem quidem supponere contra me non scribi, quia nomen meum in istis libellis non habetur, & nulla est opinionum, quæ in iis impugnantur, quam non plane absurdam & falsam putem. Sed tamen, quia non dissimiles sunt iis quæ jam sæpe ab aliis ejusdem ordinis hominibus mihi per calumniâs fuerunt imputatæ, nullique alii agnoscuntur quibus ex tribui possint, ac denique quia multi non dubitant, quin ego ille sum, contra quem isti libelli scripti sunt; monebo hic, ex occasione, earum auctorem, *primo*, per ideas innatas me nihil unquam intellexisse nisi quod ipsemet in pag. 6. sui posterioris libelli verum esse expressis verbis affirmat, nempe, *nobis à natura inesse potentiam qua Deum cognoscere possumus*, quod autem istæ ideæ sint *actuales*, vel quod sint species nescio quæ à cogitandi facultate diversæ, nec unquam scripisse nec cogitasse: imo etiam me magis quam quenquam alium ab ista supervacua entitatum scholasticarum supellectile esse alienum, adeo ut à risu abstinere non potuerim, cum vidi magnam illam catervam, quam vir fortasse minime malus, laboriose collegit ad probandum, *infantes non habere notitiam Dei actualement quamdiu sunt in utero matris*, tanquam si me hoc pacto egregie impugnaret. *Secundo*, me nunquam etiam docuisse, *Deum esse negandum*,

gandum, vel ipsum nos posse decipere vel de omnibus esse dubitandum, vel fidem omnem sensibus abrogandam, vel somnum à vigilia non distinguendum, vel similia, quæ à calumniatoribus imperitis aliquando mihi objecta sunt; sed omnia ista expressissimis verbis rejecisse, validissimisque argumentis, imo etiam ausum addere validioribus quam ab ullo ante me refutata fuerint refutasse: quod ut commodius & efficacius præstarem, proposui, initio meditationum mearum, ista omnia tanquam dubia, quæ non à me primum fuerunt inventa, sed à scepticis dudum decantata. Quid autem iniquius, quam tribuere alicui scriptori opiniones, quas eo fine tantum refert ut eas refutet? Quid ineptius quam fingere, saltem illo tempore, quo istæ falsæ opiniones proponuntur & nondum refutantur, eas doceri; atque ideo illum, qui refert atheorum argumenta, esse athenum temporarium? Quid magis puerile quam dicere, si moriatur interim priusquam speratam suam demonstrationem scripserit vel invenerit, cum atheum moriturum, ipsumque in antecessum perniciosam doctrinam docuisse, non autem esse faciendâ mala ut eveniant bona, & talia. Dicit forte aliquis, me istas falsas opiniones non retulisse tanquam aliorum, sed tanquam meas: verum quid hoc refert; quandoquidem in eodem libro, in quo ipsas retuli, omnes refutavi; atque ex ipso libri titulo potuit intelligi, me ab iis credendis esse plane alienum, quandoquidem in eo demonstrationes de existentia Dei promittuntur. Estne aliquis adeo stolidus, ut existimet cum qui talem librum componit ignorare, dum primas ejus paginas exarat quid in sequentibus demonstrandum susceperit? objectiones autem tanquam meas proposui, quia hoc exigebat stylus meditationum, quem rationibus explicandis aptissimum judicavi. Quæ ratio si nostris censoribus non satisfacit, velim scire quid dicant de sacris literis, cum quibus nulla humana scripta sunt comparanda, quando vident in iis nonnulla, quæ non possunt recte intelligi nisi supponantur tanquam ab impiis, vel saltem ab aliis quam à Spiritu Sancto vel à Prophetis dicta esse, qualia sunt Eccl. cap. 2. hæc verba: nonne melius est comedere & bibere, & ostendere animæ suæ bonæ laboribus suis, & hoc de manu Dei est. Quis ita devorabit & delicus affluet ut ego? & in capite sequenti: Dixi in corde meo de filiis hominum, ut probaret eos Deus, & ostenderet similes esse bestiis. Idcirco unus interitus est hominis & jumentorum, & aqua utrisque conditio, sicut moritur homo sic & illa moriuntur, similiter spirant omnia, & nihil habet homo jumento amplius, &c. An credunt ibi Spiritum Sanctum nos docere, ventri esse indulgendum, & affluendum deliciis, anima sive nostras non magis esse immortales quam jumentorum? non puto eos usque adeo esse furiosos: sed neque debent

etiam calumniari, quod iis inter scribendum non usus sim cautelis, quæ nunquam ab ullis aliis scriptoribus fuerunt observatæ, nec ab ipso quidem Spiritu Sancto.

Tertio denique moneo libellorum istorum auctorem, me nunquam scripsisse, *Deum non modo negative, sed & positive sui causam efficientem dici debere*, ut in pag. 8. posterioris sui libelli valde inconsiderate affirmat. Quærat, legat, evolvat mea scripta, nihil unquam simile in illis reperiet, sed omnino contrarium. Me vero à talibus opinionum portentis quam maxime esse remotum notissimum est iis omnibus, qui vel scripta mea legerunt, vel aliquam mei noticiam habent, vel saltem omnino fatuum esse non putant. Atque idcirco admodum miror, quis sit scopus istorum calumniatorum. Nam si volunt persuadere hominibus ea me scripsisse, quorum plane contrarium in meis scriptis reperitur, deberent prius curare ut omnia, quæ in lucem edidit, supprimentur; nec non etiam, ut eorum qui jam ea legerunt, memoria deleantur: quamdiu enim hoc non faciunt, plus sibi nocent quam mihi. Miror etiam quod contra me, qui eos nunquam lacessivi nihilque nocui; sed qui fortasse, si me irritarent, nocere possem, tanta cum acerbitate ac tanto studio invehantur, interimque nihil agant contra multos alios, qui eorum doctrinam libris integris refutarunt, ipsosque ut simplicios & andabatas deriserunt. Nolo tamen hic quicquam addere, quo revocem illos ab instituto libellis me suis impugnandi: video libenter me tanti fieri ab ipsis, sed iis interim precor sanitatem.

Hæc scripta sunt Eximunda in Hollandia circa finem Decembris, Anno 1647.

EPISTOLA C.

Clarissimo Viro Domino * * *.

Censura quarundam epistolarum Domini Balacii.

Clarissime Domine.

Quocunque animo legam has epistolas, sive ut serio examinem, sive magis ut oblecter, tantopere mihi satisfaciunt, ut non modo nihil inveniam quod debeat reprehendi, sed nequidem etiam in rebus tam bonis facile iudicem quid præcipue sit laudandum. Est enim in illis puritas elocutionis, tanquam in humano corpore valetudo, quæ scilicet ex

co

eo maxime credenda est optima, quod nullum relinquat sui sensum. Est insuper elegantia & venustas, tanquam in perfecte formosa muliere pulchritudo, nempe quæ non in hac aut illa re, sed in omnium tali consensu & temperamento consistit, ut nulla designari possit ejus pars inter cæteras eminentior, ne simul aliarum male servata proportio imperfectionis arguatur. Sed veluti singulæ pulchritudinis partes, inter nervos & defectus formarum quas videre consuevimus, facile distinguuntur, atque harum nonnullæ interdum tanta laude dignæ sunt, ut hinc optime, quanto majora essent formæ omnibus numeris absolutæ merita, si quæ talis reperiretur æstimemus; non dispari ratione, si ad aliorum scripta mentem converto, plurimas sæpe in illis virtutes orationis enumero, nempe quorundam vitiorum mixtura distinctas. Et quoniam illæ etiam ibi suis laudibus non carent, hinc maxime percipio, quanto pluri hic faciendæ sint, ubi puræ existunt. Apud alios enim sicubi verba lætissima, curioso ordine disposita, & liberali stilo profusa, non parum auribus fortasse satisficiant, ibidem ut plurimum sensus humilis, & in vasta oratione dispersus, attentæ ingenia frustratur. Si contra significantissimæ dictiones, nobilium cogitationum abundantia, mentes capaciores interdum oblectent, eisdem presso & subobscurò stilo sæpius fatigant. Si qui vero inter hæc extrema medium tenentes, verum sermonis institutum in puris rebus exprimendis rigidius observent, tam austeri sunt, ut à delicatis non amentur. Si qui denique in salibus & joci teneriores musas exerceant, illi fere omnes vel in vocum exoletarum ficta majestate, vel in peregrinarum strepitu, vel in novarum molitiæ, vel in ridiculis æquivocis, vel in cogitationibus poëticis, falsisque rationibus & puerilibus argutiis male collocant orationis venustatem. Atque hæc nugæ severioris notæ hominibus non aliter placere possunt, quam histrionum ineptiæ, aut gestulationes simiarum. In his autem epistolis, & elegantissimæ orationis ubertas, quæ sola implendis lectorum animis posset sufficere, vires argumentorum non dissipat, nec obruit; & sententiarum dignitas, quæ se proprio pondere facile sustineret, nulla premitur inopia dictionum, sed cogitationes altissimi spiritus, atque à plebe semotæ, verbis in ore hominum frequentibus, & longo usu emendatis, accuratissime exprimuntur: atque ex tam felici rerum cum sermone concordia, faciles quædam gratiæ exurgunt, ab ascititiis illis, quibus vulgus decipi solet, non minus diversæ, quam formosissimæ puellæ color ingenuus, à minio & cerussa prurientium vetularum. Et hæc quidem de elocutione dicta sint, quæ sola fere in hoc scribendi

genere esset spectanda, nisi hæ litteræ aliquid altius saperent, quam quæ vulgo mittuntur ad familiares. Quia vero sæpius non minora tractant argumenta, quam ipsæ conciones quæ ab antiquis oratoribus publice habebantur, quædam dicenda sunt de eximia illa persuadendi scientia, quæ requiri solet ad eloquentiæ complementum. Hæc vero apud alios habuit etiam suas virtutes & sua vitia. Nam primis & incultis temporibus, antequam ulla fuissent adhuc in mundo dissidia, & cum lingua candidæ mentis affectus non invita sequebatur, erat quidem in majoribus ingeniiis divina quædam eloquentiæ vis, quæ ex zelo veritatis & sensus abundantia profluens, rudes homines ex silvis eduxit, leges imposuit, urbes condidit, eademque habuit persuadendi potestatem simul & regnandi. Sed paulo post illam apud Græcos & Romanos fori contentio & contentio-
num frequentia corripuit, dum nimis exercuit. Transmisit enim ad vulgares homines, qui, cum aperto Marte, & solius veritatis copiis, auditorum animos vincere desperarent, confugiebant ad sophismata, & inanes verborum insidias, quibus etsi non raro incautos fallerent, non meliori tamen jure cum prioribus de oratoria laude contendebant, quam proditores, de vera fortitudine, cum animosis militibus. Et quamvis fucatas suas rationes aliquando etiam ad veritatis patrocinium adhiberent, cum tamen præcipuam artis gloriam ponerent, in deterioribus causis sustinendis, in hoc illos fuisse miserrimos puto, quod optimi oratores esse non potuerint, quin mali homines viderentur. Hic vero Balzacius quæcumque dicenda suscipit, tam validis rationibus explicat, & tam grandibus exemplis illustrat, ut maxime admirer quandam in ejus stilo vehementiam, & naturæ impetum, curiosa arte non frangi, sed inter elegantias & ornatum ætatis ultimæ, prioris eloquentiæ vires & majestatem retinere. Neque enim abutitur ille simplicitate lectoris, sed iis uti solet argumentis, quæ licet tam perspicua sint, ut apud vulgus facile inveniant fidem, sunt nihilominus tam solida & vera, ut quo majori quique ingenio est, eo certius ab illo vincatur, idque potissimum quoties non alia probat, quam quæ sibi prius ipse persuasit. Quamvis enim paradoxa veris interdum rationibus adornari posse non ignoret, periculosasque veritates aliquibus in locis prudentissima arte declinet, est tamen in ejus scriptis generosa quædam libertas, quæ satis indicat illum nihil ægrius sustinere, quam mentiri. Hinc, si quando vitia nobilium describenda suscipiat, non servili potentia metu, si virtutes, nulla animi malignitate à vero dicendo prohibetur. Si vero de seipso sermonem instituat, nec corporis morbos & naturæ imbecillitatem exponendo, contem-
ptum,

ptum, nec meritas ingenii sui laudes non dissimulando invidiam reformidat. Quod non ignoro à multis primo intuitu in deteriorem partem sumi posse; vicia enim tam frequentia sunt hoc sæculo, & virtutes tam rara, ut quotiescumque idem effectus potest ad honestam, vel turpem causam referri, de illo non dubitent mortales, juxta id quod sæpius accidit, judicare. Quisquis autem animadvertet eundem Balzacium, non bona tantum, sed mala etiam, tum sua tum aliena, in scriptis suis libere declarare, nunquam profecto rebitur, adeo diversos in eodem homine mores existere, ut modo dedecora aliorum per malignam temeritatem, modo recte facta per timidam adulationem divulget, modo etiam infirmitates suas per quandam animi vilitatem, modo egregias dotes per cupidinem inanis gloriæ describat: sed potius illum hæc omnia, tantum quia talia esse sentit, ex amore veritatis, & per insitam quandam generositatem dissimulare non posse. Atque hunc candorem & antiquos mores, ingenii supra vulgus positi, rebitur æqua posteritas, etiam si nunc in homine vivo lividi mortales tam sublime virtutis genus recusent admittere. Tanta est enim depravatio gentis humanæ, ut quemadmodum in cæta corruptæ juventutis castum esse vel sobrium, ita fere apud omnes vitio vertatur ingenium esse & veracem, multoque avidius falsa crimina, quam veræ laudes audiantur; idque potissimum, si quando viri egregii de se ipsis loqui velint; nam tunc maxime veritas superbiæ, dissimulatio verò & mendacium moderationi tribuuntur. Unde famosi in Balzacium libelli tam speciosam criminandi materiam habuere, ut quascunque alias, quantumlibet injustas vel ridiculas accusationes capitali isti conjungerent, simul tamen omnes, tanquam hujus favore commendatas, imperitum vulgus admitteret: & certe hoc in loco calamitosum mihi videretur, tam multos, ex iis qui se Aliquos putant, vulgi appellatione comprehendendi.

EPISTOLA CI.

Ad Dominum Balzacium.

Officii ergo.

QUanquam non ignorabam tibi molestum fore, in rustri tuo secessu, commercium omne cum quovis alio præter te ipsum, tamen non potuissem ad te interdum non scribere, si putassem te ibi tamdiu

man-

mansurum. Sed cum unas à te accepissem, per quas spem mihi faciebas te in aulam propediem venturum, tenuit me scrupulus ne quietem tuam usque in cretum turbatum irem, & credidi satius esse ut expectarem usquedum ex illa migrasses: hinc factum est ut ab una tabellarii professione in aliam sesquiannum integrum distulerim id quod nunquam mihi fuit animus ultra hebdomadam unam protrahere; adeo ut absque ullo meo de te bene merito, te per totum illud tempus literarum mearum importunitate imminuentem præstiterim. Sed quandoquidem jam es Parisiis, peto à te partem temporis illius quod in eorum, qui te invisi sunt, colloquio perdere decrevisti; & scias ne semel quidem incesisse me cupidinem, revertendi Lutetiam biennio abhinc relictam; nisi ex quo renunciatum est mihi te ibi esse. Sed certe hoc me monuit alium aliquem locum esse in quo felicior esse possem, quam hic; & nisi occupatio, quæ me hic loci detinet, esset sententia mea earum omnium, quibus me possim addicere gravissima; spes sola confabulationis tuæ, in qua videre licet nascentes coram validos illos sensus, quos in operibus tuis miramur, sufficeret mihi hinc abstrahendo. Ne quæras, si placet, quænam sit occupatio illa, quam tantifacio, puderet enim me tibi illam indicare: factus sum usque adeo Philosophus, ut eorum maximam partem despiciam, quæ vulgo sunt in pretio, nonnulla vero alia magni faciam, quæ plerunque parvi fieri solent. Verumtamen quia non sentis cum turba, mihi quæ sæpius testatus es tuum de me iudicium candidius esse quam merear, id tecum apertius aliquando, si tibi non sit ingratum, communicabo. In præsens dicam tantum non esse mihi amplius, ut olim erat animum scribendi quicquam; non quod famam non magnifaciam, si quidem quispiam certus fuerit bonam, ut tu, & magnam comparare: medium vero & incertum, qualem sperare possem, longe posthabeo quieti & animi quæ fruor tranquillitati. Dormio hic decem horas singulis noctibus; & postquam somnus animum meum cura omni vacuum diu deduxit per topiaria, hortos & palatia, in quibus voluptates omnes experior, quas fabulæ sinxerunt, diurnas meas meditationes nocturnis sensim admisceo; cumque me expectatum esse animadverto, id sit tantum ad voluptatis incrementum, atque ut sensus quoque veniant in communionem oblectamenti; non enim sum usque adeo severus ut iis quicquam denegem quod illa conscientia possit Philosophus ipsis concedere. Denique hic mihi nihil deest præter consuetudinis tuæ suavitatem; sed illa est mihi ad felicitatem tam necessaria, ut consilia mea omnia prope abruptam, ut possim præsens præsentem tibi dicere me esse ex animo, &c.

EPISTOLA CII.

Ad Dominum Balzacium.

Invitat illum ut Amstelodamum veniat. Amstelodami laudes.

ADmovi manum oculis dubitans an dormire, cum in literis tuis legerem te huc venire decrevisse; neque adhuc audeo de hoc aliter quam de somnio aliquo lartari. Nihilominus non miror animum magnum & fortem, ut tuum, non posse ad serviles aulæ formalas se componere; & quoniam serio profiteris Deum tibi inspirasse desiderium valedicendi mundo, putarem me in Spiritum Sanctum peccaturum, si te à sancto hoc instituto conarer retrahere; quinimo debes zelo meo ignoscere si te Amstelodamum invitem, illucque secedere. Eadem potius quam in quævis, non dicam Franciscanorum aut Carthusianorum cœnobis, in quæ plurimi boni concedunt, sed etiam amenissima quæque Galliarum & Italiarum loca, imo & præfero illud inclytæ isti cremo in qua eras anno superiore. Quantumlibet instructa sit rusticana domus, innumera semper in ea desunt non repertienda nisi in urbibus, imo & solitudo quæ sita nunquam ibi perfecta occurrit. Esto enim, illic reperias rivum qui vel loquacissimum quemque cogitandum efficiat, aut vallem tam solitariam ut in ecstasi aut lætitiâ quemvis rapiat; at certe vix fieri potest quin vicinulos multos habeas qui te nonnunquam importuni adeant, & quidem molestiores iis qui te Parisiis invisunt; cum è contra in magna hac urbe, præter me nemo non mercaturam exerceat, quisque est ad rem suam ita attentus, ut possem hic totam vitam agere, nemini notus. Deambulo quotidie per ingentis populi turbam non minus libere & quiete, quam in tuis ambulacris spatiari possis; neque aliter homines mihi obvios considero quam silvarum tuarum arbores, vel pascemia in illis animalia. Imo & negotiantium strepitus cogitationes meas non magis interpellat, quam rivus alicujus susurrus. Quod si quando in eorum actiones reflecto; eandem ex iis voluptatem percipio, ac tu ex rusticis prædia tua colentibus; quippe video laborem illorum omnem conferre ad loci quem incolò ornatum, nequid nimirum mihi deficit. Quod si volupe sit fructus in viridariis tuis crescentes intueri, atque omnibus affluere; an putas minorem voluptatem esse, videre naves huc appellentes, quæ quicquid ferunt Indiarum, quicquid eximii habet Europa, huc

Vu

ap-

apporrent. Quem locum in cætero orbe eligas, in quo omnia vitæ commoda, omnia ea quæ raritatis nomine curiositas commendat, facilius quam hic reperiantur? Quam aliam regionem in qua major sit libertas, ubi tutior somnus, ubi exercitius nunquam non instructi sint ad custodiam nostram, ubi venena, proditioes, calumniæ minus notæ sint, & in qua vitæ innocentia plura supersint? Nescio cur usque adeo capus sis amore cœli Italici, cum quo tam sæpe spiratur & pestis, atque ubi æstus diei est semper intolerabilis, aura vespertina frigidula quidem, sed insalubris, noctisque obscuritas tegit furta & cædes. Quod si septentrionis hyemes metuas; die quæso quænam umbracula, quod scabellum, qui fontes æstus incommoda possint Romæ tam bene arcere, atque hic hypocaustum, aut caminus luculentus te à frigore defendat? Cæterum te expecto cum parva meditationum collectione quæ tibi forsitan non erit injucunda, & siue venias, siue non, ero semper ex animo, &c.

EPISTOLA CIII.

Ad Dominum ***.

Rationes cur in Meditationibus suis Dei & anima humana existentiam non clarius nec fusius probaverit.

Fateor esse magnum, ut observas, in illo quod vidisti scripto defectum, meque non satis fuisse persecutum fuisse rationes, quibus evincere me puto, nihil esse in mundo evidentius perse aut certius, quam Dei & animæ humanæ existentiam; quod tamen probandum fuisset ad illas omnibus faciles reddendas. Sed non ausus sum id aggredi, quia necesse habuisssem validiores scepticorum rationes multis verbis explicare; & ostendere nihil materiale esse de cujus existentia certi sumus; atque hoc pacto assuefacere lectorem menti à sensibilibus abstrahendæ: deinde fuisset ostendendum, eum qui hoc modo dubitat de eo omniquod est materiale, nequiquam tamen posse de propria sua existentia dubitare; unde sequitur eum (hoc est animam) esse ens siue substantiam, quæ certe nequaquam corporea est, & cujus natura est cogitare; atque etiam illam esse primam inter ea quæ sunt certo cognoscibilia. Imo & meditationi huic diu immorando, acquiritur paulatim clarissima, & si liceat ita loqui, intuitiva cognitio naturæ intellectualis in genere; cujus idea absque omni limitatione considerata ea est quæ repræsentat nobis Deum; limi-

limitata vero Angelum aut animam rationalem. Impossibile autem est, ut recte intelligantur ea quæ de Dei existentia subjeci, nisi hinc ducatur initium, quemadmodum satis declaravi pag. 38. Sed veritus sum ne hæc isagoge, quæ prima fronte visa fuisset scepticorum opinionem inducere, debiliora ingenia turbaret, maxime quia vernacula lingua scribebami: ita ut ne ausus quidem fuerim pauca illa quæ de hoc habentur pag. 32. nisi præfatis quibusdam dicere; quod vero ad te attinet, tuique similes, hoc est, doctiores, speravi eos, si porro non graventur ea quæ meditatum me fuisse dixi, non solum legere, sed etiam ordine meditari, cuilibet conclusioni tantum immorando, quantum satis erit ad explorandum an erraverim necne, easdem mecum conclusiones ex meditationibus istis deducturos. Quamprimum licebit mihi per otium, libenter adnitar hanc materiam illustrare, & gaudebo hanc mihi datam fuisse occasionem testandi tibi me esse, &c.

EPISTOLA CIV.

Ad Dominum ***.

*Opera sua offert legato Gallico, æque etiam Regi, &
Cardinali de Richelieu.*

CUM nuper te comitatus fuero in ædes Domini de Charnassé, ut illum salutarem, putavi tibi non fore ingratum, si te rogaverim ut exemplarium, quæ ad te mitto, unum illi offeras una cum duobus aliis, quorum unum regi, alterum Cardinali de Richelieu, offerri cuperem, ut sint humillimi mei erga illos obsequii pignora, dum ne gravetur ipse suam mihi operam in hoc commodare. Verum est quod cum nomen meum in hisce scriptis retineri voluisssem, neutiquam speraveram oblatum iri occasione illud declarandi hominibus in tanta dignitate constitutis: sed quia novissime accepi privilegium regium, in quo quicquid in contrarium curaverim, nomen meum additum fuit; credo me jam debere fere idem, ac si fuisset animus illud vulgare, nec posse amplius supponi quod lateat. Quia autem nonnulla in hocce privilegio adjecta sunt, quæ in aliis libris nunquam vidi, quæque meritum meum longe excedunt, quanquam certe illa non optarim, nec rogaverim aliud quam ut in vulgarium auctorum numero haberet; hoc me illis tantopere devinct, ut, quo pacto gratitudinem meam significem, nesciam. Haud enim

existimo debere nos ipsis ea tantum beneficia quæ ab illis immediate accipimus, sed ea etiam omnia quæ per illorum ministros ad nos derivantur; tum quia ministri suam ab illis auctoritatem acceperunt, tum maxime etiam quia cum illi hosce viros, potius quam alios cooptarint, æquum est ut credamus suas erga nos propensiones easdem esse cum iis quas in illis experimur, qui ab ipsis instructi fuerunt potestate nobis bene faciendi. Atque ita quamvis non sim adeo vanus, ut putem Regis aut Cardinalis cogitationes usque ad me descendisse, aut scire illos quicquam de privilegio quod in mei gratiam Cancellarius obliquavit, nihilominus primarias illis & principes gratias habeo; atque in hoc agnosco Galliam longe aliter & quidem melius gubernari, quam olim Ephesum, in qua vetitum erat excellere; nam è contra nostri gratificantur non solum iis qui excellunt, quibus certe accensere me non ausim, sed iis etiam qui tentant eximia, quanquam per vias insolitas; quo quidem nomine potuisse n apud Ephesios jure postulari. Cæterum excusationes non quæro apud Dominum Charnasæum, quod illius in hac re operam audeam asciscere: nam certe & legati munus, quo ipse hic fungitur, & benigna exceptio, qua me dignatus est cum illum inviserem, & accurata cognitio, qua scientias illas amplectitur, de quibus in hisce scriptis ago, potius suadent ipsi ingratum fore, si cujuspiam alius opera uterer. Nullus autem dubito quin preces meæ ipsi gratiores futuræ sint à te, quam vel à me, vel per epistolas oblatæ. Itaque tuam, si placet, operam hac in re adhibebo, & ero dum vivam, &c.

EPISTOLA CV.

Ad Patrem quandam ex Oratorii familia
Sorbonz Doctorem.

De ideis adequatis & inadequatis. Utrum anima semper cogitet.

De sensu brutorum.

Quantum faveas desiderio quo teneos progrediendi non nihil in ventris investigatione, satis expertus sum; sumque tibi devinctissimus quod id mihi per literas testificeris. Sum etiam devinctissimus R. P. de la Barde, quod metaphysicas meas meditationes legere non fuerit gravatus sui que patrocinii gratiam mihi fecerit contra illos, qui criminabantur me omnia in dubium revocare; mentem meam optime cepit, &

si

si vestri similes fautores multos haberem, nullus dubito quin partes meae brevi superiores futurae essent; sed quanquam paucos habeo, placet tamen magnopere, quod summi viri sint & acutissimi pauci illi qui opinioniones meas amant & defendunt. Mihi facile persuadeo R. P. G. (si in vivis mansisset) futurum fuisse in hoc numero unum è principibus. Domini vero Arnaldi, quanquam non ita pridem Doctoris, iudicium pluris facio, quam dimidii seniorum Sorbonensium numeri. Nequaquam autem speravi impetraturum me totius illorum societatis approbationem; minime ignoravi, diuque praedixi cogitationes meas non iri probatum multitudini, atque ubi suffragia erunt ad calculos revocanda, illas facile damnatum iri. Privatorum etiam approbationem non optavi, quia pingeret me si quid mea causa eorum ullus faceret, quod daret sociis suis offensionis locum; atque etiam quia tam facile pro aliis libris impetratur, ut crediderim mihi non fore indecoram causam propter quam suspicari quis possit approbationem istam mihi fuisse negatam; hoc tamen non obstitit quo minus meditationes meas facultati vestrae nuncuparim, ut scilicet eo diligentius examinentur; atque etiam ut si tam celebris societas rationes iustas nullas reperiat quamobrem reprehendantur, mihi certo constare possit de veritatibus quae in illis continentur.

Quantum ad principium, ex quo mihi videor cognoscere, ideam quam de re quapiam habeo non reddi à me inadaequatam per abstractionem intellectus, illud non desumo nisi ex propria mea cogitatione: cum enim certus sim me nullam habere posse cognitionem eorum quae sunt extra me, nisi per ideas quas de illis in me habeo, diligenter quidem caveo ne iudicia mea ad res immediate referam, aut rebus positivum quicquam tribuam, quod in illarum ideis prius non perceperim. Verum existimo etiam rebus inesse necessario illud omne quod in illarum ideis reperitur; atque ita ut sciam an idea mea facta sit incompleta sive inadaequata per aliquam mentis meae abstractionem, examino tantum an illam desumpserim, non quidem ex subiecto aliquo magis completo, sed ex aliqua alia idea, quam in me habeam, magis completa & perfecta; atque annon illam desumpserim ex hac per abstractionem intellectus, hoc est, abducendo cogitationem meam à parte aliqua ejus quod in ista idea comprehenditur, ut animum melius applicarem & me attentiores praerberem ad aliam partem; sic cum considero figuram aliquam, non cogitando de substantia aut quantitate cujus est figura, abstractionem mentalem facio, quam postea agnoscere facile possum, examinando annon desumpserim ideam hanc, quam de figura habeo, ab aliqua alia, quam antea habuerim,

hucim, & cui ita juncta sit ut licet possit quispiam de una cogitare omnia altera, nequeat tamen illa negari de hac altera, quando de utraque cogitur; etenim hoc pacto clare video ideam figuræ adjunctam esse ideæ extensionis, & substantiæ, quandoquidem impossibile est ut concipiam figuram aliquam, negando esse illi extensionem ullam, aut etiam negando extensionem hanc esse substantiæ alicujus. At vero ideæ substantiæ extensæ & figuræ completa est, quia possum illam per se solam concipere, deque illa negare cætera omnia quorum ideam habeo. Videtur autem mihi valde clarum, ideam, quam habeo de substantia cogitante, completam esse hoc pacto, nullamque esse in mente mea ideam, quæ illam præcedat, aut quæ sit cum illa ita conjuncta, ut nequeam illas recte concipere negando unam de alia; talis enim in me nulla esse potest, quin illius conscius sim. Denique præter modos nihil est, cujus ideæ reddantur incompletæ per abstractionem mentis nostræ, quando scilicet illos consideramus finire illa, cujus sunt modi; substantiæ enim nequeunt esse non completæ; imo & impossibile est qualitatium, quas reales vocant, ullam concipere, quin eo ipso quod vocantur reales, concipiantur ut completæ; unde fit etiam ut concedant posse illas à substantia separari, si non naturaliter, at certe supernaturaliter, quod quidem sufficit. Diceret fortasse aliquis manere adhuc difficultatem, quia licet concipiam animam & corpus ut binas substantias, quarum una potest esse absque altera, tamen certus non sum eas esse tales, quales opinor. Sed hic recurrendum est ad regulam, quam supra tradidi; nempe non posse nos ullam rem cognitionem habere, nisi per ideas quas de illis concipimus; ac proinde debere nos de illis judicare secundum ideas istas, imo & cogitare esse absolute impossibile, & implicare contradictionem quicquid ideis istis repugnat. Sic ratio cur asseramus non dari montem absque valle, alia non est quam quod videamus montis & vallis ideas non posse esse completas, quando illorum unum absque alio concipimus; licet possumus per abstractionem habere ideam montis, sive loci cujuspiam per quem ascenditur, non considerando quod possit per eundem locum etiam descendere. Sic possumus dicere implicare contradictionem quod dentur atomi, sive partes materiæ extensionem habentes, & tamen indivisibiles; quia nempe extensionis nulla idea haberi potest, quin etiam habeatur idea semissis ejus, aut tertiæ partis, & proinde quin concipiatur ut divisibilis bisariam aut trisariam; nam ex hoc uno quod considero duo dimidia cujusvis partis materiæ, quantumcumque illa esse possit, ut duas substantias completas, & quarum ideæ non redduntur à me inada-

quæ

quæ per abstractionem intellectus, concludo certo illas esse realiter divisibiles. Si quis vero dicat quod quanquam possim illas separatim concipere, tamen nescio annon Deus illas ita univerit, aut tam ætæto vinculo inter se junxerit, ut sint prorsus inseparabiles, atque ita nullam esse rationem quamobrem id asseram: respondeo quod qualicumque vinculo illas junxerit Deus, certus sum illum posse eas separare, & sic absolute loquendo illas esse separabiles, quandoquidem ipse mihi indidit facultatem illas concipiendi ut separatas. Idem autem dico de anima & corpore, & universim de iis omnibus, quorum diversas & completas ideas habemus: sed tamen non nego quin plurima esse possint in anima aut in corpore quorum ideas nullas habeo; hoc unum nego, nempe quicquam esse quod pugnet cum ideis quas de illis habeo; secus enim Deus esset impostor, nec ullam haberemus regulam ex qua veritas nobis certo constare posset.

Ratio cur credam animam semper cogitare, eadem est quæ mihi suadet lucem semper lucere, licet nulli fuerint oculi qui illam intueantur; calorem esse semper calidum, licet se nemo calefaciat; corpus sive substantiam extensam habere semper extensionem; & generatim id quod rei cuiuspiam naturam constituit, illi semper inesse quandiu illa existit; ita ut longe facilius existimarim animam desinere esse, cum quis dicit illam à cogitando cessare, quam concipiam illam absque cogitatione existere. Neque porro ullam hic difficultatem video, nisi quod videatur supervacuum quod illa cogitet, dum nulla remanet in nobis cogitationis istius memoria: sed si attendamus mille cogitationes dormientibus nobis qualibet nocte obversari, imo & vigiles nos de mille rebus intra horz spatium cogitare, quarum vestigium in nobis nullum relinquitur, & quorum utilitatem haud melius percipimus, quam eorum quæ ante nativitatem cogitare potuimus; longe facilius erit id sibi persuadere, quam ut inducamus animum substantiam, cujus natura est cogitare, existere posse sine cogitatione. Neque etiam videtur mihi esse difficile intelligere quod facultates imaginandi & sentiendi ad animam pertineant; quandoquidem illæ sunt cogitationum species; quæ tamen non pertinent ad animam, nisi quatenus illa juncta est corpori, quia nempe tales sunt cogitationum istarum species, ut possit sine illis concipi anima pura. Quantum ad animalia bruta, videmus quidem in illis motus quosdam eorum similes, qui imaginationes nostras sive sensus consequuntur; imaginationes vero aut sensus utrum illa habeant, ignoramus; è contra vero cum isti iidem motus possint absque imaginatione fieri, non sine causa suspicari possumus illos in

iis ita produci, quemadmodum spero me clare ostensurum, subtiliter describendo totam illorum corporis compagem, & istorum motuum causas. Sed vereor ne tibi jam fuerit tædio epistolæ huius prolixitas; itaque me felicem existimabo si me amare & defendere pergas, &c.

EPISTOLA CVI.

Ad Dominum à Zuylichem.

Solatur illum de morte uxoris.

Licet procul à mundo secesserim, tamen tristis afflictionis tuæ rumor ad me usque pervenit. Mærorem certe tantum testatus es ab initio morbi uxoris tuæ, ut si te ex vulgarium animorum modulo æstimarem, timerem ne morti ejus perferendæ impar esses. Sed cum non dubitem quin tu tibi secundum rationem omnino imperes, mihi persuadeo esse jam tibi longe facilius solatium admittere, & solitam animi tranquillitatem recipere, postquam nullus relictus est remedio locus, quam cum adhuc manerent spei & metus causæ. Certum enim est spe prorsus sublata cessare desiderium, aut saltem remitti, & suam vim perdere: cum autem vel nihil vel parum desiderii remanet recuperandi id quod amissum est, dolor non potest esse admodum vehemens. Porro non sum nescius animos infirmiores hanc rationem neutiquam gustare, quia cum ipsi non intelligant quid optent, sibi fingunt posse adhuc esse quicquid olim fuit, & Deum veluti teneri votis illorum per omnia subservire. Verum anima fortis & generosa, ut tua, græ conditionis naturæ nostræ, selegis ejus necessitati nunquam non subicit: & quanquam id sine aliqua ægitudine non fiat, tamen tanti facio amorem, ut credam jucundum esse quicquid ejus causa patimur; ita ut etiam ii qui propter amicos se morti opponunt, mihi videantur ad ultimum usque vitæ suæ momentum beati. Quanquam autem valetudini tuæ timebam, dum te & cibo & somno frandares, ut ægrotanti uxori ipse inservires, tamen visus fuisset mihi sacrilegium admittere, si te à tam pio & suavi officio retrahere fuisset conatus. Sed quandoquidem nequit luctus tuus jam illi prodesse; nec proinde justus sit, ut antea; atque adeo habere nequeat comitem lætitiæ istam & interiorem satisfactionem, quæ bonas actiones sequitur, facitque ut sapientes in omnibus fortunæ casibus beatos existimant:

men; si putarem non posse te dolorem tuum ratione superare, adirem te importunus, omnibus modis conaturus te oblectare; nullum enim aliud in ejusmodi malo remedium novi. Hic quidem nullo loco numero jacturam quam fecisti, quatenus illa te spectat, quatenus scilicet privatus es consortio tibi carissimo. Utique enim mala quæ nosmetipsos spectant, haud mihi videntur æquiparanda iis quæ amicos nostros afficiunt; & quemadmodum virtus est alienis malis vel minimis affici, ita ignaviae genus est propriis adversis quantiscunque perturbari; præterquam quod iunt tibi tam multi necessarii, & quidem qui te amant, ut nihil fere sit quod in familia tua desideres; & vel una soror tua M. V. satis possit te solitudine sublevare, & rei familiaris cura, quam alius quispiam post mortuam uxorem forsantimeret. Excusatum me habeas velim quod sententiam meam Philosophica libertate ad te scribam; idque eo momento quo D. G. reddit mihi fasciculum à te, in quo non intelligo quid sibi velit P. M. Nam nullum adhuc privilegium ad me mittit, & videtur tamen me sibi devinctum habere, contrarium facienti ejus quod illum rogo. Sum, &c.

EPISTOLA CVII.

Ad Dominum ***.

Solatur illum de morte Fratris.

AUdivi modo tristem affectionis tuæ nuncium, & licet mihi nequaquam pollicear me quicquam hic scripturum, quod ad dolorem tuum minuendum multum valeat, tamen non possum mihi temperare à scribendo, saltem ut me tecum dolere testificer. Is porro non sum, qui putem lachrymas & tristitiam non decere nisi mulieres, atque ad hoc ut fortes videamur; debere nos tranquillum vultum affectare: sensi non pridem jacturam duorum hominum mihi sanguine conjunctissimorum; & expertus sum maerorem meum graviorem factum fuisse ab iis, qui mihi volebant illo interdicere; contra vero ab iis sublevatum, quos de afflictione mea dolere mecum videbam. Sic scio, me melius ferere lachrymis tuis non adversantem, quam si susceperem dolorem, quem certe justum existimo, à te amoliri; sed tamen adesse debet aliquis modus: & quemadmodum barbarum esset non omnino dolere, ubi res postulat; ita etiam nimis ignaviae esset se totum ægritudini dedere, & male prudens

X x

dens

dens esse: is qui totis viribus non contenderet se passione tam incommoda liberare. Professione armorum, in qua fuisti educatus, assuescunt homines opinatis amicorum etiam carissimorum fati; nec quicquam est usque adeo molestum, quod consuetudine non fiat tolerabile. Magna est similitudo inter manus & fratris iacturam; priorem cum olim passus fueris, haud unquam observavi te de ea dolere; altera cur tibi magis doleat? Si res tuas respicis, certum est posse hanc melius quam illam reparari; cum fidi amici acquiratio possit boni fratris amicitiae loco esse. Si vero ob illum ipsum quem desles tristis sis, ut certe abhorret à magnanimitate tua ut aliud quicquam lugeas; non ignoras nullam esse aut rationem aut religionem quæ ullum post hanc vitam malum minetur iis qui bene vixerunt, sed è contra utramque ipsis polliceri lætitiæ & præmia. Denique omnes nostræ afflictiones vix pendunt à rationibus, quibus illas ascribimus, sed tantum à commotione & interiori perturbatione, quam in nobis excitat natura. Etenim sedata demum illa, licet omnes, quibus antea commovebamur, rationes eadem maneat, tamen dolorem nostrum defuisse sentimus. Nolim autem tibi auctor esse, ut omnes constantiæ tuæ vires intendas ad interiorē, quam sentis, agitationem de repente comprimendam; esset forsitan remedium hoc durius ipso malo: sed neque etiam auctor sum ut te temporari soli sanandum committas, & multo minus ut malum tuum cogitationibus tuis foveas & propages; velim tantum ut illud paulatim mollire adnitaris, considerando calum tuum ex ea tantum parte, quæ illum tibi tolerabiliorem possit efficere, aliis te quantum poteris occupationibus addicendo. Scio equidem me nihili hic scribere quod sit tibi novum; sed non sunt bona remedia contemnenda, quia vulgaria; & quia hoc cum fructu aliquando adhibui, existimavi esse officii mei ut te illius admonerem; sum enim, &c.

EPISTOLA CVIII.

Ad Dominum * * *.

Ad veniam impetrandam rustico, qui vitricum suum interfecerat.

Scio esse tibi tam multas occupationes, & quidem graviore, quam ut literas legas hominis inter rusticos versantis, ut non ausim ad te scribere, nisi quando datur occasio tibi aliquid supplicandi. Ea jam se offert, in qua locum habes caritatem tuam exercendi erga miserum quandam viciniam

vicinix meæ rusticum, qui alium infelicitè interfecit. Cognati ejus cœperunt consilium implorandæ Principis clementiæ, ad veniam illi impetrandam; atque etiam rogaverunt me ut hac causa ad te scriberem, teque obsecrarem ut data occasione illorum postulationem verbo favorabili adjuves. Quod ad me attinet, cum nihil æque ac securitatem & tranquillitatem quæram, amo utique esse in ea regione in qua animadveretur rigide in crimina, quia improborum impunitas nimis illis licentiam addit. Verum quia passionum nostrarum motus omnes non sunt in nostra potestate, nonnunquam fit ut etiam optimi homines ad maxima delicta rapiantur, quo certe casu utilius est gratia, quam legibus uti; quia semper satius est ut bonus aliquis servetur, quam ut mille improbi puniantur; & sane nihil possunt Principes facere quod sit gloria & majestate dignius, quam ut ignorent. Rusticus ille, cujus causa te precor, minime contentiosus audit, neque ulli ante hunc casum nocuisse fertur. Hoc unum ipsi crimini dei maxime possit, quod mater ejus nupta esset ei quem is interfecit; sed si addatur illam à marito suo pessime vapulasse, idque per multos annos quibus cum illo convixerat, donec tandem ab illo discessisset; ita ut illum non amplius mariti loco haberet, sed persecutoris & inimici; qui etiam discessionem hanc ulturus, filiorum ejus (quorum hic unus est) vitæ imminebat, liquebit hoc ipsum ad illum excusandum multum pertinere. Et prout scis mihi moris esse in casus omnes obvios philosophari, dicam me disquisivisse causam, quæ miserum hunc ad hoc patrandum adigere potuerit, à quo alienus admodum videbatur. Intellexi autem gravissimam illi afflictionem incubuisse, quo tempore id contigit; unumque è liberis ejus, cujus vitæ quolibet momento metuebat, gravissime ægrotasse; cumque illi adesset evocatum fuisse ad opem ferendam marito sororis suæ, quem communis illorum hostis fuerat adortus. Quo fit ut neutiquam mirer illum non fuisse in hoc casu sui compotem: dum enim gravis aliqua afflictio ingruit; & mœnore ad desperationem animus agitur, certum est tum longe magis abripi hominem ira, si causa exoriatur, quam alias. Et ii quidem sunt optimi plerumque homines, qui instante hinc morte filii, inde periculo fratris, vehementius perturbentur. Quapropter etiâ delicta sine præmeditata malitia hoc pacto admittæ, mihi videntur præ cæteris condonanda; & huic quidem à præcipuis omnibus mortui cognatis condonatum fuit, eo ipso die quo ad mortuum efferendum convenerant. Et præterea loci hujus judices illum absolverunt, sed præcipiti nimis gratia, quæ cum Procuratorem fisci adduxisset ad provocandum de illorum sententia, non:

audet reus se coram iudicibus sistere, quibus incumbit legum rigorem sequi, nulla habita ratione personarum; sed vero supplex orat ut vitæ antea innocentia possit à Celsitudine sua ipsi veniam impetrare. Porro non ignoro utilissimum nonnunquam esse exempla ponere, ad metum malis incutendum; sed inhi videtur hic casus parum ad id idoneus: nam præterquam quod reus abest, nec alio modo in ipsum animadverti potest, quam ut à regione arceatur, atque ita uxor & liberi ejus magis quam ipse puniantur; audio plurimos esse in hisce provinciis alios rusticos, qui excusabilia minus crimina admiserunt, & quorum vita est mirus innocua, qui tamen hic maneant, etiam neglecta Celsitudinis suæ condonatione (erat autem mortuus in hoc numero); quo fit ut credam, si à vicino meo inciperet exemplum, eos qui stringendo gladio magis assueti sunt, quam ipse, dicturos, insontes tantum & idiotas esse legibus obnoxios, atque hac ratione in licentia sua magis obfirmatum iri. Denique si quid conseras ad hoc ut miser iste liberis suis reddatur, ausim dicere te bene facturum, & præterea me tibi novo nomine devinctum habebis, &c.

EPISTOLA CIX.

Ad Dominum ***.

Responsio ad iudicium quod de Philosophia ejus alius quispiam tulerat.

Q Uod tibi curæ fuerit exquirere quodnam sit de scriptis meis vestrorum hominum iudicium, est amicitiaæ tuæ argumentum quod me tibi magnopere devincit. Sed quamvis post editum librum nunquam non volupe sit rescire quid de eo lectores sentiant, tamen ausim profiteri me de hoc non magnopere laborare; imo & puto me tam bene nosse captum maximæ partis illorum qui docti habentur, ut cogitationes meæ mihi minus placiturae essent, si eas illis probari viderem. Nolim porro asserere eum, cujus ad me iudicium misisti, esse in hoc numero: sed cum ille dicat modum quo explicui Iridem vulgarem esse, & principia mea esse à Democrito desumpta, certe opinor illum scripta mea non multum legisse; quod etiam confirmant objectiones ejus contra rarefactionem. Si enim attendisset ad id quod scripsi de rarefactione quæ fit in Æolipilis, aut aliis id genus machinis in quibus aër violenter comprimitur, aut eam quæ fit in pulvere pyrio, haud utique mihi proposuisset rarefactionem

nem

nem quæ sit in fonte ejus artificiali. Et si advertisset ideam, quam de corpore live materia habemus, prout illam explicui, non differre ab ea, quam habemus de spatio, non fuisset immoratus illustrandæ penetrationi dimensionum exemplo motus: certe enim habemus ideam distinctissimam variarum celeritatum motus; sed implicat contradictionem, & impossibile est concipere quod duo spatia se mutuo penetrent. Nihil respondendo ad eum quid dicit, demonstrationes in Geometria mea desiderari: verum enim quidem est plurimas fuisse à me omisissas, sed omnes illæ tibi notæ sunt, neque ignoras eos qui conqueruntur me illas omisissas, (quia nimirum illas ex se nequeunt invenire) hoc ipso proderet se non esse magnos Geometras. At vero unum est quod præ cæteris mirer, conclusionem nempe judicii quod ad me misisti, maximum videlicet impedimentum fore Principiis meis ne in schola admittantur, quod illa non sint experimentis satis confirmata, & quod aliorum Philosophorum rationes non refutarem. Miror enim certe quod quanquam demonstraverim tot fere particularia experimenta, quot sunt lineæ in scriptis meis; tradiderimque universim in Principiis meis omnium naturæ phænomenon rationes; atque eadem opera explicuerim quotquot de corporibus inanimatis haberi possunt, experimenta: è contra autem experimentum nullum ex Philosophiæ vulgaris principiis fuerit recte explicatum, tamen obijciatur mihi experimentorum penuria ab iis qui illam sectantur. Miror etiam quod flagitent ut argumenta scholæ resellam; id enim si aggrederer, facturus essem, opinor, rem ipsis minime gratam; & sane nonnullorum malignitas mihi jam pridem præbuerat causas id faciendi, & forsan tandem ad hoc cogar. Sed quia Patres Jesuitæ ii sunt quorum hoc maxime interest, abstinui propter Patrem B. cognatum meum, qui in eorum Societate primarium locum tenet ex quo mortuus est Generalis, cujus ipse erat assistens; atque etiam propter Patrem D. nec non alios quosdam qui in ista Societate primas tenent, & à quibus me revera amari existimo; quinimo Principia mea ista composui; ut dici possit illa neutiquam adversari vulgari Philosophiæ, sed certe illam plurimis, quibus carebat, ornamentis ditasse: nam quandoquidem innumeræ aliz opiniones sibi mutuo contrariæ in ea admittuntur, quidni etiammitterentur & meæ; nollem tamen hoc illos rogare; nam si falsæ sint, mihi doleret eos decipi; si autem veræ sunt, est è re illorum ut eas amplectantur, magis quam è mea, ut illas commendem. Ut ut sit, sum tibi devotissimus quod sis mei memor. Nullus dubito quin Dominus à Z. ad te scripturus sit, quid agatur Ultrajecti; quare hic nihil addam, nisi

X x ;

quod

quod tempore & absentia nihil unquam detrahetur studio quo velim esse per totam vitam, &c.

EPISTOLA CX.

Ad Dominum ***.

De æternis veritatibus. De perfectione brutorum. De cogitatione & libero arbitrio hominis. Rationes pro & contra editionem Physices sue.

Quamvis R. P. Merfennus contra preces meas directe fecerit, nomen meum vulgando, tamen non possum ipsi succedere, quod ejus opera venerim in tui notitiam. Sed multa sunt quamobrem falsi insimuleum formam privilegii, quod ille renunciat se laborare velle ut mihi impetret: ibi enim me inducit laudantem me ipsum, & prædicantem plurimarum eximiarum rerum inventorem, & pollicentem alios tractatus, præter eos qui jam editi sunt; quod quidem pugnat cum iis quæ scripsi jam in initio pag. 77. discursus, quæ quem præstationis loco posui, quam alibi. Sed non dubito quin ipse tecum communicaturus sit id quod ad illum scribo, quandoquidem ex ea, qua me honestasti, video te illi suppeditasse objectiones nonnullas ex iis ad quas mitto illi responsonem. Quantum ad tractatum illum Physices, quem rogas ut in lucem edam, fuisset inconsultum de illo scribere, ut feci, nisi esset mihi animus illum vulgare, modo ut id cupiant homines, & cum rationibus meis & securitate constet. Et quidem velim scias, mihi non aliud consilium fuisse, cum animum inducerem hæc publici juris facere, quæ jam imprimuntur, quam ut illi viam struerem & vadam tentarem. Atque idcirco propono Methodum generalem, quam eundem non doceo, sed cujus specimina conor exhibere in tribus sequentibus tractatibus, quos dissertationi istius de Methodo adjicio, & quorum primus argumentum habet partim Philosophicum, partim Mathematicum. Secundus, pure Philosophicum. Tertius, pure Mathematicum; atque in his non verebor dicere me à nulla materia tractanda (carum saltem quæ rationationis vi cognosci possunt) abstinuisse, quod illam ignorare me crediderim: ita ut mihi videar satis præstitisse, unde quis judicet me ea uti Methodo, qua possem quamlibet aliam materiam æque bene explicare, si quidem suppetere experimenta necessaria, & tempus ad res expendendas. Præterquam quod ut ostendam Methodum hanc ad omnia extendi, nonnulla

nulla de Metaphysica, Physica, & Medicina in primo discursu strictim inserui. Quod si efficere possim ut hoc de Methodo mea sentire homines animum inducant, tunc credam minus subesse periculi ne Physices meæ Principia male excipiantur; & certe si iudices mei omnes essent pari tecum æquanimirate, facesseret jam nunc omnis metus.

— Rogas, in quo genere causa Deus disposuit æternas veritates? Respondeo, in eodem genere causa, quo omnia creauit, hoc est, ut efficiens & totalis causa. Quippe certum est illum esse essentia creaturarum, non minus quam illarum existentia auctorem: ista autem essentia non differt ab æternis veritatibus, quas ego non concipio à Deo manantes, tanquam radios à Sole. Sed certe scio Deum esse rerum omnium auctorem; has autem veritates esse aliquid; ac proinde illum esse earum auctorem. Dico autem me id scire, non vero me id concipere; aut comprehendere; sciri enim potest Deum esse infinitum & omnipotentem, quanquam anima nostra, utpote finita, id nequeat comprehendere siue concipere; eodem nimirum modo, quo montem manibus tangere possumus, sed non ut arborem aut aliam quampiam rem, brachiis nostris non maiorem amplecti: comprehendere enim est cogitatione complecti; ad hoc autem ut sciamus aliquid, sufficit ut illud cogitatione attingamus. Rogas præterea quid adegerit Deum ad hæc veritates creandas? Dico autem fuisse ipsi æque liberum facere, ne verum foret, omnes lineas ductas à centro circuli ad peripheriam esse æquales, atque creare mundum: & quidem certum est has veritates ad essentiam ejus haud magis necessario pertinere, quam cæteras creaturas. Porro rogas quid fecerit Deus ut illas produceret? Dico, ex hoc ipso quod illas ab æterno esse voluerit & intellexerit; illas creauit, aut vero (si creationem non adscribas, nisi existentia rerum) illas disposuit & fecit. In Deo enim idem est velle, intelligere & creare; neque horum unum alio prius est; nequidem ratione. 2. Quantum ad secundam quaestionem, an Dei bonitati sit conueniens homines in æternum damnare: Hoc ad Theologiam spectat, atque adeo pace tua illi supersedebō. Non quod libertinorum rationes vim ullam hic habeant, utique enim futiles & ridicula mihi videntur: sed quia puto injuriam fieri veritatibus quæ à fide pendent, quæque naturali demonstratione probari nequeant, si quis illas humanis rationibus & tantum probabilibus velit stabilire. 3. Quod spectat Dei libertatem, sum prorsus in sententia ea quam dicis fuisse explicatam à P. Gibbieu. Non resciveram illum quicquam edidisse, sed quamprimum commodum fuerit, dabo operam ut liber ejus Lutetia neceretur, ut illum legam; & lator valde opiniones meas cum

cum ipsius consentire; hoc enim me saltem certum facit illas non esse tam absurdas, quin à viris alioquin eruditissimis propugnentur. Articuli 4. 5. 6. 8. 9. epistolæ tuæ omnes ad Theologiam pertinent, quare illos, si placet, omittam. Quantum ad septimum de signaturis, quæ imaginatione matris infantibus imprimuntur, &c. fateor rem esse examinatu dignam, sed mihi de ea nondum satisfeci. Quod ad decimum articulum, in quo supposito Deum adducere omnia ad perfectionem, & nihil annihilari, rogās, quænam sit igitur brutorum perfectio, & quid fiat de illorum animabus post mortem. Certe hæc quæstio non est extra Philosophiæ mex fines; & respondeo Deum adducere omnia ad perfectionem suam, hoc est, omnia collective, non vero singula sigillatim; etenim hoc ipsum quod singularia quædam pereant, alia vero in eorum locum renascantur, una est ex primariis Universi perfectionibus. Quantum ad illorum animas, aliasque formas, & qualitates, quorsum evadant, ne labores: hoc jam ago, ut quæstionem hanc in tractatu meo explicem, illamque spero, tam clare exponam, ut nemini dubia esse possit.

Quod vero infero, si natura hominis tota consistat in cogitando; ergo illud non habere voluntatem: consequentiam haud bene allequor; etenim velle, intelligere, imaginari, sentire, &c. sunt tantum diversi cogitandi modi, qui omnes ad animam pertinent. Illud etiam improbas quod dico, satis esse ut quis bene judicet, ad hoc ut bene faciat; & tamen mihi videtur pervulgata scholæ doctrina statuere, *quod voluntas non fertur in malum, nisi quatenus ei sub aliqua ratione boni representatur ab intellectu*; unde, hoc, *omnis peccans est ignorans*: ita ut si nunquam intellectus repræsentaret voluntati quicquam ut bonum, nisi quod bonum est, non posset in eligendo errare. Verum sæpe diversa simul illi repræsentat, unde hoc; *Videō meliora, proboque*: quod quidem in debiliora tantum ingenia competit, de quibus locutus sum pag. 26. Porro bonæ illæ actiones, de quibus loquor, non sunt intelligendæ ex mente Theologorum, qui de gratia agunt, sed tantum secundum Philosophiam moralem & naturalem, in qua hæc grātia non consideratur. Quapropter nequit mihi objici Pelagianorum error: aut certe non melius, quam si exinde quod dicere in, sufficere ut quis sit recto judicio præditus, ad hoc ut sit vir bonus, objiceretur requiri insuper sexum quo à scæminis distinguitur; hoc enim non veritatē rem. Pari ratione cum dico verisimile esse (nempe secundum humanam rationem) mundum fuisse creatum talem qualem esse oportuit; non ideo nego quin ex fide certum sit mundum esse perfectum,

etiam. Denique quod ad illos attinet, qui à te quæsierunt quam religionem colerem : si ad id attendissent, quod scripsi pag. 29. nempe quod non credidissem me debere alienis opinionibus vel uno momento acquiescere, nisi constituissem iudicium proprium, ubi tempestivum esset, ad illas examinandas adhibere, ex discursu meo viderent non posse inferri eos qui à fide alieni sunt, debere in parentum suorum religione manere. Nihil amplius reperio in duabus tuis literis quod egeat responsione, nisi quod videaris metuerere ne primi mei discursus vulgatione me verbis adstringam, ad Physicam meam posthac non edendam; quod tamen non est metuendum : nusquam enim dico me nunquam editurum illam; sed certe mihi antehac fuisse animum illam vulgandi, atque ab eo tempore ob rationes quas subjicio, decrevisse me id non facere; at in præsens velle tractatus in isto volumine contentos in lucem edere. Unde pari ratione inferri potest, quod si mutaræ essent rationes quæ obstant quo minus illam faciam publici juris, possem etiam absque inconstantia nota aliud consilium inire; sublata enim causa tollitur effectus. Dicis etiam adscribi posse ostentationi id quod de Physica mea dico, si illam non faciam publici juris; quod quidem locum habere possit apud eos qui me non norint, & qui primum discursum meum tantummodo viderint. Quantum vero ad eos qui vel legerint totum librum, vel me noverint, non metuo ne me vitii hujus inlimentent; aut etiam illius quod mihi exprobras, me despiciari homines, quia nimirum ipsis non impertior inconsiderate id quod nondum scio an habere exoptent : nam uno verbo non aliud fuit quam obrem ita loquerer de Physicâ meâ, quam ut eos invitarem, qui illam optarant, ad causas removendas quæ vetant quo minus illam promulgem. Iterum rogo te, mittas nobis vel privilegium vel repulsam quam primum fieri poterit, illudque potius simpliciori forma conceptum, modo uno die citius, quam ornatori, si uno tardius. Vale, &c.

EPISTOLA CXI.

Ad R. P. Mercennum.

De inventione lingua universalis. De Musica, & de celeritate motu.

Propositio ista de nova lingua inveniendâ mirabilior videtur primâ fronte, quam attentius rem consideranti videatur; discenda enim sunt

Y y

sunt duo tantum in quavis lingua, nimirum significatio verborum & Grammatica. Quantum ad verborum significationem, haud quicquam novi in hoc pollicetur auctor; dicit enim in quarta propositione, *linguam illam interpretari ex dictionario* quod sane quilibet in linguis vel mediocriter versatus possit absque magistri ope in quavis vulgari lingua assequi. Et mihi persuadeo, quod si Domino Hardy tradideris librum Sinenſi lingua aut quavis alia conscriptum, una cum dictionario ejusdem sermonis, sensum illius se redditurum recipiet. Porro præter Grammaticæ difficultatem nihil est quod obstat quo minus id possit quilibet facere; & in hoc conjicio positam esse totam hominis istius artem: qua tamen in re nihil est quod non sit admodum facile; si enim componatur lingua in qua unus sit tantum conjugandi, declinandi, & construendi modus; in qua nulla sint defectiva aut irregularia, quæ certe omnia ex usus corruptione profecta sunt; imo & in qua nominum aut verborum inflexio & constructio fiat per affixa, quæ primitivis vocibus vel præponantur vel postponantur; affixaque illa in dictionarium omnia referantur: mirum non erit quod vulgaria quæque ingenia intra sex horas addiscant componere in hac lingua dictionarii ope; quod quidem est primæ propositionis argumentum. Quod ad secundam, nempe, *cognita hac lingua, ceteras omnes ut ejus dialectos cognoscere*; hoc tantum facit ut arti suæ pretium addat; non enim dicit quanto tempore possint addisci, sed solum illas considerandas esse ut hujus dialectos; hoc est, quod cum in hac nullæ sint, ut in cæteris, anomalix, eam pro primitiva assumit. Præterea notandum est posse illum in dictionario suo pro primitivis vocibus adhibere eas quæ in cæteris linguis usurpantur, tanquam synonymas. Ut ex. gr. ad significandum amorem sumet *aimer*, amare, *φιλέω*, &c. Gallus autem addendo affixum, quo substantivum designatur ad vocem *aimer*, faciet substantivum, *l'amour* (amor;) Græcus vero idem affixum addet vocabulo *φιλέω* & sic de cæteris. Quo posito, sexta propositio est intellectu facillima, *scripturam inventire*, &c. ponendo enim in dictionario suo unicam notam, quæ referatur ad *aimer*, amare, *φιλέω*, illorumque synonyma omnia; poterit unusquisque ope dictionarii hujus librum quemvis hisce characteribus conscriptum interpretari. Quinta propositio videtur etiam esse tantum ad merces suas extollendas; nam statim atque video vocem *arganum* in aliqua propositione, continuo suboritur mihi suspicio fraudis: verum opinor illum non aliud innuere nisi quod, cum linguarum harum omnium Grammaticas, diligenter dispexerit, ut suam compendiosiore efficeret, posset illas facilius docere quam vulgaris quispian

piam magister. Superest tertia propositio, quæ est mihi prorsus arcanum: cum enim dicit se explicaturum veterum cogitationes per vocabula quibus illi usi sunt, sumendo quodlibet vocabulum pro vera rei definitione; idem est prorsus ac si diceret, se explicaturum cogitationes veterum sumendo illorum verba alio, quam quo ipsi illa unquam usurparunt, sensu; quod quidem repugnat; sed ipse forsitan rem aliter intelligit. Consilium autem istud de reformanda Grammatica, vel potius de nova quapiam fabricanda, quæ possit quinque aut sex horis addisci, & sit omnium linguarum communis; inventum sane esset publico non inutile, si universi homines in illius usum consentirent; nisi porro duo obstarent incommoda, quæ quidem prævideo. Prius est, ingratus literarum concursus, qui injucundos sæpe & intolerabiles auditui sonos efficeret: tota enim differentia inflexionis verborum non alio fine ex usu inducta fuit, quam ut vitium hoc vitaretur; fieri autem non potest ut auditor iste potuerit huic incommodo mederi, Grammaticam suam quilibet gentibus universalem faciendo; etenim id quod in lingua nostra facile est & gratum, id Germanis durum est & intolerabile, & sic de cæteris; ita ut non potuerit ille hoc incommodum vitare nisi in lingua una aut altera; atque ita lingua ejus in una tantum aut altera regione valeret; minime autem opus est ut Galli cum Gallis confabulaturi novam aliquam linguam addiscamus. Alterum incommodum est difficultas discendi linguæ istius vocabula; nam si pro vocabulis primitivis utatur quisque linguæ suæ vocabulis, erit quidem opus minoris laboris; verum intelligetur quilibet à popularibus tantum suis; nisi porro mentem suam scripto tradiderit, atque is qui illum voluerit intelligere, laborem sumat investigandi vocabula omnia in dictionario; quod quidem magis tædii afferret, quam ut quis speret venturum in usum. Quod si velit quempiam discere vocabula primitiva omnibus linguis communia; neminem certe reperiet, qui hunc laborem subire velit, & facilius esset adducere homines omnes ut in Latinam linguam aut quamvis aliam, quæ jam obtineat, addiscendam consentiant, quam in hanc, in qua nulli adhuc libri conscripti sunt, quorum ope possit quispiam se exercere, & quam nulli adhuc homines callent, quorum confabulatione comparari possit. Itaque non video quis fructus ex hoc invento percipi possit, nisi quoad scripturam: curaret ex. ca. imprimi magnum dictionarium omnium istarum linguarum in quibus vellet intelligi; & pro quolibet primitivo vocabulo apponeret characteres communes, qui sensui non syllabis responderent, puta, eundem characterem pro *aimer*, amare, & *φιλεῖν*; atque hoc

pacto ii qui dictionarium hunc haberent, & ejus Grammaticam callescent, possent propria quisque lingua interpretari id quod scriptum esset, characteres omnes sigillatim investigando. Verum hoc mysteriis tantum & revelationibus legendis esset idoneum; in aliis enim rebus oporteret esse otio admodum abundantem eum, qui laborem sumeret vocabula omnia in dictionario investigandi; atque ita haud video id fore magni usus. Forte equidem fallor; sed meas tamen conjecturas in sex istas quas ad me misisti, propositiones scribere volui, ut cum inventum resciveris, judices an rem fuerim assecutus. Cæterum adverto posse ad hoc addi inventionem aliam, tum ad primitiva linguæ hujus vocabula; tum ad characteres inveniendos, ita ut brevissimo tempore doceri posset; idque ope ordinis, hoc est, ordinem stabiliendo inter cogitationes omnes quæ animum humanum fabire possunt, quemadmodum inter numeros ordo est naturaliter constitutus: & sicut uno die quilibet doceri potest numeros omnes in infinitum nominare lingua incognita & scribere, qui tamen innumeris diversis vocabulis designantur; idem quoque fieri posset de aliis omnibus vocabulis ad cætera, quæ in mentem hominis cadunt, exprimenda necessariis. Id si inventum esset, nullus dubito quin ejusmodi lingua in orbe locum brevi habitura esset, si quidem plurimi sunt, quos non pigeret quinque aut sex dies impendere ut quemvis alloqui possent sermone, qui à nemine non posset intelligi. Sed non puto auctori tuo hoc venisse in mentem; cum quia nihil habet in suis propositionibus quod tale quid arguat; tum quia ejusmodi linguæ inventio à vera Philosophia pendet. Absque illa enim impossibile est omnes hominum cogitationes enumerare, aut ordine digerere; imo neque illas distinguere, ita ut perspicuæ sint & simplices; qua certe in re consistit, mea quidem sententia, pars maxima artis quæ ad veram scientiam comparandam excogitari queat. Et si quis clare explicuisset quales sint idæ illæ simplices, quæ in hominum imaginatione versantur, & ex quibus componitur quicquid illi cogitant, essetque hoc per universum orbem receptum; auferem deum sperare linguam aliquam universalem, quæ facile addisci posset, pronunciarî & scribi; & quod potissimum est, quæ judicium juvaret, exhibendæ illi omnia tam distincte, ut decipi non posset; cum è contra vocabula nostra confusas tantum significationes maxima ex parte habeant, quibus cum per longum temporis spatium assueverit humanum ingenium, hinc fit ut nihil fere perfecte intelligat. Existimo autem possibilem esse hanc linguam, & reperiri posse scientiam eam ex qua illa pendet; cujus certe beneficio rusticus quispiam de rerum veritate posset me-

melius judicare, quam jam Philosophus aliquis. Sed ne speres te unquam visurum illum in usu; id magnas in orbe mutationes supponit, essetque necesse totum orbem in terrestrem Paradisum converti; quod sane in fabulæ tantum locum habeat.

Jam quod ad Musicas tuas quæstiones, id quod dixeram *salutem à quinta ad bassum non esse majorem saltu à tertia ad superius*, mihi videtur posse haud ægre intelligi, eo quod bassus per majora intervalla naturaliter procedat, quam superius; non secus quam saltus quindecim pedum dici potest minor respectu viri cujuscumque, quam saltus decem pedum respectu pueri quadrimi; quia nempe ille majori passu incedit, quam puer. Rogas deinde cur æquales soni attentionem magis excitent ascendendo, quam descendendo: haud memini quid de hoc ad te scripserim; nihilominus dicam causam non esse petendam ex eorum æqualitate aut inæqualitate; sed generatim sonum acutiorem, qui fit ascendendo, aurem magis ferire, quam gravem; atque in concentu Musico, si voces æqualiter semper procedant, aut deprimantur paulatim & remittantur, id auditores consopiturum: è contra autem rationem optimam illos excitandi esse, si vox derepente attollatur. Diverso respectu dici potest sonum gravem esse magis aut minus sonum, quam acutum. Consistit enim in majori extensione; longius audiri potest, &c. Sed dicitur Musices fundamentum, quia motus ejus sunt tardiores, & proinde in plures partes dividi; fundamentum enim dicitur id quod est veluti amplissimum, & minus variatum, & quod subiectum esse potest, cui cætera superstruantur. Quantum ad modum tuum examinandi consonantiarum bonitatem, docuisti me quid esset de hoc dicendum; nempe subtiliorem esse, quam ut dignoscatur ab aure, quæ sola bonitatis hujus judex est. Et quod ad transitum à tertio majore ad unisonum, acquiesco practicoꝝ Musicorum rationi.

Nullum est dubium quin trabes sive columna in qualicumque positione semper gravitet, & deorsum tendat; caputque etiam nostrum super humeris gravitat, & totum corpus super cruribus, licet id non percipiamus. Superest tantum ut aliquid dicam de celeritate motus, de qua dicis D. Beccmannum ad descripsisse, sed de hoc melius dicitur respondendo ad recentissimas tuas. Quantum ad proportionem celeritatis secundum quam pondera descendunt, scripsi ad te per superiores quid de hoc scirem, saltem in vacuo; sed in aëre verum est id quod scripsit ad te D. Beccmannus, modo supponas quod quo celerius pondus descendit, eo magis aër illi resistit. Si enim id verum est, quod tamen nondum

habeo certo compertum, fiet tandem ut aer tantum exacte impediat, quantum gravitas addit celeritatis motui in vacuo; atque hoc posito motus manebit semper æqualis, sed hoc cogitatione tantum definiri potest; cujus praxis nequaquam speranda. Quantum vero ad experimenta tua, quod pondus quinquaginta pedum spatium descendens, tantundem temporis impendat percurrendo viginti quinque ultimos pedes, ac percurrendo primos; salva pace non possum mihi persuadere quod illa exacta sint: in vacuo enim invenio pondus illud non impendere nisi tertiam temporis partem percurrendo viginti quinque ultimos, nec possum animum inducere ut credam aeris impedimentum tam notabile esse ut differentiam hanc imperceptibilem reddat. Vale, &c.

EPISTOLA CXII.

Ad R. P. Merfennum.

De quodam libro. De æternis veritatibus, illarumque dependentia. De libero arbitrio ejusque operationibus. Responso ad objectionem contra titulum Dissertationis & Speciminum suorum. Rationes propter quas in Dissertatione fufius locutus non sit de substantia, & existentia Dei. De editione scriptorum suorum.

GRatias tibi ago pro observatione coronæ factæ à Domino Gassendo. Quantum ad pessimum illum librum, te non amplius rogo ut illum ad me mittas; aliis enim occupationibus me in præsens addixi, & credo jam serum fore id aggredi, quo adductus fueram ut ad te per superiores scriberem, conaturum me extemporalem isti libro, si quidem eleganter conscriptus esset, & in manus meas veniret, responsum facere. Putabam nimirum quod quanquam exstarent tantum triginta quinquelibri istius exemplaria, tamen si luculente compositus esset, fore ut denuo imprimeretur, & apud curiosos veniret in pretium, quicquid in contrarium edicto cautum esset. Excogitaveram autem remedium quo id impediretur, & quod mihi videbatur validius quovis curæ edicto: nempe ut antequam alia editio clam fieret, liber iste cum licentia typis mandaretur; & post singulas periodos aut singula capita subjicerentur rationes quibus illius doctrina everteretur, ejusque falsitas retegeretur. Etenim putabam quod si cum responso palam venalis esset, nemo dignaretur illum absque responso clam vendere; atque ita falsam illius doctrinam

nam

nam nemo legisset, quin contrarium simul doctus fuisset. Certe enim responsiones quæ ejusmodi libris separatim fiunt, exigui sunt plerumque fructus; quia cum quisque legat eos tantum libros quibus oblectatur, alii sunt qui malos libros legunt, alii qui responsiones examinant. Dices porro, dubium esse an potuissent auctoris istius rationibus respondere: ad quod nihil est quod dicam, nisi quod conatus fuisset illi pro viribus satisfacere; & quod cum plurimæ rationes mihi suadeant contrarium eorum quæ in isto libro haberi ad me scripisti, audebam sperare idem posse iisdem rationibus suaderi etiam aliis hominibus; & veritatem ab ingenio quanquam mediocri explicatam potiore esse debere, quam mendacium ab acutissimis licet ingeniiis propugnatum.

Quantum ad veritates æternas, dico iterum illas esse tantum veras aut possibiles, quia Deus illas veras aut possibiles cognoscit; non autem contra veras à Deo cognosci quasi independentes ab illo sint vera. Et si homines verborum suorum sensum probe intelligerent, utique non possent sine blasphemia dicere veritatem cuiuspiam rei priorem esse cognitione Dei; in Deo enim unum idemque est velle & cognoscere; ita ut hoc ipso quod aliquid velit, ideo cognoscit, & ideo tantum talis res est vera. Non est ergo dicendum quod si Deus non esset, nihilominus ista veritates essent vera; Dei enim existentia est veritatum omnium possibilitium prima, & maxime æterna, & sola unde reliquæ omnes procedant. Sed ratio cur in hoc hallucinari proclive sit, est quod maxima pars hominum non considerent Deum ut ens infinitum & incomprehensibile, atque unicum auctorem à quo omnia pendeant: sed in nominis ejus syllabis hærent, & putant se satis cognoscere illum, modo sciant vocabulum *Deum* idem significare, atque id quod Deum Latini dicunt, quodque ab hominibus colitur. Certe qui sublimiores hisce cogitationes non habent, haud ægre Athei fieri possunt; & quia Mathematicas veritates perfecte comprehendunt, non vero existentiam Dei, minime mirum est, si non credant illas ab hac pendere. Sed contra judicare deberent quod, quandoquidem Dei potentia intellectus humani terminos excedit, istarum autem veritatum necessitas cognitionem nostram non superat, sequatur illas esse minus quid, & potentia huic incomprehensibili subordinatas. Quod dicis de productione Verbi non mihi videtur pugnare cum iis quæ ego dico; sed nolim Theologiam attingere, imo & vereor ne putes Philosophiam meam nimis liberam esse, quæ de rebus tam sublimibus ausit disserere.

Quod ad liberum arbitrium, prorsus sentio cum R. P. atque ut sententiam meam clarius explicem, velim primo notari, indifferentiam mihi

hi videri proprie significare statum istum in quo voluntas reperitur, cum illa non fertur ulla cognitione veri aut boni ad partem unam potius quam aliam amplectendam; illamque hoc sensu sumpsi, ubi dixi infimum libertatis gradum in hoc consistere, quod possimus nosmet determinare ad res eas ad quas sumus prorsus indifferentes. Sed forsitan per indifferentiam alii intelligunt positivam hanc, qua possemus, facultatem determinandi nos ad contrariorum alterutrum, hoc est, ad prosequendum aut fugiendum, ad affirmandum aut negandum unum ideinque. Atque hic dicam me nunquam negasse quin positiva hæc facultas esset in voluntate. Contra enim existimo eam adesse non solum quoties voluntas determinat se ad illud genus actionum, in quibus nullo rationis pondere in unam potius quam in aliam partem inclinatur; sed etiam in omnibus ejus aliis actionibus; ita ut voluntas nunquam se determinet, quin illam exerceat; eoque ut etiam cum evidentissima aliqua ratio nos ad aliquid inclinat, licet moraliter loquendo vix possimus contrarium facere; tamen absolute loquendo possimus: est enim semper nobis liberum, abstinere à prosequendo bono aliquo, quod sit nobis clarissime notum, aut ab admittenda veritate quapiam evidente; modo solum cogitemus bonum esse hoc ipso testari arbitrii nostri libertatem. Præterea advertendum est libertatem in actionibus voluntatis considerari posse, aut antequam exercentur, aut eo quo exercentur momento. Certum autem est libertatem consideratam in actionibus voluntatis antequam illæ exercentur, comprehendere indifferentiam sumptam in secundo sensu, prout illam modo exposui, non vero sumptam in priore; hoc est, voluntatem nostram antequam determinata fuerit, semper liberam esse, & potentiam habere eligendi contrariorum alterutrum: at vero illa non est semper indifferens; contra enim nunquam deliberamus nisi ut nos eo statu eximamus, in quo nescimus quam amplectamur partem, aut certe ne in illum incidamus. Et quanquam judicium nostrum alienis imperiis opponendo, soleamus dicere nos esse liberiores in iis quæ nobis imperata non fuerint, & in quibus proprium nostrum judicium sequi liceat, faciendis, quam in iis quæ nobis aut imperata, aut interdicta fuerint; nihilominus judicia nostra sive cogitationes alias aliis opponendo haud possumus eodem modo dicere nos esse liberiores in iis faciendis, quæ nobis neque bona neque mala videntur, aut in quibus tantundem videmus mali, quantum boni, quam in iis in quibus videmus longe plus boni quam mali. Libertatis enim magnitudo consistit aut in magna facilitate ad se determinandum, aut in magno usu positivæ hujus poten-

tix,

tiz, quam habemus, sequendi deteriora, etiam cum meliora videamus. Atqui si ea amplectamur quæ ratio nostra nobis suadet esse bona; tum nos facile admodum determinamus; si vero contrarium fecerimus, majorem tum potentiam istius usum facimus: atque ita liberius semper agere possumus in rebus iis in quibus plus boni quam mali videmus, quam in iis quas vocamus indifferentes. Atque etiam hoc sensu verum est dicere, nos multo minus libere ea facere quæ nobis imperata fuerunt, & ad quæ ultro nequaquam sciremur, quam ea quæ nobis non fuerunt imperata; quia nempe iudicium quod nobis suadet ista esse difficilia, adversatur alteri iudicio quod nos monet, bonum esse ea facere quæ iusta fuerunt; quæ quidem duo iudicia, quo æquabilis nos movent, eo etiam magis indifferentiam inducunt, eo sensu sumptam quo primum explicui, hoc est, indifferentiam eam quæ voluntatem constituit in eo statu in quo se determinare nequeat. Jam autem libertas considerata in voluntatis actionibus, quo momento exercentur, indifferentiam nullam continet, quomodocunque sumatur; quia id quod fit non potest non fieri eo tempore quo fit: itaque libertas tum consistit tantum in facilitate operandi, quæ prout augetur, augetur & libertas; tum autem agere libere, live libenter, aut voluntarie, unum sunt & idem. Atque hoc sensu scripsi me eo liberius ad aliquid ferri, quo pluribus rationibus ad id adductus fuerim, si quidem certum est voluntatem nostram moveri tum facilius & vehementius.

Videris de me pessime æstimare, meque valde levem & in actionibus meis indeterminatum iudicas, dum putas esse quod deliberem circa id quod scribis ut mutem consilium meum, & primum meum discursum adjungam Physicæ meæ; quasi vero, perlectis tuis, illam hoc ipso die essem Typographo continuo traditurus; nec potui tenere risum cum ad locum illum venissem in quo dicis, me coacturum homines ad me interficiendum, ut scripta mea citius prodeant in lucem: ad quod nihil est quod respondeam, nisi quod scripta mea eo sunt in loco & statu, ut interfectores illis frui nequaquam possent; & si vel mihi minus otii mors concedat, vel poeniteat me hominum qui nunc vivunt, ne centum quidem post mortem meam annis lucem videbunt. Sum tibi devinctissimus pro objectionibus, quas ad me mittis; teque oro ut pergas eas, quas audis, omnes ad me scribere, idque modo quam poteris maxime mihi contrario; haud certe possis gratius quicquam mihi facere: is enim non sum, qui soleam conqueri de iis qui vulneribus meis medicas manus adhibent, & quisquis me quidpiam docere dignabitur, deprehendet me sem-

per admodum docilem. Verum non potui planè assequi id quod mihi de titulo objicis; non enim dico *Tractatus de Methodo*, sed, *Dissertatio de Methodo*, quod idem est cum *Prefatione sive pramonendis de Methodo*; ut nempe ostendam non esse mihi animum illam docere, sed solum de illa disserere. Nam ut liquet ex discursu isto, illa magis in praxi consistit, quam in theoria: sequentes autem tractatus appello *Methodi* istius specimina, quia contendo ea quæ in illis continentur non potuisse absque illa reperiri, atque adeo ex iis cognosci posse quanti sit facienda; quemadmodum etiam nonnulla *Metaphysica*, *Phylica*, & *Medica* in primo discursu aspersi, ut ostenderem illam ad quodlibet argumenti genus extendi. Quod ad secundam tuam objectionem, nempe me non satis fuisse explicuisse unde sciam animam esse substantiam à corpore distinctam; cujus natura tota sit in cogitando posita, hocque unum obscuram reddere demonstrationem de existentia Dei, fateor verissimum esse id quod hic dicis, atque etiam id efficere meam de existentia Dei demonstrationem intellectu difficilem; sed hanc materiam melius tractare non poteram, nisi fuisse explicando falsitatem aut incertitudinem omnium judiciorum à sensu aut imaginatione pendentium, & deinde ostendendo quænam sint illa quæ non pendent nisi ab intellectu puro, & quam evidentia sint & certa. Quod quidem consulto omisi, idque quibusdam de causis, potissimum vero quia scribebam lingua vulgari; nempe enim metuebam ne infirmiora ingenia avidè acciperent dubia ea quæ necesse habuisssem proponere, nec possent rationes eas comprehendere quibus illa postmodum tollere studuissem; atque ita homines difficultatibus implicasssem, quibus forsan non ita facile expediri potuissent. Sed elapsi sunt circiter octo anni, ex quo scripsi Latine initium *Metaphysicæ*, in quo hæc satis fuisse deducuntur, & si liber iste alter vertatur in linguam Latinam, ut nonnulli id agere meditantur, forsan curabo ut hæc illi inserantur. Interim mihi persuadeo rationes meas apud eos, qui illas attentius pensitabunt, tanto magis demonstrativas fore, quanto plus laboris impendent in illarum vitiis exquirendis; illasque in se clariore esse contendo quavis *Geometrica* demonstratione; ita ut non mihi videantur obscuræ nisi eorum respectu, qui nesciunt abducere mentem à sensibus, prout scripsi pag. 38.

Sum tibi summo opere devinctus pro labore, quem in accuranda scriptorum meorum editione suscepturum te offers; sed si quid sumptuum in hoc faciendum esset, nequaquam paterer ut eos quisquam præter me alius faceret, tibi que mitterem argentum, quantum ad hoc satis foret.

Ve-

Verum haud credo opus fore; saltem Bibliopolarum nonnulli mihi donum aliquod obtulerunt, ut mea illis opera traderem, idque prius quam Parisiis excederem, aut quicquam scribere adhuc aggressus fuisset. Ita ut putem non defore aliquos satis insipientes ut ea sumptibus suis imprimant, neque etiam defuturos lectores satis benignos ut illa emant, & Bibliopolarum stultitiam sarciant. Quicquid enim agam, id non celabo ut scelus; sed tantum ut famam fugiam & eam mihi libertatem asseram, qua hactenus frui sum; ita ut non valde metuam si nomen meum quibusdam innotescat. Sed in praesens gratum erit latere, ne quicquam homines ulterius expectent, & ne ea quae dehinc sum facturus infra illorum expectationem subsidant. Rideo tecum chymistam istius, de quo scribis, deliria, & puto ejusmodi chimeras haud dignas esse quae literati cujuscumque cogitationem vel uno momento detineant. Vale.

EPISTOLA CXIII.

Ad quandam R. P. Jesuitam.

Conqueritur de calumniis nonnullorum Jesuitarum, &c.

SCio esse tibi tam multas occupationes, & quidem graviore, quam ut legas literas hominis qui tibi nullo pacto prodesse queat, ut verear ne meae tibi molestae sint, quoties non est aliud scribendi argumentum, quam ut meam erga te observantiam testificer. Sed quia nonnulli hic conantur mihi persuadere plurimos Societatis vestrae Patres de scriptis meis inclementius loqui: ita ut amicus quidam meus incitetur ad conscribendum tractatum quendam, in quo meditatur amplam comparisonem instituere Philosophiae quae in scholis vestris docetur, cum ea quam vulgavi, ut ostendendo quid sit in illa vitiosum, eo melius liqueret quid sit in hac praestabilius; existimavi me non debere huic consilio astipulari, donec te praemonuisset, & orassem ut praescribas quid mihi faciendum esse hic arbitreris. Sane cum debeam Patribus vestris totam adolescentiae meae institutionem; cum ad illos colendos semper fuerim singulari studio ductus, malimque consilia lenia & amica, quam ea quae displicere possint, inire, multa sunt quamobrem amicum istum rogatum vellem, ut omissa hac materia, calammum suum in alia quapiam, quae me non spectet, velit exercere: nisi porro ad aliam partem amplectendam me quasi cogeret injuria, quam mihi Patres vestros facere audio; at-

que etiam regula prudentiæ, quæ docet satius esse apertos habere, quam occultos hostes; præsertim vero in ejusmodi re, in qua, cum agatur tantum de honore, quanto major erit litis nostræ rumor, tanto plus gloriæ accedat ei, cujus causa æquitate vicerit. Verum plus valet apud me veneratio, quam tibi debeo, & benevolentia quam mihi significasti, quam quidvis aliud; quare tua super hoc jussa velim expectare, nec quicquam vehementius cupio, quam ut factis probare possim me esse, &c.

EPISTOLA CXIV.

Ad quandam R. P. Jesuitam.

Responsio ad animadversiones quasdam in Methodum, Dioptricam, &c.

Vehementer gaudeo quod librum speciminum meorum tam diligenter legere dignatus fueris, uamque de illo sententiam cum tot benevolentiarum argumentis ad me rescribere; certe adjunxissem illi literas ad te, cum illum mitterem, hancque occasionem arripuissem salutandi te, nisi illum edendo in lucem sperassem latere posse nomen auctoris; sed quandoquidem consilium hoc non successit, meum est credere te illum benigne excepisse potius ob benevolentiam erga patrem, quam ob ætatis mericum; teneorque quam maxime tibi hoc nomine gratias agere. Nescio an mihi imponant ea quæ in binis quas ad me dedisti literis in laudem meam congestisti, sed tibi sincere dicam ex iis omnibus, qui suum de scriptis meis judicium ad me scripserunt, neminem judicis officio melius functum fuisse, quam te; hoc est, tam æque, tam incorrupte, & cognita melius causa. Qua sane in re miror quod duæ tuæ epistolæ se tam prope sequutæ fuerint; illas enim eodem fere tempore accepi, accepta autem priore putabam non esse expectandam alteram nisi post vestras sub Divi Lucæ festum vacationes. Verum ut ad singulam respondeam, dicam primo, non fuisse mihi propositum totam meam Methodum docere in discursu illo in quo de illa disserui; sed solum satis multa dicere unde quispiam judicet novas eas opiniones, quas in Dioptrica & Meteoris eram propositurus, non fuisse temere conceptas, & forsitan dignas esse quæ expendere. Methodi autem istius usum non potui in tribus istis, quos vulgavi, tractatibus ostendere; quia nempe illa præscribit ordinem in rebus investigandis satis diversum ab eo, quo utendum esse existi-

existimavi in iis explicandis. Illius tamen specimen exhibui in iridis descriptione, quam si non graveris relegere, spero fore ut tibi magis fecunda vice quam prima arrideat: materia enim ista est ex se satis difficilis. Ideo autem tres hosce tractatus adieci ad discursum qui illis præfixus est, quia animum induxi contineri in illis satis multa, unde ii qui illos examinarint, judicent Methodum meam à vulgari diversam esse, nec forte contemnendam. Verum sane est me fuisse nimis obscurum in iis quæ de Dei existentia scripsi in isto tractatu de Methodo; & quamquam materia ista sit magni præter cætera momenti, fateor tamen nihil esse in toto opere minus elucubratum; quod factum est partim quod non constituerim nisi ad extremum, & Bibliopola etiam urgente, illam adjicere. Sed potissima obscuritatis istius causa est; quod scepticorum rationes fuscæ persequi non fuerim ausus, neque omnia dicere quæ ad mentem à sensibus abducendam sunt necessaria. Nequaquam enim recte cognoscipotes certitudo rationum, quibus secundum me existentia Dei probatur, nisi quispiam distincte meminerit earum, quæ in omnium rerum materialium cognitione incertitudinem arguunt; istæ autem cogitationes non visæ sunt mihi ejusmodi, quæ reponendæ essent in libro isto, in quo nonnulla etiam à mulieribus intelligi volui, ita tamen ut etiam acutissimus quisque satis amplam attentionis materiam haberet. Fateor quoque, ut à te optime notatum est, obscuritatis non nihil inde ortum fuisse, quod supposuerim notiones quasdam esse aliis familiares & evidentes, quia nempe cogitandi habitu mihi tales factæ fuerant. Ut ex. ca. ideas nostras nullam nobis realitatem aut perfectionem exhibere posse, quæ non sit vel in objectis istis, vel in nobis, quandoquidem illæ nequeunt formam suam aut essentiam habere nisi ab objectis externis, aut vero à nobis ipsis, & alia id genus, quod quidem in secunda editione elucidare constitui.

Recte etiam prævidi incredibile fore id quod de creatione mundi descripsisse me dixi in tractatu meo de lumine; nam sane si quis alius id scripsisset, noluissem ipse ego ante decennium credere ingenium humanum par esse talibus cognitionibus assequendis. Sed conscientia mea, & vis veritatis addidit fiduciam profitendi rem, quam utique omitti non posse existimavi, nisi causam meam proderem; & cujus testes hic satis multos jam habeo: præterquam quod si ea Physicæ meæ pars, quam non ita pridem absolvi & exscripsi, lucem unquam videat, spero non relictum iri nepotibus nostris locum revocandi hoc in dubium.

Devinctus sum tibi pro opera quam in examinando meam de motu

cordis sententiam navasti, si quid est quod medicus tuus in hoc objiciat, id libentissime accipiam. Septem aut octo super eadem materia objectiones accepi superiore hebdomada à quodam Medicinæ Professore Lovaniensi, amico inq̃, ad quem duorum foliorum responsionem remis; optaremque ut mihi eodem pacto proponerentur difficultates omnes quæ occurrunt in iis quæ conatus sum explicare; certum esset mihi ad illas sedulo respondere, idque ita ut eorum neminem offenderem qui illas proposuissent. Id vero commodius præstare possent multi, quam unus, nec sane quisquam melius, quam vestri. Honori maximo & gratiæ duxerim si id facere dignarentur, essetque proculdubio compendiosissima via ad scriptorum meorum errores omnes, aut veritates explorandas.

Quod ad lumen attinet, si attendas ad tertiam Dioptrices pag. videbis me disertis verbis dixisse, me ex hypothesi tantum de illo locuturum: & revera quia tractatus ille in quo totum Physicæ meæ corpus habetur, titulum præfert de lumine, & quia illud præter cætera fuscè & accurate in eo explico, nolui eadem alibi disserere, quæ illic; sed solum aliquam illius ideam per comparationes & adumbrationes exhibere, quantum ad Dioptricam mihi visum est satis. Gratiâs tibi habeo, quod te gaudere testificeris quod in cogitationum mearum promulgatione ab aliis præyerti me non fuerim passus: sed certe id nunquam veritus sum; nam præterquam quod mea parum refert utrum prior aliquid scribam, an posterior, imo tantum verâ sint quæ scribo, opiniones meæ omnes ita simul cohærent, ut nemo possit earum ullam sibi vendicare, nisi omnes noverit. Quæso difficultates eas quas in iis quæ de refractione aut alijs scripsi, mihi impertiri ne ulterius cuncteris; si enim expectes donec meæ de lumine opiniones prodeant in lucem, nimis diu forsan expectabis. Quantum vero ad id, quod in Meteoris meis supposui, illud à priori demonstrare nequeo, nisi totam Physicam meam tradendo, sed experimenta quæ exinde necessario deduxi, quæque nequeunt ab aliis ullis Principiis eadem ratione deduci, mihi videntur id satis demonstrare à posteriori. Recte prævideram hunc scribendi modum prima fronte daturum lectoribus offensionem, & credo me id cavere facile potuisse, hypothesium nomen adimendo primis istis, de quibus loquor, rebus; easque non prius declarando, quam ad illas probandas visum fuisset rationes subjicere, sed sincere dicam elegisse me hunc modum proponendi cogitationes meas, tum quia credidi posse me illas ex primis Metaphysicis meæ principiis deducere (atque ideo quodlibet aliud argumentorum genus neglexi); tum quia volui experiri an sola veritatis declaratio nul-

lis

lis mista disputationibus, aut contrariarum opinionum refutationibus, persuadendis lectoribus sufficeret. Quæ quidem in re, amicorum meorum illi qui meos de Dioptrica & Meteoris tractatus legerunt, dicunt me assecutum fuisse propositum meum: nam licet prima fronte illos haud faciliores reperirent, quam alius quispiam; tamen postquam illos ter aut quater relegissent, dicunt se nihil amplius in illis deprehendere, quod possit in dubium revocari. Revera enim non est semper necesse rationes habere à priori ad veritatem aliquam persuadendam; & Thales, aut quisquis ille fuit qui primus dixit lunam accipere lumen suum à sole, nullum sine dubio rei hujus argumentum aliud protulit, quam quod hoc supposito facillime explicentur omnes luminis ejus vices: quod unum satis fuit ut hæc opinio, nemine contradicente, in orbe postmodum invalesceret. Meæ autem cogitationes ita inter se coherent, ut ausim contendere, vel quovis judice, Principia mea non minus bene probari ex consequentiis quas ex illis deduco; (si quidem illas quispiam diu expendit, easque sibi familiares effecerit, atque omnes tibi consideret) quam ex lunæ incrementis & decrementis probatur illam mutuari lumen suum à sole. Superest tantum ut de Physicæ & Metaphysicæ meæ editione tibi respondeam; de qua uno verbo dicam me illam æque vehementer velle, aut etiam vehementius quam quemlibet alium; sed tamen iis conditionibus positis, sine quibus inconsultum esset mihi eam optare. Dicam vero insuper me nequaquam metuere ne quid adversus fidem in illis occurrat: nam è contra ausim dicere illam rationibus humanis nunquam ita fuisse sustulam fuisse, ac erit, si Principia mea admittantur; maxime vero transubstantiatio, quæ à Calvinistæ arguunt, quasi ex vulgari Philosophia inexplicabilis esset, ex mea est facillima. Sed nihil video quod spem faciat, nisi saltem intra longum tempus impleri posse conditiones eas, quæ ad illam edendam adducere me possent. Et cum satis habeam ea omnia facere quæ officii mei esse arbitror, cætera Providentiæ, quæ Universum regit, committo; cum enim sciam me ab illa acceperisse exigua ista initia, quorum specimina vidisti, spero illius gratiam mihi non defuturam, qua opus absolvam, si quidem ad ejus gloriam utile sit; sin minus, velim ab hoc etiam optando abstinere. Cæterum velim credas approbationem, qua me per literas tuas dignatus es, fructum esse, omnium quos ex scriptis meis hæcenus perceperim, longe suavissimum; est enim sane illa mihi carissima & gratissima, quæ quippe quæ proficiscatur à tanto viro, & ex ejusmodi Societate, & quidem ex illo ipso loco in quo omnem adolescentiæ meæ institutionem accipere contigit,

qui-

quique est domicilium Magistrorum meorum, erga quos ingrati nunquam animi fuero. Vale.

EPISTOLA CXV.

Ad quendam R. P. Jesuitam.

De hac notione, Id quod potest plus, potest etiam minus. De demonstrationibus sumptis ex effectibus. De anima, illiusque ideis. Causa difficultatis addiscendarum scientiarum. De errore in moribus. De suspensione iudicii. Ignorantia causæ peccati. De indifferentia Dei, illiusque potentiam in rebus pugnantibus. Discrimen inter exclusionem & abstractionem.

NON me latet difficillimum esse in alius cujuscumque cogitationes intrare, & me docuit experientia quam difficiles videantur meæ complurimis: quo fit ut tibi sim devinctissimus, quod illas examinare non fueris gravatus; nec certe possum maximam de te opinionem non habere, cum videam te illas ita possidere, ut jam tux sint magis quam meæ. Difficultates autem quas mihi proposuisti, sunt potius in re ipsa, aut in elocutionis meæ vitio, quam ab ullo intelligentiæ tux defectu; adiunxisti enim præcipuarum solutionem, sed meam tamen de singulis sententiam hic exponam.

Fateor sane in causis physicis & moralibus, quæ particulares sunt & limitatæ, sæpe fieri ut causæ illæ quæ effectum aliquem producant, impares sint aliis multis producendis, qui nobis minores videantur: sic homo quispiam potest alium hominem, formicam tamen nequit producere; & rex qui integrum populum ad obsequium cogit, nequit tamen ab equo obsequium extorquere. Verum cum de causâ universali & indeterminata agitur, mihi videtur notio hæc communis esse & evidentissima, *quod potest plus, potest etiam minus*, quemadmodum & ista, *totum est majus sua parte*. Imo & hæc notio probe intellecta extenditur etiam ad causas omnes particulares, tum morales, tam phylicas: plus enim esset in homine posse producere homines & formicas, quam homines tantum; & major esset in rege aliquo potentia imperare etiam equis, quam subditis tantum suis; quo etiam pacto fabulantur Orphei Musicam vim habuisse commovendi feras ipsas, ut scilicet eo majorem illi potentiam tribuerent.

Parum refert an secunda mea demonstratio, quæ in existentia nostra pro-

propria fundatur, consideretur tanquam diversa à prima, aut vero tantum ut prioris istius explicatio. Sed quemadmodum effectus Dei est, quod ille me creaverit, ita etiam quod suam in me ideam posuerit: nullus autem est effectus ab illo proficiscens, ex quo existentia ejus demonstrari non possit. Verumtamen omnes istæ demonstrationes ab effectibus desumptæ eodem recidere mihi videntur; quinimo perfectæ non sunt, nisi effectus isti sint evidentes, (atque idcirco existentiam meam potius consideravi, quam cæli aut terræ existentiam, de qua apud me haud æque constat) & nisi illis adjungamus ideam quam de Deo habemus; cum enim anima mea finita sit, cognoscere nequeo nunquid series causarum non sit infinita, nisi quatenus ideam primæ causæ in me ipso habeo: & licet admitteretur prima aliqua causa quæ me conservet, tamen nequeo asserere quod illa sit Deus, nisi Dei in me ideam revera habeam: quod quidem in meo ad primas objectiones responso insinuavi, sed paucis, ne viderer aliorum rationes contemnere, qui vulgo admittunt non dari progressum in infinitum; ego autem hoc non admitto, nam è contra credo dari revera talem progressum in divisione partium materia, ut liquebit in Philosophiæ tractatu, cujus editio nunc absolvitur.

Haud memini me usquam statuisse quod Deus semper faciat id quod perfectissimum esse novit, nec mihi videtur ingenium finitum posse de hoc judicare: sed vero conatus sum propositam de errorum causa difficultatem illustrare, supponendo quod Deus mundum creaverit perfectissimum; supposito enim contrario cessat prorsus hæc difficultas.

Sum tibi devinctissimus quod me docueris Augustini locos, quia opinioniones meas auctoritate fulciendas inservire possint; nonnulli ex amicis meis idem antea fecerant; & sane valde gaudeo quod cogitationes meæ cum tam sancti tamque eximii viri cogitationibus conveniant. Sum enim ab illorum ingenio alienus, qui opinioniones suas novas videri volunt; è contra meis alienis accommo, quantum patitur veritas.

Nullam aliam differentiam statuo inter animam & ejus ideas, quam inter frustum ceræ & diversas figuras quarum frustum illud capax est: & quemadmodum diversas figuras recipere, non est in cera actio proprie, sed passio; ita mihi videtur passio esse etiam in anima, quod hanc vel illam ideam recipiat, & præter volitiones nullas esse ipsius actiones existimo; ejus autem ideas in illam induci, partim ab objectis sensus afficientibus, partim ab impressionibus quæ in cerebro sunt, & partim etiam à dispositionibus, quæ in anima ipsa præcesserunt, atque à suæ

voluntatis motibus: quemadmodum etiam cera figuras suas recipit, partim ab aliis corporibus illam comprimentibus, partim à figuris aut aliis qualitatibus, quæ in ipsa sunt, ut ex. gr. exinde quod magis aut minus gravis est, aut mollis, &c. partim etiam à suo motu, cum semel agitata vim habet in se motus suos continuandi.

Quantum ad difficultatem addiscendarum scientiarum, quam in nobis percipimus, & repræsentandarum clare idearum quæ nobis naturaliter notæ sunt, illa proficiscitur ex falsis infantiæ nostræ præjudiciis, aliisque errorum nostrorum causis, quas conatus sum satis fuscè explicare in scripto quodam quod mihi sub prælo laborat. Quod ad memoriam, puto eam, quæ est rerum materialium, pendere ex vestigiis in cerebro manentibus, postquam imago aliqua illi fuit impressa: intellectualium autem rerum memoriam pendere à nonnullis aliis vestigiis in ipsa cogitatione manentibus. Sed hæc diversæ sunt prorsus ab illis speciei, neque ea explicare possim exemplo ullo à rebus corporeis ducto, quod ab iis valde diversum non sit: vestigia vero quæ in cerebro sunt illud idoneum efficiunt animæ eodem modo movendæ, quo fuerat ab illo antea mota; atque adeo revocandæ in illa rei cuiuspiam memoriæ, prorsus ut plicæ in charta aut linteo faciunt chartam illam vel linteum aptiora ad easdem, quas antea, plicas suscipiendas, quam si plicæ antea nullæ fuissent.

Error moralis quo quispiam ratione aliqua per motus falsum aliquid credit, quia scilicet illud audivit à viro aliquo bono, &c. privationem nullam continet, dummodo illud non affirmemus, nisi ut vitæ nostræ actionibus certum aliquem modum ponamus in iis quæ melius scire moraliter non possumus, atque ita non est proprius error; esset vero error si illud idem tanquam veritatem physicam assereremus, quia ad hoc non sufficit hominis unius testimonium.

Quantum ad liberum arbitrium, non vidi quid de illo scripserit R. P. Petavius; sed prout tuam hac de re sententiam explicas, non mihi videtur mea à tua valde discrepare. Nam primum quæso attendas me non dicere, hominem non esse indifferentem, nisi ubi cognitio illi deest; sed illum eo magis indifferentem esse, quo pauciores rationes novit, quæ illum ad partem unam, potius quam aliam amplectendam moveant: quod quidem à nemine negari posse mihi videtur. Tecum autem sentio in eo quod dicis posse quemlibet suspendere iudicium suum; sed conatus sum explicare modum quo id fieri possit. Mihi enim videtur certum esse *ex magna luce in intellectu, sequi magnam propensionem in voluntate*. Ita ut
quam-

quamdiu clarissime videmus rem aliquam esse nobis convenientem, difficultissimum sit, imo & ut credo, impossibile, quamdiu manet in nobis ista cogitatio, ut desiderij nostri cursum teneamus. Verum quia natura animæ ea est, ut non nisi uno quasi momento attentionem suam præbeat uni eidemque rei; ut primum abducitur attentio nostra à rationibus quæ suadent hanc rem esse nobis convenientem, nec aliud in memoria asseruimus, nisi quod illa visa est nobis optabilis, possumus demum menti nostræ exhibere aliquam aliam rationem, quæ de ea nos dubios faciat, atque ita iudicium nostrum suspendere, imo & forsan ejus contrarium ferre. Atque ita cum non statuas libertatem præcise in indifferentia, sed in potentia quadam reali & positiva determinandi se, nulla est inter opiniones nostras differentia nisi in verbis; fateor enim hanc potentiam esse in voluntate: sed quia non video quod illa, dum comitem habet indifferentiam, (quam quidem imperfectionem esse fatearis) alia sit, quam cum non habet, & quia nihil est in intellectu præter lumen, quemadmodum in intellectu beatorum confirmatorum in gratia, illud omne generatim liberum dico, quod est voluntarium: tu autem vis appellationem eam restringere ad potentiam se determinandi, quam comitatur indifferentia. Sed ego nil æque cupio in vocabulis ac usum & exemplum sequi.

Quantum ad animalia irrationalia, liquet illa non esse libera; quippe non habent positivam illam potentiam determinandi se; inestque illis mera tantum negatio coactionis. Nihil obstitit quo minus loquerer de Libertate quam habemus ad bonum aut malum amplectendum, nisi quod studuerim Theologicas, quantum potui, controversias declinare, & me Philosophiæ naturalis terminis continere. Sed certe fateor in iis omnibus, in quibus est occasio peccandi, indifferentiam inesse, neque existimo ad hoc ut male faciamus opus esse ut clare videamus id malum esse quod agimus: satis est ut id confuse videamus, aut tantum meminierimus nos olim iudicasse id esse malum, quanquam id ad præsens neutiquam videamus, hoc est, quanquam non attendamus ad rationes, quæ probant id esse malum; si enim clare videremus id esse malum, impossibile foret nos peccare, quamdiu id hoc pacto videremus; unde vulgo fertur, *omnis peccans est ignorans*. Neque tamen inde sequitur non mereri eum, qui, cum clarissime videat quid sit faciendum, id infallibiliter faciat, & absque ulla indifferentia, quemadmodum J. Christus, dum in terris ageret: cum enim homo possit non semper perfecte attendere ad ea quæ sunt officij sui, hoc ipsum est bene agere, si quis nempe ad

officium suum perpetuo ita attendat, ut voluntas nostra incunctanter obsequens lumini intellectus, sit nequaquam indifferens. Cæterum non scripsi, gratia tolli prorsus indifferentiam; sed solum nos illa inclinari in partem unam, potius quam in aliam, atque ita minui indifferentiam, licet non imminuatur libertas; unde mihi videtur sequi hanc libertatem non consistere in indifferentia.

Quantum ad difficultatem concipiendi, qui liberum & indifferens fuit Deo efficere, ut non sit verum, quod tres anguli trianguli sint duobus rectis æquales, aut universim quod contradictoria nequeant esse simul vera; id facile solvi potest considerando, potentiz divinæ limites nullos esse posse; deinde etiam advertendo mentem nostram esse finitam, atque ita creatam, ut possit concipere tanquam possibilia ea quæ Deus revera voluit esse possibilia; sed non ita ut possit etiam concipere tanquam possibilia, ea quæ Deus potuisset quidem possibilia reddere, sed quæ tamen ipse voluit reddere impossibilia. Ex prior enim consideratione liquet, Deum non potuisse determinari, seu cogi ad faciendum ut verum foret, quod contradictoria nequeant esse simul; ac proinde potuisse illum statuere contrarium. Deinde vero altera nos monet, quod licet id verum sit, non tamen debemus laborare, ut id comprehendamus, quia natura nostra huic comprehendendo impar est. Quamquam autem Deus voluerit nonnullas veritates esse necessarias, minime tamen sequitur id illum necessario voluisse, aliud enim prorsus est velle illas esse necessarias, aliud velle necessario, seu ad id volendum cogi. Fateor equidem contradictiones quasdam esse tam evidentes, ut illas menti nostræ exhibere nequeamus, quin illas omnino impossibiles judicemus, cujusmodi est ea quam proponis; potuisse nempe Deum facere ut creaturæ sint ab illo independentes: verum non debemus illas nobis ab oculis ponere, ut potentiz ejus immensitatem cognoscamus, aut inter intellectum ejus & voluntatem, prioritatem ullam ponere; etenim idea, quam de Deo habemus, nos docet unicam esse in illo actionem simplicissimam & purissimam; quod his Augustini verbis optime exprimitur; *quia videt, ea sunt, &c.* In Deo enim videre & velle unum sunt & idem.

Distinguo lineas à superficiebus, & puncta à lineis, tanquam modum à modo; sed vero corpus distingo à superficiebus, lineis & punctis, quæ illud modificant, tanquam substantiam à modis suis: neque porro dubium est quin modus aliquis eorum, qui ad panem pertinent, maneat in sacrosancto Sacramento; quandoquidem figura ejus externa, quæ

quæ modus est, in eo remanet. Quantum ad extensionem corporis Christi in isto Sacramento, illam non explicui, quia ad me non attinebat, & quia, quantum possum, abstinco à questionibus Theologicis; atque etiam quia Concilium Tridentinum dixit Christum ibi esse *ea existendi ratione, quam verbis exprimere vix possumus*; quæ quidem verba consulto inferui sub finem mei ad quartas objectiones responsi, ut me ab hoc explicando immunem præstarem. Sed ausim dicere quod si homines magis assueti essent meæ philosophandi rationi, exponi posset modus aliquis mysterii hujus explicandi, qui religionis nostræ adversariis os occluderet, nec ullum relinqueret contradicendi locum.

Magnum est discrimen inter abstractionem & exclusionem: nempe, si dicerem solummodo, ideam, quam de anima mea habeo, mihi non representare illam tanquam à corpore dependentem, atque illi identificatam; esset tantum abstractio, ex qua negativum tantum argumentum duci posset, quod quidem male concluderet: verum dico hanc ideam mihi representare animam tanquam substantiam aliquam quæ existere possit, licet ab illa excludatur quicquid ad corpus pertinet; unde positivum argumentum facio, & concludo posse illam absque corpore existere. Exclusio autem ista extensionis clareliquet in animæ natura, exinde quod concipi nequeat semissis rei cuiuspiam cogitantis, quemadmodum apprimè observasti. Non est quod ad me mittas id quod in Meditationes meas scripsisti; cogito enim propediem in Galliam, ubi, si possim, te invisam; atque interea quæso crede me, &c.

EPISTOLA CXVI.

Ad quendam R. P. Jesuitam.

De distinctione inter essentiam & existentiam.

Haud memini mihi unquam ab ullo dictum fuisse, esse tibi propositum perstrigendi scripta mea; neque id sane unquam mihi in animum induxi. Non enim is sum, qui ea fingere amem, quorum argumenta nulla habeo; præsertim si mihi minus grata fuerint, cuiusmodi certe hoc foret: nam cum te in maxima æstimatione habeam, haud crediderim esse tibi animum carpendi me, quin simul putem me id com meritum fuisse. Porro quamvis nullus dubito, quin scripta mea vitiis quamplurimis laborent; tamen mihi persuasum habeo nonnullas etiam

veritates in iis contineri, quæ à viris parisiis tecum eruditionis & æquanimi-
tatis vitiis condonationem essent impetraturæ. Quod quidem ita
in animum induxi meum, ut quatuor abhinc aut quinque mensibus scri-
bens ad R. P. Charletum de P. Bourdini objectionibus, illum rogave-
rim (si quidem non sinerent negotia ejus ut ipse causam meam examina-
ret) ut deferret ad te tuique similes rei arbitrium, potius quam ad similes
adversarii mei; & cum te unum ibi loci nominarim, mihi videor satis
ostendisse neminem esse in Societate vestra mihi potum, à quo æquius
judicium expectarem. Quatuor sunt aut quinque anni, ex quo me di-
gnatus fueras epistola, quæ hanc mihi spem faciebat; & jam vehementer
lætatus sum accepta altera quæ idem mihi confirmat. Te etiam atque
etiam rogo ut credas, me repugnanter admodum adductum fuisse ad res-
pondendum ad septimas istas objectiones, quæ meam, quam vidisti, ad
R. P. Dinetum epistolam antecedunt; eandemque vim mihi adhibi-
tam oportuisse, ac si mihi refecandum fuisset brachium aut crus unum,
aliquo ejusmodi morbo affectum, quem leniore remedio sanandum des-
perassem. Vestram certe Societatem magna semper veneratione & amo-
re profectus sum: sed cum rescivissem qui illudum fuisset scriptis meis
biennio abhinc in disputationibus habitis publice Parisiis; & licet obni-
xe rogassem lectores, ut me errorum meorum, si quos deprehenderent,
monitum vellent, ut scripta mea corrigerem, potius quam ut absente
me & causa non cognita illa traducerent; cum viderem illos nihilominus
scriptis meis eo illudere modo, qui me ridiculum posset efficere apud
eos quibus non essem notus, remedium melius excogitare non potui,
quam illud quod adhibui. Me plurimum devinctum agnosco R. P. Di-
neto, pro æquanimi- & prudentia quam in hac occasione testatus est:
neque minus æquitatis mihi polliceor à R. P. Filleau successore ejus, li-
cet illi hætenus ignotus fuerim; scio enim non assumi ad hoc munus ni-
si eos qui virtute & prudentia alios antecedunt. Vereor solum ne ad-
versarius meus amicos habeat Parisiis, qui rem aliter, quam se habet,
superioribus narrent. Quamobrem optarem ut ibi esses potius quam
Aureliani; nullus enim dubito quin illos mihi conciliaturus esses. Ne-
quaquam miror quod Meditationes meas plurimi non intelligant, cum
ipse D. de Beaune difficultatem in iis reperiat; ejus enim ingenium ma-
ximi facio; ut vero quis illas intelligeret, inique me acturum existima-
rem, si rogarem ut illas approbaret, antequam notum sit quodnam sit
futurum cæterorum hominum de illis judicium; aut etiam si rogarem ut
quispiam Philosophiam meam profiteatur, antequam illam totam vide-
rit

rit aut intellexit. Hoc ego nequaquam rogo, sed solum ut abtineat lector ab iis taxandis quæ non intelligit, & si quid est quod aut in scripta mea, aut in me possit objici, id ad me potius scribat, quam absente me traducat, aut eas ineat rationes, quæ iis tantum dedecori sint, qui iis utuntur.

Quod ad distinctionem inter essentiam & existentiam non succurrit locus in quo de illis locutus sum; sed distinguo inter modos proprie dictos, & attributa sine quibus res, quarum sunt attributa, esse non possunt; sive inter modos rerum ipsarum, & modos cogitandi (liceat mihi hic mutare sermonem ut mentem meam melius exprimam.) Ita figura & motus sunt modi proprie dicti substantiæ corporeæ, quia idem corpus potest existere, nunc cum hac figura, nunc cum alia; nunc cum motu, nunc sine motu, quamvis ex adverso neque hæc figura, neque hic motus, possint esse sine hoc corpore; ita amor, odium, affirmatio, dubitatio, &c. sunt veri modi in mente; existentia autem, duratio, magnitudo, numerus, & universalia omnia, non mihi videntur esse modi proprie dicti, ut neque etiam in Deo justitia, misericordia, &c. Sed latiori vocabulo dicuntur attributa, sive modi cogitandi, quia intelligimus quidem alio modo rei alicujus essentiam, abstrahendo ab hoc, quod existat, vel non existat, & alio, considerando ipsam ut existentem; sed res ipsa sine existentia sua esse non potest extra nostram cogitationem, ut neque etiam sine sua duratione, vel sua magnitudine, &c. Atque ideo dico quidem figuram, & alios similes modos, distinguere proprie modaliter à substantia cujus sunt modi, sed inter alia attributa esse minorem distinctionem, quæ non nisi late usurpando nomen modi, vocari potest modalis, ut illam vocavi in fine meæ responsionis ad primas objectiones, & melius forte dicetur formalis; sed ad confusionem evitandam, in prima parte meæ Philosophiæ, articulo 60. in qua de ipsa expresse ago, illam voco distinctionem rationis (nempe rationis ratiocinatæ;) & quia nullam agnosco rationis ratiocinantis, hoc est, quæ non habeat fundamentum in rebus; (neque enim quicquam possumus cogitare absque fundamento) ideo in illo articulo verbum *ratiocinata* non addo. Nihil autem aliud mihi videtur in hac materia parere difficultatem, nisi quod non satis distinguamus res extra cogitationem nostram existentes, à rerum ideis; quæ sunt in nostra cogitatione: ita cum cogito essentiam trianguli, & existentiam ejusdem trianguli, duæ istæ cogitationes, quatenus sunt cogitationes, etiam objective sumptæ, modaliter differunt, strictè sumendo nomen modi; sed non idem est de triangulo extra cogi-

cogitationem existente, in quo manifestum mihi videtur, essentiam & existentiam nullo modo distingui; & idem est de omnibus universalibus; ut cu n dico, Petrus est homo, cogitatio quidem qua cogito Petrum, differt modaliter ab ea qua cogito hominem, sed in ipso Petro nihil aliud est esse hominem, quam esse Petrum, &c. Sic igitur pono tantum tres distinctiones; realem, quæ est inter duas substantias, modalem, & formalem, sive rationis ratiocinatæ; quæ tamen tres, si opponantur distinctioni rationis ratiocinantis, dici possunt reales, & hoc sensu, dici poterit essentia realiter distingui ab existentia; ut etiam, cum per essentiam intelligimus rem, prout est objective in intellectu, per existentiam vero rem eandem, pro ut est extra intellectum, manifestum est illa duo realiter distingui. Atque ita lites omnes Philosophicæ exinde tantum oriuntur, quod unus alium non intelligat. Da veniam quod hic discursus sit paulo intricatior; ipse tamen tabellarii discessus, nec finit me aliud addere, nisi quod sum tibi devinctissimus quod mei memoriam retineas. Vale.

EPISTOLA CXVII.

Ad Dominum Clerfeliæ.

*Leges motus explicantur. De idea quam Pagani de plurimis Diis,
& de Deo habuerunt.*

Ratio cur dicam corpus aliquod motu carens nequaquam moveri posse ab alio minore, quacunque celeritate moto, est quod secundum unam ex naturæ legibus requirantur ut corpus illud à quo alterum movetur, majorem vim habeat ad movendum, quam alterum ad resistendum: ista autem vis major non potest pendere nisi ab ejus magnitudine; etenim illud, quod est immotum, tot habet resistentiæ gradus, quot aliud, quod movetur, habet celeritatis. Cujus rei ratio est, quod si corpus illud moveatur à corpore duplo celerius moto, quam aliud quoddam, debeat ab illo accipere duplo majorem motum, sed duplo etiam magis resistit duplici illi quantitati motus. Ex. ca. corpus B non potest impellere corpus C, quin illud pari celeritate moveat, quia ipsum B movebitur postquam impulerit C. nempe si B est ad C, ut s ad 4. oportet, ut ex novem gradibus motus suppositis in B transferantur quatuor in C, ut æque celeriter moveatur atque ipsum B. Quod qui-

quidem facile fieri potest; potest enim transferre quatuor gradus & semissem (hoc est semissem totius sui motus) potius quam in aliam partem reflectatur. Verum si B sit ad C ut 4 ad 5; tum B non poterit movere C, nisi ex novem istis sui motus gradibus transferat illi quinque gradus, quod semissem totius sui motus excedit, & proinde corpus C magis resistit, quam B polleat ad agendum; quamobrem B debet reflecti in aliam partem potius quam ut C moveatur. Et certe absque hoc foret, nullum unquam corpus alterius occursum reflecteretur. Cæterum gaudeo quod prima & præcipua difficultas quam in Principiis meis reperisti, sit de regulis juxta quas corporum concurrentium motus mutatur; hinc enim colligo nihil te moratum fuisse in superioribus, aut moraturum in sequentibus, & ne has quidem regulas, modo attendas illas ab hoc uno principio pendere, nempe quod *cum duo corpora duos modos incompatibiles habentia in se mutuo incurrunt, mutationem quidem aliquam in modis istis fieri necesse sit, qua reddantur compatibiles; sed mutatio ista est minima qua possit esse, hoc est, si certa modorum istorum quantitate mutata possint fieri compatibiles, non mutabitur major illorum quantitas.* Duo autem diversi modi in motu considerandi veniunt, quorum unus est motio sola, seu celeritas; alter vero determinatio istius motionis versus certam partem, qui quidem duo modi pari difficultate mutantur. Ut ergo intelligantur quarta, quinta, & sexta regulæ, in quibus motus corporis B & quies corporis C sunt incompatibiles, advertendum est posse modos istos fieri compatibiles duobus modis, nempe *si vel B totam motus sui determinationem mutaverit, aut vero, si B mutaverit quietem corporis C, impertiendo illi talem motus sui partem, ut illud secum movere possit eadem illa celeritate, qua ipsum B movebitur.* Neque porro aliud dixi in tribus istis regulis, nisi quod, quando C majus est quam B, prior istarum mutationum locum habeat; quando vero est minus, posterior; denique quando æqualia sunt, mutatio ista fiat partim juxta priorem, partim juxta posteriorem. Quando enim C majus est, non potest B illud antrosum se impellere; nisi transtulerit in illud plus quam semissem celeritatis suæ, & simul plus quam semissem determinationis suæ, qua à dextra versus sinistram movetur, quia ista determinatio adjuncta est celeritati ejus: cum contra si B reflectatur immoto C, suam tantum determinationem totam mutet, quæ quidem mutatio minor est, quam si mutaretur plus quam semissem istius determinationis, & plus quam semissem celeritatis. Contra autem si C minus sit quam B, ab eo impellatur necesse est;



Bbb

tum

tum enim B imperit ipsi C minus quam semissem celeritatis suæ, & minus quam semissem determinationis ipsi adjunctæ, quod quidem non æquat illam totam determinationem, quam mutari necesse esset, si reflecteretur. Neque porro hoc experientia repugnat; nam per corpus motu carens, intelligo corpus quod non est in actione ad separandum superficiem suam ab ambientium corporum superficie, quodque adeo partem constituit duri alicujus corporis majoris: dixi enim alibi quando duorum corporum superficies separantur, quicquid est positivi in natura motus, non minus reperiri in illo quod vulgo quiescere dicitur, quam in eo quod dicitur moveri; postea vero explicui cur corpus aliquid in aëre suspensum possit à minima quaque vi moveri. Sed tamen fatendum est hæc regulas non carere difficultate, & illas fusius explicare conarer, si id in præsens possem; sed quia animum habeo aliis cogitationibus occupatum, alias si placet meam de hoc opinionem fusius ad te scribam. Sum tibi admodum devinctus pro victoriis quas data occasione pro me reportas, & verissima est tua solutio argumenti hujus, *Pagani habuerunt ideam plurimorum Deorum, &c.* Nam licet idea Dei sit menti humana ita impressa, ut nemo non habeat in se facultatem illum cognoscendi, tamen fieri potest ut plurimi nunquam sibi hanc ideam distincte repræsentarent; & revera ii qui putant se habere multorum Deorum ideam, nequaquam habent ideam Dei. Implicat enim contradictionem multos Deos summe perfectos concipere, ut apprime notasti; & dum antiqui plures Deos nominabant, non concipiebant plures omnipotentes, sed tantum valde potentes, supra quos unum Jovem imaginabantur ut summum, atque adeo illi uni applicabant veri Dei ideam, ipsis confuse obversantem. Vale.

EPISTOLA CXVIII.

Ad Dominum Clerfelier.

Primum principium quodnam sit? Solvitur Achilles Zenonis.

Cum sperem me profecturum propediem Parisios, factus sum paulo indiligentior in scribendo ad eos quos ibi me visurum spero. Atque ita quanquam tuas pridem acceperim, tamen putavi te non esse valde sollicitum de responsione ad quætionem quam mihi proposueras, quodnam nempe sit illud principium, quod pro primo assumi debeat; quippe

ad

ad illam jam respondisti melius, quam egomet possim. Addo tantum, vocabulum *principium*, variis sensibus sumi posse; aliudque esse quæ-
rere notionem aliquam communem, quæ tam clara sit & generalis ut
possit principii loco assumi ad probandam entium omnium, quæ postea
cognoscuntur, existentiam; aliud vero, ens aliquod quærere, cujus exi-
stentia sit nobis notior ullorum aliorum entium existentia, ita ut prin-
cipii loco apud nos esse possit ad ea cognoscenda. Priore sensu dici potest
hoc esse principium, *impossibile est idem simul esse & non esse*, atque univer-
sim posse adhiberi, non proprie ad rei cuiuspiam existentiam investi-
gandam, sed solum ad rei cognitæ veritatem huiusmodi ratiocinatione
firmandam; *impossibile est ut illud quod est, non sit. Atqui cognosco tale quid
esse; ergo impossibile est ut id non sit.* Quod certe nos parum juvat, nihiloque
doctiores efficit. Altero sensu, primum principium est, *quod anima nostra
existit*, quia nihil est cuius existentia sit nobis notior. Addo etiam, non
esse conditionem in primo principio requisitam, ut cæteræ propositi-
ones possint ad illud reduci, & ex illo probari; satis est ut possit permul-
tis reperiendis inservire, nec ullum aliud sit à quo pendeat, aut quod
ipso prius inveniri possit. Fieri enim potest ut nullum sit in mundo
principium, ad quod unum omnia reduci possint: & sane modus quo
cæteræ propositiones reducuntur ad hanc, *impossibile est idem simul esse
& non esse*, supervacaneus est, & nullius usus; cum è contra utilissimum
sit Dei primum, & deinde omnium creaturarum existentiam ex propriæ
sux existentie consideratione stabilire.

P. Mersennus scripserat ad me Dominum le Conte nonnullas in Phi-
losophiam meam objectiones formasse; sed illas nondum vidi: quæso
sciat me illas expectare, meque gratiæ ducere quod illas scribere digna-
tus fuerit.

Achilles Zenonis facile solvetur, modo attendatur si ad decimam
quantitatis alicujus partem addatur decimæ istius decima; nempe
una centesima, atque iterum una decima hujus centesimæ, nempe una
tantum millesima primæ, & sic in infinitum, omnes istas decimas simul
junctas, quanquam realiter actu infinitæ supponantur, tamen finitam
tantum quantitatem componere; unam nempe nonam partem primæ
quantitatis, quod facillime demonstrari potest. Nam ex. ca. si ex linea A B
tollatur una decima pars ad A, puta A C, & simul ex altera parte tol-
lantur octo decimæ, puta B D, restat tantum C D, æqualis lineæ A C:
Deinde iterum si ex C D tollatur una decima pars versus A, puta C E,
& ex altera parte tollantur octo ejusdem C D decimæ, puta D F, resta-



bit tantum EF, nempe una decima totius CD: & si pergas tollendo indefinite ex parte A unam decimam ejus quod antea sublatum fuerat, & octuplo magis ex altera parte, reperietur inter duas lineas ultimo ablatas semper restare una decima pars totius illius lineæ, ex qua ablata fuerint; ex qua decima iterum poterunt eodem modo auferri duæ aliæ lineæ. Sed si id supponatur factum fuisse vicibus actu infinitis, tum nihil omnino amplius restabit inter duas ultimas lineas, quæ ita ablatæ fuerint, & sic utrimque per ventum erit exacte ad punctum G, supponendo AG esse unam nonam partem totius AB, ac proinde BG esse octuplam lineæ AG. Nam quandoquidem id quod ablatum fuit ex parte B octuplum semper erat ejus quod ablatum fuit ex parte A, aggregatum sive summa omnium istarum linearum ex parte B ablatarum, quæ quidem omnes simul component lineam BG, debet esse octupla lineæ AG, quæ etiam est aggregatum earum omnium, quæ ablatæ fuerunt ex parte A: & proinde si ad lineam AC addatur decima ejus pars CE, & præterea decimæ istius decima, & sic in infinitum, omnes istæ lineæ simul junctæ component tantum lineam AG, nonam scilicet partem totius AB, ut demonstrandum assumpseram. Hoc autem prænotato si quis dicat testudinem præeuntem decem leucis equo progredienti decuplo celerius quam ipsam, nunquam posse ab illo anteverti; quia dum equus decem istas leucas conficit, testudo unam interea pervadit; & dum equus hanc leucam perficit, testudo iterum progreditur decimam unam leucæ; & sic in infinitum. Respondendum est, equum quidem haud anteversum testudinem, quandiu illa hanc leucam, hancque decimam, & $\frac{1}{100}$ & $\frac{1}{1000}$ leucæ, &c. conficiet, sed non inde sequitur equum nunquam superaturum illam, siquidem $\frac{1}{10}$ & $\frac{1}{100}$ & $\frac{1}{1000}$ &c. leucæ unius faciunt tantum $\frac{1}{10}$ leucæ; qua emensa demum incipiet equus illam antevertere. Captio autem in hoc latet, quod nona ista pars leucæ concipiatur tanquam quantitas infinita, quia nempe imaginatione dividitur in partes infinitas. Vale, &c.

E P I S T O L A CXIX.

Ad Dominum Clerfelier.

De variis locis tertia Meditationis.

NON ero hic prolixus in gratiis tibi agendis pro cura & diligentia qua effecisti ne literæ quibus ex Septentrionalibus oris cohonestatus fui, in manus meas non venirent, quippe enim sum tibi aliis nominibus tantopere addictus, habeoque alia tam multa amicitie tue argumenta, ut id mihi nequaquam novum videatur. Dicam solum illarum nullas amissas fuisse, meque decrevisse iter illud aggredi, ad quod per novissimas hæc fui invitatus, licet ab eo primum magis alienus essem, quam forsan putaris. Fastidium attulerat mihi iter illud quod Parisios ætate superiore feceram; atque inter rationes, quæ me ad hoc consilium ineundum adduxerunt, possum dicere potissimam esse, quod summopere eolam D. Chanutum, & quod ejus erga me benevolentiam habeam exploratam.

Quod ad tractatum de passionibus, haud spero illum typis mandatum iri, ante meum in Sueciam adventum; tui enim in illo recognoscendo negligentior, & iis addendis quæ illi deesse judicasti, quæque illum una tertia parte augebunt; tres enim partes continebit, quarum prima erit de passionibus in genere, atque occasione data de natura animæ, &c. secunda de sex passionibus primitivis, tertia vero de omnibus aliis.

Quantum ad difficultates quas mihi proposuisti; respondeo ad primam, quod cum esset mihi animus argumentum pro Dei existentia ducere ex idea sive cogitatione quam de illo habemus, existimavi debere me primo distinguere nostras omnes cogitationes in certa quædam genera, ut observarem quænam sint illæ quæ possunt decipere; atque ostendendo vel ipsas chimæras nullam in se habere falsitatem, illorum opinioni irem obviam, qui ratiocinationem meam repudiare possent, eo quod ideam quam de Deo habemus in numerum chimærarum referant. Habui autem necesse distinguere inter ideas quæ nobiscum natæ sunt, & eas quæ aliunde adveniunt, aut à nobis confictæ sunt, ut eorum obviam irem sententiæ, qui dicturi essent ideam Dei esse à nobis factam, aut ex iis acquisitam quæ de illo audivimus. Præterea fusc ostendi, quam incertum sit id omne quicquid est quod nobis suadent aliæ

B b b 3

quæ-

quævis ideæ, quas aliunde advenire putamus, ut probarem nullam esse, quæ quicquam æque certò demonstret, atque eam quam de Deo habemus. Denique perperam dixissem, *aliam adhuc viam se offerre*, &c. nisi repudiatis prius omnibus aliis lectorem hac ratione præparassem ad ea, quæ eram scripturus, concipienda.

2. Respondeo ad secundam, mihi quidem videri clarissimum non posse dari progressum in infinitum respectu idearum quæ in me sunt; tum quia eo in loco in quo hoc scripsi nihil adhuc ulterius in me admitto, quam quod in me esse cognoverim. Verum deinde ubi non audeo negare progressum in infinitum; rationem demum habeo operum Dei, quem infinitum esse scio, & proinde meum non est operibus ejus fines ullos præscribere.

3. Ad hæc verba, *substantiam, durationem, numerum*, &c. potuissem addere *veritatem, perfectionem, ordinem*, aliaque complura, quorum numerum definire haud facile est; & de quibus omnibus disceptari potest, sitne necesse ea à prioribus quæ nominavi distinguere, necne; veritas enim non distinguitur à *re vera*, sive *substantia*; nec perfectio à *re perfecta*, &c. Quare satis habueram ponere, *Et si qua alia sunt ejusmodi*.

4. Per infinitam substantiam intelligo substantiam perfectiones veras & reales actu infinitas & immensas habentem. Quod non est accidens notioni substantiæ superadditum, sed ipsa essentia substantiæ absolute sumpta, nullisque defectibus terminata, qui defectus ratione substantiæ accidentiæ sunt, non autem infinitas vel infinitudo. Atque observandum est me nunquam adhibere vocem *infiniti*, ad significandum tantummodo aliquid terminis carens; quod utique negativum est, quodque *indefinitum* appello; sed ad significandum reale quid incomparabiliter majus terminato quovis.

5. Dico autem notionem quam de infinito habeo priorem esse in me notionem finiti; quia hoc uno quod concipiam ens seu *id quod est*, nulla habita ratione finiti aut infiniti, infinitum est ens illud quod concipio. Verum ut concipiam ens finitum, oportet ut aliquid relinquam ex generali ista notionem entis, quam proinde priorem esse necesse est.

6. *Est inquam hac idea summe vera*, &c. veritas consistit in *esse*, falsitas vero tantum in *non esse*; ita ut idea infiniti, cum comprehendat totum esse, illud omne comprehendit, quicquid est in rebus veri, nec falsi quicquam in se habere potest, etiam si aliunde supponeretur non esse verum quod ens istud infinitum existat.

7. *Est sufficit me hoc ipsum intelligere*. Nempe sufficit me intelligere hoc ipsum

ipsum quod Deus à me non comprehendatur, ut Deum juxta rei veritatem, & qualis est intelligam; modo præterea judicem omnes in eo esse perfectiones quas clare intelligo, & insuper multo plures, quas comprehendere non possum.

8. *Quantum ad parentes, ut omnia vera sint, &c. hoc est, quamvis fortasse verum sit quicquid de iis credere solemus, nempe quod corpora nostra genuerint, nequeo tamen animum inducere quod illi me fecerint, quatenus ego me considero ut cogitans quid, quia nullam video relationem inter corpoream istam actionem per quam credo me ab illis genitum fuisse, & productionem substantiæ cogitantis.*

Omnem fraudem à defectu pendere, mihi est lumine naturali manifestum; quia ens in quo nulla est imperfectio non potest tendere in non ens, hoc est, pro fine & instituto suo habere non ens, sive non bonum, sive non verum; hac enim tria idem sunt. In omni autem fraude esse falsitatem manifestum est, falsitatemque esse aliquid non verum, & ex consequenti non ens, & non bonum. Ignosce si Latinum huic epistolæ admiscui, temporis angustia non sinunt ut verba expendam, neque aliud velim quam ut te certiore faciam me esse, &c.



A01 1462473

XXXIII

7

90



